

XISHOODKA HABLAHA IYO XANUUNKA JACAYLKA

Waxa Qoray: Cabdiraxman Maxamed Guun

Qisada buugan cusub ee lamagac baxady (Xishoodka hablaha iyo xanuunka jaceylka) waxay lamaanaysay laba qof oo aad nolosha ugu kala fogaaday. Qisadan waxay lamid tahay ama ay meelo badan uga eg tahay kuwa dhaca maalin walba balse aan da, yartu in badan u dhugyeelan.

Waxaa iswaydiinleh marka hore waa maxay sababta marar badan keenta in qof lahayste u ahaado midkale oon abtirsiimo kadhaxayn, kana awood waynayn imisaad aragteen wiil ama gabadh waqtigu kahiiliyey oo hoos jooga mid uu nasiibku la jiro iyadooy sidaa tahay wa meerto duniduyoo waxaa layidhi (aduunyooy waalaley aduunyooy waayo badan maxaad waagii baryaba wacdaro gaara leedahood uwanaagsan tay wiil midkalena waabay suniyo uwalaaqausaa dhunkaal). Hadaba jaceylka ayaa sidiisaba lagu tilmaamaa ilma aragtay u gudba unugyada dhiiga iyo xubnaha kale ee jidhka wuxuu u fidaa sida ay u fidaan laamaha geedaha cagaaran marka ay helaan biyo iyo qorax ku filan. Wuxu ka abqaalmaa ilmada ka timaada mataanka marka hore uu haleelo hadiiba aanu labadoodaba asiibin, geedkan jaceyl ayaa noqda mid qaaadha oo laamihiisa dib ula noqda haddii ay lamaanuhu isu hayn waayaan niyad saafiya ama ay wada hanan kari waayaan halganka adag ee nolosha.

Cida keliya ee ka badbaada khasaaraha iyo dhibaataada murugada badan waa kuwa garta qiimaha jaceylka iyo sida loo xanaaneeyo, waxa lamaanahaas lagu tilmaamaa in ay ka gudbeen ama utalaabeen geesta kale nolasha, kuwaas oo ah kuwa kaliya ee bulshada dhexdeeda ugu karaamada badan hadaba qiimayn iyo darasad lugu sameeyey tirada ku guulaysata ama ka adkata waayaha adag ee soo waajaha ayaa noqotay mid aad uga yar tirada lamaanaha aan usoo gudbin wareega labaad ee nolashooda kuwaas oo loogu yeedho ama noqda qaar aad dushooda ka garato sida ba an ee ay uga siibteen salaanka nolasha sidaas oo ay tahay qoladan lafti goodu waxay uqaybsamaan laba oo kala ah shaqsigii keenay kala hadhka iyodhalan dhoolka ay hadeer kusugan yihiin iyo mid lagaba yaabo inuu helo waxa inta badan bulshadu utaqaano nabsibaxa oo isagu inyar kamuuqaal

roon ka jabiyaay wacadkii dhex yiil Oo inta badan isagu isku maaweeliya heesaha jacaylka ah ee kahadla nabsiga sida(**gacaladaydaay hadaad igoso gami mayo wiilkale hadaad garabkasaartee balgudoon geeridayda gabadhyahay**)

Hadaba sida uu qabo caalim sare oo ka faalooda jaceylka wuxuna yidhi:

"Mar waxa uu jaceylku ku bilaabmaa aragtida mar qudha sidii uu abwaankuba ulahaa **(balan maaha jacaylku bandhig laysugu baaqee waa ishaa biligtaada wax bogaaga ku beerma)**

Marna wuxuuba ka dhex dhashaa laba qof oo is ag joogay muddo aad u dheer oo xataa laga yaabo in mid waliba ka kale ogaa arrimihiisa ama ahel ahaa oon loo filayn inuu kadhax dhasho jacaylku Tusaale **(hibooy inaabti haduu hilibkaygu kuguyaal ama uu habeen qudha kaa galay hunguri haka aamusine nafta baas lahadaloo haasaawi galab qudha"**,

Caalimku isagoo hadalkiisa sii wada wuxu yidhi jaceylku wuxu u baahan yahay mariin ama arad bax. In badan baa markaa isweydiisay, oo jaceyl arad baxa sidee buu odhanayaa miyuu xidhanayaa oo waa qof, balse tolow ma arki kartaan jaceyl arad baxay?

Su'aashan isagoo sii faahfaahniya ayaa wuxu yidhi: "ha moodin arad baxa jacaylku inuu yahay dhar la xidho ee waxaa jira dadka is jecel ee waliba muddo meel wada deganaa waxay mar mar u baahdaan inay isu soo xiisoodaan tiyoo aanu xiisahaasi ahayn mid marka hore cadho lagu kala tagayo balse uu yahay sida xagaagii oo kale oo loo dalxiis tago meel aan ahayn halkaad degenayd soo noqodkiina waxaad la soo guryo noqonaysaa buu yidhi idinkoo sita jaceylkiinii hore mid ka cusub oo aad moodo in uu hada bilow yahay haddaba marka aynu intaa ku dhaafno sida iyo qaabka ay jacayladu u kala baxaan waxaa iyana meesha ku jirta oo u baahan in layara dul istaagno oo aynu inyar iftiimino faa iidada jacaylka amase qiimaha ugu roon ee laga helayo shaygan isaga ah uma baahna bay ila tahay inaad mudo ka sii fakarto jawaabta su'aashan oo ah midhaha

jacaylku waa (UBAD) waxa kale oon daah inaga saarnayn in badan oo dhalinyaro ahi ogtahay maanta sida uu yahay waxa uu yahay iyo waliba qaabka ama habka looga bogsoodo marka hore, marka xiga iyo ugu dambayntaba taasoo sida laysku raacay dawadiisu tahayLamaanaha oo is hela Waxaad moodaa inynu kudheeraanay sharaxa iyo macnaha balaadhan ee uu xambaarsan yahay jacalku.

Hadaba bal aynu u soo noqono qisadeenii ahayd(xishoodka hablaha iyo xanuunka jacaylka) qisadan sida uu magaceedu muujinayo waa dareen ka dhashay laba qof oo is jecel midkood kii kalena la qaatay balse waayuhu kala fogeeyey, waqtigu kala kaxeeyey, iswaayey in badan walbahaar jaceyl iyo werwer ku noolaa. Waa qiso ka turjumaysa sida waalidku aanu mar marka qaar ama inta badan aanu u tixgelin jaceylka iyo rabitaanka ubadkiisa gaar ahaan gabdha oon lawaydiin waxa ay rabaan cida ay calmadeen balse qoorta looga galiyo nimaanay waligood is arag isku da ahayn is dooran.

Waa qiso in badan ka hadlaysa sida ugu haboon ee aad ku gaadhi karto guul marka aad rabto in aad jaceylkaagu noqdo mid waara oon wiiqmin.

Waa qiso xambaarsan inta aad ka tabayso jaceyl iyo waxa uu ka kooban yahay waxaad kala kulmi doontaa runtii meelo badan oo aan hubo in aad is odhan doonto malaha waa adiga qofkani.

Waa qiso muddo dheer laga shaqaynayey waxayna ka mid tahay Buugaagta faro ku tiriska ah ee lagu daabacay dalkeena, inkastoo jaceylku uu yahay waxa sababay in la qoro buugan haddana waxaad odhan kartaa ama u qaadan kartaa sidii cashar oo kale, waayo naftaa u baahan in wax badan ay ka ogaato macnaha erayga jaceyl. Anigoon rabin in aan wax badan idiin hordhaco haddana qisadani waxay kaga duwan tahay kuwa kale oo badan iyadoo ah mid la jaan qaadaysa waqtiga aynu joogno iyo da yarta hadeer. Waxay kubilaabmatay qisadan lamagac baxday Xanuunka jacaylka iyo xishoodka hablaha Sidan:

Subeer waa wiil madi ah oo reerkooda ugu weyn, waxayna wallaalo yihiin laba gabdhood oo hoos uga yar.

Subeer waxa uu had iyo goor dhegaystaa heesaha ka sheekeeya arrimaha caashaqa, wuxuuse si gaara u xiisayn jiray heeso ay ka mid yihiin “Baalgoray” oo ka mid ahayd heesaha jaceylka ah ee uu qaadi jiray Alla ha u naxariistee Fannaankii caanka ahaa *Axmed Mooge Liibaan*.

Subeer waa wiil gaaban, midabkiisuna waa madow dhallaal widh-widhaya, waana nin aftahan ah oo ka mid ah dadka balaqada hadalka hodanka ku ah, wuxuuna ka shaqayn jiray meherad weyn oo ganacsi ah, meheradaas oo uu Aabbihii leeyahay waxa uu aha xiisaabiye.

Subeer ma ahayn dhalinyarada ay balwada jaadku labo diblaysay, sidaa darteed maalmaha aanay shaqo u oolin waxa uu raacaa dhalinyaradda asxaabtiisa ah.

Subeer da’diisu waa dhawr iyo labaatan jir, wuxuuna noqday bulshada uu la nool yahay, gaar ahaan da’diisu nin si weyn ula falgalay.

Subeer, wuxu muddo keli nool ahaadaba, maalintii dambe ayuu isha ku dhuftay gabadh ku nool guri ka mid ah guryaha udhow meherada uu ka shaqeeyo. Gabadhaa waxa magaceeda la yidhaahdaa Salma, waxayna wax ka barataa Xarun laga barto maamulka iyo maarayanta.

Salma waa gabadh dhinaca quruxda aad loo majeertay oo uu midabkeedu yahay casaan dahabiya.

Salma ninka ama qofka quruxdeeda dheehda wuxu xusuusanayaa gabadhu uu ninka Abwaanka ahi ku sifeeyey heesta la magac baxday (Indho-deeralay) oo ay midhaheeda ka mid ahaayeen.

**Dumar ugu filrooneey,
dayax Shan iyo
tobanaay, dahab lagu
masaalaay, da’da tii
toddoba iyo toban gu’ga**

loogu darayeey, indho deeralayeey.

Salma waxay ahayd gabadh midabkeeda casaanka ahi sida tiriigga u widh-widhayo, dhinaca ooga haddii aad kor u milicsato waxay ahayd gabadh dheer oo aad qotonkeeda moodo laan hareeri ah oo qumaati u baxday.

Waxay ahayd gabadh dhismaha jidhkeedu kala baxsan yahay oo ay xubin kasta oo jidhkeeda ka mid ahi ay sideeda kuu cajabinayso, haddii ay tahay dhexda dhuuban ee taako qabatayga ah, haddii ay tahay gacmaha jalaqsan ee xaadda leh, haddii ay tahay adimada qotoma ee kubku buuxo, haddii ay sanqoorka dheer ee cawaandiga ah tahay, haddii ay tahay suniyaha isku jooga, haddii ay tahay indhaha balacsan oo aad cad caddaankooda ku indho daraandarayso timaha jileec iyo madow dhaafay oo labada garab ka kala dhacayaba, waxa ay ahayd mid xubnaha jidhkeeda qurux lagu manaystay. Salma Aabbaheed, waxa la odhan jiray Abtidoon, hooyadeedna waxa la odhan jiray Ruun, isla markaana Abtidoon wax ubad ah, wuxuu leeyahay Salma oo keliya. Hooyo Ruun markii ay Salma dhashay waxay ahayd 17 jir.

Hase yeeshee hooyo Ruun, waxa jeer dambe heshay taws xun, ka dib markii uu dhinaca bidix kaga dhuftay xannuunka faaliga loo yaqaan, waxayna noqotay bukaan jiif guriga lagu daweeyo.

Hooyo Ruun Saacad-Saacad goob dawo ama dakhtar la gaynayo mooyee, inta badan waxay jiiftaa aqalka oo waa dhul yaal.

Sidoo kale Salma Aabbaheed Xaaji Abtidoon, waxa aad u culaysiyey Xannuunka Islaantiisa oo ahayd Marwo uu jecel yahay.

Sidaa awgeed Xaaji Abtidoon, waxa mashquuliyey la tacaalida xaaladda Caafimaad ee ooridiisa Ruun iyo korinta gabadhiisa curad ee Salma, taas oo keentay inuu Xaaji Abtidoon marna ka shaqeeyo daawaynta iyo duljooga marwadiisa, marna ka shaqeeyo nolosha qoyskiisa.

Salma waxay ahayd gabadh aan mar qudha lagu qaban ama lagu arag meelo joog joog iyo dibed wareeg, waayo marka hore waxay ahayd gabadh akhlaaq wanaag iyo dhawr-sanaan shakhsi ah Eebbe ku manaystay, mar

labaadkana waxa isu barkaday hawsheeda waxbarasho iyo dhibaataada gurigooda dhextaal.

Salma ma ahayn gabadh dhalanteed ku nool sida gabdho badan caado u ah ee waxay ahayd gabadh is fiican u dareensan dhibta iyo rafaadka qoyskooda haysta. Sidaa darteed marka laga yimaado hawsha guriga ee mar walba badyaal u ah.

Salma waxay inta badan mashquul ku noqotay xanaanaynta iyo rog-rogida Hooyadeed. Sidoo kale Salma waxay ahayd gabadh mar walba u heelan ixtiraamka iyo raali gelinta Aabbaheed. Salma ma ahayn qof asxaab badan, inta badana waxay ahayd qof gooni socod ah, balse taa macnaheedu maaha inay Salma ahayd qof dabeecad xumo iyo qalafsanaan shakhsi ah looga cararay ee waxay ahayd shakhsiyad Illaahay ku manaystay dabeecad wanaagsan oo aadminimo iyo dareen naxariistu debedda ka joogto.

Hase yeeshee marka hore Salma duruufta ayaa ka dhigtay gooni socod, mar labaadkana xishood iyo dhawrsanaan ay kaga durkayso macaamilka qaarkii iyo waxyaalaha ay dhalinyaro badani xadaarada u yaqaaniin ayaa gooni socod ka dhigay, laakiin taasi kama xaaraantinimaynayso asxaabteeda ay u aragto inaanay qalin daarrin habdhaqankeeda nololeed iyo sumcadeeda shakhsiga ah.

Inkasta oo ay hooyo Ruun tawsi dhul dhigtay, hadalkuna dirqi kaga soo baxayey, haddana waxa dareenkeeda ka soo neefayey kalgacaylkii waalidnimo iyo danayntii hooyanimu, sidaa darteed, markasta oo hadal ka soo baxo waxay isku deyeysay inay gabadh dhawrsoon oo is ilaalisa ay ahaato.

Subeer, wuxu ahaa wiil lagu indhokuusho oo ay qoyskoodu aad u daneeyaan, sidaa darteed marka laga yimaado danaynta waalidkii uu u hayo, Subeer wuxuu ahaa wiil ay laba hablood oo walaalihiis ahi keligii ku dhaataan, ka dibna ay ka shaqeeyaan dhar maydhkiisa iyo baahiyihiisa kale, wuxu ahaa wiil loo kool kooliyo si aan la arrag iyadoo badanaaba uu

la wadaago xannaanaynta wiil madiya oo reerkoodu keligii leeyihiin sidoo kalena Subeer aabihii iyo hooyadii markii ay isku dhaleen saddexdaa ubada wax dambe isuma ay yeelan, carruurtooduna wakhtigan waxa ay noqdeen qaar aan uga baahnayn koriinsho oo mid waliba geestiisa ayuu masuul u yahay waxaanay dhameeyeen dugsiga sare, goortan waxay diyaar u yihiin haddii ay helaan in ay waxbarasho dibadeed galaan waxaana inta badan ku fekerta Hanna oo ah gabadha ku xigta Subeer oo iyadu ah dadka aad u jecel waxbarashada halka Subeer uu aabihii uga yahay gacan yare hawlihiisa ganacsiga, waxaanay inta badan waalidkii Subeer ku guubaanin jireen in uu guursado si raasku u noqdo mid balaadhan iyanguna u arkaan ilmo uu dhalay inankooda keliyi.

Haddaba maalin maalmaha kamida ayaa waxa kulmay Subeer iyo aabihii Dhamal, waxaana dhex martay sheekadan:

Dhamal: aabo Subeer, waxan u malaynayaa in aad gaadhay wakhtigii aad reerkan ku soo kordhin lahayd reer labaad waayo waad ogtahay waxaynu nahay raas iska dad yar mana rabo in ay tafiirteenu noqoto mid kooban, Illaahay baa hayee isla markaa aabo waxan ku tashaday in aad sida ugu dhakhsaha badan ugu geed fadhiisato gabadh gayaankaaga ah haddana waxa ila noqon wayday inaan kaliday talada goosto waxaanan doorbiday in aan kaala tashado, haddaba bal ka waran arrintan.

Subeer: "Aabo waa talo wanaagsan aniguna waan aqbalay, balse sidaad adiguba sheegtay wakhtiga aynu marano iyo waayaha maanta jira aad ayay u adag tahay in la isku keeno wiil iyo gabadh aan hore isu arag waxaanay inta badan keentaa arrintaasi in reerkaasi noqdo mid si dhib yar ku bur bura markaa aabbo haddii taladii xagiina ka soo dhammaatay aniguna aan u ahaa diyaar walow aanay wakhtigan jirin gabadh ii diyaar ahi haddana kuma rajo xumi in aan heli doono midii dookhayga noqon lahayd.

Dhamal waa oday aad u fur furan oo ka mida waalidada fara ku tiriska ah ee ubadkooda la saaxiibka ah run ahaantiina jecel in ay noqdaan kuwo dhigood iyo ku xigoonadooba dhaafa umannu arag hadalka inankiisa mid

deelqaaf ku ah ama ka hor imanaya balse wuxu u qaatay in uu yahay mid isagu marka horeba uu ka filayay maadaama aan wakhtigan da'yarta la isku keenin waxaanu ku yidhi: 'aabo waan ogahay oo way fiican tahay, aadna way u qurux badan tahay in aad soo xulato midii nolosha kula qaybsan lahayd sababtoo ah waxaynu nahay dad talo wadaag leh ee ha moodin in arrinkaygu yahay mid bir lagu gooyay waxase i dhibaysa in aad i sii agjoogto adiga oon oori lahayn, kuma necbi oo ifka adaan kuu jeclahay haddana hadu (Geerida) waa mid ina garab taagan goor ay imana Allaa og arrintanina waa mid aniga masuuliyadeedu si gaara ii saaran tahay ee aabo waxan kaa codsanayaa in aad sida ugu dhakhsaha badan iigu soo war celiso.

Intaa dabadeed Subeer aabihii waxay ku kala imanayaan ballan adag. Haddaba bal aynu eegno sida uu uga soo baxo Subeer ballantii uu la galay aabihii iyo waxa uu hayo, illeen waa inan ragge show beryahaaba waxa uu dusha ka eeganayay oo aanu marnaba daymadeeda dhaafin gabadh ay jaar yihiin oo soo marta halka uu ku yaalo dukaanka ay leeyihiin Subeeriyo.

Sidaa darteed waxa Subeer caado u noqotay inuu saacadaha ay ku soo beegan tahay jidka uu u diyaar garoobo, taas oo uu isa soo taagi jiray goob uu si fiican uga daalacan karo arageeda. Intaa waxa u dheeraatay taladii waalidkii ee ahayd in uu guursado waxaana xaalkiisu noqday meel aan rabay roob ma igu eryay, wakhtigana wiilka Subeer wuxu diyaar u yahay ama uu isku diyaariyaa sidii uu gabadhaasi ugu sheegan lahaa xaladiisa mustaqbal oo markaas isagu uu ka rabo in ay u noqoto oori.

Haddaba Subeer ma aha wiil aad ugu dhow dhow xaga dumarka waxaanu ka mid yahay dhalinyarada looga faro dhuudhuuban yahay la sheekaysiga hablaha, hadda ma aha wiil dabeecad xun ama dad la dhaqankiisu uu hooseeyo balse wuxu inta badan ku hawlan yahay hawlaha ganacsi ee reerkooda oo waabay yar tahay inta uu firaaqo yeeshaa. Laakiin hadeer la isku soo korodh, xaalku maaha sidii hore, wakhtiguna waa is beddelay waxaana gashay hawo guur oo weliba laga dhur sugayo in uu si dhakhso ah u soo xero geliyo gabadhii uu la dhisi lahaa guriga cusub iyadoo ay sidaa

tahay haddana meesha kama maqna in uu waxoogaa baqdin ahi ku jirto Subeer waayo way ku adag tahay badiyaaba dhalinyarada Subeer oo kale ah in ay si dhib yar ugu dhiibaan ama ugu gudbiyaan doonitaankooda gabadha ay wakhtigaasi la wadaagayaan sheekada, haddana waxa hore loo yidhi "dani waa seeto" oo wuu ku khasban yahay in uu u sheego si kastaba ha ugu sheegtee waxa ku soo kordhay muddadan dambe.

Subeer, marwalba wuxuu ku fekeri jiray ama naftiisa ku guubaabin jiray in uu u sheegto Salma jaceylkiisa. balse yaa siinaya wadnaha uu kula dhacayo!

Subeer, wuxuu gaaf wareego oo uu hadba geed iyo koone isa soo taagaba ku dhici waa iska daa jaceyl uu uga waramo'e, xataa wuxuu kari waayaye inuu yidhaahdo nabad ma sheegtay.

Runtii, marka aad aragto suuradda iyo san saanka dhaqan ee Salma ninkastaaba waa ka maagi lahaa la hadalkeeda, waayo waxay ahayd gabadh boqol lagala baxo, isla markaana goorta la arkaba gooni socod ah, afkeeduna xidhan yahay inta badan oo aan hadal badani ka soo baxin.

Sidaa darteed, nin waliba wuxuu is odhanayaa "waar malaha tani waa mid kibirtay oo uu inan raggba ka waashay oo loo geli waayey ee lafahaaga ha u dhiman".

Ninkii Subeer feker iyo culays adduun baa ku sii batay, wuxuuna noqday nin talo ku cadaatay, waayo habeen walba siduu u gal galanayo ee isu leeyahay Salma waa inaad aroorta u sheegto arrintaada ayaa waagu ku baryaa, haddana markuu arageedu u muuqdo ayay xiniinyuhu rooraan oo uu waxba kula dhici waayaa. Sidoo kalena reerkooda waxa ka haysta culays badan, waayo waxa laga sugayaa talo ilayn waa tii uu yidhi iga war suga'e, dabadeed, ninkii Subeer oo ay talo adduun ku cadahay oo is leh talow maxaad yeeshaa, ayaa maalintii dambe goor galab ah, waxa dukaankii ugu soo gashay gabadhii Salma oo alaab doonaysa, xiligaasi waxa uu ahaa xili ay sanqadha iyo cagta dadku aad u yar tahay waayo roob baa da'ay welina

sii tiixaya, isla markaana badhtamaha iyo hareeraha wadooyinka waxa maraya biyo daad ah oo roobkii da'ay ka kacay.

Ta kale Subeer dukaanka keligii buu joogay markaa sidaa darteed goortaasi waxay ahayd, waqtigii uu ugu firaaqo iyo fursad badnaa ee ay meel cidlo ah, isugu soo galaan isaga iyo Salma.

Subeer, isaga oo aad u dhoola cadaynaya, sina wadnuhu u ruxmayo, ayuu si macaan u yidhi: "Salma waa ku salaamay bal iska waran".

Salma intay si kooban u tidhi: "waa lagaa qaaday", ayey waydiisay wixii ay dukaanka uga baahnayd, hase yeeshee Subeer mar hore ayuu hawada ka baxay waxayna maskaxdiisa ku maqan tahay sidii uu Salma ula hadli lahaa, dabadeedna markuu alaabtii ay dukaanka uga baahnayd miiska u soo saaray ayuu isaga oo naxsan oo wadnuhu gariirayo ku tiraabay "walaal, waan kuu baahnaa ee iga raali ahaw, iina ogolaw inaad waxyar I dhegaysato".

Salma waqtigaa diyaar uma ahayn sheeko iyo hadal midna, waqtiguna wuu ku yaraa oo way deg-degsanayd, balse waxay ahayd gabadh degan, dareenkeeduna naxariis la tiicayo, sidaa awgeed, inkasta oo ay soo qadintay inaanay waqti haysan, haddana kama diidin hadalka Subeer ee uu sida edebta leh u yidhi, waxayna tidhi "Walaal maxaad iiga baahan tahay". Subeer, inta ay neefi ka soo booday ayuu si boobsiis ah u yidhi: "walaal, ma rabo inaan hadda halkan kuugu sheego wax kasta oo aan u baahanahay laakiin waxaan kaaga baahanahay inaad I siiso waqti kale oo aan si wanaagsan kuugu sharaxo wax kasta oo jira ama i xaganaya".

Salma inta uu Subeer hadlayo waxay eegaysaa dareenkiisa iyo naxwaha ay xanbaarsan yihiin weedhaha ka soo burqanayaa ka dibna markuu hadalkii ka baxay ayey gabadhii Salma si kooban u tidhi: "beri mooyee saadambe marka aan iskuulka ka imaado ayaan ku soo marayaa", intaa ka dibna way ka baxday dukaankii, iyadoo aanay hadal dambe isdhaafsan.

Subeer, galabtaa waxa dareenkiisa biyo dhigay farxad iyo rayn rayn, wuxuuna naftiisa u sheegay inuu guul weyn gaadhay, taas oo uu isku

qanciyeey inuu yahay nin soo taabtay himiladii uu hiigsanayey ee ahayd helista iyo hanashada Salma, laakiin sheekadu ma aha sida uu Subeer, naftiisa u sheegay waayo waxa meesha ka dhacay waxay ahaayeen labo weedhood oo si kooban la isu dhaafsaday natiijaduna waxay ahayd ballan oo keliya balse kuma koobnayn fekerka Subeer oo keliya ee wuxu ahaa mid dhinaca kale ku mudan Salma lafteeda waayo waxa ay qaaday ballan taasoo ay u sheegtay in ay u iman doonto maalin kadib wiil aanay hore isku arag wallow ay dhalinyarada dhaqan u tahay ballanta iyo isku imaatinka haddana Salma waxay u ahayd wakhtigii u horeeyay ee ay la ballanto wiil dhigeeda ah, taasi iyo iyada oo og ballantu waxay tahay ayaa aad uga wareeriyay maskaxdeeda run ahaantiina gurigooda oo ay markaa ku sugnayd Hooyadeed waxa aad moodaysay Salma in ay ku soo kordheen wax aad u wayn.

Waxay laba boglayso oo ay hadba dhinac isku rogto habeenimadii waxa ay baadho oo ay ka fekerto waxa ay kula ballantay wiilkan waxay qaadatay go'aan ah in ay kollay tahay gabadh filaysana in waxyaalo farabadani ay kaga yimaadaan dhinaca wiilka balse waxaanay meesha soo dhigan Salmi waxa ay ahayd waxa uu dareemayo Subeer oo ah jaceyl waxayse ka fekertay oo in badan ay rog-rogtay iyada oo aan dhinacyo badan ka eegin, in aan xaalka Subeer dhaafsiisnayn barasho guud maadaama ay ahaayeen dad in badan jiiraana balse aan dul ahaan mooye si kale isu aqoon.

Waxa xaalku sidaa ahaado oo mid waliba dhinaciisa u qaato wixii maskaxdiisa ku jiray ayaa waxa la gaadhay maalintii ballanta iyo goobtii la isugu imanayay waxa isagu goorahanba taagnaa oo dhinacyada jeedaalinayay Subeer oo ka soo horreeyay muddo soddon daqiiqo ah, waxa in yar dabadeed sheeda uga muuqday muuqaal qurux badan oo run ahaantii ka dhex mudhay intii dumar markaasi ku sugnayd waddada ay ka soo baxday waa Salma oo kollay lama muuq aha lamana midab aha inta dumar agteeda ah, Subeerna si weyn buu u yaqaanaa socodkeeda maadaama oo uu in badan dusha kaga gaaf wareegayay isaga oo aan u sheeganin dhibaataadiisa. Waxba kuma seegana muuqaalka guud iyo haybada gaar ee Illaahay ku manaysay gabadhan da'da yar.

Waxay soo laafyootaba in cabaara dabadeed waxay ag timid oo ay dhinaca kale ka soo istaagtay geedkii ay ku ballan sanaayeen iyada iyo subeer ka dibna bariido qurux badan inta ay is dhaafsadeen ayey goobtii ay isku salaameen uga wada dhaqaaqeen jihada bari oo ah halkii ay markii hore u socotay Salma, sidii aynu horeba u soo sheegnay Subeer waa wiil aftahan ah, balse cabaar dhan ayaan wax hadal ahi ka soo bixin, waayo dareenkiisa ayaa tashi ku maqnaa, isaga oo is waydiinayey, halkii uu arrintaa ka geli lahaa iyo wixii uu Salma ku odhan lahaa balse wuxuu ciftaba markii dambe ayuu si dareen leh oo ay gacaltooyo badani ka muuqato u yidhi: “walaal arrinkaan kuu doonayey anigoo kuu sheegi doona horta aan si fiican isugu kaa sheego ilayn dukaanka ayuun baad igu aragtaye, aqoon kaleba waxaa laga yaabaa inaad ii lahayne”.

Salma oo in badan ka dhur sugaysay waxa ka soo yeedhi doona afka wiilka ay maanta iskugu horrayso ayaa ugu hal celisay: “waayahay walaal”, intaa ka dibna

Subeer wuxuu faallo kooban ka bixiyey sooyaalkiisii taariikheed iyo qoyska uu ka soo jeedo. Subeer, markii uu dhameeyey iska warrankiisii ayuu hadalkiisa ku daray, “walaal adigana waan ku aqaan inaad ina Xaaji Abtidoon tahay, islaanta hooyadaana waan ogahay inay xanuunsanayso oo ay muddaba dhulyaal ahayd”. illeen waa nin in badan soo haybshay oo ka hor iyo daba wareegay halka ay ka soo jeedo gabadha uu hankiisa guudka ugala baxay Isagoo hadalkiisii sii wata, wuxu yidhi “Salmaay, maanta waxaan doonayaa inaan kuu sheego arrin aan ugub ahayn oo weligeedba lays odhan jiray, aniga oo rajaynaya inaad iga ajiibi doonto ama iga aqbali doonto”.

Subeer markii uu hadalka halkaa marrinayey ayuu waxoogaa yara aamusay sidii wax hadalku ka soo bixi waayey sidii ruux tash qabsaday oo kale, balse markii dambe ayuu si dareen leh u yidhi “walaal haddii aan hadalka soo koobo, horta hoo warqadan, waxaanan kuu sheegayaa inaan ku jecelahay, isla markaana waxaan kaa doonayaa inaad wax ila qabato.”

Warqadani waxay ahayd mid uu muddadii ay kala maqnaayeen isaga iyo Salmi uu qoray waxaanu ku qoray wixii uurkiisa ku jiray waayo waxa inta badan dhacda in aan wiilka dhalinyarada ah ama gabadha dhalinyarta ahiba ayna ku dhiiran in ay si toos ah ama foolka fool ah ugu sheegaan qofka marka arrimahan oo kale ay dhacaan inkastoo aanu Subeer waxba ka qarrin oo kelmadii dulucda hadalka ahayd uu horteeda ka sheegay haddana faah faahinta iyo xog waranka xaaladiisa wuxu ku gudbiyay qoraalka quruxda badan ee uu siiyay Salma, waxay ku jirtaa warqadu gal aad u qurux badan oo badiyaa aan wakhtigaa oolin halka ay degan yihiin.

Salma way ka qabatay warqadii, waxayna iyadoo warqadii gacanta ku haysa waydiisay Subeer, waxa warqadda ku qoran, ka dibna wuxuu u sheegay inay ka hadlayso ujeedada uu u soo bandhigay oo faahfaahsan.

Intaa dabadeed Salma ayaa waxay tidhi: "warqadda waan soo akhriyayaa, ka dibna berito hadaa ayaan jawaabta kuu soo celinayaa, waanan ka soo fekeri doonaa bal sida aan ka yeelayo arrinta aad ii soo bandhigtay".

Subeer hoosta ayuu uga riyaaday weedhaha Salma, wuxuuna si farxadi ka muuqato ku yidhi:, "waayahay wallaal" isagoo ku ladhay "waad mahad san tahay".

Ma jirto meel fadhiisi iyo dood dheer midna, hadalkana taagni ayaa la isku dhaafsaday, waayo duruufka ayaan u saamaxayn, Salmana waxay ka werwersan tahay islaantii hooyadeed oo aanay waqti badan ka maqnaan karayn ka dibna deg deg ayaa loo kala dhaqaaqay markii intaa la si dhaafday.

Salma markii ay Subeer ka dhaqaaqday gurigii bay si dhakhso ah ugu noqotay oo meelo kale kuma leex leexan, ka dibna islaantii hooyadeed ayey cabaar ku foorarsatay, oo ay u qabatay waxoogaa hawlo ah, intaa dabadeed ileen waxa ay sidataa warqad aanay ogayn waxa ku qoran oo ay rabto in ay ogaato iyada oo aan marnaba ilawsanayn daryeelka waalidnimo iyo xannaanaynta aadka ah ee ay u waday hooyadeed way u dhammaystirtay wixii hawl ah ee ay u qaban jirtay wakhtigan oo kale hooyo Ruun.

Markii ay ka soo jeedsatay hooyadeed ayay intay meel gooniya yara fadhiisatay warqaddii furtay, una faadhumaysatay akhriskeeda.

Tolow maxaa kaaga soo bixi doona, maxayse ku bilaabmayaan sadarada qoraalka warqadda u horeeyaa?

Balse inaga oo aan warqadda akhriyin hadii aynu is nidhaahno sii sheega ereyada uu qoraalka warqaddu ku bilaabmayo, taasi waxay ila tahay waa arrin dadka badidiisu aanu sii malayn karayn, mooyi qolyaha jaceylku soo maray ama hayaa inay inaga yaqaanaan weedhaha lagu aftaxo qoraalka waraaq dareen jaceyl xanbaarsan oo la isu dirayo!, basle intaynu doodda su'aasha u yara kaadsano bal aynu eegno weedhaha uu Subeer ku bilaabay warqaddii uu Salma gacanta ka saaray, wuxuuna ku bilaabay qoraalka warqaddaa sidan:

**"Inkastooy
sideedaba, safar
tahay adduunyadu,
lagu sugayo geerida,
Saaka waan ka noolahay,
Adna saatirkaan sidoo
kale samo inaad ku
waartoo,
Ku samaato baro wacan,
heedhe kuu su'aalee
Seyidaay salaan wacan,
sidriga iyo laabtaan
Sooryo kaaga soo diray,
ee sow ma fiicnid adiguna**

Intaa ka dib Salmaay, waxaan filayaa inaad ogtahay, haddii aad ogtahayna aanad dafiri karrin jiritaanka shayga ama waxaa loo yaqaan cishqiga balse haddii aan is idhaahdo tafsiiir kooban ka bixi jaceylku waxa uu yahay waxaan shakhsiyan ku micnayn karaa inuu yahay rabitaan qoto fog oo ku beerma qalbiga iyo nudaha dareenka ee qofka aadamaha ah, ka dibna qofka wax jeceli waxaa uu ku sugnaadaa had iyo goor boholyow iyo baahi nafaaniya oo uu u qabo qofka uu jecelyahay.

Markaa sidaa darteed, gacaliso waxaan shaki igaga jirin inuu naftayda haleelay dareen caashaq oo aan sahlanaayn, waxaanse kuu sheegayaa qofka aan jecelahay inuu adiga yahay, xanuunka cishqigu inuu i asiibayna waxaan ku xaqiiqsaday, arimahan.

Sida aan ku sheeko qaatay ama warka ku hayo xanuunka ama dareenka jaceylku wuxuu leeyahay ama maraa toddoba wadiiqo.

Toddobadaa wadiiqo midkastaa waa toddoba taako oo ay taako kastaa dherersan tahay toddoba talaabo waana sidan:

Eegmo aan la hilmaamin ama kugu reebta xusuus soo noq noqota oo xiiso leh. Qosol ilko caddays ah iyo weji furan, oo marba marka ka dambaysa ku sii dhowaada dunida farxadda iyo rabitaanka qofka, kuguna khasba inaadan qofka aad jeceshahay ka ag fogaan.

Bariido niyadsami xanbaarsan iyo dareen soo dhowayntu ku badan tahay oo aad qofka ku qaabisho had iyo goor.

Afti murtiyeysan iyo hadal meel mar ah oo qofka had iyo jeer weedhihiisa loo qushuuco, qofkana soo jiita marka aad rabitaankaaga u ban dhigayso. Oofinta ballanka qofku ma ilaawo, haddii uu ruuxa kale noqdo qof marwalba oofiya ballanta waxaa qofka ballanta ilaaliya lagu tilmaamaa inuu yahay qof xataa lagu aamini karo nafta aadamaha.

Gacaliso, labada wadiiqo ee hadhay waxaan kaga soo sheegi doonaa waraaqaha dambe, balse gacaliso, waxaas oo tusaale ah, ujeedada aan uga socdaa waxay

tahay in aan kuu sheego wax aan anigu dareemi karo ama uu ogaan karo qof wax jecel, haddaan kuu cadeeyana, Gacaliso waan ku jecelahay Waxanan rabaa in aad noqoto midii ila wadaagi lahayd nolosha. Gacalo, ha ila yaabin hana u qaadan waayin hana u arkin hadaladayda qaar ah mala awaal ama wax si dhib yar aan u idhi balse run ahaantii muddo badan ayaad ku jirtay qalbigayga oo aad ugu milantay sida barafku ugu milmo cadceeda waxad tahay qofka keliya ama mida keliya ee aan odhan karo ama aan idhi waa midii oori kuu noqon layd.

Salma waan ogahay oo kollay in badan ayaad ku dul fekeri doontaa qoraalkagya waxanse si naxariis leh kaaga codsanayaa in aad ku eegto il gacaltooyo qoraalka warqada taasoo aan filayo in aad iigu soo jawaabi doonto sida ugu quruxda badan." Waxay warqadani wax weyn ka beddeshay dareenka iyo mawqifka nafsaaniga ah ee Salma. Illaa labo saddex goor ayey Salma ku noq noqotay akhriska waraaqdii Subeer, waxaana dareenkeeda ku soo kordhay culays weyn, waxayna hal cabbuur ah noqotay qof dheygagsan oo meel gooni ah yuururta, balse markii dambe ayey intay warqadii iska laabtay hawshii guriga ku dhaqaaqday.

Subeer ilaa markii ay Salma kala tageen oo uu warqada gacanta ka saaray, waxa ku taagan saxar, wuxuuna isweydiinayey tolow, maxay yeeli doontaa? "Armay gaashaanka kugu dhufataa oo ay meesha wadhi kaa raacdaa" ayuu Subeer hoostaa ka lahaa.

Subeer muddadii uu sugayey jawaabta waxa u dhammaaday wer wer iyo feker adduunyo, wuxu galay xaalad aamusnaan ah, waxaana naftiisa la soo dersay cidhiidhi iyo culays badan, taas oo keentay inuu cuntadii cuni waayo oo uu galo xaalad cunto ka soomid ah.

Subeer, inkasta oo uu iswaydiinayey, tolow go'aanka Salma muxuu noqon doonaa, haddana waxa meesha taal go'aanka ay qaadatay gabadhii Salma ka dib markii ay warqada akhriday iyo siday u aragtay dhambaalkii jaceylka ee uu soo diray Subeer. Iyadooy sidaa tahay oo uu weli ka wareersan yahay Subeer waxa uu noqon doono go'aanku ayaa waxa u yeedhaya odaygii u

aabaha ahaa kuna war galinaya in ay isku raaci doonaan dalka Sacuudi Arabiya laba maalmood kadib halkaas oo ay ka soo iibin doonaan allaabooyin ganacsi oo la xidhiidha ama kamida kuwa uu ka ganacsado aabihii. Sidaa awgeed, Subeer, wuxu aabbihi u sheegay inuu maanta soo diyaar garoobo oo soo hagaajisto Baasaboor iyo wixii kale ee ka dhiman, isla gelinka dambena ay u fadhiisan doonaan xisaabta dukaanka, si ay cid kale ugu wareejiyaan.

Waqtiga uu Subeer Aabbihi la ballamay waa waqtigii uu sugayey Salma, ka dibna talo adduun ayaa ku cadaatay, waayo aabbihiina ma diidi karo, Salmana uma goyn karo, taasina waxay ku noqotay labo daran mid dooro.

Subeer, aabbihi aad buu u ixtiraami jiray weligiina hadal kumuu soo celin, sidoo kale odayguna aad buu u jeclaa wiilkiisa, Subeerna ma oggolaan jirin inuu mar qudha agtiisa ka waayo maadaama uu yahay madigii keliya ee uu wax rag ah dhalay. Waxa soo dhowaaday waqtigii ballanta, xaaladii Subeerna waxay noqotay Allaw sahal.

Salma waxay u soo baxday dhinaca Iskuulka oo ay ka maqneyd muddo laba saacaddood ah, qorshaheeduna waxa weeye in ay soo marto marka ay iskuulka ka soo gadoonto.

Salma mar hore ayey gaadhay go'aanka ay Subeer siin lahayd, balse iyadu sidii Subeer warqad kumay soo qorin ee laabta iyo maskaxda ayey ku sidataa, waxayna doonaysaa inay ugu dhijiso, iyaga oo is hor jooga oo ay afkeeda isticmaasho, balse Subeer wax war ah ma haysto, mana oga waxa ay Salma la soo guuxayso.

Waxay socotaba saacadu waxay soo gaadhay 5:15 daqiiqo ee galabnimo, taas oo ay waqtigii ballanta ka hadhay 15 daqiiqo oo qudhi, balse Subeer

iyo aabbihii waxay dhax fadhiyaan dukaanka, waxayna badhtanka kaga jiraan xisaabtii.

Subeer oo xaaladu ka qasnayd oo tiroba laba goor khalday xisaabtii, ileyn waa nin ay maskaxdiisa meel kale ku maqan tahaye, odaygii Dhamal ee Subeer aabbihiiina waa yaaban yahay oo wuxu leeyahay tolow wiilkii maxaa galabta helay, sidan muu ahaan jirine.

Waxay arrini socotaba, markii dambe ayuu Subeer intuu mar qudha istaagay ayuu yidhi: "Aabbo meel dhow baan ilaa 20 daqiiqo kaga soo noqonayaaye isii yara sug, furaha gaadhigana ii yara dhiib"

Odaygii, goorahanba wuu yaabana, wuuna arkaa inay wiilkii wax si ka yihiin, balse furihii gaadhiga ayuu u dhiibay, wuxuuna ku yidhi, "Aabbo galabta shakibaad leedahaye gaadhigana ilaali, soona dhakhso," balse Subeer ma haleelin inuu odayga u jawaabo, ka dibna intuu furihii gaadhiga deg deg odayga uga qaaday ayuu gaadhigii deg deg furaha ugu rogay, wuxuna afka saaray goobtii ballanta, cabbuur markii uu taagnaa ayay Salma u timid, kadibna waxa la is dhaafsaday salaan xiiso iyo kalgacaltooyo ka muuqato hase yeeshee markii ay isa salaameen waxa dhacday in ay qadar hal miridh gaadhaya kala aamusnaadaan sidii wax midba gooni shoog u qabsaday dabadeed Subeer ayaa ku tiraabay: "Salmaay waxay ila tahay adiga ayuu ahaa qofka ay arrintu xaggiisa jirtaa ee jawaabta laga sugayaa sidaa awgeed gacaliso soo daa wixii aad inoogu talisay."

Subeer maskaxdiisu aad ayay u shaqaynaysaa wuxuuna is leeyahay tolow maxaa kaaga iman doona waxaana haysta wal-wal badan. Salma iyadu hore ayay go'aan meel u soo dhigatay oo waa ay haysataa jawaabtii laakiin markiiba afka may kala qaadin ee cabaar ayay hoos u yara foorarstay muddadaasi waxay ahayd qadar ka yar miridh badhkii balse Subeer waxay ku sii siyaadisay culays badan wuxu hoosta ka leeyahay (malaha dayro ayey

kuu sidaa waa tan hoos u foorarsatee) dareenkiisa waxa ka muuqata firka nax iyo walbaahar saa'id ah. Salma intay qoorta kor ula soo yara kacday oo ay dhoola caddaysay ayay si degan u tidhi: "waa runtaa oo arrintu aniga ayay ila jirtay oo jawaab ayaa la iga sugayay warqadiina waan akhristay si fiicana waan u fahmay ujeedadii ay xambaarsanayd sidaa awgeed arrintii aad jawaabteeda iga sugaysay markaan dhinac walba ka eegay waan kula qaatay, laakiin waxan ka war sugayaa sida ay arrintaasi kaaga dhab tahay iyo sida aad uga soo baxdo axdigaa."

Subeer waxa ka go'day falaadh kaga taagnayd garka wadnaha waxaana ka soo booday bahal neef ah kadibna wuxu ku tiraabay "wallaal aad baad u mahadsan tahay aniguna waan ka soo baxayaa waajibkayga" intaa kadib Subeer waxa uu yidhi: "gacaliso, ina wadi aan ku yara sii dhaweeyee dabadeedna way dhaqaaqeen, wadada ay sii marayaan waxa taagan odaygii Dhamal ee Subeer aabihii oo raagsaday wiilkiisa Subeer oo leh "Waar tolow xagee buu wiilkii ku raagay" hase yeeshee Subeer waxba ma arko oo wuxu ku mashquulsan yahay gabadhii Salma oo uu waxoogaa ballan ah ka sii yara gaadhsiinayo wuxuna leeyahay: "wallaal Salmaay beri oo qudha ayaan magaalada joogaa waxaanana maqnaan doonaa ilaa labaatan cisho waayo odayga aabahay ah ayaan isku raacaynaa Sacuudiga oo aanu alaabo ka soo iibinaynaa kadibna waanu soo noqonaynaa markaa gacaliso nooli kulantee na sii sug."

Salma inkasta oo aanay warkaa ku farxin haddana jawaab diidmo ah Kama ay bixin waxayna tidhi: "waayahay waan kaa war sugayaa Illaahayna ha ku soo nabad celiyo." Subeer oo ka wer wersan odayga aabihii ee sugaya ayaa yidhi: "Wallaal odaygii aabahay ah ayaa I sugayee maca salaama" kadiba way kala dhaqaaqeen. Subeer isma laha odaygu wuu ku arkayay balse odaygu si fiican ayuu ula socday dhaqdhaqaaqa Subeer iyo inay gabadh isku maran yihiin.

Subeer intuu gaadhiga baakinka dhigay ayuu dukaanka deg deg u soo galay kadibana odaygii ayaa ku yidhi: "aabo maxaa kugu dhacay laba saacadood ayaad Iga maqnayd labaatan daqiiqo inaad iga maqnaatana waanu isku ogayn."

Subeerna wuxu ku jawaabay "aabo waxan tagay gurigeenii oo aan waraaqo ka soo qaatay."

Odaygii dhamal ayaa isna ku jawaabay: "aabo waraaquhu ma waxay ahaayeen gabadhii aad ku mashquushay ee shidhka gaadhiga kuu saarnayd." Subeer intuu naxay ayuu xagaa u soo jeedsaday oo hoos u foorarsaday balse intaanu wax hadal ahi ka soo bixin ayuu odaygii ku celiyay "aabo miyaanan mar hore kugu odhan waxba ha iga qarrin, ta kale miyaynaan isku ogeyn in aad guursato oo aanad igu odhan iga war suga, maxaa dhacay ma wixii aanu isku ogeyn wax ka duwan ayaad wadaa."

Oday Dhamal sheekadii wuu sii waday, wuxuuna yidhi: "aabe Subeerow, wiil yar baad tahaye, geel labo jir soo wada mar, markaa ma aha inaad iga qariso waxaan kula fahmayo, hadhaw-na aan iga qarsoomayn.

Dhamal hadalkii ayuu ku sii dheeraaday, wuxuuna ku cel celiyay Subeer in aanu waxba ka qarsan ee uu u sheego wax kasta oo la soo dersa, Subeer-na intuu xishood iyo ixtiraam dartii gorodda hoo u laad-laadiyey ayuu hayedaa guray.

Dhamal, wuxuu marba wiilkiisa Subeer ku tuuraa hadal yar oo sidii kaftan ah, laakiin duurxul ah waxaana ka mid ah, hadaladii uu hoosta uga dhiibayey, "Aabo gabadhu tuma ayey ahayd, waa ina ayo, xagee bay degan tahay."

Subeer oo uu xishood badani ka muuqdo balse waxoogaa sidii hore soo yara dhaamaya maadaama aanu aabihii waxba la diidanayn ayaa isaga oo hoos

u foorara wuxuu yidhi; "Aabe gabadha Salma ayaa la yidhaahdaa, waana xaafadan jaarkeena, waxaana dhalay odayga Abtidoon."

Dhamal, hadal dambe oo badan uma noqon. Wuxuuna intuu madaxa yara ruxay ku tiraabay "Waan gartay" Dhamal, wuu ka gaws qabsaday arrinta, kumana qancin gabadha aabaheed iyo qoyska uu wiilkiisu gabadha ka soo xushay, laakiin, wiilkiisa madiga ah ee uu jecel yahay ma tusayo dareen diidmo ah iyo wax niyad jab ku rida toona, hadalkiina halkaa ayey ku hakiyeen, dabadeedna Subeer iyo aabihii waxay ku kala foofeen wixii hawlo ah, ee ka dhiman maadaama ay beri wixii ka dambeeya safar gelayaan, wayna kala dhaqaaqeen.

Subeer habeenkii oo dhan hurdo fiican ma ledin, wuxuuna ka fekerayey xaalada jacayl ee ka aloosantay dareenkiisa iyo mustaqbalkiisa nololeed, isla markaana wuxu ka gam'I waayey xusuusta soo noq noqonaysa ee Salma.

Dhinaca kale Salma lafteedu waxay wehel ka dhigatay warqadii farriinta dahabka ah xambaarsanayd ee Subeer ugu dhigay waayihiisa jaceyl.

Salma may lahayn saaxiibo gabdho ah oo badan, balse gabadh Yurub la yidhaahdo oo ay jaar yihiin ayey mar mar kala tashataa arrimaheeda, welise uma ay sheegin sheekada cusub ee dhex martay iyada iyo Subeer. Yurub waxay ahayd gabadh bulshaawiyad ah, oo leh axsaab badan oo gabdho iyo wiilal-ba leh.

Salma inkasta oo ay ahayd gabadh afgaaban oo aan wax badan dadka la sheekaysan, haddana maalintii dambe ayey cabaar meel ku sheekaysteen gabadhii Yurub ee ay deriska ahaayeen, sheeko wadaagtana ay ahaayeen, ka dibna waxay u sheegtay inay sheeko ka dhexayso wiilka la yidhaahdo Subeer.

Gabadha la yidhaahdo Yurub aad bay u taqaan Subeer, waayo reerahooda ayaa deris ah, ka dibna Yurub iyada oo la yaaban warka ay Salma u sheegtay ayey ku tidhi: "walaal Salmaay miyaad igu ciyaaraysaa, mise waa ka dhab", intaanay Salma weli jawaabin ayey Yurub mar kale hadal soo tuurtay, waxayna tidhi: "sow, wixii oo qab weyni iyo is qalqaloocin ahayd waxay kaa ahayd hur iyo been, isla waynidaaduna waxay ahayd bilaa micne ma naagtaada jeclaatay yarkii aan weligay aqaanay ee aan macnaha lahayn ayaa dookh leh".

Asmi may jeclaysan dhaliisha deg degga ah iyo hadalada aan wacnayn ee ay Yurub kula dul kuftay Subeer, waxayna ugu jawaabtay "walaal Yurubeey, ninkaasi aniga ayuu dookhayga noqday ee ii daa oo yeynaan ilaa heerkaa isla gaadhin, hana ku deg degin waxyaalaha qaarkood".

Yurub markii ay aragtay jawaabta ka soo yeedhay Salma iyo sida ay u diidan tahay in wax laga sheego Subeer, ayey doodii mawduuca ku saabsanayd soo afjartay, waxayna sheekada kaga baxday "walaal Salmaay, waa adiga iyo nasiibkaa, anigu intaa waan kaala hanweynaaye".

Subeer iyo aabihii Dhamal, waxay u safreen Sucuudiga iyadoo aanay Subeer iyo Salma dib isu arag, waxayna maqnaayeen muddo bil ah.

Subeer muddada uu maqnaa marna wax xidhiidha ah lama soo samayn Salma 15 maalmood markii uu Subeer sii maqnaa, ayaa waxa dalka Jarmalka ka yimi nin ay Salma ilma-abti yihiin oo uu abtigeed dhalay ninkaa oo magaciisa la yidhaahdo Mursal, ujeedada uu Jarmalka uga soo dhoofay ee dalka uu u yimo, waxa weeye laba arrimood oo kala ah, inuu Eddadii Ruun dhakhtar debedda ah u qaado iyo inuu gabadh ka soo guursado dalkiisa, waxaana sidaa ku soo diray aabihii oo ah Ruun walaalkeed.

Mursal wuxuu ku soo degay gurigii Eddadii ee reer Xaaji Abtidoon, ka dibna waxa loo goglay qol guriga ka mid ah.

Mursal inaabtadii Salma wuxuu dalka ka tegay iyadoo 7 jir ah, maantana wuxuu u yimi iyadoo 17 ah, isla markaana si fiican u kortay oo ah gashaanti isku tumatay oo boqol lagala baxo.

Mursal waa Injineer wuxuuna shaqo wanaagsan ka hayaa dalka uu degan yahay ee Jarmalka. Mursal da'ahaan Salma wuxuu ka weyn yahay 25 sanno.

Sidaa darteed waa 42 jir, wuxuuna hore u guursaday gabadh saddex caruur ah u dhashay, balse ay is fureen labo sanno ka hore isla markaana waa maal qabeen.

Subeer iyo aabihii waxay magaalada Jidda ee dalka Sucuudiga ka soo ambabaxeen 7 cisho markii uu Mursal joogay, waxayna soo raaceen markab ay alaabi u saran tahay.

Mursal waxa uu sitaa Baasaaboar ay ugu qoran yihiin gabadhiisa iyo hooyadii, kuwaas oo uu wakhtigan u qoondeeyay in ay noqdaan Eddadii Ruun iyo inaabtadii Salma oo uu niyada ku hayey kana helay.

Mursal marku in badan fiiriyay, eegay, ka bogtay in badan oo ka mid ah hablaha deganaa Magaalada waxa uu hore u waayay gabadh qancisa waxase mar dambe niyadiisa ama qalbigiisa ku soo dhacday mar haddiiba aad gabadh guursanayso maxaa kuu diiday in aad inaabtidaadan Illaahay dhammaystiray cidina kuu diidayn aad guursato.

Mursal waxa ku adkaatay sidii uu ugu sheegi lahaa gabadha ay wallaalaha yihiin ee uu imika damacu ka galay wuxu sidii ahaadaba, oo uu gooni u faqaba waxa uu markii dambe go'aansaday inuu la tashado odaygii Abtidoon ee Eddadii qabay, ka dibna wuxuu u sheegay inuu doonayo inuu guursado gabadha Salma, wuxuuna intaa u raaciyey inuu waqtigu ku yar yahay oo uu doonayo inuu dhakhso u laabto.

Xaaji abtidoon, laftigiisu hoosta ayuu kala rabay laakiin afkiisa may ahayn gabadhayda guurso, Mursalna intii uu joogay dhowr goor ayuu Salma geeyey meelo dalxiis ah, wuxuuna u muujiyey dareen kool koolin ah, taas oo uu ku doonayey inuu dareenkeeda kasbado, laakiin Salma waxaas oo dhan may dareemin, waxayna u arkaysay inaabtigeed oo si gacalnimo ah u danaynaya.

Hase yeeshee iyadoo uu Mursal weli joogo isla markaana ay sheekadiisii guurku weli bilow tahay, ayuu ninkii Subeerna maalintii dambe soo dhacay, wuxuuna soo galay goor galab ah.

Subeer markiiba inta uu maydhay oo uu iska beddelay maryihii uu safarka ku soo galay ayuu deg deg uga soo baxay gurigii wuxuuna u dhaqaaqay dhinicii gurigii Salma, oo aan aad uga fogayn.

Subeer, inta uu yimi meel aan aad uga fogayn guriga Salma ayuu wiil yar oo deriska ah ku yidhi “walaal iigu yeedh Salma Xaaji Abtidoon”.

Salma markii uu wiilkii yaraa fariintii gaadhsiiyey ayay debadda u soo baxday waxayna isha ku dhufatay wiilkii Subeer oo meel guriga u dhow foodda ku soo haya, ka dib way u tagtay.

Hase yeeshee hadal badan kama ay gaadhsiiin karayn, sidaa awgeed, salaan kooban ka dib, waxay si deg deg ah, isugu qadimeen ballan, waxayna balameen fiidnimadii caawa, iyadoo ay goortaasi ahayd abaara 5:30-kii galabnimo.

Subeer, wuxuu Salma u sidaa hadiyad muhiima oo ka kooban alaabooyin kala nooc nooc ah waxaana Subeer dareekiisa ka muuqda boholyow badan, iyadoo muddadii bisha ahayd ee uu maqnaa ay kaga badnayd sannad.

Sidoo kale Salma lafteeda waxa dareenkeeda ka muuqda muxubo iyo xiisa badan, waxaana shucuurteeda laga akhriyeyaa inuu u yimi qof ay maqnaashihiisa tebaysay, taas oo la odhan karo, iyadana dareenka caashaqu wuu ku fogaaday.

Arrintu sida ay doonto ah ahaatee, Salma iyo Subeer goor fiid horaad ah ayey isugu yimaadeen goobtii ay ku balameen oo ah, meeshii ay weligood isugu iman jireen. Dhinaca kale, isla galabtaa waxa kulan u socdaa ninkii Mursal ee Salma inaabtigeed ahaa iyo odaygii Salma aabadeed ee Xaaji Abtidoon. Mursal wuxuu hadalkiisa ku bilaabay: "Adeer, sidii aan horeba idiinku sheegay viisaha aan sido waxa ku qoran labo qof, labadaa qof mid waa eeddo Ruun, ka kalena waxaan ugu talo galay inaan ku kaxeeyo hadba gabadhii aanu calaf guur isku yeelano iyadoo markii aan xagaa ka soo kicitimayey ku talo galkaygu ahaa in aan dalkii ka soo guursado. Haddaba, adeer, markii aan wax indho indheeyey, , nasiib wanaag waxay dookhayga iyo talodayduba ka wadi waayeen inaan guursado inaabtiday Salma, waxaan odhan karaa waa Illaaay mahadii haddii ay Eddaday Ruun iyo walaashay Salma noqdaan labada qof ee I raacaya. Markaa adeer, adiga oo aniga iyo inantaba waalid noo ah arrintaasi sideebay kula tahay, ma kula tahay inaad igu darto Salma."

Xaaji Abtidoon diidmo meesha ugama furna waayo meesha inanta lagu waydiistay waa gurigiisa, ninka inanta waydiistay waa ninkii uu Eddadii qabay, isla markaana waa ninkii Jarmal-ka uga soo dhoofay inuu Islaanta Ruun ee gabadha hooyadeed ah daaweyn ugu qaado Jarmalka.

Qolka xiligaa la fadhiyaana waa qolkii ay Ruun jiftay, sidaa awgeed waxa keliye ee Xaaji Abtidoon u banaani waxa weeye inuu yidhaahdo waayahay gabadhii waan ku siiyey.

Ka dibna Xaaji Abtidoon intuu cabaar aamusay ayuu ku tiraabay: "horta Mursalow inankaygii baad tahay, waadna ogtahay aniga iyo Eddadaa Ruun inaanu wax ubad ah dhalay Salma oo qudha. Soomaalidaa waxay tidhaahdaa Geyaan ahaan ilmaabtigaa isugu xaq badan ama waxaaba inoo dhaqan ahaan jirtay inay ilmaambtigu is guursadaan. Markaa waxba yaan hadalku ila dheeraane gabadhii inaabtidaa waan ku siiyey, waanan kuu meherinayaa".

Dabadeed Mursal inuu soo kacay ayuu odaygii Xaaji Abtidoon gacan qaaday, kuna yidhi: "adeer waad mahadsan tahay ee gudoon wacan."

Xiligaasi waa goor fiid horaad ah, Subeer iyo Salmana waxa u socota sheeko, waxayna fadhiyaan geed ku yaal hudheel ay ka cashaynayaan hoostiisa.

Subeer iyo Salma waxa hadheeyey dareen muxubo oo uu midba midka kale aad u xiisaynayo, isla markaana waqtigan xaadirka ah dareenka caashaqu keli kuma aha dhinaca Subeer ee waxa labadoodaba sida caleemaha geeka u ruxaysa saxansaxo cishqi iyo quluubtooda biyo dhigtay. Waxayan xiligaa si xiiso leh u gorfaynayaan sidii ay uga midho dhalin lahaayeen hiyigooda jacayl iyo sidii ay ugu gogol xaadhi lahaayeen aayahooda mustaqbal.

Subeer iyo Salma waxay sheekada sii macaan sadaanba waxay saacaddu gaadhay 8:00 habeenimo, ka dibna Salma oo ka wer-wersan gurigoodii iyo islaantii hooyadeed ee xanuunsanaysay ayaa codsatay inay sheekadu caawa halkaa ku joogsato, dabadeedna Subeer intuu Salma albaabka gurigooda keeno ayay is macasalaamaynayaan. Gabadhii Salma waxay markiiba deg deg u gashay gurigii, iyadoo ay aabaheed Xaaji Abtidoon iyo inabtigeed Mursal xaajo meel isla dhigeen oo ay iyada sugayaan, taas oo ay doonayaan inay arrinta ku wargeliyaan.

Salma waxay guriga soo gashay, iyadoo aad u faraxsan oo ay Subeer sheeko fiican isla soo qaateen.

Sidoo kale Subeer wuxuu gurigoodii dib ugu noqday isagoo aad u niyad wanaagsan, wuxuuna la kulmay aabihii, oo uu sheegay inuu soo helay gabadhii uu guursan lahaa oo ay tahay Salma Xaaji Abtidoon, ka dibna odaygu inkasta oo aanay arrinta aad uga wada hadlin, haddana wiilkiisa ma tusin dareen diidmo wuxuuna ku yidhi: "aabo ma xuma'e aynu ka tashanno", Subeerna wuxuu aabihii ugu jawaabay: "waayahay aabo".

Gabadhii Salma markii ay cabaar gurigii joogtay ayuu odaygii aabaheed oo la fadhiya inaabtigeed Mursal u yeedhay wuxuuna ku yidhi: “aabo halkan soo yara fadhiiso arrin yar baan kuu sheegayaaye”, dabadeedna waxay soo fadhiisatay meel odayga u dhow, ka dibna odaygii aabaheed ayaa hadalkii bilaabay, wuxuuna yidhi: “aabo waxaan ku siiyey inaabtigaa Mursal, wiig ka baccina adiga iyo hooyadaaba waxaad u dhoofaysaan dalka Jarmalka oo waxa idin kaxaynaya Mursal, markaa aabo waan isugu kiin ducaynayaa adiga iyo ina’abtigaa, Illaahayna khayr ha idiin kala siiyo”.

Gabadhii Salma markii aabaheed ku wargeliyey inuu inaabtigeed Mursal siiyey, iyada iyo hooyadeedna Jarmalka loo kaxaynayo talo way ku ciirtay oo si ay yeesho way garan wayday, waayo markii hore waxay ahayd qof Illaahay akhlaaq wanaagsan iyo adeec waalidnimo ku manaystay, sidaa awgeed aabaheed diiday kuma odhan karto.

Ta labaad hooyadeed oo liidata oo dhulyaal ah, oo aan cid iyo ciirsi kala lahayn oo dal shisheeye loo qaadayo kama hadhi karto.

Dhinaca kalena waxa ku mudan falaadhii caashaq ee uu garka wadne kaga taagay Subeer iyo axdigii ma dhaafaanka ahaa ee ay la gashay Subeer.

Sidaa awgeed xaaladeedu waxay gashay labo dhagax dhexdood iyo meel cidhiidhiya, waxayna arrinteedu noqotay,

“Hadal waalid ma diidi karo

habaar adag buu dhalaa,

hayeeshee ma yeeli karo,

jacaylkuna way hayaa,

haddii arrin igu habsaday,

xageen talo kaga

hagaagaa?!

Gabadhii Salma, waxay feker la ceeryoontaba waxay aakhirii talo kaga ururtay inay arrinta kala tashato hooyadeed. Salma waxay soo dul fadhiisatay hooyadeed Ruun oo uu hadalkuba dirqi ku yahay.

Hooyo Ruun hore ayaa sheekada loola socodsiiyey oo way ogtahay, isla markaana odayga ayaa talo ka waydiiyey, wayna aqbashay. Salma, iyadoo ay indhanaha ilmo ka hibitiqaysa ayey dul kadaloobsatay hooyadeed, ka dibna intii aan Salma hadal ka soo bixin ayey islaantii tidhi: "hooyo maxaa kugu dhacay ee aad la ooyaysaa", ka dibna Salma deg deg hooyadeed uguma jawaabin ee cabaar ayey oohintii ku sii negaatay, balse wax yar ka dib ayey u bandhigtay sida wax u jiraan oo ay uga warantay xaaladeedii hore iyo arrinta cusub ee dhinaca aabaheed kaga soo korodhay.

Waxayna hadalkeeda ku soo gebo gebaysay: "hooyo arrintayda maxaad kaga talin lahayd." Salma halkii ay ka eegaysay garowshiiyo iyo in ay ka arragti duwan tahay odayga Aabaheed ayaa Hooyadeed waxay u soo qadintay "hooyo arrintaada waanu wada go'aaminay aniga iyo aabahaa, sidaa ayaanuna kuugu talinay, oo ay dantaada iyo dantayduba ku jirtaa". Salma diidmo daayoo maxaa tidhi, kuma soo celin karto hooyadeed oo dhulyaal ah oo ay weedhahaasi dirqi kaga soo baxeen.

Sidaa awgeed, ma jirto wax kale oo ay yeeshaa, waxaynse ciirsatay oohin iyo muraara dilaac, waxayna habeenkii ku dhamaysatay feker iyo oohin, balse waxay go'aansatay inay Subeer uga waranto arrinta soo korodhay iyo halka ay xaaladi marayso.

Habeenkaa inkasta oo ay Salma oohin iyo labo boglayn ku dhamaysatay, Subeer wuxuu ku dhamaystay farxad iyo rayrayn, waayo xaaladiisu waxay ka dhigan tahay nin himiladiisii si kama damabays ah u gaadhay, reerkoodana wuu ugu bushaareeyey arrinta, dhinaca kalena gabdhihii ay

Subeer walaalaha ahaayeen waxay isla habeenkaa go'aansadeen inay laga bilaabi berito ku dhaqaaqaan hawshii uu diyaargarowga aqal galka Subeer.

Sidaa darteed, waxay habeenkaa u ballameen in berito guriga laga bilaabo hawl qurqurxin ah, oo la mariyo rinji iyo nuurad, ka dibna laga beddelo gogosha baaliga ah oo lagu xidho gogol cusub.

Reer Dhamal, oday, Islaan iyo gabdhoba waxay talo ku gaadheen in aanu wiilkooda madiga ah ee indhaha u ahi aanu ka fogaan, ee uu guriga ay degan yihiin wax ka dego oo qayb loo banneeyo.

Salma waxay habeenkii oo dhan labo bog laysaba hirtii waaberi oo ahayd abaaro lixdii subaxnimo ayey ka soo kalahday aqalkoodii si ay Subeer u gaadhsiiso arrinta ku soo korodhay ka dibna intay gurigii Subeer reerkooda is agtaagtay ayey u yeedhay gabadh yar oo ay Subeer walaalo yihiin, waxayna ku tidhi: "walaal Subeer iigu yeedh", ka dibna gabadhii yarayd intay Subeer ku garaacday qolkii uu hurday ayey u sheegtay inay gabadhi doonayso oo ay banaanka u taagan tahay.

Subeer waa maalintii ugu horaysay ee ay gurigooda hortimaado gabadh doonaysa tan iyo intii uu garaadsaday, ka dibna isaga oo hoosta iska waydiinaya "talow, waa ayo gabadha saaka ku doonaysaa ee weliba soo jarmaaday" ayuu debedda u soo baxay si uu ugu tago gabadha doonaysaa.

Markii uu Subeer guriga debedda uga baxay ayaa gabadhii ugu waynayd hablaha

Subeer walaalihii, waxay tii yarayd ee Subeer toosisay ku tidhi: "yaa u yeedhay Subeer, xagee buu qabtay" cunugta yar waxa la yidhaahdaa Hoodo, waa 10 jir, waana qof caqli badan, waxayna walaasheed u sheegtay inuu Subeer u tegay gabadh doonaysa, oo guriga dhiniciisa taagan.

Subeer markuu arkay inay gabadha doonaysa tahay Salma aad buu ula yaabay, waxaana intii yarayd ee uu ku sii socday maskaxdiisa ku soo dhacayey boqol wax iyo boqol arrimood, wuxuuna hoos isu waydiinayey “tolow, Salma ma reerkiibay islaayeen oo waxa lagu maagay xalay xagee baad qabatay, mise Islaantii hooyadeed ee buktay ayaa geeriyootay, caje!! Tolow, maxaa dhacay oo Salma soo kallihiyey”.

Subeer markii uu Salma isla soo taagay, wuxuu ka codsaday inay guriga u raacdo oo ay qolkiisa wax isku waydiiyaan balse way diiday inay guriga u raacdo oo ay qolkiisa wax isku waydiiyaan ka dibna waxay si deg deg ah ugu soo qadintay ujeedadii ay u socotay, iyadoo uga warantay arrintii ku soo korodhay iyo sidii ay wax u dhaceen iyo halka ay xaajo maayso, isla markaana waxay Salma hadlkeeda ku soo khatintay inay arrintu marayso meel aanay waxba ka qaban karrin, waayo kama hadhi karto hooyadeed oo dhulyaal ah oo aan cid iyo ciirsi kale lahayn, umana badheedhi karto inkaarta labadeeda waalid ee aan iyada mooyee ubad kale ifka u joogin.

Subeer waxay arrintu, ku noqotay war dhiilo leh, wuxuuna galay jawi murugo leh iyo xaalad walbahaar leh.

Salma markii ay sheekadii Subeer uga dhacday, iyada oo aan hadalkii weli ka bixin ayey Subeer u sheegtay inay deg deg u noqonayso, iyadoo ka cudur daaratay inaanay hadda diyaar u ahayn hadal waqti badan qaata, taas oo ay sheegtay inay ka baqayso in gurigii laga tabo, waxay markaa hadalkeeda ku soo afjartay “walaal intani war gelin ayuun bay iga ahayde, waa inoo galabta iyo halkii aynu isugu iman jirnay”.

Dabadeed Subeer ma gelin wax hadal ah wuxuuna si murugo leh u yidhi “waayahay walaal waa inoo shanta galabnimo iyo goobteenii”, ka dibna waa la kala dhaqaaqay ninkii Subeer isaga oo cago jiid ah ayuu gurigii dib ugu noqday, ka dibna intuu maqsinkiisii galay ayuu hosta ka xidhay, wuxuuna

isku dul tuuray sariirtiisii dabadeedna wuxuu cabaar dhegaystay hees jacayl
ah oo ay midheheeda ka mid
yihiin

Cakuye hawl adduun badanaa

ma cidla ciirsilaan fadhiyaa cir
kaa dheer dhul kaa dheer
caways ma kuu dudaa way
igu ciirsantee taladu cayn
wareegsatee aniga
culaysbaa I saarane allow
ciilka iga bixi callool
xumaadayoo xalay baa
gogoshu I cuntoo cartamee
sidaan u cadibnaa baa
cadceedu soo baxdee ma
hayo carfigii qalbigoo ma
hayo indhihii aragoo
nin caydh ahi weligii
ceeb kama fogaadee
caaway u darantee
xaggee baan cuskadaa

Run ahaantii Subeer markii uu heestaa dhegaystay waxa ku sii siyaaday
walbahaarkii haystay, waxaana damqaday nabaro hor leh. Subeer, waxa la
soo gudboonaatay sheeko dhiilo leh, waxayna xaaladiisu gaadhay meel aan
laga sheekayn karayn, wuxuuna hoosta ka xidhay qolkii uu seexan jiray oo
xataa uma soo kicin quraac.

Goor dambe oo ay saacadu ku dhowdahay abaaro 12-kii duhurnimo ayey
gabdhii Subeer walaalihii is waydiiyeen sababta uu Subeer saacadan la

jiifo, oo way yaabeen, ka dibna gabadh ka mid ah habilihii walaalihii ayaa Subeer albaabka ku garaacday, ka dibna wuu ka furay, waxayna waydiisay “walaal maxaa kugu dhacay ee aad waqtigan la jiiftaa, miyaad xanuunsanaysaa”.

Subeer wuxuu walaashii ugu jawaabay “walaal waxoogaa xanuun ah ayaa i haya, markaa idaaya waan iska jiifayaaye”.

Waxaa u cunto ah oo uu ku habayaa halbawlayaasha wadnahiisa ee hibanaya waxaanay helayn heesaha ay qaadaan qaar ka mida fannaaniintu kuwaas oo aan odhan karno waxay ka mid yihiin dhaawac tirida ama dhaymaha nabarada amase dakharada uu jaceylku gaadhsiiyo qof, xilligana waxa u baxaysa heestan:-

hadaan aawadaa hibooy, naftaydii
hanqaarantoo, hawaawiga
caashaq, iyo hammiga igu sii
kordhaan, armaad hodadaamadii
haween, weligii lahaa hadhowto la
soo baxdaa, heshiishkaba
daadisa, intaan hawshaasi dhicin,
xagee arrinkeenu noqon, bal aan
hadalkaba jaree, maxaa adi kula
haboon

Hadaan aawadaa hibooy, naftaydii hanqaarantoo, hawaawiga caashaq, iyo hammiga igu sii kordhaan, armaad hodadaamadii haween, weligii lahaa hadhowto la soo baxdaa, heshiishkaba daadisa, intaan hawshaasi dhicin, xagee arrinkeenu noqon, bal aan hadalkaba jaree, maxaa adki kula haboon.

Gabadhii ayaa haddana Subeer u celisay “walaal cunto ma ku siinaa”, wuxuuna ugu jawaybay “walaal waxba ma cuni karayo ee fadlan i daaya oo mar dambe ha i kicinina”.

Subeer wuxuu galay xaalad adag, waxayna culimada jecaylku, taas oo kale ku tilmaantaa mid ka mid ah mar xaladaha ugu adag geedi socodka ama meertada waayaha jacaylka.

Marka la eego duruufka meesha taal ee dhinacyada badan, arrinta soo korodhay waxay u muuqataa arrin aanay Subeer iyo Salma ra’yi ka dhiiban karrin halka talada la marrinayo iyo halka ay sheekadu ku dhamaanayso.

Subeer, wuxuu jiifaaba waxa la gaadhay xilligii ay ballameen balse ballantu way ka duwan tahay balamihii hore, waayo balamihii hore waxa meesha yiilay niyad wanaag iyo fir-fircooni, balse hadda waxa dareenka labada qofba ka muuqda niyad xumo iyo cago jiid.

Weliba saacadihii ay kala maqnaayeen waxa soo korodhay sheeko hor leh, taasoo ah in gabadhii Salma farta laga saaray waqtiga kama dambaysta ah ee ay dhoofayaan, waxaana loo sheegay inay baqoolayaan, lix cisho ka dib.

Markii ay xiligii ballanta gaadhay ayey Salma timi goobtii ballanta, balse Subeer ilaa rubuc saac ayuu xiligii ballanta dib uga dhacay oo goor dambe ayuu yimi, isaga oo cago jiid ah.

Subeer, waa madluun oo gabal-baas baa u dhacay, sidoo kale Salma tiiraanyo iyo walbahaar ayeyba la il daran tahay, waxayna aad uga werwersan tahay xaaladda uu ku dambayn doono wehelkeedii ay dunida caashaqa ku mataanoobeen.

Subeer iyo Salma markii ay isu yimaadeen waxay Salma ku dadaashay sidii ay Subeer u dejin lahayd dareenkiisa, uguna caqli celin lahayd, waxaana hadaladeeda ka mid ahaa “walaal waan ogahay inaan anigu ahay qofka aad u dhibaatoonayso ee ku badday tiiraanyada iyo murugada naftaada haysata, balse waxaan kuu ballan qaadayaa inaan oori u noqon doonin nin aan adiga ahayn ee sidaa naftaada u sheeg, ogowna qofka keliya ee aan adduunka ka eeganayaa inuu adiga yahay.

Subeer markuu cabaar yara aamusnaa ayuu goor dambe ku tiraabay: “Salmaay gacalo adigu eeda ma lihid ee waxaa iska leh indhahayga ku soo arkooday iyo qalbigeyga ku ogolaaday, gacalo eeda waxaa leh, wadnahayga kuu ruxmaya, dareenka jidhkayga ee kuu dubaaxinaya iyo rabitaanka naftayda ee keligaa kuu noqday maxbuus”.

Subeer, wuxuu intaa ku daray “Salmaay gacalo, ilaa aan ku helo xaaladaydu sida aan imika ahay waxba iska beddeli mayso walbahaarka iyo tiiraanyaduna igama baxayaan”.

Subeer, markii ay erayadaasi afkiisa ka soo baxeen, Salma waxa indhaheeda ka soo qubtay dhibco biyo ah oo hoos u dareeray, laabteedana qooyey, waxaana xusuusteeda ku soo dhacay heesta ay erayadeeda ka mid yihiin.

Hadaan laysu dhimanayn,
Nafta laysu dhiibayn,
sow maaha dhalanteed
caashaqa dhexdeen
yaal

Subeer, wuxuu sii waday hadalkii wuxuuna yidhi “Salmaay, gacalo xaaladaha adduunyadu waa iska caynkaa, wax walibana way dhici karaan, mana aha wax lala yaabo inaynu kala fogaano”.

Weedhahani maaha kuwo uu Subeer si niyad ah u leeyahay ee waa ku afgaboodsanayaa, wuxuuna isleeyahay isku day inaad nafta qanciso, balse culayska dareenkiisa saarani ma ogola af gobaadsi iyo sasabo.

Salma, waqtigan xaadirka ah, dheeliga jacaylku xageeduu jiraa oo boholyowga iyo wer werkuba aad buu ugu weyn yahay dareenkeeda, waxaana saaran culays aan qiyaas lahayn, talana way ku caddahay xaaladeeduna waxay ka dhigan tahay “aabahaa iyo hooyadaa, iyamaa la cadaabaa”.Hase yeeshee Salma, waxay inta badan ku mashquulsan tahay sidii ay Subeer u dejin lahayd walow uu iyadaba caabuqa jacaylku sida dhibco roob ugu qubanayo oo ay talo iyo taagba u baahan tahay.

Subeer iyo Salma halkii ay shantii galabnimo istaageen waxay ku gadheen 8:00 fiidnimo, iyaga oo aan is ogayn, ka dibna markii ay arkeen inay goor dambe tahay ayey cabaar isku dul ooyeen, wayna kala dhaqaaqeen, iyada oo ay dib u ballameen berito gelinka dambe.

Salma markii ay cabaar sii socotay ayuu Subeer ka dabo dhawaaqay, wuxuuna ka codsaday inay habeen dambe hal sawir wada galaan oo haddii ay kala ragaan xusuus u noqda.

Salma intay soo joogsatay ayey ugu jawaabtay: “waayahay walaal, mid iyo lababa waan ogolahay inaynu wada galno”.

Subeer, intii ay Salma la joogtay wuxuu dareemay waxoogaa xumad jebin ah. Dabadeedna isaga oo ay diiftii ka muuqato ayuu soo gelayaa gurigii oo uu aabihii

Dhamal joogo, ka dibna odaygii aabihii ayaa yidhi: “wiilkaygiiyow maalmahan maxaa kugu dhacay diif baa kaa muuqata’e, ma hawadaad la qabsan wayday oo muddadii aynu debedda ku maqnayn ayaad ilowday

hawadeenii, mise safkan xannuunka ah ee magaalada ku jira ayaa ku haleelay”.

Subeer oo culayska dareenkiisa saaran awgii aan hadliba karayn ayaa aabihii ugu jawaabay: “aabo magaranayo wax igu dhacay, balse culays baa I saaran, jidhka oo dhamina wuu idamqanayaa”.

Subeer aabihii waa nin beer jilicsan oo carruur jecel, Subeerna waa madiga keliya ee uu ragba dhalay, aadna u jecelyahay sidaa darteed wuxu markiiba ku yidhi: “aabo mar haddii uu xaalkaagu sidaa yahay ina dhaqaaji aan dhakhtar ku geeyee” ka dibna way israaceen waxayna u tageen nin dhakhtar ah, wuxuna Dhamal ninkii dhakhtarka ahaa ku yidhi: “dhakhtar wiilkani anigaa dhalay oo wuu xanuunsanayaa ee bal xanuunkiisa noo baadh, dawona noogu qor”.

Dabadeed ninkii dhakhtarka ahaa ayaa Subeer waydiiyey sida loo hayo, wuxuna Subeer ku jawaabay “jidhka oo dhan baa I damqanaya, mana jirto meel gaar ah oo I xanuunaysaa”.

Dhakhtarkii ayaa haddana su’aalay: “habeenkii hurdada ma seexataa, cuntadase ma cuntaa?”, Subeer, wuxuu ku jawaabay “walaahi, muddo ilaa labo wiig ku dhow, hurdo hagaagsana ma seexan, cunto hagaagsana ma cunin”.

Dhakhtarkii, wuxuu Subeer u diray baadhitaano dhiigga ah, wuxuuna u qoray dawooyin fiitamiino u badan, isla markaana wuxu kula ballamay inuu jawaabta badhitaanka dhakhso ugu keeno.

Oday Dhamal oo isu dhegaysanaya wiilkiisa Subeer iyo dhakhtarkii uu u geeyey ayaa dareemay in uu wiilkiisu ku jiro xaalad xun taas oo uu arkay diifta oogadiisa ka muuqata ka dibna oday Dhamal wuxuu isku qanciyeey in

uu wiilkiisu u bahaan yahay baan, waayo Subeer wuxuu u muuqday qof muddo dheer buhay.

Markii ay oday Dhamal iyo wiilkiisii Subeer dhakhtarkii ka soo noqdeen wuxuu odaygu u leexday dinicii meheradda, Subeerna dhinicii guriga ayuu qabtay.

Oday Dhamal markii uu meheradii ka yimi ayuu u soo galay Subeer oo qolkiisii jiifa, dabadeedna intuu soo dulfadhiistay ayuu waydiiyey dhawr su'aalood, waxaana su'aalaha ka mid ahaa "aabo meeday inantii ina Xaaji Abtidoon ee aad hore iigu sheegtay inaad rabto inaad guursato".

Odaygu, hadalkiisa wuu sii watay, wuxuu yidhi "aabo adiga iyo gabadhaa maxay arrintiinu ku dambaysay, ilayn adiga ayuun baan kaa warsugayey oo aniga xagayga wax walbi waa iga diyaar".

Subeer, hadalka uu aabihii su'aalay wuxuu ku noqday dhimbil dab ah oo laabta xawda ka saaran, waxaana dambqaday nabar awelba kaarayey, dabadeedna markii uu cabaar aamusnaa ee uu waxoogaa fekerayey ayuu markii dambe Subeer go'aansaday inuu aabihii uga waramo halka uu xaalkiisu marayo iyo sida ay kaaf iyo kala dheeri u tahay rabitaankiisa lagama noqdaanka ah iyo sida ay u kala fogaanayaan mataantiisii uu cal-maday, iyadoo aanu dareenka Subeer inuu Salma helo mooyaane wax kala ku qancayn.

Ka dibna Subeer sheekadii ayuu uga dhacay aabihii, uguna waramay xaaladiisa. Oday Dhamal, markii uu dhegaystay hadalkii wiilkiisa, wuxuu ugu jawaabay "aabo anigu markii horeba kulamaan doonayn gabadhaas, waayo waa gabadh hooyadeed keligeed dhashay, marka aad gabadh sidaas oo kale ah guursatana waa inaad hooyadeedna la soo guursataa, markaa aabo hadii ay gabadha xageedii ka suuroobi wayday dhibtaato ma laha oo gabadh kaleba waad iska guursan".

Oday Dhamal hadalkisii ayuu sii watay, wuxuuna yidhi: “aabo waxaan ku xusuusinayaa, miyaadan ogayn muddo hadda laga joogo 20 sanno inay gabadhaa reerkooda iyo reerkeenii is-dileen oo ay ku kala dhinteen ilaa labaatan nin, markaa markii aad i tidhi ina Xaaji Abtidoon baan doonayaa meel baa i xanuuntay oo waxaan is lahaa armay wiilkaaga madiga ah kaa galaafataa, iminkana markii aad i tidhi xageeda ayey ka suuro geliwayday meel i xanuunaysay baa i qabowday”.

Subeer, oo u qaadan waayey halka ay aabihii arrini ka joogto ayaa yidhi: “aniga iyo Salma waxaanu nahay labo qof oo is jecel, markaa jacaylka aniga iyo Salma maxaa ku xidhiidhiyey reeraha is dilay, waayo Salma, iyana ima xumayn aniguna maan xumayn, markaa aabo miyaadan arrinkaa ku khaldanayn”.

Sida la ogyahay waxa dhaqankeenii hore ku jiri jirtay in marka uu wiilku guurdoonka yahay had iyo goor laga duuli jiray halku dhega ah “wiilkaaga abti u yeel”, taas oo macnaheedu yahay inuu wiilka guurdoonka ahi meel dheer u doolaalo tegi jiray, balse waayaadan dambe waxa jirta in uu guurkii noqday sheeko xaafadaha isku dhaw ku wareegaalaysata, taas oo ay wiilka iyo abtigii isku xaafad noqdeen runtiina karaamadii dhinaca dhaqanka ee guurka iyo mil-gihii xidid-nimada iyo weliba is dhexgalkii bulshada dhaawac weyn bay u geysatay, iyadoo ay taasi dhaqan ahaan ku qurux badan tahay inuu wiilka guurdoonka ahi meel fog u doolaalo tago si loo soo celiyo xidhiidhkii dhaqan hido is dhexgalkii dadka.

Subeer, wuxuu habeenkii oo dhan baaxaadegoba subixii ayuu waxoogaa quraac ah yara taataabtay. Subeer wuxuu si xad dhaaf ah, isaga dabariday Salma, taas oo keentay inuu xataa habeenkii ku hadro. Ogow Subeer iyo Salma galabnimada ayey ballan leeyihiin, markaa mid waliba dhiniciisa ayuu ballantii uga diyaargaroobayaan.

Hase yeeshee oday Dhamal ayaa duhurnimadii la kulmaya wiilkiisii Subeer, wuxuuna kala hadlayaa arrinta gabadhaa oo uu u shegay inuu iska ilaawo gabadhaa iyo doonisteeda, Dhamal wuxuu wiilkiisa Subeer ku yidhi: "aabo gabadhaa ina Xaaji abtidoon iska ilaw oo soo doon doono gabadh alaale gabadha aad doonto, aniguna gabadhii kale ee aad soo xulato ayaan wax kaala qabanayaa".

Dabadeed Subeer wuxuu aabihii ugu jawaabay: "aabo, anigu waqtigan uma taag hayo dhibaato kale, sidaa darteed mar haddii aan Salma waayey, waxaan go'aansaday inaan waqtigan xaadirka ah iska dhaafo dumar iyo dhibtooda".

Odaygii Dhamal, wuxuu aad ula yaabay go'aanka deg degga ah ee uu Subeer gaadhay, wuxuuna yidhi: "wiilkaygiiyow guurkaaga ama jacaylkaagu ma aha inuu adiga oo keliya ku raaligelinayo balse waa wax aanu wax ku leenahay haddii aanu nahay reer Dhamal oo dhan, waayo waa baahi nahaysa oo aanu aad u danayno". Oday Dhamal hadalkiisa wuu sii watay wuxuuna yidhi: "Aabbo, in lagu danaynayo waxa daliil u ah bal eeg gabdhaha aad walaalaha tihiin oo dhami waxay heegan u yihiin inay ku dhisaan, aabo, toddoba cisho ka hor gurigeenu wuxuu ahaa meel farxad weyni ka muuqato, waayo waxa diyaar loo ahaa xafladii arooskaaga, iminkana waxaad moodaa in tacsii loo fadhiya oo dadkii oo dhan waxa ka muuqata murugo, markaa taasi waxay muujinaysaa inaad tahay waslad naga mid ah, oo aanu farxadda iyo murugadaba kula wadaagayno.

Ta kale aabo, anigu waalid ahaan ma doonayo inaan kugu khasbabno waxaanad raali ka ahayn, waayo waxaad jeceshahay ayaanu kula jecelnahay balse, haddii ay sidan u dhacday oo aynaan heli karin ina Xaaji Abtidoon maxaynu yeelnaa aabo, ma sidaas ayeynu ahaanaa oo murugo iyo

soo madow ayeynu ku sugnaanaa, mise calool adayg waa Illaahay wehelkii ayaa la yidhiye, arrinta meel kale ayeynu ugu wareegnaa”.

Oday Dhamal, wuxuu hadalkiisa ku soo gebo gebeeyey “aabbo anigu waan kaa tegayaaye talo keen”. Ka dibna wuu ka baxay.

Subeer ra’yiga iyo talada aabihii iyo guud ahaanba jawiga kaga yimi xagga reerkooda waxay ku keentay culays kale oo u labeeyey culayskii ka haystay dhinaca Salma, ka dibna wuxuu aad uga fekerayaa sidii uu yeeli lahaa.

Hase yeeshee isaga oo weli labo bog laynaya oo aan wax go’aan ah, gaadhin ayaa la gaadhay waqtigii uu la ballamay Salma, dabadeed, intuu sii lebigay dhawrkii shay ee uu dharkiisa ugu jeclaa ayuu deg deg u baxay.

Subeer wuxuu goobtii balanta tegay, iyadoo ay Salma taagan tahay, Subeer waxa galabtaa ka muuqda qurux iyo shacni aan hore loo arag balse Salma sidaa way ka duwan tahay waxaana ka muuqda waxoogaa canbus ah, waayo may soo lebigan sida Subeer ee deg deg ayey u soo baxday, taas oo ay haleeli wayday maryihii ay doonaysay inay ku baxdo.

Subeer iyo Salma markii ay si naxariis leh, murugona ka muuqato isu bariidiyeen, waxay isu raaceen meel sawirle ah, waayo waxay hore ugu ballansanaayeen inay sawiro xusuus ah soo galaan.

Subeer, wuxuu galabtaa soo kaxaystay baabuurkii aabihii, isaga oo aabihii u sheegay inuu dano ku soo qabsanayo.

Dabadeed Subeer iyo Salma, iyaga oo baabuurkii wata ayey isa soo hortaageen sawirlihii, ka dibna Subeer baa intuu soo degay wiilkii sawirlaha ahaa ku yidhi: “walaal gabadh baa ila socota waxaanuna u baahanahay sawiro ee noo diyaari”.

Cabaar ayey Subeer iyo Salma debedda ku sugnaayee, intii ay u banaanaysay goobtii sawirku, dabadeedna sawirlihii ayaa u yeedhay, wayna soo galeen.

Balse markii ay gudaha galeen ayey Salma bilowday waxogaa diyaar garow ah, ilayn hore uma soo diyaar garoobine.

Subeer, isagu hore ayuu u soo diyaar garoobay oo meel halkan ah ayuu ku sugayaa Salma, inta ay diyaar garoobayso, wuxuuna hoosta ka hallacsanayaa heemaalka Salma oo hoos ugu xanshaashaaqaya "ilayn calaf aan lagu qorin lama cuno".

Salma markii ay diyaar garowday ayuu wiilkii sawirlaha ahaa waydiiyey nooca sawirka ah ee ay rabaan, ka dibna Subeer iyo Salma ayaa midba midka kale eegay, taas oo uu midba midka kal doonayey inuu ka jawaabo, su'aasha wiilka sawirlaha ahi waydiiyey.

Hase yeeshee markii ay cabaar indho jacayl isku milicsadeen ayey markii dambe

Salma jawaabtii bixisay waxayna tidhi: "walaal waxaanu doonaynaa sawiro xanbaarsan xusuus caashaq".

Salma iyo Subeer markii loo diyaariyey agaasinkii sawir qaadista ayey gidaarka dhabarka saareen, waxana gidaarka ka dambeeya ku xardhan sawiro far shaxan leh oo aad moodo inay sida geedaha u baxeen oo aanay cidiba sawirin.

Subeer iyo Salma markii ay galeen labo sawir oo ay dhinacyada isku hayaan ayey debedda uga soo baxeen sawirlihii waxayna shidhka ugaleen baabuurkii ay wateen oo ku qoofallan sawawirlaha hortiisa, cabaar ayey gaadhiga dhexdiida ku soo sheekaysteen, ka dibna waxay yimaadeen hudheel cunto si ay uga casheeyeen.

Markii ay soo galeen gudihii hudhelka ayuu Subeer dib u jaleecay Salma oo daba socota wuxuuna ku yidhi: “walaal Salmaay inoo door goob aynu fadhiisanno, oo aynu ku cashayno”.

Salma inta ay yara dhoola caddaysay ayey ku jawaabtay “Subeerow malaha adigaa ina martigelinayee, inoo door, ta kale anigu waxaan inoo dooray sawirkii ee adiguna inoo door goobtii aynu fadhiisan lahayn”.

Subeer, intuu yara qoslay ayuu yidhi: “waayahaye ina keen waxaynu fadhiisanaynaa mutulkaa”.

Ka dibna inta la soo laafyooday ayaa la hoos fadhiistay mutul yar oo hudheelka ku dhex yaal kana mid ah goobaha lagu casheeyo, dabadeedna waxa si deg deg ah ugu yimi wiilkii mudalabka ahaa oo ka qaaday dalabkii.

Intii uu mudalabku ka maqnaa ayey Subeer iyo Salma sheeko bilaabeen, waxayna sheekadii dhexmartay u dhacday sidan:

Subeer: Salmaay, waxaynu joognaa adduunyo oo wax waliba waa nasiib, calafkuna waa wax qoran, oo qofna waxaan loo qorin ma calfado. Inaguna waxaynu nahay walaalo jacaylku mataaneeyey ku talo galkeenuna waxa uu ahaa inaynu noqono laba qof oo nolosha wadaga, laakiin waa tan arrini inagu soo korodhay, oo dhawr maalmood ka dib waxa laga yaabaa inaynu ku kala noolaano laba meelood oo aad u kala durugsan, balse taasi waa amar Illaahy, waxaanase is idhaahdaa tolow waa maxay nasiibka xun ee kugu dhacday ee kaa hor joogsaday tii aad dunida ka calmatay.

Hase yeeshee Salmaay, taasi maaha wax lala yaabo waayo tan oo kale maaha sheeko ugub ah ee waa arrin ku dhacday kumanaan is jeclaa balse aan is calfan, iyadoo in badan oo ka mid ah lugta loogu xidhay ruux aanay naftiisu calman, laakiin Salmaay marka la eego duruufta dhinaca waalidka,

gaar ahaan Islaanta hooyadaa kaa haysta, dhacdadaa meesha timi waxa lagu tilmaami karaa mid maangal ah, ta kale reerka hore waxba uguma aynu sheegin ilayn way ku xisaabtani lahaayeen.

Walaal Salmaay, tiro ma leh inta gabadh qoorta loo geliyey nin aanay weligood is arag, isna maqal, kuwaas oo in badan oo ka mid ahi, ay ku mustaqbal xumaysteen, waxase dhacda inay qaarkood ku guulaystaan guurka noocaas ah oo uu reerkoodu noqdo mid dhisma.

Hadal iyo gunaanad, Salmaay waxa wanaagsan inaynu calool adayg wehashano sidaa darteed, aniga caawa taladaydu waxa weeye inaad adeecdo talada waalidkaa oo aaddan ka hor iman, sababta aan sidaa u leeyahayna ma aha inay wax iska beddeleen mawqifkaygii jacayl, balse waxaan doonayaa inaad farxad iyo nolol wanaagsan ku noolaato oo aanay karaahiyada waalidku kugu dhicin, waayo haddii aad manta aniga ii go'do koleyba waxaad marwalba dareemaysaa murugo, markaa aad murugo ama farxad dareentona aniguna waan kula dareemayaa hadba ka aad dareento, miyaanay gacalo sidaa ahayn?

Salma: (oo si dhugmo leh u dhageysatay hadalada Subeer, ayaa iyaduna markeeda la wareegtay sheekadii,) waxayna tidhi:

Subeeroow horta waa runtaa oo adduunyadu way waayo badan tahay, waana tii hore loo yidhi, "weligeed adduunyada, waqtigaa qof saacida, qofna waayaha xidha." Markaa anigu waan dareensanahay dulucda iyo nuxurka hadalkaaga, laakiin haddii aan ku dareensiyo muxubada iyo kalgacalka aan kuu hayo, runtii waxaad qolad ka samaysatay qalbigayga, waxaad degtay badhtamaha wadnahayga, kama baxdid oo waxaan kuu tabeyaa sida u ilmaha yar ee abaydinka ahi u tabo hooyadii, midna waan kuu sheegayaa ee waxaad oggaataa inaad tahay qofkii i baray, iguna beeray geedka jaceylka, isla markaana waxaad idareensiisay inuu jaceylku yahay qayb nolosha ka mid ah, taas oo aan kugu tilmaami karo inaad tahay qofkii i

baray wax badan oo noloshayda ka dhinnaa, kana dhigay naftayda mid ku miisaaman ama ku dheeli tiran heemaalka nolosha.

Waayo waqtiyada qaarkood waxaan ahaa qof seexata oo soo toosta, waxna cunta, laakiin aan ka fekerin waayaha nolosha iyo hiigsiga mustaqbalka, taas oo aan odhan karo waxaan ahaa qof aan wax badan ka ogeyn dareenka nolosha iyo wacyiga garaadka.

Sidaa darteed waayaha jaceylka ee ina dhexmaray, wuxu naftayda ku beeray xusuus aan duugoobayn iyo muxubo degel fadhi ah.

Salma markii ay intaa tidhi, waxay hadalkeeda dhex gashatay waxoogaa geeraar ah oo ay ku cabirayso muxubbada iyo kalgacalka qalbigeeda huriyey, waxayna tidhi:

“Dhammays

sowsideedba, dhidigiyo

laboodkaba, waa laysu

dhaafoo, in ay

isdhaqdaan baa.

Dhulka loogu beeroo

dharaartii timaadaba

dhawr baa aroostee

anna dhudi haddaan

ahay meel aan

dhoweynbaad,

dhigaytay rarkaagee

nafta dhaymaheedow

waan kugu

dhadhabayaa, dhuuxa

iyo laabtiyo

Qalbigaad dhex jiiftaa,
Muxubadu dhab
weeye i dhansii
jacaylkoo
Alla hayga dheeraan.”

Salma waxay tuducyadan geeraarka ah, ku muujinaysaa sida ay uga dhab tahay muxubada iyo jacaylka ay u hayso Subeer iyo sida ay u doonayso inay nolosha la wadaagto, waxaanay tidhi:

“Subeerow calaf waa halkiisee, aniga go’aankaygu waxa weeye inaan adiga nolosha kula wadaago ee Illaahow isku keen sin adigoo nabad ah iyo anigoo nabad ah.”

Salma markii ay sheekada halkaa marinaysay ayuu isa soo dultaagay mudalabkii hudheelka oo cuntadii ay dal-badeen u sidda, dabadeedna Salma ayaa hadalkii yara hakisay, balse Subeer oo cabaar aamusnaa si qurux badana u dhegaysanayey weedhaha Salma afkeeda ka soo baxaya ayaa intii cuntada miiska la dhigayey ku tiraabay:

“Salmaay, waata la inaga soo dhexgalaye, malaha waxaaba laynnoo qaadan lahaa inagoo sheedakeena iska sii wadana.”

Intaa ka dib, waxa la isugu jawaab celiyey qosol dhoolla caddays ah oo la is dhaafsaday, ka dibna waxa lagu foorarsaday cashadii.

Mudulabkii wuxu miiska soo dhoobay cunto badan oo kala nooc nooc ah, dabadeed Salma intay halacsatay cuntada badan ee hortaal si kaftan ah u tidhi: “Subeeroow ma waxaad is tidhi Salma waxba deeqsiin maysid, maxaad waxan oo raashin ah u dalbatay, mise waxaagu wa xishood iyo xilqarsiinyo?”

Subeer, wuxu ku hawlan yahay kala habayntii cuntada iyo weelkii lagu cuni lahaa isaga oo wax walba u soo riixaya dhinaca Salma, wuxuna ku tiraabay: ‘Salmaay ha’iga deg-degin aniga ku garanaya inta kugu filan.”

Dabadeed inta ay waxoogaa qosol ah oo dhoola caddays u badan isku jiibiyeen ayay raamsi daymo jaceyl ku badan tahay isla hor fadhiisten.

Inkasta oo Subeer mar mar yara xusuusanayey tegista Salma oo ay meeli yara damqanaysay mararka qaarkood, wuxu haddana habeenkaasi Subeer iyo Salma u ahaa habeen farxadeed aan hore u soo marin ayaamihii jacaylkooda.

Subeer marka laga reebo waxooga werwer ah oo mar mar hoosta ka yara damqa, waxa dareenkiisa ka muuqda farxad iyo niyad wanaagsan.

Sidaa darteed wuxu la qushuucay jawiga niyadsamida xiisaha leh ee ay Salma la hor fadhido, ka dibna Subeer, wuxu hoosta ka xusuustay, heesta ay midhaheeda ka mid yihiin,

“Waxaan idileey ku oon bixi laa,
adigoo idileey aroos ila gala,
adigoo ooridayda noqdoo ubad
dhala, ilwaad quruxeey, ilwaad
quruxeey. Agagaarka wadnaha
haddaanay ku ool ayaan walba
kuma xusuusteen, sidii ubixii
udgoon badaneey,
ilwaad quruxeey, ilwaad quruxeey.”

Subeer markii uu cabaar heesta niyada kaga luuqeeyey ayuu mar qudha si lama filaan ah, fadhigii uga hinqaday, badeedna intii deg deg u dhaqaaqay ayuu yidhi:

“Walaal Salmaay waan soo noqnayaaye wax yar iga raali ahow.”

Dabadeedna wuxu is taagay guri yar oo dhawr tallaabo u jira mutulkii yaraa ee ay gudihiisa ku cashaynayaan.

Subeer hal cabaar ah ayuu suuryo leexsan ku soo oohin dhammaystay, ka dibna wuxu dib ugu soo laabtay gabadhii yaabanayd, isna waydiinaysay tolow ninkii Subeer maxaa helay.

Subeer wuxu soo fadhiistay, isaga oo maqnaanshihii ka cudur daartay, waxayna sii wateen cashadoodii.

Subeer iyo Salma markii ay casheeyeen ee uu Subeer biilkii bixiyey ayey hudheelkii debedda ugu baxeen, waxayna u soo dhaqaaqeen dhinicii baabuurka.

Subeer berito oo kale wuxu doonaya inuu u ambabaxo dekedda Berbera oo ay alaabo uga soo degayso.

Habeenba summad leh, habeenkaasi wuxu noqday hebaankii ay Subeer iyo Salma fursadii ugu badneyd isu heleen tan iyo markii uu bilaabmay waayahooda caashaq, sidaa darteed iyaga oo waxoogaa isu niyad qabow ayey kala hoydeen.

Markii uu waagu beryay ayuu Subeer aabihii ka codsaday inuu ka daayo safarka Berbera, isaga oo cudurdaar ka dhiganaya xannuunka jilibka kaga jira, taas oo uu aabbihiina ka aqbalay, waxaana alaabtii doonay odayga.

Labo maalmood kadib waxa oo baxay sawiradii ay Subeer iyo Salma wada galeen, waxaan sawirada soo qaaday Subeer.

Maalinta uu Subeer sawirada soo qaadayo maalinta ku xigta oo ah berito oo kale aya Salmana dalka ka dhoofaysaa oo Jarmalka u baqoolaysaa Subeer markii uu sawiradii soo qaaday ayuu markiiba isaga oo aan meel kale eegin ayuu u yimi gabadh walaashi ah, wuxuna ku yidhi: "Walaalo sawiradaa Salma ugee, adigaa guriga geli karaayee, ilayn anigu gurigooda ma geli karo'e."

Ka dibna way ka aqbashay, wayna u gaysay sawiradii. Subaxnimadii ay Salma iyo dadkii weheliyey iska xaadiriyeen garoonka diyaaradaha ee Hargeysa, si ay ugu dhoofaan dalka Jarmalka.

Salma waxa weheliya oo garoonka la jooga labadeedi waalid iyo wiilkii Mursal ee ay ilmaabtiga ahaayeen, lana siiyey iyadoo ay diyaarada wada raacayaan Mursal Salma iyo Salma hooyadeed.

Hase yeeshee waxa Salma garoonka uga sii horreeyey oo salaad hore iska xaadiriyey Subeer, balse Salma taa ma oga.

Markii ay saacadu ahayd 9:00 barqanimo ayey Madaarka soo fadhiisatay diyaaradii ay Salma iyo dadka la socdaa raacayeen.

Diyaaradaas oo ahayd nooca dadka ka qaada waxa lahayd Shirkadda Daallo Airlines oo maalintaa u duulaysay dalka Imaaraadka Carabta.

Iyadoo ay dadkii rakaabka ahaa ee diyaarada raacayey isu diyaarrinayaan inay ka ambabaxaan qolalka nasashada ee Madaarka, una baqoolaan dhinaca diyaarada ayey Salma sheeda ka halacsatay Subeer oo soo taagan meel waxoogaa u jirta, dabadeedna intay soo dhuumatay ayey Subeer ugu tagtay meeshii uu joogay, iyadoo iska qaradaysa waalidkeed iyo dadkii la socday.

Subeer wuxu gacanta ku hayaa silsilalad dahab ah oo uu magaciisu dusha kaga xardhan yahay, ka dibna markii ay Salma isla soo taagtay ayuu guddoonsiiyey, wuxuna ku tiraabay ereyo dardaaran ah oo uu kaga hadlayo silsilada dahabka ah, taas oo uu yidhi: "Salmaay walaal waxaan kugula dardaarmayaa inaad silsiladaa mar walba qoorta ku sidato, si aad markasta oo aad silsilada oo qoorta kuu sudhan eegtoba ii xusuusato oo aynaan u kala duugoobin."

Salma markii ay silsiladii guddoontay ayey si deg deg ah qoorteeda u sudhay, waxayna u guddoonatay si niyad sami iyo farxad badani ka muuqato, kana waaban inay macfalka ku guddoomato silsilada uu Subeer gacanta ka saaray ee waxay si dhiirani badani ka muuqato qoorta u sudhatay silsiladii, iyadoo ay dad badani isha ku hayaan.

Subeerna markaa wuu hortaagan yahay, waxay ballanqaaday inaanay weliged qoorteeda ka saarayn silsiladaa, isla markaana aanay qalbigeeda ka guurayn xusuusta Subeer.

Iyadoo ay Subeer iyo Salma weli isku maqan yihiin, ayaa loo yeedhay rakaabkii raacayey diyaaradda ay Salma raacayso, ka dibna intay is macasalaameeyeen ayey kala dhaqaaqeen Subeer iyo Salma, waxaana wejiyadooda ka muuqda dareen boholyow xanbaarsan oo uu midba midka kale tebayo.

Waxa kale oo uu isla halkaa ugu dhiibayaa warqad kooban oo u qornayd sidan:-

Dear my love Salma,

Wallaal, waxa maanta inoo bilawday in aynu u kala baadno ama u kala baqoolno boqolaal kun oo Mayl way adag tahay waase laga yaabaa in aynu isku soo noqono ama aynu dib isku aragno waxase laga maarmaana maadaama aad u ambabaxday wadan shisheeye oo leh dhaqamo gooniya oo aanad hore u aqoonin una tahay gabadh walow aad wakhtign tahay xaas ninkale qabo haddana waxa iga dardaarana in aad ku dadaasho daryeelka hooyadeen iyo in aad iska ilaaliso waxyaalaha aadka u foosha xun ee ka jira meesha aad tagayso.

Gaciso, waan ogahay oo waxan ku ahay adduunka madi, aad ayaan u nasiib xumahay balse ma qalbi xumi wax wal oo kastana waxan ku iloobayaa dhibaataada adag ee haysata hooyadeen Ruun.

Gacaliso, ha ii baqin, ha ii werwerin hadda kuma lihi I ilow oo aan niyadaada ka baxo laakiin waxan kuu leeyahay intaa si aynu noqon Allaa og waa in aynu labadeenuba isku ducaynaa. Waxaanad ila yar akhrisataa erayada aan kuu soo xulay ee heestan:

Dumarkaba aduun baa ii
Dhega nuglaayoo
Aan soo dhaweeyee
Dhaawicii horeen qabay
Waxad tahay dhakhtaradii
Nafta iga dhayaysee
Adigaa dhiri iyo ubax
Iyo dhool aroor da'ay
Dhul xareedi wadhan tahay
Uga dhigan naftaydoo
Hadduu taarkan soo dhacay
Dhawaan soo baxay kugu yidhi
Diyaarada dhakhsanaysee
Ku sidaa ma dheelido
Uma seexato dhinacyada
Illaahay dhantaal iyo
Kumo tuso dhibaata

Gacaliso, waxan ku siinayaa kalsoonida naftayda sidaa maanta aad u baxday ayay kuu raacday maanta naftaydu waan ogahay oo qalbigaygu mid aan adiga ahayn uma soo jeedo sidaan yeeli lahaana waxan go'aansaday inan kugu aamino amaano midii ugu adkayd oo ah in aad ii hayso, ii ilaaliso, ii dhawrto, ii dhool dhooliso, dhaawaca u diido, dhidibada u taagto sidii wiil dhalaanana dhabta iigu hayso taasoo ah ilaalinta naftayda oo adiga kuu ah ammaano.

Intaa kadib waxan Illaahay kaaga baryayaa oo aan kaaga rajaynayaa in aanad intaad nooshahay cidna u baahan, sidaa iyo nabadgelyo.

Warqadii marku u dhiibay ee ay la dhaqaaqday, Inkasta oo ay ismacasalaameeyeen haddana Subeer kama dhaqaaqin meeshiisii, waxaana ku soo dhacay qalbigiisa maadaama uu in badan dhegaysanayay heesaha jaceylka ah, erayadan:

Waa qallanjo yaabloo
Qurux iyo illaahbaa u
dhammeeyey qaayee
Alleen way
qarsoonayd
Qudh markaan u eegaba
Qac indhaha ku siiyaba
Qunbacdaa jaceylkee
Alla igama qaadan
Qalbi nuura ii daa
Qaabkii suleekhaa
intu eebbe kuu qoray
Uu qotomiyaa,
caashaqa ka qaadee
Qudh markaan u
eegee
Qac indhaha ku siiyee
Kalgacayl I qariyee

Wuuna taagnaa ilaa intii ay libdhaysay diyaaradii ay Salma iyo dadkii la socday raaceen, dhawr daqiiqo ka dibna isaga oo Subeer weli meeshiisii taagan ayey Salma iyo Subeer noqdeen dad ku kala nool laba duniyood oo aad u kala fog.

Markii ay libidhay diyaaradii ay Salma raacday ayuu Subeer ka soo baqoolay Madaarka, iyadoo aanay dareenkiisa wax farxad ahi ka muuqan, wuxuna Subeer ahaa qofkii u dambeeyey ee Madaarka ka soo dhaqaaqay, marka loo eego dadkii dadka dhoofaya sii dhoweynayey.

Subeer wixii maalintaa ka dambeeyey wuxu isu arkay nin madi ku ah waayaha jaceylka, waayo waxaa ka tagtay mataantii uu ka weheshan jiray

fooraha caashaqa. Salma waxay socdaalka (Transit) ku sii martay magaalada Dubai ee dalka Imaaraadka Carabta, laba maalmood ka dibna waxay tagtay magaalada Boon ee dalka Jarmalka oo ah meeshii loo soo waday inay degto.

Mursal markii uu eedadii Ruun iyo inaabtidii Salma gurigiisa Boon ku yaalay keenay, wuxu markiiba Telefoon kula hadlay aabbihii, wuxuna u sheegay inay yimaadeen, isaga iyo eedadadii Ruun oo odaygaa walaashii ah iyo gabadhii Salma.

Mursal aabbihii hore ayuu ula socday sheekada oo dhan waayo inankiisa ayaa hore ugu sheegay inuu inantii Ruun dhashay doonayo inuu guursado, soona kaxaynayo. Mursal aabbihii oo aanay walaashii Ruun is arag muddo 15 sanno ah ayaa wiilkiisa ugu jawaabay: "Laba saacadood ka dib ayaan idiin imanayaa."

Mursal markuu uu Telefoonkii ka soo jeestay, wuxu Eddadii Ruun u sheegay in walaalkeed u imanayo laba saacadood ka dib, ka dibna Ruun farxad darteed ayaa indhaheeda ilmo ka soo qubatay Salma lafteedu way xiisaynaysay aragtiga abtigeed iyo ilma abiyadeed, balse qalbiga waxa kaarka ugu weyn ku haya xusuusta Subeer oo muxubada ay u haysaa aanay jirin cid kale oo ay sidaa u jeceshahay.

Subeer markuu uu muddo dheer guriga iska jiifay sidii qof kaneeco hayso ayuu maallintii dambe iyadoo aad moodo sidii qof xannuun ka soo kacay bakhaarkii aabihii yimi, wuxuna bilaabay hawlihii bakhaarka, halkaas oo uu gelinka dambena meel waxbarasho ah tegi jiray.

Subeer inkasta oo uu u muuqday nin waxoogaa dadka soo dhexgelaya oo yara dhaama sidii uu maalmaha qaarkood ahaa, haddana ma aha nin ay qalbigiisa ka baxday Salma, sidaa darteed xusuusta Salma waxay ahayd mid goor walba dhex ciyaaraysay maskaxda Subeer.

Marka la eego sidii uu jacaylka Salma ugu beeran yahay qalbiga iyo dareenka Subeer, waxa lagu tilaami karaa sida shay maandooriye ah, taas oo dhakhaatiirta cilmi nafsigu sheegeen in haddii aan qofka maskaxdiisa laga sifayn inuu dhaawici karo caafimaadka maskaxda, waayo bay yidhaahdeen wuxu dareenka noocaan ahi keeni karaa xannuun nafsaaniya, taas oo dadka qaarkood isla hadlaan ama uu sidaaba xiskiisa ku waayo.

Waxaana la sheegaa ama la arkay dad badan oo dunida ku nool oo uu xiskiisa dhaawacay waaya jacaylka, iyadoo ay xataa arrimo noocaas ahi ka dhaceen Somaliland, taas oo la odhan karo ma yara dhalinyarada uu waalay.

Subeer inkasta oo la odhan karo arrintu weli lama gaadhn heer waali ah, haddana mararka qaarkood wuxu ku dhowaaday inuu isla hadlo.

Xaalku sida uu doono ha noqdee, haddana Subeer iyo Salma waxay ku kala nool yihiin labo meelood oo kala fog waxaana soo dhexgalay qorshayaal oof-wareen ku noqday dareenkoodii caashaq oo uu sababay wiilka ay Salma ilma abtiga yihiin.

Waxaanad moodaa in jaceylka Salma iyo Subeer shabaho kii Cilmi iyo Hodan, waayo Subeer oo markii hore ahaa nin afgaaban oo aan dhalinyarada inta badan dhex galin ayaa wakhtigan waxa ugu darsamay in uu gooni joog noqdo oo uu xataa ka go' reerkooda iyo dhalinyaradii ugu dhadhawayd mar marka dhifta ah ee uu soo galo suuqa waxay dhalinyaradu iyaga oo xamanaya ama aan hadalka ku caddaynayn odhan jireen waa Cilmigii wakhtigan ama Boodharigii Hargeysa.

Wuxu sidii ahaadaba maalin maalmaha ka mida ayaa wiil ay saaxiib yihiin u sheegay in uu Subeer sidan naftiisa u dhaamo waxana dhex martay sheekadan:

Sahal: sidaad la socoto Subeerow adduunku subax-ba waa cayn mana aha wax adiga kuu hor ah arrimaha ku haystaa, ha u malaynin in aanaan ogayn dhibaataada iyo dhibka xoogan ee kugu dhacday laakiin saaxiib waxa keliya ee aan kuu qaban karnaa waxay tahay in aan ku barno gabadh kale si aad u guursato ugana baxdo hawlaha gabadha iyadu go'aankeeda ku meel martay.

Subeer: Wallaal horta qof kale haddaad tahay wax xun ayaa ina dhex mari lahaa waxanan u malaynayaa in aad ilawsan tahay in aan jeclahay, jeclaana doono horena u jeclaa Salma, sidoo kalena waxaanad ogayn in aan Salmi igaga bixin jaceylkii aanu wada qaadnay laakiin aan anigu ahay qofka ku taliyay in aanu sidan kala noqono waayo dhibaato aanay iyadu lahayn ma aha in dusha laga saaro. isagoo is ilowsan ayaa wuxu yidhi Salmi ma xannuunka islaanta ku dhacaybaa, ma abtigeeda Fiisaha soo diray baa, ma aabaheeda ninka siiyay baa mise waa inaabtigeeda garan waayay in uu iska daayo qofkan qofka jecel. Sahalow saaxiib ma garan karo meel keliya oo ay Salmi gef igaga gashay mana iloobayo inta aan ifka ku noolahay kaana aqbali maayo, haddaad boqolaal hablood oo midiba mida kale ka qurux badan tahay halkan iigu keento.

Sahal waa qofka keliya ee aadka ay iskugu dhow yihiin Subeer ilaa dhalinyaranimadoodii waana nin og in go'aanka uu qaato Subeer sidiisa u soconayo markaa wuxu is yidhi intaa in ka badan haddii aad la sii hadasho waxa laga yaabaa in aad isku xumaataan, waxaanu ku yidhi Subeer "wallaal iga raali ahow waxad jeceshahay aniguna waan kula jeclahay."

Intaa markuu yidhi ayuu Subeer u soo dabgay Sahal waxaanu yidhi: "wallaal mar hore haddaad intaa I odhan lahayd waxa laga yaabi lahaa in culays badani iga bi'I lahaa waayo waxad ahayd gacantayda midig, waxad ahayd qofkii wax kasta oo igu dhaca ila xalin lahaa sida darteed ayaan kuugu sheegayaa in aan dhibaatays nahay wakhtigan aan imika joognana waxan rabaa in aad ii raacdo Boosta si aan ugu diro warqadan Salma."

waa la isa soo raacay waxaana la imanayaa halkii ay ka diri lahaayeen warqada markay dhammaysteen hawshii ayuu Sahal saaxiibkii ku celiyay "oo wallaal mar haddii gabadhii guri yeelatay oo ay tahay xaas nin kale waa maxay xidhiidhkan gaarka ah ee idinka dhaxeeya." Subeer ayaa si dhib yar ugu jawaabay waxaanu yidhi:

"Sahalow umaan jeclayn Salma keliya in aan anigu ku farxo iyadana ka nixiya balse waxad ogaataa in jaceylkaygu uu ahaa in aan u sameeyo inta aan u samayn karo waxa ay ku farxayso guurka hadeerna waxa ku kalifay duruuf haysatay hooyadeed ee ma aha mid ay u guursatay jacayl si kastaba ha ahaatee waan ogahay in aanu nahay laba qof oo kala xaaraantimaysan balse warqada waxa ku qorani marnaba ma aha mid wax u dhimaya gabadhnimada salma iyo dhaqankeeda inta ugu badan ee aan u qorayna waxay tahay xog waraysi xaaladeeda guud iyo halka ay marayaan hawlihii hooyadeed.

Muddo dabadeed waxay warqadii gaadhay gabadhii Salma waxaana goor subaxa ay ku waabariisatay bushqada quruxda badan ee loogu riday box-ka ku yaala gurigeeda hortiisa, markii ay la soo baxday ayaa intii aanay furin waxay dusha ka aragtay magaca ku qoran oo aan ahayn mid hadda ku cusub balse baal dahaba kaga yaala qaybo badan oo jidhkeeda ah, si deg deg ah ayay u furaysaa iyadoo wakhtigan fadhida makhsinkeeda waxaanay ku bilaabmaysaa warqadu sidan:

To: Salma

From: Subeer

Wallaal, waxan u malaynayaa in aynu kala maqnayn muddo aad u badan waxa kale oo aan ogahay in aan u boholyoobay wada hadalkeenii wada joogeenii iyo wejigaagii furnaa.

Waan ogahay oo halka aad maanta joogtaa ama aad maanta taalaa waa meesha aan u malaynayo in aad ku dhamaysanayso noloshaada mana hilmaansani in aad tahay xaas, laakiin haygula yaabin qoraalka ama

dhambaalka xambaarsan hadalada kala duwan kuwaasoo isugu jira waano, dardaaran, waxa isu sheegid.

Haddaba, Salma sidaa aynu maanta u kala tagtay ee aynu u kala fogaanay ayaa in badan oo inala mid ahi u kala fogaadeen, kuwo kale oo badanina ay isugu soo dhawaadeen.

Mana aha in aynu canaanano nafteena, ama imtixaano waayo waa qadar Illaahay. Wallaal hadiyada aan kuu soo diray waxay la mid tahay ta aan u diray walaashayda yar maadaama aad adiguna noqotay inantaydii saddexaad. Waxan oga jeedaa hadaynu isku weynay ama calafku iskeen sii waayay kuma aynaan kala gu'in wallaaltinimadii.

Laga bilaabo imikana waxan kuu ahay wallaalkaa keliya ee aad adduunka ku leedahay.

Waxanan kugula dardaarmayaa in aanad i iloobin iina xasuusnaato sidaa.

Waxaan kuu soo diri doonaa hadba sida uu yahay waayahaygu adiguna sidoo kale ayaan kaa warsugayaa in aad iigu soo dirto, wixii kula soo darsa. Sidaa iyo Nabad Gelyo.

Haddii aynu halkaa ku dhaafno sheekada qaybteedii ama wajigeedii hore, bal aynu eegno afar sanno ka dib, waxa ay ku dambaysay sheekada Subeer iyo Salma.

Su'aasha xiisaha leh ee ayu af-joogta uga dhigayno wejiga labaad ee sheekada waxay tahay afar sanno ka dib Subeer iyo Salma waa sidee muuqaalkooda nololeed, muxuuse ku dambeeyey waaya-hoodii jaceyl?

Muddo ilaa sannad gaadhaysa markii ay Salma dalka ka sii maqnayd ayuu Subeer u dhoofay dalka Baakistaan, halkaas oo uu u tegay waxbarasho, balse Subeer sababaha ku kelifay inuu waxbarasho dibadeed doonto, waxa ugu badnaa reerkooda oo ku khasbayey inuu guursado gabadh ay u soo xuleen, maadaama uu ku guuldarraystay sahankiisii, muddona laga

sugayey inuu guursado. ka dibna wuxu Subeer cadaadiska reerkooda kaga yimi kaga mar marsiinyooday inuu doonayo waxbarasho Jaamacadeed. Subeer, wuxu ka soo laacay saddex sanno iyo badh waxbarasho Jaamacadeed ah, isaga oo soo bartay cilmiga dhaqaalaha.

Ka dibna wuxu ku soo guryo noqday dhulkiisii hooyo iyo gurigoodii. Subeer muddadii uu Jaamacadda ku jiray ma badnayn xidhiidhka wada hadal ee dhexmaray isaga iyo Salma, waxayna wada hadleen ama xidhiidh dhexmaray in ka yar toban goor, iyadoo ay sababtuna ahayd dhinaca Salma.

Subeer markii uu Baakistaan ka soo laabtay garoonka diyaaradaha Hargeysa ku soo dhoweeyey waalidkii iyo walaalihii oo in ku dhow saddex saacadood ku sugayey, waxaana loo soo daadihiyey gurigoodii.

Subeer waxa ka muuqday dareen waxoogaa jimcoon iyo muuqaal aan ku didinayn oo yara laaban, iyadoo ay aqoontii u soo bartayna ku soo kordhisay bisayl maskaxeed iyo garaad waayeelnimo.

Hase yeeshee haddii aynu dhinaca Salma eegno iyo halka ay xaaladeedu ku dambaysay muddadaa ka dib.

Salma waxay indho ku daraan dartay dhaqankii iyo nolosii ay ugu tagtay dunida reer Galbeedka, waxayna si hawl yar u ilowday waayihii nololeed iyo xushmadii caashaq ee ay maalmo badan la soo wadaagtay Subeer.

Salma saddex bilood oo keliya markay joogtay Jarmalka ayey aqal gashay, waxay oori u noqotay inaabtigeed Mursal.

Marar dhawr ah oo uu Subeer telefoon kula hadlay Salma, waxay ugu jawaabtay,

“Hadda meel baan ku deg degsanahaye, anigaa telefoonka kugu soo celin doona.”

Salma waxay noqotay qof ay dareenkeeda ka baxday xusuustii Subeer iyo wacadkii u yiilay, iyada iyo Subeer.

Mursal wuxu hore u qabay gabadh Jarmal ah oo laba carruur ah u dhashay, balse ay is fureen sannado ka hor.

Labada carruur ah ee ay Mursal u dhashay gabadha Jarmalka ahi waqtigaa waa dad waaweyn, waxayna muddo ka dib markii uu aabahood Salma guursaday ka shaqeeyeen sidii ay aabahood iyo hooyadood isugu celin lahaayeen. taas oo ay labada waalidba cadaadis badan ku sareen, aakhirkiina way isku noqdeen Mursal iyo gabadhiisii hore ee uu furay oo mar kale ayey isu noqdeen nin iyo ooridii.

Hase yeeshee dib isugu noqoshada Mursal iyo gabadhiisii hore waxay keentay inay Salma lumiso kalsooni badan oo ay markii hore ninkeeda ku qabtay, waxaana bilaabmay madmadow iyo qardoofaayin hor leh oo dhexmara Salma iyo odaygeedii Mursal.

Waxay arrintu socotaba markii ay Mursal iyo Salma muddo labo sanno gaadhaysa isqabeen oo aanay weli wax ubad ah isu dhalin ayey maalin dudmo ku kala tageen.

Salma iyo inaantigeed markii ay muddo kala maqnaayeen oo ay xaaladoodu sii xumaatay, balse aanay isfurin ayey gabadhii Salma go'aansatay inay waxbarasho bilowdo, waxaanay gashay Mac-had lagu barto xirfado kala duwan.

Sidii aynu horeba u soo sheegnay Salma waxay ahayd gabadh Illaahay ku manaystay qurux oo boqol lagala baxo, gaar ahaan waxay ahayd qof Illaahay siiyey dherer iyo laxaad.

Salma gelinka hore waxay tegi jirtay Mac-hadka, gelinka dambena waxay tegi jirtay meel lagu jimicsado, isla markaana lagu ciyaaro kubadaha gacanta, laliska iyo ta koleyga.

Salma waxay xiisaysay ciyaaraha kubadda gacanta, ka dibna si tartiib tartiib ah ayey u baratay ciyaaraha kubbada gacanta ilaa ay ka mid noqotay hablaha ugu cad cad ee naadiyada xaafadahooda u ciyaara kubbada koleyga.

Salma maadaama ay ahayd gabadh dheer oo jalaqsan, waxay indhahooda soo jiidatay dadka ka shaqeeya tartanka lagu xayeysiiyo dharka faashinka loo yaqaan. Sidaa daraadeed waxay dhawr goor ka qayb gashay goobo lagu qabtay tartanka quruxda dharka oo dalka Jarmalka ah.

Salma tartanka quruxda dharka kama gelin kaalmaha sar sare, haddana waxay noqotay qof ay dadkii daawaday aad ugu majeerteen qurux badnaan, gole joog, wanaag iyo firfircoonaan.

Salma waxay noqotay qof u banbaxday hawlaheeda gaarka ah, haddii ay tahay dhinac waxbarasho iyo haddii ay tahay hawlaheeda dhinaca ciyaaraha, waxayse mar mar soo booqataa hooyadeed Ruun oo hadda caafimaadkeedu aad u wanaagsan yahay, kuna talaabsata lugaheeda, halkii ay awal dhulyaal ahayd, iyadoo ay hooyo Ruun dhakhaatiirtu u sheegeen inay muddo baxnaano ahaanayso, dalkana aanay ka bixi Karin ilaa inta si kama dambays ah loo habsanayo xaaladdeeda caafimaad.

Hooyo Ruun raali kuma ah sida ay gabadheedu u dhaqmayso. Hase yeeshee ma qaadi karto wax talaabo ah, waayo waxay cid walba ka awood badan sharciga dalka u yaal oo dhigaya inuu qofku xor u yahay waxa uu rabo, isla markaana aanay cidina ku khasbi Karin wax aanu rabin.

Salma inkasta oo aanay gaadhin halkii ugu xumayd, haddana waxa in badan ku milantay dhaqanka reer galbeedka, gaar ahaan dalka Jarmalka ee ay ku nooshahay, taas oo keentay inuu isbeddel weyni ku dhaco dhaqankii iyo

dabeecadii qofnimo ee Salma, marka la isu eego noloshee dhulkeeda hooyo iyo nolosheeda Jarmalka.

Salma oo awalba ahayd gabadh qurux u dhalatay, haddii ay tahay dherer, dhumuc iyo midab casaan oo ah mid jinniyad leh, ayaa haddana waxa quruxdeedu taageero ka heshay nolosha wanaagsan ee ay kala kulantay dalka Jarmalka, taasina waxay keentay inay Salma muuq iyo midaba u ekaatay dadka ay la nooshahay ee reer Jermani.

Sidaa darteed Salma qofkii yiqiinay dirqi ayuu ku garanayaa.

Salma hooyadeed muddo ka dib ayey dhakhaatiirtu ku sameeyeen hubin caafimaad, waxayna dhakhaatiirtu hooyo Ruun u sheegeen inay bogsatay, sidaa darteed ay ku noqoto dalkeeda maadaama ay ka bogsatay xannuunkii loo keenay dalka Jarmalka.

Hooyo Ruun oo aad uga werwersan xaaladda gabadheeda waxay ka fekeraysaa sidii ay inanteeda u soo kaxayn lahayd ee ay ugu celin lahayd dalkeedii hooyo, uguna gayn lahayd aabaheed.

Hooyo Ruun iyo Mursal, waxay isla gorfeeyeen sidii Salma loogu celin lahaa maadaama aanay Mursal-na u jeedin, hooyo Ruuna ay tegayso, iyaga oo ka walaacsan waxa uu Salma mustaqbalkeedu ku dambayn doono.

Dabadeed hooyo Ruun, ayaa galabtii dambe u yeedhay gabadheedii ay ku curatay, kuna dhalmo daysay ee Salma, waxayna ku tidhi: "Hooyo maadaama aan bogsaday dalkii iyo dadkiina aynu muddo dheer ka soo maqnayn waxa loo baahan yahay, in aynu mar dalkii dib ugu laabano oo aynu muddo soo joogno, dabadeedna aabana soo kaxayno oo aynu soo wada noqono.

Hooyo Ruun weedhahan way ku khiyaamaynaysaa gabadheeda, waayo waxay rabtaa inay meesha ka saarto, hadhowna marka ay dalkii tagto loo taliyo.

Salma waxay hooyadeed ugu jawaabtay: “Hooyo anigu tegi maayo oo hawlo badan baa ii socda ee adigu iska tag mar kale ayaan kaa daba imanayaaye.”

Hooyo Ruun, taa ma yeelin ee waxay gabadheedii cadaadis ku saartay inay raacdo. Salma waxay dhego adaygtoba markii ay islaantii ka tegi wayday ee ay marba dib uga dhacdo waqtigii ay tegi lahayd ayey Salma markii dambe oggolaatay inay muddo saddex bilood ah soo joogto dalkii, ka dibna dib ugu noqoto Jarmani.

Sidaa darteed Salma iyo hooyadood Ruun, waxay u diyaar garoobeen safar dhulkoodii ah, Mursal iyo Salma xaaladoodu kama soo rayn, sidii ayeyna u kala maqan yihiin, walise ismay furin, laakiin Mursal iyo Eddadii Ruun way is ogyihiin oo qaddiyada Salma way ka tashadeen.

Sidaa awgeed Mursal isaga ayaa qaban qaabinaya ambabaxa Ruun iyo gabadheeda.

Maalintii dambe ayuu Mursal goor aroor hore ah Eddadii Ruun iyo gabadheedii Salma geeyey Garoonka diyaaradaha, wuxuna ku habsaday diyaarad toos u tegaysa madaarkii ay ka soo duuleen ee Hargeysa, waxayna maalintii dambe Salma iyo hooyadeed ka soo degeen madaarka Hargeysa, waxaana garoonka kaga hor yimi Xaaji Abtidoon oo ah Salma aabaheed iyo Ruun odaygeedii.

Sidaa awgeed Salma iyo hooyadeed waxay yimaadeen gurigooda oo ay ka maqnaayeen muddo afar sanno gaadhaysa.

Salma waxay dib ugu soo laabatay dhulkeedii hooyo iyo gurigii hooyadeed.

Subeer inkasta oo ay Salma xumaysay oo ay xadhiga u jartay markii ay Yurub tagtay, haddana qalbigiisa kama ay maydhmin muxubadi iyo xusuustii kalgacalkii gaamuray ee uu u hayay Salma.

Laba maalmood ka dib imaatinkii Salma ayay Subeer gabadh walaashii ah u sheegtay inay Salma timi, waxayna ku tidhi: "Wallaal gurigii reer Abtidoon waxa yimi Salma iyo hooyadeed oo Jarmalka ka yimi."

Subeer inkasta oo ay meeli yara damqatay, haddana markii loo sheegay warka Salma dareenkiisa wax weyni iskama beddelin, waayo wuxu ogaa in aanay Salma maanta waxba ugu filnayn oo Jarmalka lagu guursaday oo ay nin kale ooridii tahay, isla markaana Subeer ma oga in Salma iyo Mursal aanay xaaladoodu wacnayn.

Salma markii ay saddex maalmood joogtay ayay oggaatay inuu wiilkii Subeer magaalada joogo, isla markaana aanu weli guursan.

Hase yeeshee Salma ma hayso weji ay Subeer ku hortagto oo xataa inay soo salaanto way ka weji gabaxday, waayo wixii ay fashay ayay ogtahay, waxayna aaminsan tahay inuu Subeer colaad iyo calool xumo u hayo. balse Subeer isagu sidaa si ka duwan ayuu u fekerayay, mana aaminsanayn inay ka gashay dembi sidaa u weyn, laakiin wuxu u arkaa inuu calafku yahay wax qoran oo aan meelna laga dhaafi Karrin.

Sidaa darteed uu Mursal yahay ninkii ay Salma calafka isku lahaayeen, calafkuna uu waxba kama jiraan ka dhigay waayihiisii caashaq iyo riyadiisii tabitaanka Salma.

Subeerna inkasta oo ay weli xusuusta qalbigiisa ku laaqan tahay muxubadii iyo kalgacalkii ay Salma ku beertay, haddana qalbigiisu xiisaha Salma wuxu

ugu dhololayaa sidii uu maalmo ka mid ah waayihiisii caashaq ugu dhololi jiray.

Guul-daradii uu Subeer kala kulmay caashaqii uu beeray ee dhexmaray isaga iyo Salma, waxay qalbigiisa ku beertay bayr iyo didmo uu ka qabo dhinaca haweenka.

Sidaa darteed Salma, ka dib gabadh kale dibnihiisa uma kala furin, marka lala soo hadal qaadana waxa qalbigiisa damaqda xusuusta jacalykiisa lafaha guray iyo siduu faro madhan uga joogo beertii caashaqa ee uu maalmo badan dhiigiisa ku waraabiye.

Subeer marar badan ayuu aabihii u soo jeediyey inuu guursado oo uu ku yidhi: "Aabbo guurso." laakiin marmarsiinyo iyo marba horta arrin baan soo qabsanayaa ama inoo soo qabanayaa Aabbo ayuu cudur daar uga dhigi jiri diidmadiisa.

Waxyaalaha uu Subeer odayga aabihii ku qancin jiray waxa ka mid aha hindisayaal la xidhiidha hawlahooda ganacsi, wuxuuna marba soo bandhigi jiray qorshe uu ku horumarinayo hawshooda ganacsi, taas oo uu odayguna u guuxi jiray, waayo qorshe kasta oo uu Subeer ku soo kordhiyo hawsha ganacsigooda, waxa uu noqdaa mid laga dhaxlo horumar iyo koboc dhaqaale, taas oo keentay inay yeeshaan shirkad weyn oo keenta ama soo dejisa allaabta dhismaha.

Subeer inkasta oo uu maqlay inay Salma timi, haddana uma tegin, waayo maadaama aanay oori u noqonayn, wuxu is yidhi, yaanay aragtideedu kugu soo kicin hurgumo kaa legdan iyo dookh aad la dheelido.

Ta kale, wuxu waxoogaa walaac ah ka qabay in Salma, haddii ay doonto ay salaantaba ka qaadi waydo, maadaama ay ka danaysatay Subeer iyo

waayihiisa caashaq, sidaa darteed dareenka noocaas ahina wuxu ka mid yahay waxyaalaha Subeer ka walaaciyey inuu Salma soo booqdo.

Hase yeeshee Salma markii ay joogtay muddo labaatan cisho gaadhaysa ayay maalintii dambe go'aansatay inay Subeer salaanto, kuna tidhaahdo, "Wallaal iska kay cafi, waxayna hoos ugu xashaashaqday oo tidhi, "Alleylehe wixii dhacayba dhece'e waa inaan Subeer u tagaa oo ku idhaahdaa wallaal iska kay cafi oo aynu noqono dad wallaalo ah, maadaama aynu kala fogaanay oo uu gidaar weyni inoo dhexeeyo hadda."

Salma aad bay u yiqiinsan tahay inay Subeer xumaysay oo ay godob ka gashay, sidaa darteed markii ay dib u soo noqotay ee ay u timi meel ay uga baxayso sanqadha Subeer, waxay taasi dareenkeeda ku beertay damqasho badan, waayo waxa nafteeda ku beermay waxoogaa tiiraanyo ah, taas oo ay xusuusteedu la waalalowday sidii ay Subeer u xumaysay.

Salma markii ay go'aansatay inay Subeer u tagto ayay waxoogaa ka fekertay qaabkii iyo meeshii ay ugu tegi lahayd.

Hase yeeshe maalintii dambe ayay goor galab ah intay si la yaqaan u soo lebisatay, waxay isa soo hoos taagay geedkii uu ubax-dhiga jacaylkoodu ka bilaabmay afar sanno ka hor.

Geedkaasi wuxu ahaa geedkii ay ku ballami jireen mar kasta oo ay kulmayaan, wuxuna geedkaasi ku yeelaa meel u dhow guryahooda, gaar ahaan wuxu ku yaal meel loo maro bakhaarada Subeer aabihii marka laga tago guriga Subeer reerkooda.

Salma markii ay muddo ilaa 40 daqiiqo ah hoos taagnay geedkii ayuu Subeer markii dambe ka soo baxay gurigooda, isaga oo u socda Xafiiskii shaqada.

Subeer markuu guriga ka soo baxay wuxu gacanta ku sitay dhawr xabbo oo buugaagta xisaabaadka ah iyo shandad gacmeed nooca waraaqaha lagu qaato ah, wuxuna ku lebisay yahay surwaal madow iyo shaadh cad, isla markaana wuxu galabtaa doonayaa inuu xidho xisaabaadkii bisha iyo inuu mushaharooyinkii u diyaariyo shaqaalaha, maadaama ay bishii dhammaatay, iyadoo ay shirkadoodu noqotay shirkad ballaadhan oo dalka intiisa badan laamo ku leh, ayna gobolada u joogaan wakiilo iyo dad shaqaale ahi.

Salma waxay taagnaato oo ay Subeer bidhaamiso bal inuu guriga ka soo baxay iyo inkale ayay markii dambe si lama filaan ah isha ugu dhufatay Subeer oo guriga ka soo booday, ka dibna cagta soo saaray waddo hoos marta geedka ay hoos taagan tahay.

Muuqaalka Subeer wuxu dareenka Salma ku riday khal-khal iyo baxaadeg, wuxuuna dareenkeeda maskaxeed tusay sawiro badan oo is-dhexqaadaya, mar way naxday oo waxay is tidhi tolow mayska dhaqaaqda oo ma ka dhuumataa, marna waxay keentay farxad oo waxay xusuusatay aayaamihii wacnaa ee waayaha jacaylka iyo sidii uu qalbigoodu isugu soo muhan jiray iyada iyo Subeer, marka ay ballanta ku leeyihiin geedka ay hoostaagan tahay, ka dibna waxay isku qancisaa ha ka dhuumane sug oo salaan.

Shucuurta Salma kor iyo hoosba waxa hadheeyey daruuro walaac ah, waxa korkeeda ka soo booday dhidid buurbuuran.

Hiinraaga feedhaheeda ka baxayna, waxaad moodaa in boqol mayl la soo baacsaday, waxay ku waalatay dhaqaaq joogsi, waxayna xaaladeedu ka dhignayd,

“Ma tagtaa, ma joogta, weli waan talamayaa.”

Subeer wuxu soo socdaa meel qiyaastii noqonaysa kala badhka guriga iyo geedka dhexdooda, guriga iyo geedkuna waxay isku jiraan wax aan boqol tallaabo ka badnayn.

Sidaa darteed haddii aanay Salma meesha ka dhaqaaqin labo daqiiqadood ka dib ama ka yarba iyada iyo Subeer way ishuran yihiin, laakiin gabadhii Salma qaybta jawaab celinta ee maskaxdeeda ayaa khal-khashay oo joogid iyo tegis midna ugu talin weyday, waxayna ku waalatay, "Tolow ma iska tagtaa, mise waad iska joogtaa."

Subeerna kaabiga ayuu u soo saaran yahay, Salmana weli may go'aansan inay meesha ka dhaqaaqdo oo Subeer ka dhuumato iyo inay calool-adaygto oo ay iska sugto.

"Cajeb, tolow maxay noqon" Salma waxay geedka hoostaagnaataba oo ay Wejigabax la caloolyowdaba, waxay aakhirikii go'aansatay inay u babac dhigto wejiga Subeer.

Salma sidii dembiile la qabtay hoosbay u foorartay, Subeerna waa ku soo dhowyahay laakiin Subeer maskaxdiisa kuma jirto Salma ayaa geedkan hoostaagan ama kuu imanaysa, sidaa daraadeed bannaan ayuu iska socdaa oo ma aha ninka burkaba bahal ka filaya.

Hase yeeshee markii uu marayey meel la guudboon halkii ay Salma taagnayd oo saddex afar tallaabo u jirta ayuu dhanka bidix jaleecay, mise wuxu isha ku dhuftay qof dumar ah oo aanu wejigeedu ku cusbayn, dabadeedna isaga oo hooska iska weydiinaya, "Qofkan aad wejigiisa garanayso ee meesha taagani, muxu ahaa," ayuu niyada iska yidhi.

Salma hoos bay u foorarsatay oo indhaha may siin karayn Subeer, laakiin markii uu istaagay ayay soo eegtay, iyadoo uu wejiga gabaxweyni ka muuqdo, balse eegmo mooyaane wax hadal ahi Salma kama soo bixin.

Subeer wuxu gartay in qofka meesha taagani Salma tahay, ka dibna xaggeedii ayuu u soo dhaqaaqay isaga oo yaaban, laakiin markii uu ilaa

saddex tallaabo u soo jiray ayuu istaagay, intii aanu midna mid la hadlin ayay Salma indhaha sacabka saartay, si ay isaga masaxdo ilmo buurbuuran oo ka soo yaacday.

Salma markii ay ilmadii iska yara masaxday ayey hadal u hollatay, waxaana afkeeda ka soo baxay, "Wallaal Subeeroow waan ogahay in aan gef iyo godoba kaa galaye iska kay cafi, walaashaa oo kale ayaan ahaye." Dareenkii firkanaxa ahaa dartii ayaa xataa salaantii laga booday.

Sidaa darteed markii ay Salma weedhaa ku tiraabtay ayuu Subeerna ugu jawaabay: "Salmaay wax dembi ah ma lihid, waxa dhacayna waxay ahaayeen waxa hore u qornaa, aniguna wax xumaan ah kuuma hayo, markaa arrinta iska ilow oo bal iiga waran xaaladdaada reernimo hooyadaase waa sidee? Xaaladeeda caafimaad ma soo bogsatay?"

Weedhaha Subeer ka soo yeedhay aad bay u damqeen qalbiga Salma, waayo waxay Subeer kala kulantay dareen aanay ka filayn, aadbayna ula yaabtay iimaanka qaniga ah iyo samir wanaaga ku sugnaaday Subeer.

Haddalada Subeer ku tiraabay waxay dareenka Salma ku sii kordhiyeen culays saa'id ah, taas oo keentay inay tiiraanyo darteed hadalba soo rogan waydo oo ay hoos isaga foorarsato, marna wejiga Subeer ku dheygagto.

Subeer markuu arkay inay gabadhii Salma dhibaataysan tahay oo uu hadalba ka soo bixi wayey, ayuu haddana ku yidhi: "Wallaal Salma is-deji, hana ka tiiraanyoon wixii dhacay, waayo dunida wax kastaa way ka dhacaan, adiguna dembi kuma lihid wixii dhacay, aniguna calool xumo kuuma hayo."

Subeer markii uu wedhahaa caqli celinta iyo dejinta ah Salma u jeediyey, ayuu hore uga sii socday, wuxuna yidhi: "Salmaay wallaal waxaan ku weydiiyey imisa carruur ah ayaa Mursal u dhashay."

Subeer ma joojin hadalka, wuxuna su'aasha ku sii xigsiiyey: "Alla ninka aad carruurta u dhashay nasiib badanaa, Salmaay koley caruurtaadu waa kuwo qurux badane, goormaad I soo tusi, waxaan doonayaa inaa arko'e?"

Subeer wuu sii hadlay, wuxuna haddana yidhi: "Salmaay mar haddii uu calaf ii kaa diiday, waxa aniga iga nasiib badan ninka aad ooridiisa noqotay ee aqal kugula hoyda, ubadna aad u hayso?"

Salma intay hoos u foorarsatay ayay aamus miciinsatay, laakiin Subeer markuu arkay inay gabadhii Salma ka didsan tahay oo ay hadliba kari weyday oo ay wax heleen, ayuu yidhi: "Waxaad yeeshaa telefoonkaygaan ku siinayaaye ila soo hadal, marka aad fursad u hesho si aynu isu waraysano." isagoo isku dayaya inuu khajilaadan, xishoodkan faraha badan ee ku habsaday Salma maaro u helo, taas oo ay teleefanka iska weydiin karaan, kana wada sheekaysan karaan, si ka duwan sidan ay hadda isu hortaagan yihiin ee keentay xishoodka iyo firkanaxa.

Salma may siin wax jawaab ah, waxayna dhexgashay duni-tiiraanyo, laakiin Subeer intuu telefoonkiisii warqad yar ku qoray ayuu farta ka saaray Salma, ka dibna wuu ka dhaqaaqay, waayo haddii uu Salma la sii joogi lahaa waxa ka baylihi lahaa hawl maalmeedkiisa ahayd, dhinac wuxu ku degdegayay hawshii xafiiska u taalay, dhinacna wuxu is leeyahay armaa lagu yidhaahdaa maxaa ninka maantoo dhan la taagay gabadha xaaska ah ee la qabo.

Subeer iyo Salma waxay ku kala tageen ballan qarbo qarbo ah, waxayna goobtii ku kala dhaqaaqeen, iyadoo aanu qofna qofka kale hadalka deeqsiin karayn.

Hase yeeshee labadoodu way sii kala daraayeen, waxayna qoontu ku sii xumayd Salma oo ay tiiraanyadu qalbigeeda aad u damaqday, taas oo ay aad u xusuusatay godobtii jaceylka ee dhexmartay iyada iyo Subeer.

Sidoo kale Subeer laftiisu inkasta oo aanu la mid ahayn Salma, haddana kulanka lama filaanka ah ee dhexmaray isaga iyo Salma ee ay la hortimi ayaa waxoogaa dacar ah ku kiciyey shucuurta Subeer, wuxuna meesha ka dhaqaaqay, isaga oo ka fekeray xaaladda Salma.

Ballanta keliya ee uu Subeer kaga tegay Salma waxay ahayd, isagoo siiyey Telefoonkiisa guriga, ka dibna ku yidhi telefoonkaa igala soo xidhiidh.

Galabtii ay kulmeen habeenimadeedii ayey Salma 9:00-kii caweysnimo dultagtay telefoon qolkeeda huradada yaalay, waxayna garaacday telefoonkii uu siiyay Subeer ee uu yidhi igala soo hadal.

Telefoonka Subeer, wuxu yaal qolkiisa, laakiin waqtiga ay Salma telefoon soo garaacday waxa qolka Subeer dhexjoogta gabadh ay Subeer wallaalo yihiin oo haghagaajinaysa cashadiina u dhigaysa.

Markii uu telefoonkii soo dhacay ayey Subeer wallaashii qaday oo tidhi: "Hallo, waa ayo." Salma ayaa tidh: "Wallaal, waa aniga ee Subeer ma joogaa, Subeer baan doonayaayee."

Gabadhii Subeer walaashii way yaabtay, waayo weligeed may arag gabadh Subeer Telefoon u soo diraysa, waxayse gabadhii ugu jawaabtay, si xishmad iyo qederin ka muuqato waxayna ku tidhi: "Wallaal ma joogo laakiin wuxu imanayaa 30-daqiiqo ka dib."

Salma way dhigtay telefoonkii, waxayna tidhi, "Waayahay wallaal mahadsanid." Salma muddada soddonka daqiiqo ahi way ku dheeraatay, waayo ladhbaa ku kacsan, laakiin marka ay telefoonka garaacayso Subeer ma foga ee wuxu wiil saaxiib yihiin la taagan yahay meel gurigooda hortiisa ah oo aanay masaafadeedu ka badnayn dhowr tallaabo.

Hase yeeshee, ilaa nusa-saaco dambe ayuu Subeer la sii taagnaa wiilkii uu la joogay, wuxuna soo galay guriga. Waxa kulmay Subeer oo albaabka afkiisa soo socda iyo qalalowda telefoonka markaa soo dhacay.

Subeer intaanu meel kale eegin ayuu telefoonkii haab haabtay oo kor u qaaday, markuu dhegta saaray telefoonkii wuxu maqlay cod dumar oo leh "Halloo", wuxuuna ugu hal celiyey: "Waa tuma,". Salma ayaa si deg deg ah ula soo booday hadal aad moodo in firkanax ku jiro, waxayna tidhi: "Wallaal waa Salma ee iska Waran."

Subeerna wuxu ugu jawaabay, "Wallaal waan fiicanahaye, adigu iska waran." Weedho salaan ah markii la isu celiyey ayay Salma hadalkii qaadatay, waxayna tidhi: "Wallaal Subeerow

Agtaada markaan
imaado Uurkaygu wuxu
jeclaa waxaan ku odhan
lahaa afkaan kala
maagayaa, indhaha
Nuurkoodiiyow
warkaygan iidheh iyo
Ogaysiis hawmalayn

Agtaada markaan
imaado Uurkaygu
wuxu jeclaa waxaan
ku odhan lahaa
afkaan kala
maagayaa, indhaha
Nuurkoodiiyow

warkaygan iidheh iyo

ogaysiis hawmalayn

Laakiin haddii aan kuu guudmaro waayihii ila kulmay muddadii aynu kala maqnayn ma aha sheeko aan caawa iyo dhawr habeen oo kale toona kuu dhammaystiri karayo, balse waxaan kuu taataabanayaa inta ugu muhiimsan.” Dabadeedna Salma waxay ka warantay waayaheedii, waxayna tidhi:

“Waad ogayd oo halkan waxaanu iska raacnay inaabtigay Mursal oo ahaa wiilkii ay reerkayagu igu dareen, dabadeedna markii aanu Jarmalka tagtay waxaa khasab igu noqotay inaan aqbalo guurkiisa, maadaama ay hawsha hooyaday ku xidhan tahay, isla markaana ay waalidkay igu cadaadiyeen.

Sidaa darteed, markaan Jarmalka tegay waxaan la aqal galay Mursal oo aan ooridiisana noqday, laakiin markii aanu muddo wada joognay waxa soo yaraatay muxubadii iyo rabitaankii dhexdayada, ilaa ay arrintayadu markii dambe gaadhay in aanu isku dhacno oo aanu si weyn isu qabano, wuxuna aakhirikii isqabadkayagu gaadhay inaanu noqono dad ku kala nool laba meelood, waxaananu kala maqnayn hadda ilaa labo sannadood iyo badh.

Sidaan u malaynayno inaan kuu sheegay Mursal gabadh Jarmal ah ayaa u dhashay laba carruur ah oo hadda dad waaweyn ah, laakiin gabadhaa waqti hore ayey is fureen, balse carruurtii markii ay maqleen inuu aabbahood gabadh kale guursaday ayey ka shaqeeyeen sidii ay aabbahood iyo hooyadood isugu celin lahaayeen, wayna ku guulaysteen inay aabbahood iyo hooyadood dib isugu guuriyaan.

Arrintaasi markii ay dhacday ayaan ka tegay Mursal, waxaanan intii muddadaa ka dambeeyey si keli ah ugu noolaa magaalo kale oo aan ahayn magaalada uu Mursal degan yahay.

Muddadii aanu kala maqnayn aniga iyo Mursal wax xidhiidh ahi nama dhexmarin, waayo isna ilama soo xidhiidhin, aniguna uma aan baahnayn inaan la xidhiidho, imikana ma jirto wax caqiibo ah oo na dhexyaal.

Sidaa darteed waxa keliya ee aan hadda sugayaa waxa weeye inaan warqadaydii ka helo. Ta kale haddii aan kaaga jawaabo su'aashaadii ahayd immisa carruur ah ayaad Mursal u dhashay, "Wallaal ma jirto wax ubad ah oo aanu isu leenahay aniga iyo Mursal, waayo muddo dheerna waanu kala maqnayn oo meel ku maanu wada noolayn, muddadii aanu wada joognayna Illaahay ubad nama kala siin, sidaa darteed wax carruur ah ma lihi."

Salma markii ay iska waayo warantay, waxay u gudubtay dhinaca Subeer, waxayna tidhi:

"Wallaal Subeer wixii ka dambeeyey isqabadkayagii aniga iyo Mursal, waxaan jeclaa mar walba inaan kula soo xidhiidho, laakiin waan kugu soo dhici waayey, waayo markasta oo aan damco inaan kula soo xidhiidho, waxaan xusuusanayey sidii foosha xumayd ee aan kaa yeelay, taas ayaana sababtay inaan kugu soo dhici waayo."

Salma waxay hadalkeeda ku soo afjartay "kuu badiyaye intaa ayaan ku dhaafayaa xog warankaygii la xidhiidhay waayihii I soo maray muddadii aynu kala maqnayn ee adiguna iska waran."

Salma waxay hadlaysay in ka badan saacad iyo shan iyo toban daqiiqo, intaana Subeer waa ka gurayey oo mar qudha kama dhexgelin, waayo Subeer aad buu u xiisaynayey sheekada Salma, maxaa yeelay waxay ka waramaysay arrin muhiim ah oo uu Subeerna warkeeda doonayey.

Arrintu sida ay doonto ha ahaatee, waxa hadalkii la wareegay Subeer, wuxuuna ku billabay:

"Horta Salmaay ma dhacaan waxaan Illaahay qorini ee taa ogsoonow, aniguna waan ogsoonahay.

Ta kale anigu ma ilawsani inaan ku jeclaa, adna aad i jeclayd, balse hore ayaa loo yidhi nina calaf aan loo qorin iyo qadar Alle ma dhaafo, umana arko inaad wax qalad ah iga gashay.

Duruufaha iyo waayaha kula kulmayna waa wax dunidaba ka dhaca, adduunkana haddii uu qof waliba waxa uu doono yeelayo oo aan cidi ka hor imanayn, cidiba isma qabateen, markaa wallaal aniga waxba taa ha iga raaligelin, hana ka tiiraanyoon ee iskaga gudub.”

Subeer markuu intaa yidhi ayuu isna iska xog warramay, wuxuna yidhi:

“Aniga waadigii halkan igaga tagey, markii aad tagteyna waxay reerkayagu igu billaabeen guurso, taas oo uu odayga aabbahay iigu darnaa, aniguna waxaan isla soo taagay guur nafsad uma hayo, sidaa darteed markii aanu aniga iyo odayga muddo isla kadeednay ee odayguna i lahaa guurso, aniguna aan marba jar isku taarayey ayaan maalintii dambe odayga ku idhi Aabbe waxbarasho debeddeed ii dir, marka aan soo dhammaystana aan guursado, taas ayuu iga aqbalay, dabadeedna sidii ayaan ku tegay dalka Baakistaan, halkaas oo aan ku dhammaystay Jaamacadda Dhaqaalaha, waxaanan dib ugu soo noqday dalka, balse tan iyo markii aan soo noqday waxa jawaabteeda la iga sugayaa arrintii ahayd inaan guursado marka aan Jaamacadda soo dhammeeyo, illaa haddana kama jawaabin, mana hayo wax aan kaga jawaabo.”

Sidaa darteed Salmaay ilaa hadda maan guursan, dabadaana guur daayoo, xataa gabadh lamaan sheekaysan.

Hase yeeshee marka la eego culayska iga saaran xagga reerkayaga iyo jawaabta sannadaha badan la iga sugayey, waxa hadda xaaladu taagan tahay marxalad ay lagama maarmaan tahay inaan waalidkay jawaab ka siiyo arrinta guurkayga, taas oo noqonaysa inaan guursado, wallow aanan ilaa hadda gabadh aan guursado haynin, balse waxay doonto ha noqotee, waan ku khasbanahay inaan guursado.”

Markii uu Subeer hadalka halkaa marrinayey ayey Salma ka soo dhexgashay, waxayna su’aashay sababta uu dabadeed gabadh kale ula

sheekaysan waayey ee ka horjoogsaday, waxa gabadh qurux badan magaalada is luleysa. Subeer waxa uu ugu jawaabay:

"anigu mar baan cid calmaday midii aan caashaqayna, calafkaa isku kaayo diiday oo hore waxa loo yidhi ma cuntid ceesh aan lagu qorin. Gabadhaa dabadeedna waxan aad oga baqaa in aan ku dhiirado dhex gelida dumarka. Ee laakiin adigu waad iga nasiib wanaagsan tahay maadaama aad heshay qof kula wadaaga nolosha sideedabana guurku waa nasiib wakhtigan aynu joognana way adag tahay sida aad u hesho qof aad la qaybsato ama aad la wadaagto nolol, markaa wallaal anaa og dhibaata ay leedahay kelinimadu, qof xun oo aad haysataana wuxu dhaamaa wax la'aanta, waxaanan wallaal kugula talinayaa maadaama uu inankaasi si wanaagsan kaa yeelay markii hore, ehelna tihiin oo abtigaa dhalay sidoo kalena ilaa hadda uu kugu xidhan yahay meherkiisu waa in aad is dhawrto, isu aragto xaas, una dul qaadato dhib kastoo kaaga timaada dhinaciisa, waxa aad reer arkayso ee dhisani mid waliba sidaadan oo kale ayuun buu ku bilaabmay iyadoo ay sidaa tahay haddana wuxuunbaa guulaysta labaada qof ee nolosha ka adkaada markaa wallaal anigaa maanta garan lahaa haddaan gabadh haysto ee waxan kugula talinayaa in aanad si dhib yar uga bixin xayndaabka quruxda badan ee ah guurka."

Inta uu subeer waday hadalka ku saabsan waanada, wanaag faristaj iyo u caqli celinta Salma way karaahiyeysanaysaa mawduuca waanada ah ee ku saabsan arrinta Mursal iyo iyada u dhexaysa, waxaanay ka doorbidaysay in ay ka qaadato warqadeeda maadaama aanay markii horeba u guursan jaceyl ee uu ahaa mid ku yimi nasiib iyo calafka oo meesha ka adeegaya waxaana ugu xiiso badnaa erayadaa uu subeer ku lahaa in ay ka hesho kuwo kale oo la xidhiidha iyada iyo Subeer waayahoodii jaceyl iyo wakhtigii ay soo mareen iyo waxa ay hadda yeeli doonaan. Sidaa darteed waxay mar walba ku dedaalaysaa inay Subeer ku soo dabaasho sheekada cusub, waxaana erayadeeda ka mid ahaa: "Wallaal Subeeroow aniga iyo Mursal

way noo kala dhamaataye, iska dhaaf arrintayada iyo hadal haynteeda oo inoo wad sheekadeena.”

Salma waxay aad u xiisaynaysaa sheekada cusub ee dib ugu bilaabantay iyada iyo Subeer, waxayna Subeer kor iyo hoosba ugu dhigaysaa hadalo sarbeeb ah oo ay ku abuurayso jawi rabitaan oo dhexmara iyada iyo Subeer. Subeer iyo Salma waxay Telefoonka dhegta hayaanbka waxay saacaddu gaadhay 1:30-kii habeenimo, Dabadeedna Salma ayaa tidhi: “Wallaal Subeeroow, waan ku hurdo seejiyey iga raali ahaw, waana inoo habeen dambe, waynuna wada cashaynaynaa oo anigaa ku casuumay.”

Inkastuu u arkayey in ay tahay gabadh soddoh ah oo laga wanaagsan yahay in lagu arko ag joog joogeeda haddana Subeer wuxu ku jawaabay: “Waayahay Wallaal, isagoo tixgelinaya xidhiidhkii jaceyl iyo wallaaltinimo ee wakhtiyada qaar ka dhaxayn jiray walow ay yar tahay dad sidaa wax u qadariyaa haddana waxan odhan karnaa subeer wuxu ahaa wiil Illaaahay ku manaystay Iimaan, Samir, Dulqaad iyo Deeq oo umaba arkaba in wax dhibaato ah ay u geysatay gabadhan Salmi iyadoo ay arrintani ahayd mid aayahiisa, noloshiisa iyo dadnimadiisaba meel kaga dhacday oo uu ku dhawaaday in loo dhigo Cusbital ama lagu xidho mid ka mida jeelasha dadka waal waalan haddana isaga oo yaqiinsan Illaahay ayaa wax walba wuxu ku dhaafay aaminaada Alle iyo samirka aan cidna loola simin ee Illaahay ugu deeqay. Intaa ka dibna waxay is yidhaahdeen "macasalaama" wayna dhigeen telefoonadii. Telefoonka ay saacadaha badan kula hadashay Subeer, waxay Salma xusuusisay waayihii caashaq ee waqti hore dhexmaray iyada iyo Subeer, taasina waxay keentay inay Salma markii ay Telefoonka dhigtay sariirteeda dusheeda gal-galato, iyadoo uu qalbigeedu dib u soo fadhayo xusuusta Subeer iyo waqtigii ay isla soo mareen Subeer.

Dhinaca kale ninkii Subeer habeenkaa waxa casho u noqotay sheekada Salma, sidaa darteed markii uu telefoonkii dhigay ayuu deg deg isu tuuray isaga oo ilawsan cunaba, xataa habeenkaa wuxu Subeer ilaaway inuu

sariirtiisa ku seexdo, sidaa darteed markii uu waagii beryey ayuu is arkay isaga oo ku jiifa mid ka mid ah furshaanka dhuudhuuban ee fadhiga qolkiisa.

Sidoo kale habeenkaa, wuxu Subeer ku seexday shaadhkii iyo surwaalkii uu ku lebisnaa maalinimadii iyo xataa kabihi.

Ilowshiyaha intaa le'eg ee subeer ku dhacay ma ahayn mid naftiisu dareentay ama u jan jeedhsantay xaga Salma balse waxa ka yaabiyay sida ay u wada hadleen isaga iyo Salmi iyadoo uu mar walba ka door bidayay in uu iska fogeeyo, subeer ma aha nin u bartay soo jeedka habeenkii waxaanu habeenkii inta badan seexan jiray inta ka horaysa tobanka taasi waxay kelifatay in uu ku dhaco ilowshiyaha intaa le'eg.

markii ay qoraxdu soo baxday ayuu Subeer iska beddelay dharkii uu ku seexday oo dhar kale ku lebistay, ka dibna shaqo tagey.

Maalintaa habeenimadeeda waa habeenkii ay Salma casuuntay Subeer, waxayna balameen 7:30-kii fiidnimo. Sidaa darteed abaaro 5:00 galabnimo ayey Salma isu diyaarisay qaabilaada Subeer, waxayna noqotay istaanbay, iyadoo ku lebisatay dharkeeda intii ugu quruxda badnayd.

Salma ilaa maqribkii waxay ku mashquulsanayd lebis iyo isdiyaarrin, inkasta oo ay Salma lebisatay dharkeeda intii ugu quruxda badnayd, haddana saaxiibadeeda la talinaysa oo ah muraayada la isku daawado ayaa marba tusaysay waxa ka khaldan, markaas ayey dib u hawgaleysay, waxayse aakhirikii Salma iyo la talisadeedu isla go'aansadeen bedlad isu eg oo aad u qurux badan.

Goor ay abaaro 6:00 maqribnimo tahay ayey Salma iyadoo diyaar ah debeda uga soo booday qolkeedii, balse iyadoo aan dhaafin daaraha guriga ayuu telefoon soo dhacay.

Telefoonka waxa soo diray Salma odaygeedii Mursal, waxaana telefoonka qabtay Salma hooyadeed Ruun oo Mursalna Eddadii ah.

Mursal, wuxu hadalkiisa ku bilaabay: "Eddo Ruun waa Mursale iska warrama." Hooyo Ruun ayaa u celisay, "Eddo Mursal aad baanu u wanaagsanahay ee idinkuna iska warama."

Hooyo Ruun iyo Mursal markii ay is dhaafsadeen salaan iyo waxoogaa xaal waraysi ah, ayuu Mursal yidhi: "Eddo Ruun, ma joogtaa Salma."

Islaantii Ruun intii aanay u jawaabin Mursal ayey u yeedhay Salma oo ay tidhi:

"Salmaay soo carar." Salma aad bay u karaahiyaysanaysay yeedhmada hooyadeed oo way ka naxday, waayo waqtigii ay la balantay Subeer, ayaa kaabiga u soo saaran, laakiin markii hooyadeed telefoonka ugu yeedhay way soo carartay.

Salma markii ay telefoonkii kor u qaaday ee ay dhegta saartay ayuu Mursal yidhi: "Salma waa Mursal iska waran, ma fiican tahay, xaaladadu waa sidee ma xiisaynaysaa inaad Jarmalka ku soo noqoto, mise waad nacday."

Mursal qader dhawr miridh ah ayaanu Salma wax fursad ah siin oo uu hadal xidhiidh ah boobsiiyey, wuxuna hadalkiisa ku soo afjaray, "Wallaal anigu aad baan u fiicanahay muddadii aad iga soo maqnaydeena waxa ii dhashay ilmihii saddexaad ee ay ii dhasho xaaskaygii aanu isku noqonay ee carruurta waaweyn ii lahayd, ilmaha ay hadda ii dhashayna waa wiil, iyadu aad bay u wanaagsan tahay ee adigu iska warran wallaal."

Salma aad bay uga xanaaqday waxyaalaha faraha badan ee isu dabo dhigay, waxay hoosta iska odhanaysaa "tolow ma wuxuu kuugu faanayaa inuu dhaqan yahay oo carruur badan dhalay iyo inuu naagtiisa jecel yahay." Salma hadal badan kama sii gurin Mursal, waxayna si taxadir leh u siinaysaa jawaabo kooban, iyado odhanaysa, "Wallaal ma jeceli in aan telefoonka wax xumaan ah kaa idhaahdo, balse haddii aad jeceshahay wanaageena wax

kale kaama rabo'e warqadaydii ii soo dir, ta kale anigu weligay ku soo noqon maayo Jarmalka."

Mursal aad buu u qoslay, waxaana Salma afkeeda ugu soo baxay kelmad uu doonayey oo ah isoo fur, taasoo uu iska diidayey inay dhinaciisa ka timaado oo aan hadhow lagaga caban, laakiin waqtigan ay Salma waraaqda waydiinayso Mursal wayba ka furan tahay oo waraaqdeedi furiinku waxay ku jirtaa khaanada kabadhka

Mursal, wuxuna qoray 15 maalmood ka hor intii aanay Hargeysa iman, waqtigaas oo uu goostay inuu furo. Sidaa darteed Mursal, wuxu Salma ugu jawaabay, "Wallaal waxba taa ha ku xiiqin mar hore ayaan go'aansaday in aan ku furo, warqadaadii furniinka gacanta ayaan ku hayaa, isla caawa ayaana faakis (Fax) kuugu soo dirayaa.

Ta kale lacagtaadii meherkana waanba soo diray oo waxay la socotaa lacag Islaanta

Ruun ee Eddaday aan u soo diray oo hadda xawaaladda taal. Sidaa darteed Wallaal Salmaay sidaa ku abshir dheh."

Intaa dabadeedna waxay Salmi ugu jawaabtay weedhahan, "Wallaal Mursalow marna Xumaan uma qabo furiinka aad isoo furtay, laakiin hadalkaaga oo dhan hadda kama wada jawaabi karayo oo waxa ii taal hawl aan fursad ii ogalayn ee habeen dambe hadahan oo kale ila soo hadal."

"Waayahay iyo waayahay" inta la isdhaafsaday ayey Salma telefoonkii isa saartay.

Hooyo Ruun oo qolka Telefoonku yaalo hortiisa fadhiday, ayaa isha ku dhufatay Salma oo qolku ka soo booday, iyadoo faraxsan, dabadeedna waxay hooyo Ruun gabadheedii Salma ku tidhi: "Hooyo Salmaay waadigan faraxsane muxuu kugu yidhi inaabtigaa ama odaygaagii, ma wuxuu kugu yidhi waan kuu imanayaa, mise lacag buu kuu soo diray."

Salma iyadoo hooyadeed Ruun agtaagan oo aan weli uga jawaabin su'aashii ay weydiisay ayaa albaabkii gurigala la soo garaacay, waxaana qofkii garaacayey ka furtay gabadh shaqaale ah oo guriga joogta. Qofkii guriga laga furay, wuxu noqday gabadh yar, waxayna gabadhii yarayd tidhi: "Salma ma joogtaa." Haa baa loogu jawaabay, dabadeedna waxay gabadhii yarayd haddana tidhi: "wallaal iigu yeedha." ka dibna gabadhii yarayd ayaa Salma u sheegtay fariin oo ku tidhi waa lagu doonayaa.

Salma intay si deg deg ah u dhaqaaqday ayay hooyadeed ku tidhi: "Hooyo aroos baan tegayaa oo waan ka habsaamaye ee waa inoo soo noqodka." intaa ka dibna Salma albaabka ayey ka booday.

Salma markii ay gurigooda debedda uga soo baxday aay intaanay meel kale eegin ayay si deg deg ah u daymootay goobtii ay Subeer ku balameen oo gurigooda u muuqata, waxayna isha ku dhufatay baabuur yar oo ah nooca tagaasida loo yaqaan oo midabkiisu cad yahay, laakiin gabadhii yarayd oo weli Salma la joogta ayaa ku tidhi: "Qofka ku doonaya ee ii kaa soo diray, wuxu ku jiraa baabuurka yar ee halkaa taagan gudihiisa."

Salma intay deg deg uu soo dhaqaaqday ayey u timi baabuurkii, saa waxa dhexfadhiya Subeer oo yaaban oo ilaa 40 daqiiqo sugayey.

Salma intay tidhi: "wallaal iga raali ahaw" ayay baabuurkii fuushay, waxayna Subeer uga cudur daaratay sababta ay u habsaantay, waxayna tidhi: "Wallaal Subeerow wax kale kaagamaan habsaamine waxa telefoon igula soo hadlay ninkii iqabay ee aanu ilmaabtiga ahayn oo aanu indoora telefoonka ku wada hadlaynay, wuxuna isoo garaacay xilligii uu soo dhawaa waqtigii ballanteenu markaa iga raali ahaw." Subeer baa isna ugu hal celiyey, "Wallaal Salma waad mahadsan tahay raaligelinta aad i raali gelisay, sababta aad u habsaantayna waa mid macquul ah ama muhiim ah."

Intaa markii la is dhaafsaday ayuu baabuurkii meeshii taagnaa uga dhaqaaqay jihada waqooyi oo ah meesha uu ka xigo hudheelka u qorshaysan inay ka wada casheeyaan. Casuumadda cashada waxa fidisay Salma, maalinimadii ayeyna soo balamisay, dabadeed markii ay hal cabaar ah ka socdeen goobtii ballanta ee ay isugu yimaadeen ayay albaabka ka galeen hudheelkii, baabuurkii ayay dhigeen meel baarkin ah ka dibna waxay badhida la heleen labo kursi iyo miis gaar ah oo loo sii diyaariyey, waxaana miiska iyo kuraasta loo dhigay buqcad gaar ah oo aanay cidi u dhawayn oo weliba qurux badan oo ay dhir cagaar lihi ku hadoodilan tahay ayna u ifayso xabad guluub ah oo iftiinkeedu u egyahay midabka cadceed godka sii gelaya.

Salmaiyada ayaa qaabilaada iyo maamulka casuumadda leh, maadaama ay iyadu wax casuuntay. Goobta ay fadhiyaan waxa ka dhacaysa laydh macaan, waxaana sanku qofku urinayaa caraf iyo udgoon, waayo waxa dhacay waxoogaa foore ah oo aan dhaxan iyo dhiif kulayl midna lahayn, isla markaana waxa kaamboolka hudheelka dhexdiisa ku yaal dhir aad kaymo moodo oo kala nooc-nooc ah, iyadoo dhirtaasi isugu jirta qaar la beeray iyo qaar dabiici ah intaba.

Sidaa darteed marka la isku darro dhirta kala nooc-nooca ah iyo nalalka kala jaadjaadka ah ee ku sharaxan kaamboolka hudheelka waxa qofka goobtaa soo dhex fadhiista ku filan il-doogsiga iyo muuqaalka qalbiga u roon ee meesha yaal, isla markaana waxay dareenka qofka ilowsiinaysaa xusuusta wixii dhibaato ah ee soo maray.

Subeer iyo Salma intii cuntada loo soo aggaasimayey, waxay mararka qaarkood ku mashquuleen daawashada quruxda goobta ay fadhiyaan, balse inta badan iyagaa isku mashquulsanaa, waayo waxay isdhaafsanayeen sheekooyin iyo su'aalo googoos ah oo ay isku xaal warreysanayaan.

Subeer inkasta oo uu xiisa u qabay inuu Salma waydiiyo wax walba, haddana wuu ka xishoonayey inuu Salma weydiiyo su'aalaha qaarkood, waayo uma arko gabadh madaxbannaan oo uu la haasaawayo sidii wakhtiyada qaarkood, balse wuxu u arkaa inay tahay qof xaas ah oo ay keliya ka sheekaysanayaan macruufad qadiim ah iyo muxubaddii wallaalaysay waqti waqtiyada ka mid ah.

Cashadii oo ka kooban cuntooyin kala nooc nooc ah ayay shaqaalihii hudheelku marba qaar miiska soo dhigayaan, laakiin Salma iyo Subeer iyagaa isku mashquulsan oo ma oga waxa ka socda miiska dhexdooda yaal.

Hase yeeshee goor dambe oo ilaa nusa-saace laga joogo markii cuntada loo soo dhammeystiray ayay ku baraarugeen miiskii oo buuxa oo aanay waxbka ka dhinayn wixii ay dalbadeen.

Dabadeedna cuntadii bay ku foorarsadeen, laakiin inta la aamusay cuntadii oo qudha lama wadaagine, waxa la isku dhexwaday cuntayntii iyo sheekadii, qosol yar yar, weedho macaan iyo milicsi dareen leh, ayaa la wadaagay, waxaana lagu wada casheeyey dareen farxad leh iyo qaabilaad xurmo ku dheehan tahay.

Hase yeeshee Salma iyo Subeer markii ay cuntadii ka fan jeediyeen miiskii cuntada may sii fadhiyin ee deg deg ayay uga kaceen, laakiin haddana may tegin oo hudheelkii kama ay bixin. Cajeb! Oo haddii ay miiska ka kaceen meeshiina aanay ka tegin, isla markaana ay casheeyeen oo ay miiska ka dulkaceen, tolow, maxay sameeyeen?

May tagin meel kale manay ka bixin hudheelka ee waxay u digo rogteen agagaarka mutulkii ay fadh fadhiyeen halkaas oo loo dhigay kuraasi ay ku cabaan cabitaan.

Muuqaalka yaabka leh ee hudheelka iyo cuntooyinka la soo hor dhigay iyo guud ahaanba bilicda iyo hannaanka adeeg ee hudheelka Subeer aad buu ula yaabay, waxayna ku noqotay wax cusub, waayo muddo dheer ama weligiiba casho, qado iyo quraac toona uma doonan hudheel, wuxuna saddexda waqti ee cuntada iska xaadirin jiray gurigooda oo aanu weligii ka habsaamin maadaama aanu lahayn mataan uu la soo casheeyo amaba aanu yeelan guri kale oo uu kaga maarmo ka hooyadii.

Subeer iyo Salma markii ay fadhiisteen miiskii ay uga digo rogteen miiskii cashada, waxay halkii ka sii waden sheekooyinkooda la xidhiidhay is xaal waraysiga.

Salma ayaa ugu horreyn sheekada qaatay, waxayna Subeer uga warantay wadahaadalkii dhexmaray iyada iyo odeygeeda Mursal galabnimadii markii uu telefoonka kula soo hadlay, waxayna tidhi:

“Subeerow, wada hadalkii galabta telefoonka nagu dhexmaray aniga iyo odaygayga Mursal, wuxu ku saabsanaa sidii aanu u kala tegi lahayn, aniguna waxaan markiiba u qadimay inuu warqadaydii ii soo diro, isla markaana waxaan u sheegay in aanan dib ugu soo noqnayn Jarmalka.

Salma markii ay halkaa sheekada marinaysay, ayaa Subeer oo si dhugmo leh u dhegaysanayey hadalka Salma, wuxu ku hal celiyey,

“Wallaal Salmaay, maxaa kugu kelifay inaad gurigaaga dumiso oo aad odaygaaga ku khasabto in uu ku furo, maad reerkaaga iska dhaqatid oo iska daysid kala taga iyo furiinka, horaa loo yidhi Reer hadda la dhisayaa ma gaadho reer hore u dhisnaa, Soomaaliduna waxay tidhaahdaa reer saaka talo guuray reer galabta soo guuray ma gaadho. Sidii uu markii horeba telefoonka uga sheegay ayuun buu markana ugu waaniyay in aanay ku deg degin furitaanka.

Sidaa darteed hadda waxaad tahay Marwo la qabo, laakiin haddii aad arrintaa ku adkaysato oo aad sidaa isku furtaan odaygaaga berito waxaad yeelanaysaa naanays kale, taas oo laguugu yeedhi doono hebli waa Carmal ama waa garob iyo waa tii la furay, markaa anigu Subeer ahaan, waxaan mar walba kugula talinaya inaad odaygaaga deysato oo aad u dulqaadato wixii xumaan iyo dhibaato ah ee aad

ka tirsanayso iyo haddii ay hadda ka dib xumaan kale idin kala gaadho.” Salma ayaa haddana hadalki qaadatay, waxayna tidhi:

“Subeerow, wallaal taladaada waxan u qaadanayaa nasteex iyo in aad tahay qof wanaageyga jecel, laakiin horaa loo yidhi niyad kaa sii jeeda lama soo jeedin karo, taas oo macnaheedu yahay inaan niyada qofka lagu khasbi Karrin meel aanay rabin, aniguna kum qanci karo, naftana kuma khasbi karo wax aanan rabin, markaa Subeerow wallaal iga daa ninkaa iyo hadalkiisa, waayo wax kasta oo aad igu tidhaahdo ama aynu iska nidhaahno ninkaa iyo arrintiisa, waxba ka beddeli mayso niyadayda, taladayduna marna noqon mayso inaan ninkaa ku noqdo, isaguna hadda wuu ogyahay inaanu kala raja go’nay, welibana waxaan kuu sheegayaa inuu ii sheegay inuu habeen dambe ii soo dirayo warqadaydii furiinka, lacagtii meherkaygana wuuba soo diray oo wuxu markii dhawayd ee uu telefoonka igula soo hadlay iigu sheegay inay lacagtii meherkaygu xawaaladda Hargeysa taal.

Balse waxaan Subeeroow adiga ku weydiiyey, Hadda halkee buu xalkaagu marayaa, goormaadse ku talo jiraa inaad guursato oo aad xaas iyo reer yaalato?"

Subeer oo hal cabaar ah aamusnaa, si degana u dhegaysanayey doodda iyo hadalada Salma ayaa hadalkii la wareegay, wuxuna yidhi:

Salmaay jawaabta su’aashaadu wa mid adag oo aan igu hawl yarayn, laakiin haddii aan isku dayo waxaan ku talo jiraa inaan arrintaa isku dayo

waqti dhow, balse waxaan kuu sheegayaa inaanay xageyga ka ahayn arrin hawl yar, waayo way adagtahay sida aad ku heshaa gabadh ku cajibisa oo ay quruxdeeda, dabeecadaheedu iyo dadnimadeedu kugu filaataa, sidaa darteed dareenkaygu wuxu mar walba negi ku yahay inuu arrintaa ka fekeriyo.”

Salma ayaa Subeer ugu hal celisay: “Subeeroow wallaal maxaad sidaa ugu hadlaysaa, imisa gabdhood oo qurux iyo qiime leh baa magaalada jooga ama hore kuu soo maray.”

Subeer baa isna yidhi:

“Wallaal Salmaay quruxdu ma aha inta muuqata oo qudha ee intaa way ka qoto fogtahay, tusaale ahaan haddii aan dib ugu noqdo sooyaalkii iyo waayihii caashaq ee labadeena ina dhexmaray oo aan tilmaan yar ka bixiyo sababtii ama sababihii ay nafteydu kugu jeclaatay, waxaan odhan karaa miyaan helayaa gabadh samirkaagii oo kale leh, akhlaaqdaadii oo kale leh, dabeecad wanaagaagii oo kael leh, yuhuun wanaagaagii oo kale leh, muuqaal wanaagaagii oo kale leh, waji fur-furnaantaadii oo kale leh, balse aan idhaahdo ma jirto gabadh qurux kugu haysataa.”

Subeer oo weli hadalkii sii wata ayaa intuu farta ku fiigo meel maqsin-yaraha ay fadhiyeen albaabkiisa ku toosan, wuxu yidhi: “Salmaay waxaas oo dad ahi adiga ayey ku eegayaan oo waxay daawanayaan suurada aan la heli Karrin ee Illaahay kuu sameeyey.”

Salma markii uu Subeer ku tiraabay weedhihii uu ku sifeynayey quruxdeeda, waxa dareenkeeda ku dhacay isbeddel, waxayna iyada oo aad moodo inay qajilsan tahay oo hoos u foorarta ku tiraabtay, “Subeeroow wallaal amaanta inaa le’eg iyo sifooyinka tirada badan e aad shaqsiyadayda ku bishay ma lihiye, ma waxaad dooneysaa inaan cirka dhaafo oo aan dhulka cagaha ka qaado, adigana aanan dib kuugu iman.”

Salma hadalka uu Subeer ku xusay waayahoodii jacayl, wuxu damqay qalbigeeda, ka dibna intay yara jidhidhicootay, wejigeedana waxoogaa ilmo ah ka masaxday ayay tidhi:

“Wallaal Subeerow ma anigaad igu sifeynaysaa qof samir badan oo wanaag badan, miyaanan ahayn qoftii intaad balanteen adiga oo sugaya iska guursatay nin kale, miyaanan ahayn qoftii intay dhooftay aan dib kuu soo xusuusan ee iska ilowday wixii ina dhexyaalay, sidaa darteed koley ma ogi inuu Illaahay waqti dambe oo mustaqbalka ah I gayeysiin doono taariikh wanaagsan iyo amaanta aad I huwisay, laakiin maanta kaa maan muteysan amaan iyo abaal wanaagsan toona.”

Hadalkii Salma wuxuu Subeer ugu dhadhamay garowshiiyo waxayna taasi ku noqotay qaadan waa iyo wax aanu filayn, waayo wuxuu is lahaa Salma koleyba way dafiri doontaa wixii gef ah ee ay ka gashay waayahoodii caashaq iyo sidii ay dhinaceeda u liicisay, laakiin wuxuu u arkay hadalka u dambeeyey ee Salma ka soo yeedhay inay qiratay gef weyn iyo meel ka dhac ah, taas oo ay is tustay inaanay u qalmin ammaanta uu Subeer ku billay.

Sidaa darteed Subeer isaga oo u jawaabaya Salma wuxuu yidhi:

"Salmaay iska dhaaf sidii wax u dhaceen, laakiin aniga waxaad iigu qiimaysnayd xulashi naagood iyo qof loo xusho qofkii ugu wanaagsanaa, balse hadeer waxa igu adag ama igu dhib ah helitaanka iyo u hawl gelida qof dhigaaga ah sidaan horeba kuugu sheegay aniga iyo dumarku waxanu kala nahay laba aan marnaba isku iman karrin, anigoon wax badan odhan adiguba waad ogtahay waxa aan u diidayo in aan mar dambe dib u jaleeco dil dilaacyo badan iyo dibin daabyo xoog ah oo wadnahayga iyo waaxyaha jidhkayga weeraaro ka jeexay, waxan ogahay ama aan idhaahdaa Illaahayow dhibaato haween ha kuugu dambayso intii kaa soo gadhay

Salma, hadda wallaal kuma necbi oo waxad iigu jirtaa halka ay iigu jiraan wallaalahay waligayna ma ahi mid ku iloobi doona waayo nolosha ayaa ina walaalaysay, naftayda ayaad ka mid noqotay, ismaad lahayn ka tag, ku maad fekerin ka fogow mana aad is odhan xumee, xadhigiisa goo, balse waayaha adduun ayaa ina kala fogeeyay.

Salma, jawaabta su'aashaasi oo aad iila dheeraatay ayaa waxay tahay haddii aanan marnaba helayn mida aan calmaday horena ugu hungoobay waa in aan u hoggaansanaadaa halka uu Illaahay I mariyo.

Salma ma ogi oo ma garan karo ilaa wakhtigan aad tahay gabadha la qabo oo aanu Illaahay isku keen bannayn ayaa waxad moodaa haddana in qalbigayga aanad ka bixin, waxan arkayaa aniga oo ka baxay hawada aynu ku jirno, waxan arkayaa waxaan dadka kale ila arkayn waxan xasuustaa heestii ahayd:

***Inkastoo Salmi aqal yeelatoo,
Ubad kale dhashoo, Tahay oori nin kale,
Anigoo ogsoon, Kama aamusee,
Waa amar Alee Bal maxay indhuhu
Kaa eegayaan Bal muxuu afkani
Kuu amaanayaa Berigii aad ogayd
Jaceylkaan afkiyo Uurkaba ka jaray
Igu soo noqay Isagoo mar kale
Oodihii sitoo Aniga I hayaa
Bal maxay indhuhu Kaa eegayaan
Oo salmaay afkani Kuu amaanayaa***

Salma hayla yaabin hana odhanin malaha odaygii Subeer wuu soo laba kacleeyay, ma jecli ama maan rabin in aan dib kuu xasuusiyo meelo iyo nabaro aan ogahay in ay ku damqanayaan balse waxa keenay hadalkan iyo in kale oo badanba xaalada aynu hadda ku suganahay oo ah mid haddii

Abwaanadu ama hal abuuradu ay helaan u noqon lahayd sheekooyinka sida aadka ah loo xiiseeyo.

Salma ayaa hadalka qaadatay, kadibna tidhi:

"Subeerow, ma ogtahay in aanu uurku xejin karrin wixii uu afku rabo, ee ay ka soo fara baxsadaan, waayo aniguba anigoo og in aan ahay oori la qabo haddana waxan ogahay in waayaheenii jaceyl uu ahaa mid xaqiiqa oon la dafiri karayn, sidoo kalena ma aha wax inaga inagu xidhan ama aynu hadda ka talin karno waayo haddaynu tashan karayno hore ayaynu u tashan lahayn, taladuna waa ta Illaahay, inkastoo aanan anigu wax badan odhan karayn oo aan ahay qof dembiile ah haddana waxaan la dafiri karin jiritaanka shayga jaceylka oo ah mid asalkiisu yahay xaqiiq, wallaal ma iloobi doono ilmadii iga daadan jirtay iyo indhahaagii ooyi jiray haddana farxi jiray markasta oo aynu kulano, ma aha wax si dhib yar oga bixi kara qalbigayga erayadii aan beenta ahayn ee aynu rabnay in aynu ku dhisano guri xallaala. waxad kaga duwan tahay wiilasha da'daada ah ayaa ahayd adigoo mar walba ku dadaalayay ama u hawl galayey sidii aad u dhisan lahayd reer ku dhisan run, qofka kula abuurayaana yahay mid kula dheeli tiri kara ama kula qabyo tiri kara guriga aaad yagleelaysid, wallaal waxay inta badan ku burburaan dadku oo aanay is waydiin oo aan imika soo arkay waxa ka mida:

Ninka oo isku arka in uu isagu yahay qofka taladu ka go'do mar walba gabadhana ku yidhaahda wixii aan kuu yeedhiyo uun maqal.

Ninka oo u arka ooridiisa qof qalaad ama qolo kale ah oo ka qarsada inta ugu qiimo badan noloshiisa, isagoon ogayn in ay tahay qasnadii naftiisa, waxaanu mar walba galaa qaxar u horseeda burbur aan kabasho lahayn.

Gabadha oo ninkeeda ka dhego adaygta, iska ururisa waxba aan u sheegin wax walba ku halaysa, hiifta, hagar daamaysa, ka ilaalin wayda wakhtiga uu shaqada ka yimaado wixii naftiisa dhibaya iyadoo la saaxiibi wayda

odaygeeda, ulana farokaciyaari wayda sida wiilkeeda, tusida raxmada faraha badan ee ooridu tusto ninkeeda wuxu ka qayb qataa ama ay ka mid tahay waxyaabaha ugu waa weyn ee uu reerkaasi u sii jiri kara muddo fara badan.

Haddaba Subeerow wakhtigan aynu hadda joogno, oo aynu isku soo raacnay xogwaraysi iyo bal qof waliba in uu ka waayo waramo waayihiisii nololeed kadib markii muddo afar sannadood ah aynu kala maqnayn haddana waxan dareemayaa in waxoogaa kalgacal ahi I galayo taasoo ay sabab u tahay qalbigaaga nadiifta ah ee aan marnaba is beddelin ee aan dareemin wixii dhibaato soo maray. Wallaalo way yar yihiin dadka adiga oo kale ah, hadday dadku sidaada yihin waxba may xumaadeen, kuma faaninayo Subeerow, ee inta kugu dhacday hadday aniga igu dhici lahayd halkan caawa aynu fadhino waligay kulamaan fadhiisteen markan ugu yarahayna waxan ku kici lahaa aargoosi aan kaaga aargoosanayo ballanka aad igaga baxday iyo dhibaataadii laxaadka lahayd ee aan ku soo gaadhsiiyay adiga iyo reerkiinaba, walaal waxan ahay qof khalijalaysa, waxan ahay qof og in ay dembi gashay, waxan ahay midii aamusi lahayd tii is qarin lahayd, balse intaasi oo dhan waxan kaga bad baaday niyaddaada nadiifta ah iyo wakhtiga oo aniga ii hiiliyay adigana kaa hiiliyay waxanse ogahay in aad adigu tahay qofka badiyay, aniguna aan ahay qofka khasaaray ee maanta wuxu yeelo garan la'.

Subeer ayaa isna u hal celiyey:

"Wallaal, hadalkaagan dambe ayaa wuxu yahay mid si weyn u damqaaya nafsadayda waan is ilowsiiinayay, waxan iska dhigayay qof aan dhibaato soo gaadhayn, waxan naftayda u sheegayay in aan la iga guulaysan, waxan naftayda tusayay iftiin aanan arkayn iyo hirar beena balse habeenkan caawa ah waxad moodaa inaad soo afjartay rajadii noloshayda, waxan oga jeedaa, waan fiicnaa oo waan ladnaa oo waan bogsaday ka hor intii aynaan dib u kulmin, waxan aad uga ladnaaday ama aanan dib ugu laabanin fur furitaanka iyo dib u raacida jidkii madoobaa ee marka hore quruxda badnaa,

waxan naftayda ku haasaawiyaa in aan anigu ahaa Halyey aan waligii dhiniciisa dhulka la dhigin haddase Salma waxad naftayda u daah furtay in aan ahaa ninka laga guulaystay, la dhibay, u bukooday dartaa, kuu boholyoobay kuu baahday aadse kaga dhaqaaqday gego cidlo ah waan ogahay oo wakhtigaasi wuxu aha mid aynu kala dooranay dhibaataada waalidkeena iyo dhibkeena, waan ogahay oo hooyo Ruun maantaba cagaheeda ayay ku socotaa, aniguna ma dhimanin oo waaniga nool laakiin wakhtiyada qaar waxan qarka u saarnaa in aan noqdo qof waallan, Salma hawl iguma yarayn hadalna iguma jirin haddase waad I aragtaa, haa waa runtaa oo waxa aanan garanayn ilaa hadda tolow maxay indhahaygu kaaga dhaygageen, tolow muxuu afkaygu ugu muhanayaa amaantaada, tolow muxuu uurkaygu kuu doonayaa, tolow muxuu qal-bigaygu kuugu ooyayaa, mooyi sababtu waxay tahay bal adba!"

Salma intay hoos u foorarsatay ayey tidhi; "Wallaal, taasi way iska caddahay oo waa calaamadaha lagu yaqaan dareenka wax jecel."

Subeer iyo Salma waxay miiska isku dhaafsadeen xog waraysi dheer iyo doodo rabitaan ka muuqdo oo googoos ah, laakiin iyaga oo weli xiisa isu qaba oo uu midba midka kale dareenkiisa iyo weedhihiisa sida laydha u cabayo ayey saacadu isku taagtay 11:30 habeenimo, dabadeedna goor dambe ayey saacada is waydiiyeen, waa la eegay, saa waxay ku sii siqaysaa 12:00 habeenimo.

Subeer intuu hareerhiisa eego ayuu odhanayaa "Walaal hudheelka waynu ku raagnay waayo waxaynu dhex fadhinaay afar saacadood oo dhow dhow, laakiin anigu waxaan moodayey in aynu wada joognay ugu badnaan 30 daqiiqo."

Salma intay yar dhoola caddaysay ayaa, iyana tidhi: "Walaal, aniguba kula mid baan ahayoo, waxaan is lahaa imika haddii ay ugu badato waa ilaa

9:00, laakiin waan yaabay markii aan arkay halka ay saacaddu taagan tahay."

Hawl wadeenadii hudheelka laftigoodu way yaaban yihiin oo waxay hoosta ka leeyihiin, tolow qoladani meesha miyey u hoyanaysaa, laakiin Subeer oo kor u hadlaya ayaa yidhi "Walaal biilka la kaalaya"

Dabadeed wiilashii shaqaalaha ahaa ayaa biilkii oo diyaar ah la soo cararay, dabadeedna Salma oo casuumadda lahayd ayaa dhiibtay lacagtii, intaa ka dibna way baxeen.

Subeer habeenkaa waxa dareenkiisa ka muuqday xasilooni iyo deganaan badan, taasna waxa laga garanayey sida degan ee uu baabuurka u waday markii ay hudheelka ka baxeen ee ay guryaha u sii socdeen.

Subeer oo isteerinka gaadhiga si miisaaman u haystay hareeraha ayaa milicsanayey muuqaalka Salma oo fadhiday kursiga dhinaca ku haya ee shidhka. Subeer wuxuu Salma ku dejiyey meel albaabka gurigooda u jirta dhawr talaabo, kadibna markii ay Salma albaabkii gurigooda garaacday ayuu Subeer dhaqaaqay.

Salma waxa albaabka ka furtay hooyadeed Ruun oo ka wer-wersanayd meesha ay gabadheedu ku raagtay, waxayna hooyo Ruun tidhi: "hooyo Salma waanu yaabanayn ee xagee baad ku raagtay oo aad waqtigan ku maqnayd."

Salma ayaa hooyadeed ugu hal celisay "Hooyo, sownigii kuu sheegay inaan aroos tagayo, imikana arooskii ayuun baan ku maqnay ee meel kale maan jirin."

Laakiin Salma intaa kumay dayn hooyadeed, ee labada dhaban ayey dhunkasho raali gelin ah kaga dhufanaysaa, dabadeedna intay xagga

qolkeeda u soo daadihiso ayey in nususaace ku dhow dul joogaysaa oo cagaha u duug duugaysaa.

Hooyo Ruun-se waxay aad ula yaaban tahay farxada caawa ka muuqata gabadheeda Salma, waayo waxay ku aragtay farxad aanay ku arag muddo sannad iyo badh ka badan, laakiin Hooyo Ruun waxay farxadda u qaadatay inay tahay mid ka dhalatay hadalkii uu la soo hadlay inaabtigeedii qabay, waxayna Hooyo Ruun tidhi: "Hooyo Salma Illaahow isu kiin daa adiga iyo inaabtigaa, illayn haddii uu habeen walba kula soo hadlo sow sidan aad caawa u faraxsan tahay ayaad u faraxsanaan lahayd."

Intaa dabadeed Salmi waxay si toosa u gashay qolkeedii iyadoo daartay rikoodhkii u yaalay qolka, balse aan ogayn wakhtigu in uu yahay wakhtigii la seexan lahaa, cabaar ayay iska dhagaysanaysaa cajalado ay ku duuban yihiin heeso kala duwan oo jaceyl ah isla markaana waxa bogeeda saaran sawir uu leeyahay subeer oo ah kii ay wada galeen maalintii ay kala ambabaxayeen kaas oo ahaa mid xasuus weyn qalbiga ku reebay.

Haddaba bal aynu eegno heesta goortaa u socotay oo ah

tan:- Inan yahow daraadaa

Anfacada ma dayo oo

Dibnaha ma saaree

Sida ilin uu daad maray

Ama ubaxa dayreed

Indhahaa ku doortoo

Qalbigaad dul joogtaa

Dab markaan ka baydhiyo

Imikoon da'daa ahay

Waan ku daawadaayoo

Dadkaan kaa jeclaystee

Haydayrin wiilyow

Cabaar kadib ayaa Hooyo Ruun ay u soo baxday xaga bannanka waxaanay maqlaysaa dhawaaqa heesaha ka shidan qolka ay inanteedu gasho iyadoo yaaban si aayarana u socota ayaa waxay waydiisay "Hooyo maxaa xilligan ku soo jeediyay miyaad xanuunsanaysaa mise farxadii ayuun baa kula fogaatay."

Salma ayaa hooyadeed ugu hal celisay: " Hooy maya ee xannuun ima hayo." hooyo Ruun ayaa tidhi, "Cajeb!!" oo u dhaqaaqday in ay salaadeedii iska tukato, laakiin markii waagii saani u beryey ee dadkii oo dhammi soo toostoosay ayey Salma qolkeedii debedda uga soo baxday, iyadoo ay indhuhu casaan-dartii xinjir dhiig ah u egyihiin, ilayn waa qof xalay oo dhan soo jeeday oo aan mar keliya il bidhiq isku siine, sidaa darteed markii ay quraacatay ayey qolkeedii dib ugu noqotay oo seexatay.

Subeer isagu dhinaciisa habeenkaa si degan ayuu u seexday, subaxdiina wuu shaqo tegay oo meheradahoodii ayuu kala maamulayey.

Subeer waxa ku taagan ballantii ay aabbihii Dhamal isku ogaayeen ee ahayd inuu si dhakhso ah gabadh u soo xusho, ka dibna loo dhiso, laakiin wakhtigan xaadirka ah Subeer jawaabtu waa ka diyaar, wuxuna doonayaa inuu aabbihii u sheego inuu soo xushay Salma.

Hase yeeshee odayga laftiisu dhinac buu baadidoon kaga jiraa oo wuxu intaa baadhaya gabadhii uu wiilkiisu guursan lahaa, haabkana kuma hayo inay mar kale soo noqotay sheekadii Salma, sidaa darteed isla habeenkii ay Subeer iyo Salma foodda is dareen ee uu Subeerna hoosta ka go'aansaday inay Salma tahay gabadha uu soo xushay, ayuu odayga aabbihiiina gabadh kale soo xulay, gabadhaas oo uu dhalay nin ay odayga saaxiib yihiin, waxa uu Subeer Aabbihii doonayaa inuu wiilkiisa ku wargeliyo inuu gabadhaa u soo dooray, isna uu la soo sheekaysto arrin guurna la soo dhammeeyo.

Subeer iyo aabbihi gelinkii hore oo dhan fursad isuma ay helin, laakiin waxay isa soo raaceen xiligii qadada ee ay soo rawaxayeen, dabadeena odaygii Subeer aabbihi, wuxu go'aansaday inuu fursadaa oo ay labadooda keliya yihiina uga faa'iidaysto, una sheego arrinka, wuxuna oday Dhamal hadalkiisa ku bilaabay:

"Aabbo Subeeroow muddo badan ayay qaadatay intii aan kaa warsugayey ee aan is lahaa ikhtiyaarkiisa gabadh ha ku soo heloodo, ismana aan lahayn waqtigan wiilkaagu kelinimo ha ku soo gaadho ee waaan ku talogalay inaad maanta oori iyo ubadba yeelato, haddii Eebbe idmo oo aad barbarkayga degto, laakiin Aabbo taa waad la raagtay ee bal ka warran haddii aad talada igu soo wareejiso oo aan gabadh anigu kuu soo xulo, wallow aad dhowr goor oo hore igu diiday hablo aan kuu soo xulay."

Subeer ayaa hadalkii la wareegay, wuxuna ku jawaabay:

"Aabbo taasi ma xuma, laakiin haddii aan awl hore baadidoonka ku raagay oo aan magaalda ka la'aa gabadh I cajabisa, hadeer waan helay waxaanse u baahanahay inaad Aabbo muddo bil ah isiiso, waayo gabadha aan soo helay ee I cajabisay waxay magaalada joogtay labo toddobaad oo keliya oo debedda ayay ka timi, sidaa darteed muddadaa bisha ah ayaan kaga boganayaa sheekadeeda ee ii ogolow Aabbe."

Odaygii Dhamal ee Subeer Aabbihi, wuxu taa kaga jawaabay

"Aabbo Subeeroow, taana waan kaa aqbalay, intaadan hadalkan I odhana, waxaan siday arrin kale oo aan ku soo tashaday, laakiin hadda waan la noqday taydii, waxase loo joogi doonaa gabadha aad ka heshay ee aad na horkeeni doonto, tolow mid aan dunida hore loogu aragbaa."

Subeer aad buu ugu farxay jawaabta Aabbihi siiyey iyo sida uu codsigiisa uga aqbalay, iyadoo uu Subeer Aabbihiina yahay oday aad u jecel wiilkiisa, taas oo keentay inuu marwalba u yeelo sida uu rabo.

Labo maalmood markii ay Subeer iyo Salma kala maqnaayeen ayay maallintii saddexaad Salma telefoon u soo dirtay Subeer, waxayna ku wargelisay inay heshay warqadii furiinka oo uu Mursal u soo diray, gacanteedana ay soo gashay warqadii ay muddo dheer ku taamaysay.

Subeer aad bu ugu farxay warkaa, ka dibna wuxu Salma uga warramay sheekadii dhexmartay isaga iyo Aabbihi Dhamal, wuxuna yidhi: "Salmaay wallaal odayga Aabbahay waxaanu ka wada hadalnay arrin guurkayga ku saabsan, taas oo uu odaygu igu yidhi, Muddo dheer baan kaa warsugaynay ee bal ka warran haddii aan anigu gabadh kuu soo xulo, laakiin waxaan u sheegay inaan gabadh soo arkooday, balse aan u baahanahay muddo bil ah in la iga warsugo, taas oo aan odayga ka codsaday inuu bishaa iga aqbalo, taana odayga aabbahay wuu iga yeelay."

Markii u Subeer gabadhii Salma uga warramay sheekadii dhexmartay isaga iyo Aabbihi, taas oo ay Salmana dhinaceeda si fiican u fahamtay, ayaa la go'aansaday in la qabsado ammin iyo goob arrintaa lagu gorfeeyo. Waxayna isla qaateen in labo habeen ka dib la isu yimaado, goobta ballantana waxa laga dhigtay isla hudheelkii habeenkii hore lagu kulmay, iyadoo uu Subeer ku tiraabay, inuu casuumadda maanta isagu qaabilayo, halkii ay habeenkii hore wax casuuntay Salma, dabadeedna waxa hadalkii lagu soo gebogabeeyey waa inoo hudhaalkaa iyo ammintii habeenkii hore oo kale.

Salma ilaa hadda Aabbaheed iyo Hooyadeed uma ay sheegin inay Mursal kala dhaqaaqeen oo uu warqadeedii iyo meherkii ay ku lahaydba u soo dirtay, laakiin hadda ayay go'aansatay inay u sheegto, wayna ku dhaqaaqday oo waxay isla markiiba la kulantay labadeedii waalid.

Salma waxay labadeeda waalid ugu timi iyagoo wada jooga barxadda hore ee daaradda gurigooda, halkaas oo ay iskaga sheekaysanayen labada waalid.

Xaaji Abtidoon iyo Ruun oo ah Salma labadeeda waalid waa labo qof oo aad isu jecel, sidaa darteed marka aad aragto waxaad moodaysaa inay yihiin labo qof oo imika is aroosay.

Xaaji Abtidoon iyo Ruun, marka aad eegto dhaqankooda muxubada iyo rabitaanku hadheeyey, markaa aad eegto kaftanka iyo sheekooyinka xiisaha leh ee ay is dhaafsanayaan, marka aad eegto dareenka farxadeed iyo boholyawga aan xadka lahayn ee ay isu hayaan iyo guud ahaan marka aad eegto sida ay isugu muraaqoonayaan, ma moodaysid inay yihiin laba qof oo is qabay 25 sannadood in ka badan, waxaadse moodaa inay ku jiraan toddobaadkii u horreeyey ee aqalgalkooda.

Inkasta oo ay Xaaji Abtidoon iyo Ruun weligoodba ahaayeen dad aad isu jecel oo aanay noloshooda marna dhex marin isqabad iyo calool xumo, haddana tan iyo intii ay Ruun ka soo noqotay Jarmalka waxaa muxubadoodii weliba degal fadhiga ahayd sii buunbuunisay yididiilo hor leh oo hadhaysay dareenka Xaaji Abtidoon, taas oo ka dhalatay caafimaad qabkii ay la soo guryo noqotay Ruun, waayo Xaaji Abtidoon markii uu arkay Islaantiisii Ruun oo lugaheeda ku talaabsanaysa, caafimaadkeeduna taam yahay, waxay taasi ku noqotay farxad lama filaan ah iyo nasiib wanaag aanu hore u arag, iyadoo uu Xaaji Abtidoon maalintaa ka caafimaaday yididiilo xumo iyo culays nololeed oo uu ku sugnaa in ku dhow 17 sannadood oo uu la baxaadegayey marwadiisa Ruun oo 7 sannadood ka dib aqalgalkoodii uu halleelay xannuun laxaadka ka fadhiisiyey.

Hase yeeshee Xaaji Abtidoon, wuxu duruufaha adag ee 17-ka sannadood haystay kaga soo gudbay samir iyo dulqaad, wuxuna markii uu Illaahay ka kor qaaday culayskii haystay tukaday salaatul shukri.

Marwo Ruun maaha qof garasho liidata oo meel dhow wax ka eegta, sidaa darteed si fiican ayay u ogtahay dhibaataadii uu odaygeedu la soo maray iyo sidii yaabka lahayd ee uu ula soo kifaaxay, uguna samray waayihii adkaa ee uu kala kulmay xannuunkeedii, isla markaana Marwo Ruun waajibka dumarnimo ee uu odaygeedu mar walba ku leeyahay ka sokow, waxay si fiican isu tustay abaalka dheeraadka ah, ee uu odaygeedu ku leeyahay, taas oo ay nafteeda ku qancisay inaanu koleyaba ahayn wax ay nolosheeda guddi karto sidii uu ula dhaqmay ayaamihii xannuunkeeda, laakiin waxay go'aansatay inay habeen iyo maalinba qalbiga ku hayso abaalka magaynada ah ee uu odaygeedu ku leeyahay.

Sidaa darteed Marwo Ruun, waxay nafteeda u sheegtay oo meel iska dhigtay inay goor walba la taagnaato raaligelin dheeraad ah iyo fadhiga oo ay ugu shaqayso, wanaagna ay odaygeeda hadh iyo habeen ku soorto.

Salma waxay soo duljoogsatay labadeedii waalid oo ay u socoto sheeko xiisa lihi, aadna isugu mashquulsan oo aan cid kaleba u baahnayn, laakiin Salma si ay u dhexgasho dareenka labadeeda waalid axay ku dhexdarsatay ereyo kaftan ah oo ay ka mid yihiin, "Aabbo iyo Hooyo miyaad ilowdeen inaad keligay I dhasheen ilaa saaka mar qudha ii maydaan yeedhine, dee malaha waad I nacdeenba."

Ruun iyo Xaaji Abtidoon ayaa marqudha ku wada dhawaaqay "Alla sidee baanuu kugu nici karnaa miyaanad beerkayagii ahayn, waxa ubad carada buuxiyeyna kelidaa ayaanu dhalay oo Illahay nasiyey, ee ma wax la naco ayaad tahay, isla markaana wax noo dambayn doona mooyiye ilaa hadda nagama aad galabsan xumaan iyo nacaybtooyo midna. Ta kale anaga oo ku xamdi naqayna Illaaha na kaa siiyey, haddana miyaanu ognahay inaanu Ubad kale dhali doono, sow imika keligaa ma haysano wax ubad ah, sidee baanuu kuu ilownaa ama kuu nacnaa gabadhayadiiyeey".

Salma intay qososhay ayey labadeedii waalid ugu hal-celisay “Aabo iyo Hooyo waan iska kaftamayaaye, waan ogahay inaad keligay i dhasheen oo aydaan horena ii ilaawin, haddana i ilaawayn, aadna aad ii jeceshihiin, wax kastana aad ii qabateen”.

Salma markii ay intaa tidhi ayey hooyadeed dhinaca aabeheed ka xigo mooyaane dhinaca kale ka soo fadhiisatay ka dibna Salma, iyadoo aabaheed ka yara xishoonaysa ayey intay hooyadeed hoos ula xanshaashaqday ku tidhi: “hooyo arrin yar baan doonayaa inaan kuu sheego”.

Laakiin Salma, iyadoo aan arrintiiba sheegin ayey hooyadeed Ruun intay kor u hadashay tidhi: “hooyo arrinta aad ii sheegayso horta aabahaa u sheeg waayo koleyba ka qarrin maayo oo hadhow baan u sheegayaaye ee hadaba u sheeg”.

Salma oo aad u xishoonaysa ayaa iyana tidhi: “ee hooyo maxaad ii khashiftay haddii aan kula faqay oo aan hoos wax kuugu sheegay”.

Hooyo Ruun ayaa hadana tidhi: “hooyo aniga iyo aabahaa inta yar ee dumarnimada ah mooyee isku mid baanuu nahaye waxaad keligay ii sheegi lahayd noo wada sheeg oo aabahaa waxba ha ka qarsan ilayn midigtaadii iyo bidixdaadii ayaanu nahaye”.

Mar hadii uu faqii fashilmay gabadhii Salma lagama maarmaan bay ku tahay inay arrinta sheegto, iyadoo ay aabaheed iyo hooyadeedba dhegaysanayaan.

Sidaa darteed, Salma iyadoo ay odaygii iyo islaantiiba si fiican u dhegaysanayaan ayey sheekadii bilowday, waxayna tidhi:

“Aabo iyo Hooyo hadii aan idiin sheego arrinta aan idiinka socday ee aan doonayo inaan idiin sheego, waxay tahay aniga iyo inaabtigay Mursal

waxaanu isla gaadhnay inaanu kala tagno oo aanu is-furno, sidaa darteed labo maalmood ka hor ayuu ii soo diray warqadii iyo lacagtii meherkayga oo wada socda oo aan soo qaatay, markaa Aabo iyo Hooyo sidaa u ogaada, inaanu aniga iyo Mursal nahay oo keliya Ilmaabti ee ay meesha ka baxday isqabidii”.

Hooyadeed iyo Aabaheed ayaa mar keliya ku kulmiyay kelmada ah "miyaanay inaga dhexayn in aynu wada tashano oo aynu wax is waydiino, mise goonibaad isaga tashanaysaa oo wax kasta keligaabaa go'aansanaya, adiga oo aan wax yarna nala socod siin."

Intaa markii ay odayga iyo islaantu soo tuureen ayey aamuseen, iyaga oo la fejeesan hadalka gabadhooda ka soo yeedhay, dabadeedna Salma oo aan garowsan hadalada waalidkeed ka soo baxay ayaa u jawaabtay labadeeda waalid, waxayna tidhi:

"Aabo iyo hooyo, anigu haddii aan taladayda raacayo oo aanan waxba idin waydiinayn maanta kama aynu wada hadaleen Mursal iyo qadiyadda na dhextaal, waayo maalintii aad Mursal, I siiseen waxaanu heshiis kama dambays ah oo guur isla gaadhnay wiil aan muddo dheer sheekaysanaynay aanuna is jeclayn oo la yidhaahdo Subeer, laakiin taladii aad iigu taliseen ayaan raacay oo aan ka hor iman kari waayey, markii ay arrintaasi ila soo gudboonaatayna waxaan isu eegay xaq iyo jacaylka waalidkay, aniga oo weliba si gaar ah u tixgelinayey duruuftii ay hooyaday waqtigaa ku sugnayd iyo jacaylkii aan u qabay wiilkii aanu guurka ku heshiinay, dabadeedna aniga oo raacaya taladiinii, waxaan duhur cad ka dhaqaaqay wiilkii aanu axdiga iyo aaminka wada galay, waxaan go'aansaday inaan maro halka ay waalidkay iigu taliyeen, laakiin laga soo bilaabo maalintii aad Mursal, I siiseen waxay naftaydu ku sugnayd qulub iyo calool-xumo, dhibtaas oo dhanna waxaan naftayda u gaadhsiinayey qiimaha ay iigu fadhiyaan iyo ixitiraamka ay iyo xaga culus ee ay igu leeyihiin labadayda waalid waxaan naftayda ku qanciyeey ma helaysid aabo iyo hooyo laakiin waad helaysaa wiil

aad guursato, sidaa darteed waa in aad u go'daa dhinaca waalidkaa, sidii ayaanan idiinku go'ay oo aan taydii u tuuray, tiiniina u raacay. Hase yeeshee maanta waxaan joogaa Illaahay mahadii, mar haddaan ku guulaystay laba arrimood oo ay naftaydu jeclayd, kuwaas oo kala ahaa: in aan helo hooyaday oo caafimaad qabta oo lugaheeda ku talaabsanaysa iyo inaan helo warqadii, iyadoo ay naftaydu ahayd mid ku dhex jirta nolol biime iyo karaahiyo ah, waayo waxaan oori u ahaa nin aanay naftaydu rabin."

Ayey Salma ku soo xidhay hadalkaa dheer ee ay ugu jawaabaysay labadeeda waalid.

Labada waalid intii ay Salma hadlaysay waxay u dhegaysanayeen si taxader leh oo mar qudha eray kama soo bixin waayo waxay fahamsanaayeen inay gabadhoodu ku hadlayo wax xaqiiqda ku fadhiya, laakiin markii ay Salma hadalkii ka baxday ayaa aabaheed hadalka qaatay, wuxuuna yidhi:

"Aabo sida aad u hadashay way na damaqday, waanuna ka xunahay dhibta naftaada la soo kulantay ee aad ka sheekaysay, anaguna hadalkii aanu ku nidhi waanu kaa raali galinaynaa. Ta kale aabbo waxaad sheegtay inaad muddo afar sannadood ah ahayd qof mariid ah oo aan dhimasho iyo nolol midna ahayn, laakiin aabo maxaad mar hore taa noogu sheegi wayday, kugu maanu daawaneen dhibaataada'e?"

Hooyo Ruun oo iyana tiiraanyo darteed ilmo ka hibitiqayso, isla markaana dareensan inay iyadu tahay qofka ay Salma nafteeda u dhiibatay, ayaa hadalkii qaadatay, waxayna tidhi:

"Hooyo Salmaay haddii aanu ognahay inay xaaladaadu sidaa tahay, marna kuguma aanu khasabneen Mursal iyo qof aadan rabin toona, laakiin inkasta oo aanan marna mooganayn sida aad noo jeceshahay iyo ixtiraamka waalidnimo ee aad noo hayso, haddana maanta ayuun baan anigu ogaaday inaan dhalay gabadh qiimo badan oo garasho badan, mana aan filayn inaad

mustaqbalkaaga oo dhan aniga ii burburinayso, balse hadal iyo dhamaan wixii dhici lahaaba dhace'e maxaanu hooyo hadda yeelnaa oo aanu kula qabanaa."

Salma ayaa haddana hadalkii la wareegtay waxayna ku bilowday: "Aabo iyo hooyo waad mahadsan tihiin, dhibta aan idiin galayna waa wax aad xaq iigu leedihiin, laakiin intaasi waxay iga ahayd xusuusin iyo waayo waran."

Salma way sii wadatay hadalkeeda, waxayna tidhi: "imikana aabo iyo hooyo, waxaan doonayaa inaan mustaqbalkayga ka shaqeeyo oo aan guursado nin ay naftaydu raali ka tahay laakiin wiilkii aa idiin sheegayey ee ay naftaydu ka heshay magaalada ayuu joogaa, dabadiina cid kale naftaydu ma jeclaan, welina igama bixin rabitaankiisii, intii aan dalka ku soo laabtayna salaan wax ka badan isu maanu dhaafin, waxaase lay sheegay inaanu weli guursan. Sidaa darteed marka aan u waayo-waramo haddii ay dareenkiisa iiga muuqato in aanu dib u yab-yabi karno wixii naga burburay afar sannadood ka hor, waxay naftaydu raali ku tahay wiilkaas oo qudha in aan nolosha la wadaago ee idinkuna aabo iyo hooyo sidaa igu ogaada."

Salma marka ay hadalkan leedahay waa mar ay iyada iyo Subeer wax isla soo meel dhigeen oo ay iyana diyaar tahay Subeerna dhiniciisa diyaar u yahay, laakiin labadeeda waalid ayey sheekada u sii bislaynaysaa, waxayna ka sii afeefdhiganaysaa in aanay labadeeda waalid mar dambe ka hor iman rabitaankeeda.

Xaaji Abtidoon ayaa odhanaya, "aabo gartaye, maxaad nooga baahan tahay, mase na tusaysaa wiilka aad sheegayso ee ay naftaadu raalida ka tahay."

Salma ayaa iyana aabaheed ugu hal celinaysa "aabo arrinta qaybna anigaa leh, qaybna waxbaad ku leedihiin, markaa halkii aad kaga talo geli lahaydeen weli may gaadhine aniga iga war suga."

"Haye" ayey labadii waalid yidhaahdeen, dabadeedna Salma way ka dhaqaaqday labadeedii waalid, iyaga oo weli fadhiya daaradii ay ugu timi ee ay ku sheekaysanayeen.

Markii ay Salma ka dhaqaaqday ayey Xaaji Abtidoon iyo islaantiisii Ruun isku jeesteen, waxayna isu tusaaleeyeen sida ay uga xun yihiin dhibaataada ay u geysteen gabadhooda ay keligeed ubad leeyihiin, dabadeed Xaaji Abtidoon oo islaantiisa la hadlaya ayaa yidhi: "marka Illaahay khayr kula damco, ubadka badan iyo midka keliya isku si buu kuugu barakeeyaa, bal imika eeg gabadheenu nafteeda waxay u haligtay dhibtii adiga ku haysatay sidii wax looga qaban lahaa, waxaan leeyahay Illaahay taa meel roon ha mariyo, khayrna ha siiyo."

Hooyo Ruun ayaa iyana tix buraanbur ah oo duco ah, la hiyi kacday, waxayna tidhi:

Cawo kuma haleelo hooyo,
Oo laguma ciilo weligaa,
Cimrigaagu noqoy kii cisi leh,
Alla kuma celiyo oo curad
raagta noqo, Cawo iyo nasiib
caadil kuugu deeq, Ha car-
caraafin oo rays cagaha la
gaadh, Illaah baan kuu
cugtee caano iyo guri
nabdoon, Cudooneey hooyo
khayr ku waar

Hooyo Ruun markii ay tixdaa buraanburka ah ee ducada ah, qac ka siisay ayey odaygeedii la hadhaysaa, waxayna ku tidhi: "Xaaji Abtidoonow, waa tii la yidhi shuruudi aabahaa ka weyne maxaynu yeelnaa oo inooga ballan

ah, wiilka ay gabadheenu inoola timaado, ee ay ina tidhaahdo wiilkan ayaan doonayaa oo aan guursanayaa, ma kula tahay in aynu raacino oo aynaan wax hadal ah ka keenin, oo aynu isu dayno iyada iyo nasiibkeeda ducona u raacino."

Xaaji Abtidoon oo ka jawaabaya hadalka islaantiisa ayaa isna yidhi: "Ruuneey, hadal kale ma jiree, maanta wiilka ay gabadheenu inoola timaado waynu u hibaynaynaa, ducona waynu u raacinaynaa, ballanteenu waa taa."

Oday Xaaji Abtidoon iyo Islaantiisii waxay isla qaateen inay gabadhoodu wiilka ay calmato ee ay ula timaado inay ugu duceeyaan Salma markii ay ka dhaqaaqday labadooda waalid oo daarada hore ee guriga fadhiya waxay gashay qolkeedii gaarka ahaa waxayna markiiba telefoon kula xidhiidhay Subeer oo isna qolkiisii jooga dabadeedna bahal sheeko ah oo xiiso leh ayaa la haloosiyay.

Salma markay telefoonka dhegta ku hayso waxaad moodaa inuu Sayloon ku rikiban yahay jidhkeeda, waaayo intay madaxa telefoonka beerka la dhigtay ayay dareenkeeda oo dhan siisay dhagaysiga weedhaha Subeer u soo marrinayo khadka telefoonka oo ay aad u macaansanaysay taasoo aad dhaq-dhaqaaq yaraanteeda aad moodo sidii qof suuxsan oo aan darreenkiisu waxba ogayn Salma waxa qalbigeeda iyo sambabadeeda saaqay Subeer oo ku afuufay weedho macaan badan oo ka soo burqanaya mawjado gaaxsanaa oo jaceyl ah.

Subeer qolkiisa ayuu hoosta ka xidhay wuxuuna gabdhahooda ku yidhi "cidkastoo I doonaysa ma joogo ku dhaha."

Subeer sidii qaalin geel ah oo curatay ay ilmaheeda uga ilaaliso bahalada iyo cid kastoo u soo dhawaata ayuu telefoonkii dul fadhiistay oo uu hareeraha qabsaday kadibna intuu madaxii telefoonka dhegaha la yoomay

ayuu sariirta dusheeda la dhabcay, wuxuuna dareenkiisa oo dhan u hibeeyay dhegaysiga weedhaha uu macaansanayo ee ay Salma u soo marrinayso khadka telefoonka iyo u hal calinteeda wakhtiga la wada hadlayaa waa goor galab ah oo qoraxdu casar gaaban joogto oo ay laydh qaboobina dhacayso.

Salma tan iyo intii ay dalka dib ugu soo noqotay habeen qudha hurdo si fiican uma ladin waayo waxa dareenkeeda ku oognaa ugu yaraan dhawr arrimood oo ay ugu horreeyaan sidii ay warqadeeda uga heli lahayd Mursal iyo sidii ay mar kale niyadiisa iyo rabitaankiisa u kasban lahayd ninkii uu waayaha jaceyl dhex maray ee ay ku wacad furtay (waa Subeere).

Hase yeeshee Salma waxay soo gaadhay xili ay xaaladeedu u muuqato inay labadii duruufood ee dareenkeeda aad u xaganayay ka soo gudubtay sidaa darteed Salma markii ay maalinimadii u warantay aabbaheed iyo hooyadeed, isla markaana ay galabnimadii telefoonka isku waraysteen Subeer, habeenimadii si fiican ayey dhinaca dhulka u dhigtay, waxayna seexatay hurdo aanay iskadaa maalmo iyo bilo oo xataa aanay seexan labadii sannadood ee u dambeeyay. Sidaas darteed habeenkaa mar qudha iskama ay rogin dhinacii ay u jiifsatay fiidkii hore.

Salma maadaama ay habeenkaa ku seexatay jawi xasiloon oo ay hurdada si fiican uga bogatay waxay subaxnimadii la soo toostay dareen firfircoon iyo furfurnaan aan in dhowayd lagu arag.

Sidaa darteed goor hore ayay ku fooftay hawshii gurigooda, waxkastana jac iyo mac ayey ka siisay.

Salma waxay maalintii oo dhan adeeg hufan iyo firfircooni dheeraad ah gurigooda kaga shaqaynaysayba waxa la soo gaadhay xilligii kala wareega maalinta iyo habeenka oo ah aminta makhribka loo yaqaan, iyadoo ay habeenimada soo galaysay Salma ballan la leedahay Subeer. Hase yeeshee Salma maaha qof goor dambe ku hambaabareysa ballantii ay lahayd ee casar dheere ayay hoosta ka diyaar garowday.

Wuxu wakhtigu isguraba waxay amin-sheegtu ku dhawaatay 7:00 fiidnimo, sidaas darteed waxa soo dhowaaday xilligii ballanta. Dabadeedna, Salma iyadoo ay dhawr miridh ka hadhsan tahay xilligii ballanta ayay ka soo booday gurigooda. Waxayna afka saartay goobtii ballanta.

Toddobadii fiidnimo oo hal miridh dhiman ayey Salma isa soo taagtay goobtii ballanta. Sidoo kale Subeer oo isna maalintii oo dhan istaanbay u ahaa ballanta ayaa miridh ka dib markii ay Salma timi, isna isa soo taagay goobtii ballanta isaga oo wata baabuurkiisii. Dabadeedna way is raaceen waxayna u kaceen hudheelkii ay habeenkii hore ku sheekaysteen.

Habeenkaa waxa casuumada fidiyay Subeer, halka ay habeenkii hore Salma casuumada qaabishay. Cabaar markii ay Salma iyo Subeer baabuurka ku soo dhex sheekaysteen ayey soo gaadheen hudheelkii waxayna fadhiisteen goobtii loo diyaariyay.

Marka la isu eego labada habeen way ku kala duwan yihiin labada qof, waayo habeenka dambe ayey Subeer iyo Salma ka farxad iyo yididiilo badan yihiin habeenkii hore, taas oo ay ugu wacan tahay horumarka ay ka gaadheen dib u noolaynta xayaatadoodii caashaq ee naafowday.

Sidaa darteed, habeenkaa waxa Salma iyo Subeer wejiyadooda ka muuqda farxad, qushuuc iyo qalbi degan. Markii ay Subeer iyo Salma Salka dhigeen kuraastii iyo miiskii loo dhigay waxay bilaabeen sheeko is-xaalwaraysi ah, taas oo ay wax iska waydiinayaan bal waxa arrimahooda ku soo kordhay labadii caano maal ee ay kala maqanaayeen.

Subeer oo u muuqday nin u hamuumaya inuu ogaado bal waxa ay ku dhamaatay sheekadii dhex martay Salma iyo waalidkeed ee la xidhiidhay qadiyadooda ayaa markii ay fadhiisteen hadalka bilaabay wuxuuna yidhi: "Walaal Salma bal ii waran, intaad wax ii taataabatay ayaadan haddana ii

bal balaadhinine, iiga waran sheekadii idin dhex martay adiga iyo labadaada waalid, sidee bay u arkeen qadiyadii aad u ban dhigtay."

Salma ayaa hadalka qaadatay, Waxayna tidhi: "wallaal Subeerow, hayga deg degin si faah faahsan ayaan sheekadaa kaaga dherginayaaye, balse waxa laga yaabaa haddii aynu hadda bilowno inay inala dheeraato'e, ma kula tahay inaynu horta cashayno, kadibna marka aynu cashada ka soo fan-jeedino si fiican u sheekaysano."

Markii ay Salma tidhi, intaynaan is waraysan horta aynu cashayno, kadibna aynu sheekaysano ayuu Subeer ugu jawaabay, "Gacaliso Salmaay Cuntada warkaagaan uga baahi iyo boholyow badnahay oo raashinka u hamuumi maayo ee waxaan u hamuumayaa sidii aan uga haqab beeli lahaa warkaaga iyo xaaladaada."

Markii uu Subeer sidaa yidhi, Salma waxay go'aansatay inay waxoogaa war ah u yara qadinto, waxayna tidhi: "Subeerow haddii aan kuu sheego wixii aan aniga iyo waalidkay is nidhi iyo halkii ay arrini isugu biyo shubatay, marka hore, waxaan oga waramay in aanu aniga iyo Mursal kala faataxaysanay oo aanu is furnay warqadaydiina uu ii soo diray, mar labaadkiina waxaan dareensiiyay in aan hadda kadib mustaqbalkayga ka shaqaynayo, aniga oo weliba u saray ama u taabtay inay dani iga hayso wiil aanu beri hore caashaq wadaag ahayn oo aanu aad isugu dheer nahay.

Dabadeed markii aanu arrinta dhinac walba ka eegnay ee aan aniguna si fiican u hoga-tusaaleeyey waxa aan damacsanahay iyo dareenkayga waqtigan xaadirka ah, waxaanu aakhrikii aniga iyo waalidkay isla qaadanay in maanta taladayda la ii daayo, taas oo waalidkay ila ogolaadeen inay iigu duceeyaan wiilkii aan ku qanco ee aan soo xusho oo ay raali igula noqdaan.

Markaa Subeerow arrintu waa sidaase maxaa ka dhiman, miyaanay intaasi kugu filnayn oo aanan anigu soo dhamayn dhinacaygii."

Subeer, ayaa isna yidhi:

"Salmaay war farxad leh ayaad ii sheegtay, aadna waad u dedaashay laakiin waxaan kuu sheegayaa warka aad maanta labadaada waalid u sheegtay ee aad ka soo dhammaysay waa warkii aad u sheegi kari wayday afar sannadood ka hor. Hase yeeshee wax badan baynu buste saarnay caashaqeennee, maanta aynu ka badheedhno oo aynu soo afjarno arrimaheena."

Subeer, isaga oo hadalkii ku dhex jira ayaa la soo hordhigay cuntadii, dabadeedna Subeer, intuu sheekadii joojiyey ayuu yidhi: "Salma fadal iyo wadaag xiise leh gacaliso."

Salma iyo Subeer, si degan oo ay farxadi hadhaysay ayey u wada casheeyeen, iyadoo ay cuntada dusheeda isku dhaafsanayaan weedho xiiso leh.

Subeer iyo Salma habeenkaasi waxa uu u ahaa habeen uga duwan habeenadii hore ee ay kulmi jireen, waayo waxay u arkayeen inay soo dhowaatay rajadoodii maalmo badan fogaatay, taas oo ay habeenkaa ku naaloonayaan yididiilo qariib ah oo agtooda soo joogsatay.

Salma iyo Subeer habeenkaa xaaladdu waxay uga dhignayd sheeko dhamaatay oo ay yihiin sidii laba qof oo aanay waxba u hadhsanayn oo nin iyo ooridii ah.

Subeer iyo Salma markii ay casheeyeen kadib waxay cabaar ku sii negaadeen goobtoodii, halkaas oo ay sheeko macaan oo la xidhiidha arrimahooda sii qaadaa dhigeen.

Hase yeeshee habeenkaa uma ay raagin sidii ay habeenkii hore u raageen. Sidaa darteed goor hore ayey ka soo baxeen hudheelkii.

Subeer iyo Salma oo ay dareenkooda hadhaysay farxad iyo yididiilo aan hore loo arag way ballameen, dabadeedna Subeer intuu Salma dhigay albaabkii gurigooda ayuu iska hoyday.

Laakiin Subeer markii uu gurigoodii tegay markiiba ma seexan waayo kar baa ku taagan, sidaa darteed wuxuu go'aansaday in inta aanu seexan inuu aabihii u sheego arrinta cusub iyo halka ay xaaladiisii guurku marayso.

Dabadeedna Subeer intuu u tagay odaygii aabihii oo qolka fadhiga ku sugan ayuu u bilaabay sheekadii, wuxuun yidhi "Aabo gacaliye, caawa ma kuu sheegaa arrin aad in badan iga sugaysay jawaabteeda."

Odaygii ayaa ugu hal celiyey wiilkiisii Subeer, "aabo ma'daba ka daayoo ii sheeg."

Dabadeedna Subeer baa sheekadii hoos ugu daadegay wuxuuna yidhi; "aabo wax badan baan ku lahaa gabadh baan soo xulanayaaye, maanta ayaan arrintaa ka sidaa go'aankii kama dambaysta ahaa.

Sidaa darteed waxaan doonayaa in aynu u tagno gabadhii aan guursan lahaa reerkooda oo ay inoo hibeeyaan."

Odaygii dhamal ee Subeer aabihii ayaa yidhi: "Aabo war wanaagsan baad sheegtaye, laakiin waa ayo gabadhu, ma tahay gabadh aan garanayo, mise waa mid aanan garanayn, bal ii sheeg ina ayadeeda?"

Subeer ayaa u jawaabay aabihii, wuxuuna yidhi; "Aabo gabadhu waa ina Xaaji Abtidoon, oo waa inantii aan berigii kuu sheegay ee aan kugu odhan jiray, gabadhii aan doonayey in aanu is guursano, waxa la siiyey nin ay il-maabti yihiin oo debedaha ka yimi, ninkaas oo markii uu guursaday debeda ula dhoofay."

Odaygii ayaa haddana yidhi: "Aabbo gabadha aad sheegayso, mee ninkii guursaday afar sannadood ka hor?"

Subeer ayaa ku jawaabay: "Aabo dhowaan bay is fureen, gabadhiina hadda magaalada ayey joogtaa oo way ka soo noqotay debedii, ninkiina wuxuu jiraa meeshii uu awalba ku noolaa oo ahayd Jarmalka wuxuuna qabaa naag kale."

Odaygii ayaa haddana hadalkii la wareegay oo wiilkiisii ku yidhi:

"Aabo Subeerow, ma waxaad doorbiday inaad guursato gabadh carmal ah oo afar sannadood la qabay, maxaa kuu diiday inaad guursato gabadh yar oo aan faro gaadhin, maxaase kaa hortaagan inaad gabadh timo-tidcan ka xulato waxa gabadh qurux badan Magaalada dhex mushaaxaysa. Maadse ilowsan tahay in ay gabadhani tahay tii burburisay farxada gurigeena afar sanno ka hor marka laga yimaado adiga oo dhibaataada inta ugu badani gaadhay, ma waxaanad dareensanayn dhibaataada gaadhay reerkeena inta kale oo aan ilaa hadda uga baqo qabo in ay saamayso gabdhaheena.

Aabo waan ogahay in uu jaceylku jiro laakiin ma qabo in wakhtigan uu jaceyl kuu qaban karo gabadha caynkaas ah arrinkaa aad I waydiisayna haddii aan ku dhalay oo aad in badan baan ku dhegaystee warkayga maqlayso, waxa iga go'aan ah oo aan ku leeyahay in aad raadsato gabadh kale.

Dhamal isaga oo sii faahfaahinaya ujeedooyinka uu ku diidan yahay gabadha wuxu yidhi:

"Maaha ceeb in ninku guursado gabadh ka weyn isla sidoo kalena waa suuragal in wiilka dookhiisu noqdo gabadh garooba (Carmal) laakiin waxan marnaba suuragal ahayn in ay gurigeena soo gasho gabadhii aad ogayd sida ay inoo gashay.

Subeer ayaa hadalka aabihii kaga jawaabay:

"Aabo gacaliye, maan waayin gabadh kale iyo gabadh ugub ah toona laakiin naftaydu waxay rabtaa gabadhan, mana jirto cid aan ku doorsanayaa, iyadoo aan aaminsanahay in aanay dhulkeenaba ku noolayn gabadh la qiime

ah oo u dhigantaa, sidaa darteed aniga iyada ayuun baa I cajebisay, mana jirto gabadh aan iyada ahayn oo ii cuntamaysaa, waxayna gabadhani ahayd gabadhii u horaysay ee aanu is doorano, ee aanu jacayl wadaag noqono, mana jirto gabadh kale oo ay indhahaygu arkayaan, markaa aabo ii ogolow gabadhaa ayaan soo xushaye, isla markaana aynu dhakhso ugu tagno reerkooda oo u sheegno in aynu gabadha ka guursanayno." Oday Dhamal ayaa dabadeed haddana yidhi:

"Aabo Subeerow, waxaan ahay nin weyn oo caqli iyo aqoon leh, markaa waan garanayaa rabitaanku waxa uu yahay waanan fahamsanahay inay labo qof isjeclaan karaan oo uu jacaylku yahay wax jira, balse aabo waa goor dambe sidaa darteed arrintani ma aha mid si sahlan aan u yeeli karo sidoo kalena waxan u maleynayaa in aanad aabo fayoobayn ee waxan ku siinayaa muddo saddex cisho ah oo aad kaga soo fekerto arrinkaagan kuumana oggolaan doono anigoo intaa kugu soo tabcay kuguna ogayn wax iin ah oo aan kuugu oggolaado gabadhaa."

Subeer, oo aad uga werwersan sida qotoda fog ee uu aabihii uga soo horjeedo arrinkiisa talona ku caddaatay ayaa isaga oo aan geesnaba eegin ka dhaqaaqaya halkii ay ku wada hadlayeen isaga iyo aabihii waxaanu si cagojiida u gelayaa qolkiisa, waa habeen gelinkii hore ahaa nin farxadeed aad moodana in uu ku soo gebageboonayo si murugo leh, wakhtigaa iska caynkaas ah oo waayahaa dhibkiisa wata horaa loo yidhi:

Marbuu kuu wanaajiya

Wakhtiguu kuu hiiliyaa

Wallaakii kaa dhigaa

Sidii waqal kuu da'aa

Marbaad kala weecataa

Waayuhu cadow kuu noqdaa

Wacdiga aad aadmiga fartaa

Marbuu wadhi kuu dhalaa

Adduunyooy waalaleeye

Adduunyooy waayo badan

Werwareeg maanigaa ku idhi

Fartiyo wadnaha

Fartiyo wadnahaan isku hayaa

Subeer galgalashada sariirta dusheeda waxaa u dheer sida aanu u haynin garowshiiyo xaga reerkooda ah waayo dhammaan reer Dhamal dhinac ayay ka soo wada jeedaan oo marnaba xasuustooda kama maqna sidii foosha xumayd ee ay Salmi yeeshay waxayna noqotay arrin lagaga sheekaysto xaafadaha jaarka iyo aqalada u dhow dhow, mar marka qaar hablaha ayaa kaftanka lagaga helaa oo dhalinyarada ay isku dhow yihiin ayaa ku dacaayadeeya arrinta ku dhacday Subeer si kastaba ha ahaatee habeenkaasi wuxu ahaa mid Subeer aan weligii soo marrin xataa markii ay ku dhacday arrintii Salma. Odaygii Dhamal sidiibuu ku adkaystay saddexdii cishona way dhamaadeen Subeerna wuxuu u sheegay Salma inuu aabihii arrinkii ishortaagay isla markaa Salmi lama yaabana waayo arrintan iyada ah marka hore khaladkeeda oo dhan odayguna wuxuunbuu ka daba socdaa eed hore oo ay gashay hurgumooyin, murugooyin iyo xusuus badan leh mawjado bad wayn oo iska soo daba noqonaya waxa sida dhibica roobka ugu da'aya maskaxda Salma waxa uu ku danbayn doono aayaheedu waayo dhinac way ka soo amba baxday oo inaabtigeed way ka soo qaadatay warqadii halkii ay u soo qalab qaadatayna way usuuro gali wayday waxaanay ku noqotay argagax iyo filan waa fajac aduun ayaa u dhamaaday quruxdii, dhaldhalaalkii iyo dheehii ay kala timi Germany waxa ka qaaday kalmada oday Dhamal oo u dhigmaysay xageeda in Nukliyeer lagu dhuftay,

Hadaynu eegno Subeerna waxba ma samayn karo arrinta waa laga faro maroojistay hore ayaanu talo kuu siinay mar hore ayaad wakhtigaagii qaadatay mar labaad yeeli mayno in aan kugu xidhxidhno guriga dhexdiisa erayadaasi waxay ka mid yihiin kuwa joogtada u ah Subeer ee aan marnaba dhagaha looga duwin Salmi sidaan hore u sheegnay ma laha saaxiib ay u sheegato dhibaatooyinka la soo dersa ama ay kala tashato waxa u saaxiib ah labadeeda waalid iyo Subeer xaaladu waxay noqotay mid aan meel laga

soo qabto lahayn Xaaji Abtidoon oo ah Salma aabaheed waxa uu la yaaban yahay waxyaabaha waayadan danbe ku soo kordhay inantiisa wuxuu u soo galaa iyadoo guriga fadhida oo wax akhrisanaysa haddana huruda wuxuu u yimaadaa iyadoo isu jawaabaysa oo matalaysa qaabkii loo qancin lahaa odayga dhalay Subeer ayaamuhu kala daran wakhtiyadu kala xanuun badan, xaaladuhu kala qalafsan, xiliyaduna kala adage waa maalin Axad ah saacadu waa tobankii subaxnimo waxa la joogaa suuqa waxa iska soo horbaxay labadii waalid ee kala dhalay Subeer & Salma waa Dhamal & Abtidoone,

Dhamal wuxuu ugu talagalay inuu u sheego in Abtidoon ka qabsado ama uu u sheego inantiisa inay ka waantowdo sidii ay u heli lahayd wiilkiisa Abtidoon waa nin degan, waa nin dhibaataada aduunku dhinacyo badan kaga timid markiisii horena u dhashay dulqaad iyo samir faro badan Dhamal ayaa bilaabaya hadalka waxaanuu leeyahay "Abtidoon inaadeeroow, waxaan ergo kaaga ahay inta aan dadku isku keen maqlin inaad iga qabsato gabadha aad dhashay waayo waxa jirta dhibaato soo jiitamaysay muddo shan sano ku dhaw oo u dhaxaysay iyada iyo wiil aan dhalay mudadaa intaa leeg wiilkaygu imika ayuunbuu yahay qof caafimaad qaba xataa wuxuu gaadhay heer aan geeyo goobaha dadka waalan iyo meelaha lagu dabiibo kuwa la yidhaahdo waa la derderay waxaan uga socdaa arrintan waan ogahay oo sheekada inantaada wiilkayga ayaa aad iiga dhergiyay adiguna kolay wiilkayga taariikhdiisa sidoo kale ayaad uga dheregsan tahay markaa waxaan kaa doonayaa qaabkii iyo sidii aynu u furdaamin lahayn arrintan" inta uu hadlayo Dhamal Abtidoon si wanaagsan oo dhug leh ayuu ugu fiirsanayaa hadalada ka soo burqanaya ee hanfiga ka kulul mase aha nin waxaasiba dhibayaan waxa uu ogyahay sheekadu sida ay tahay wuxuu ogyahay waxaanuu ogayn odaygan kale wuxuu ogyahay in dhamal inankiisu uu ka qariyay waxyaabo badan oo aanu ula sheekaysan sida xaqiiqdu tahay wuxuu dareensan yahay inay arrintani tahay tii uu yeeli lahaa qof kasta oo waalid ah oo ilmo dhalaa waayo cidna lama jecla ubadkooda dhibaato iyo waxyeelo wuxuu ugu jawaabay "Hadalkaad itidhi inkastoo uu yahay mid aan

halkan ku haboonayn hadana waan kaa qaatay oo qof la yidhi ilmahaaga iga qabso dee wax kale oo uu yeelaa ma jirto inantaydu kuu iman mayso wiilkaaga way nabad gelinaysaa waxaadse balan iiga qaadaa adiguna inaad inankaaga ka adkaanayso oo uu ii daayo gabadhayda” markuu intaa yidhi ayuu Dhamal hadalkii ku soo noqday waxaanuu yidhi “Haddii aynaan is yeelyeelayn labadeena ayaa reerkan taladiisa leh aniguna inankayga waan aqaanaa sidaan u qabsanayo adiguna waad taqaanaa gabadhaada sidaad u celinayso” Abtidoon isagoo aad uga xun uga murugoonaya, tiiraanyaysan ayuu ugu jawaabayaa,

“Wakhtigu waa goor xun soddon sanadood ayanu jaar ahayn mudadii ugu badnayd ee aynu wada hadalnayna waa maanta manay fiicnayn inaynu ku hadalno wax karaahi ah aniga xagayga cafi ayaad iga tahay gabadha aan dhalayna aniga ayaa wado marinaya laakiin waxaad ogaataa ubadka wakhtigan jooga in ay yartahay inta waalidkood adeecdaa wiilkaaga waan aqaanaa waxaanuu ka mid yahay inta yar ee aqbalaysa hadalka waalidkiisa anigana inantaydu waa sidoo kale waxanan odhan lahaa hadal taagtaagan la inooga wanaagsan aan isusoo noqono rogrogno hadalka talada hadba gees ka eegno wixii laga maarmi waayo aynu markaa ku dhaqaaqno bir laguma gooyo talada qasabna maaha in la bedeli waayo go’aan soo baxay waxase dhibtu tahay labada ubadka ah waxyeelada soo gaadhaysa aniguna maanta ayaan u sheegayaa gabadhayda waanad mahadsantahay” sidii ayaa lagu kala dhaqaaqay odaygii Dhamal dhinicii tukaankiisa ayuu kicitimay halka Abtidoon uu ku sii socdo Masaajidka oo mudadii ay wada taagnaayeen waxa soo dhawaatay salaadii Duhur markuu tukaday ee uu gurigii soo gaadhay ayaa wuxuu damcay inuu u sheego ballanta uu la soo galay ninka dhalay wiilka ay inantiisa is jecel yihiin intii aanuu hadalkiiba bilaabin ayaa waxa albaabka soo garaacaya gaadhi hayadeed oo sida warqad lagu dalbanayo Salma inay u soo shaqo tagto xafiis ka mid ah kuwa magaalada oo qolo ay isku asxaab ahaayeen markii ay dibada joogeen madax ka yihiin sidaan horeba u sheegnay waxay shahaado sare ka haysataa cilmiga maamulka iyo maaraynta waxaanay aad ugu wanaagsantahay oo ay mudo

ku shaqaynaysay Arkiifiyada iyada oo gooni u baratay qaabka iyo sida loo ilaaliyo faylasha iyo waraaqaha sirta ah waxa kale oo loogu yeedhay mashruuca waxa wada oo qayb ku leh wadanka Jarmalka waxaana loo baahan yahay qof afkoodii yaqaan oon ahayn intan madaxda ah intii aanuu uba sheegin hadalka Abtidoon ayay Salmi soo fadhiisinaysaa qoladan sharaab ayay u shubaysaa aabaheedbay is baraysaa dabadeedna sidiibay ku tagayaan waxay ku mashquushay Salmi warqadan shaqada oo ah tii koontaraaga iyo midi loogu bushaaraynayay inay heshay shaqada inkastoyna dalbanin haddana way u baahnayd waayo wakhtiyadan danbe waxay ku ahayd guriga kali oo markan diyaar ayay u tahay inay gasho shaqada.

Abtidoon markuu arkay farxada inantiisa ka muuqata ayaa wuxuu ka xishooday inuu u sheego arrinkii ay isla soo qaateen Subeer aabihii waxaanuu go'aansaday inaanuu ka nixinin gabadhiisa curad wuu iska dhaafayaa waa la iska qadaynayaa qof walibana qolkiisii ayuu u hurdo tagayaa halka maalintaa reer Dhamal ay u ahayd maalin aad u adag murugo badan aqalkuna buuq iyo sawaxan isla oogsaday Subeer istaagay talo kale ma yeelayo oon ahayn Salma oo la ii dhiso Dhamalna istaagay wax kastaa haday dhacayaan kuuma suuro galayaan aabaheedna waanu isasoo aragnay waan u sheegay inuu iga qabsado inantiisa isla markaa adna waxaan ku farayaa haddii aad ubadkayga tahay inaad faraha ka laabato gabadhaa kasii darane labadii hablood ee la dhashay waxay la safan yihiin aabahood oo ninkii Subeer ahaa ma haysto wax garowshiyo ah waxay sidaa ahaataba ayaaniba ayaan ayay u sii dhiibaysaa wakhtigu nacasaysanaa waayuhu kaa badin ogaa walaalkaa mar ay ku tahay waxayntu mar fiicanaa Subeer kama go'i karo oo gooni ugama tagi karo reerkooda waayo aabihii kaligiibuu dhalay reerka isagaa ka masuul ah mana laha dhaqanka dhalinyarada wakhtigan oo maaha nin aabihii ku hal celin kara aamusnaantiisii faraha badnayd canaantii oday Dhamal dhego hadalkii hablahooda iyo dhoole ka qosolkii dhalinyarada ay jaarka yihiin ayaa dhaygag ku noqday oo marnaba Subeer kama soo kabanayo hantaaqada

gaadhay hadaynu dib ugu noqono Salma markay furtay warqadii **loogu** keenay warqada xafiiska isla maalintii ku xigtayba waxay u shaqo tagtay xafiis hayadeed kaasoo mushahar wanaagsan looga qoray inkastoonay iyada ujeeddadeedu ahayn diyaarna u ahayn shaqadan hadana si ay iskaga mashquuliso, isku ilowsiiso ayay u yeeshay wax kasta oo ay kaga bixi karto ama kaga badbaadi karto bad weyntan kaaga darane awal hore marka ay Salmi u dirto taleefan guriga reer Dhamal si fiican oo soo dhawayn leh ayaa looga qaban jiray maxaase iska bedelay isagoo jooga ayaa lagu yidhaahdaa ma joogo xataa waxa la sooo gaadhay heer ay hablahoodu ku yidhaahdaan gabadhyahay telefoonka gurigayaga noo daa dhibaatooyinka jacaylka, dhirbaaxooyinka xanuunka kulul ee ka yimaada dhanka waalidku waa dhib ku saa'id ah inta is calmata iyo inta is caashaqda

Markaan dhan kale ka eegno aabuhu ama waalidku ubadkiisa wuxuu la jecelyahay inay maraan ama noqdaan kuwa ugu nolosha wanaagsan oo nina ma ogola in ilmihiiisu meel halow, heedo daw iyo camal la'aan la taagnaado gidaarada waatane hadaba yaa isu afgaran doona waalidiinta iyo jacaylka Salma subixii waxay baxdaa todobada maalintii waxay soo noqotaa saddexda galabnimo Subeer inkastoo aanay reerka kala xidhiidh furan oo aanuu dayro ahayn haddana uma aha habluhu sidiisii hore ogowoo waxa bar-bar socda dhawr hablood oo aabihii iyo hablahoodu ay soo arkeen mudadii uu isagu ku maqnaa Salma Hodan waxay ka mid tahay hablaha quruxda badan ee ay soo aragtay mid ka mid ah labadaa gabdhood ee la dhashay, gabadhaa Hodan inkastoo aanay gaadhayn halka Salma waxaadse moodaa hablaha wakhigan joogay inay tahay midii lagala bixi lahaa Hana oo ay walaalo yihiin Subeer ayaa waxay Subeer ku khasbaysaa inay is barto dabadeed goor galab ah ayay la balantay wakhtigaana Subeer wuxuu joogaa qolkiisa oo wuxuu u diyaar garoobayaa inuu u soo baxo dibada waxa albaabka ka soo galaya gabadha Hodan oo siday u labisan tahay aad moodo qolyihii Model xayasiin jiray Hana lafteeda ayaa in badan kor iyo hoos u eegtay markii ay ka furtay albaabka waa la soo socday waxa la yimi qolkii fadhiga cabaar yar ka dib ayay Hana u tagtay walaalkeed iyadoo u

sheegaysa inay rabto inay isbarto gabadh ay saaxiibo yihiin Hana iyo Subeer walaalnimada ka sokow way isaga dhawaayeen reerka intooda kale markaa waxaan odhan karnaa waa qofka kaliya ee wakhtigan ku dhiiran kara Subeer una sheegi kara dhibaato kasta oo dhaca wuu soo baxay waxaanuu u soo dhaqaaqay qolkii fadhiga wuxuu markiiba isha qac ku siiyay gabadhan aan gabdhaha la midka ahayn gabadhan qaabka ilaahay uu u dhigay uu gaar uga yeelay kuwa kale gabadhan qof kasta oo arkoodaa aanuu marnaba ka jeedsanahayn in yar kadib ayuu ku hakaday albaabka hortiisa dabadeed isagoo sidii xishood u hadlaya ayuu odhanayaa “waa la idin salamay” hablihii guriga ku jiray ayaa mar kaliya ka wada qaadaya waxaana loo raacinayaa “soo soco Subeeroow”

Inkastoo Subeer qalbigiisu meel ku jihaysan yahay inkastoo cidina aanay bedeli karin go’aanka adag ee uu qaatay inkastoo aanuu wakhtigan arkayn wuxuu kaga digo rogto ama uu ku duro Salma hadana markuu fadhiistay meeshii ayaa Hana intay kacday waxay u sheegtay in gabadhani tahay Hodan oo ay isku iskuul yihiin imikana ay dhameeyeen waxbarashadii isla markaana rabta inay waxbarasho dibada ah u aado isbaridu ehelkeeda halkay ka soo jeedo halkay degen tahay iyo faahfaahin badan oo kale ayay isu raacisay sidoo kalena waxay ku tidhi Hodan wiilkan aad arkaysaa waa ka keliya ee waxa ilaahay dad uumay aanu ka eegano waa indhahayaga waa qalbigayaga waa aayahaga waa iftiinkayaga waa ka keliya ee inta ilaahay ka sokoysa aanu u noolahay waa walaalkay oo aanu jecelnahay aan kuu soo daadajiyeey waa Subeer intaa markay tidhi ayuu Subeer aad u qoslay waxaanu ku yidhi walaashii “anigoo ogsoon waxa aynu isu nahay anigoon inkirayn inaan ahay iftiinkii aqalka anigoon hilmaansanayn inaan ahay aayihii walaashaydaan jeclaayeey marna isma lahayn Hana intaasoo faalo ah ayay kaa bixin doontaa waadse ku mahadsan tahay sida aad isku kaaya bartay aniga iyo Hodan walow wakhtigan ay Hodan ku jeedo dhinaca TV-ga oo uu ka socdo filin musalsal ah” Hana ayaa waxay tidhi “waan idiin soo yar laabanayaaye” inantu yay dareemin cidlo sidaan hore u sheegnay Subeer maaha aftahan waa nin afgaaban oon aad u furfurnayn waa nin mar

walba jecel inuu raali galiyo qof kasta isla markaa wuxuu ku odhanayaa “walaal Hodan horta barasho wanaagsan, waxase ka fiicnayd maalmo ka hor ama bilo inaynu is baran lahayn waayo waxa jirtay wakhti aan xanuunsanayay oo aan u baahnaa dhakhtar iga badbaadiya khatarta aan ku suganahay anoon kuu duur xulayn kuuna dul marayn hadalna kuu dadayn waxaan kuu sheegayaa waxaan ahay nin xaas leh balse reerkoodu aanay la ogolayn gabadha uu rabo” Hodan sheekada way la socotaa laakiin waxaa ka yaabisay waxaan ahay nin xaas ah waxay la soo booday “walaal goorma ayaad ismehersateen gabadha sawkuwan reerku aadka kuu jecel maxaa idin dhex yaala” wuxuu yidhi hadaan xaqiiqda kuu sheego ma guursanin wali laakiin waxba kama dhaco guurka arinka aan imika ku jiraa hadaan kaaga waramo sooyaalka taariikheed iyo jaranjarada uu soo maray jacaylkaygu waxa laga yaabaa inaad u garaabi doonto ee waxaan ku waydiiyay adigu ma inanbaad tahay, miyaa lagu qabaa mise imikaad qalqaalinaysaa” isagoo qoslaya ayuu intaa isu raaciyay

Hodan waa gabadh furfuran kama ay xanaaqin ama uma ay qaadan xumaane waxay ku tidhi “kolay waxaan ahay korkayga ayay ka muuqataa la ima qabo guurna marleyba gabadhi waa tii u joogta iyadoo ka daba joogta kalmadii ahayd ma qalqaaladeedaad ku jirtaa waxaananse garanayn goorta iyo wakhtiga uu igu qaadan doono” wuxuu u sheegay ma haysataa cidaad jecelayd, ma sheekaysataa hadaad sheekaysatadan ma is jeceshihiin qofka aad la sheekaysato waa kaaf iyo kala dheeri waa maan baray iyo maan bilaal waa gudcur iyo maalin halka ay kala taagan yihiin gabadhani waxay u soo qalab qaadatay isaga isaguna waakan waydiinaya cidii ay la sheekaysanaysay Hodan ma odhan karto adiga ayaa doonaa inaan kula sheekaysto waxayse si sarbeeb ah ugu sheegtay in uu wakhtigeedu dhaw yahay iyadoo ku kaftamaysa calaf waa halkiisee caashaq ayaa i haleelay waxaanse garan la’ahay qofkaan jecelaa qof kale oo uu jecel yahay si aan ugu sheegana ma garanayo maba dhaadana Subeer qofka la jecel yahay ee qofka kale jeceli inuu isaga yahay wuu soo booday wuxuuna ku yidhi “walaal waxaasoo miidhanbaa ka dhacaya adduunka ha u badnaadeen raguye

waxaad arkaysaa hablihii oo sugaya iyo iyagoo iska sheekaysanaya ama iskala qabsanaya cid kale arrintu se waa mid guracan oo anigu qudhayda dhibaato jacaylbaa Hodaneey dhabta aan ku haystaa ma dhigo hurdada dhinac habeenkii maalintii waan ka go'ay dhadhansigiiye dhulka waxaan u joogaa dhimasho iyo nolol dhexdoode dhigay caruuray dhaleen oy dhabta ku hayaane anigana dhibaato jacaylbaa dhinacayga taal oo dhulku wuxuu ila wareegaa marka aan maqlo dhudi warkeeda isagoo geeraraya ayuu ku yidhi walaal haddii dadka oo dhami isu ogaan lahaayeen jacaylka waxba ma xumaadeen ee dhibtu waxay ka dhacaysaa qof qof wax u ogi ma jiro labadii qofee isdoortana waxa la kala dhex dhigaa dad kala dila oo waxa loo kala sheegaa waxa aan jirin hadaad cid kasta ka badbaado waxa laga yaabaa inaanad ka badbaadinba qaraabadaada" wuxuu sitaa Subeer oo uu soo durkinayaa wakhtigaa rikoodh wayn ma daawanayo TV-ga laakiin cajalad heeso xul ah ayuu ku yar ridanayaa waxaanay ahayd heestaasi midan:

Cisho roobka oo da'ay

Iyadoo ay ciid tahay

Dhirtu caadadeedii

Carfi gaara leedahay

Oo cidhifka reeraha

Ubox caynba cayniyo

Is cidhiidhshay kaymuhu

Dhalintunaa ciyaartiyoo Cadaloolaka

fiidkii Ku cawaysay sheekada

Cindi ha isku keen simo

Caafimaadku noloshiyo

Calaf ha isku keen simo

Heestan markay maqashay Hodan iyo kuwo kale oo la mid ah oo uu u sheegayo ama aad garanyso in loo tiriyay qof loo diidan yahay qof kale balse aanu ka samrayn ayay waydiinaysaa waxaanay odhanaysaa "ma ogtahay Subeeroow in dhalinyaradu intooda badani kugu xamato inaad tahay cilmigii

wakhtigan inaad caashaqaba adigu abuurto inaad aabo u tahay oo aad anba qaaday ama itijaah wanaagsan u samaysay habka dhalinyaradu maanta u mari lahayeen guurka waayo ma jiro wiil shan sano ku dhawaad sagaya gabadh laga yaabo markay timaado inay isbedesho amase waxa ka sii daran gabadha la guursaday ee la soo qabay eed ilaa hada jeceshahay walaal jacaylkani waa kaa sidee? Waayo da' yarteenu aad ayay arintaa uga faaloodaan, u falanqeeyaan mana arag wali garowshiyo aad adigu leedahay markii hore way wanaagsanayd oo inantu dhib kasta way la soo dersi kartaa laakiin markan danbe mar haday guri gashayba waxay ahayd inay ku adkaysato ninkeeda iyadoy waliba igu maqaalo tahay in wakhtigii aad kala maqnaydeen aanuu wax war ah ama waraaqo ah ka heli jirin marleyba anigu walaashaa saaxiibadeed waa walaashaa waxaan kuu jecelahay sida wiilkayaga oo kale" waxay ku qarinaysaa inay erayadan ay tirisay uu u qaato qaar ay kaga diyaarsanayso inuu xageeda u soo jeenjeedhsamo Subeer lugaha ayaa isu dul saaran wuxuuna ku fadhiyaa kursi fadhi ah oo nooca dhaadheer ah dhabanka ayuu gacanta ku hayaa waxaanuu si aada u dhagaysanayaa hadalada Hodan dhinacna wuxuu ka fekerayaa halka ay ku danbayn doonto arrintii isaga iyo Salma Hana mudadan dhan banaanka ayay iskaga maqnayd intay doonaysayna way heshay oo mar haday labadoodii u kala dhex baxday waxaad moodaa inay ku guulaysatay arrin ay in badan ka soo shaqaynaysay halkaa marka ay marayso sheekadu ayay u soo galaysaa waxaanay ka cudur daaranaysaa maqnaanshaheeda iyadoo ku sababaysay inaan guriga inani la joogin inankooduna gabadh u keeni waayay markaa keli aan ku noqday hawshii guriga oo dhan halka Muna oo ah ta ka wayn ay ku maqantahay waxbarasho balse aanay u furfurnayn sida Hana oo kale,

Subeer ayaa ku odhanaya "sheeko aad dhistay iyo arin aad qorshaysatay ayaa isugu kaa beegmay waxbana ma laha ee ninba waa mare adiguna markaaga adkayso" intaa markay is dhaafsadeen ayay ku odhanaysaa "walaal Subeeroow malaha inanta si fiicanba ugumaad sii sheekayn, dee Hodaneey inankayagu wuu xishood badan yahaye ka raaleehaw haddii

mudadii aad la joogtay aan wax hadal ah oo badan dhankiisa kaaga iman” waxayse hilmaansantahay in meelo fog-fog la isla gaadhay oo sheekaduba si quruxbadan isugu duba dhacday Hodan ayaa ugu celinaysa “Subeer idinkaa gooni ka dhigaye maaha nin gooni ah agtiisana u malayn maayo inuu yahay mid lagu cidloonayo maba dareensanayn mudada aad iga maqnayd ee aad iga maqnayd ee hadalkaaga ayuunbaan ku soo baraarugay haddii aanad noo iman lahayna maan ogaadeen goorta waayo Subeer waa qof Illaahay isu raaciyay karti uu ku hadli karo, aftahanimo iyo isagoo hibo u leh inuu ka dhaadhiciyo waxa uu rabo qofka uu daanayo laakiin arrintu waxay ka dhigan tahay dhibaataada Subeer ayaan reer Dhamal si aada ugu dhug yeelanin ninkanina nidar ayuu galay adigoo walaashii ah oo u dhawina wax badan kalama socotid waxa ka sii daran heesta wakhtigaa ka socota rikoodhka hoos yaala ood moodo inay ka turjumayso waayaha Subeer waxaanay ahayd heestu sidan:

Waxay dani keentay iyo
Kalgacal ila durkoo
Dad iyo duunyoba ka go’ay
Waxbaa daris ii noqdee

Dugaagaan weheshadaan
Dulmeerayaa kaymahoo
Halkaad iga daydaydiyo
Halkaan degay kala durkeen
Illaahbaa deeq baxshee
Dulmiga caashaqa ka daa
Doorashada caashaqa ka daa
Anoon dooda iyo deeq
Dagaal la iga badinahayn
Dareenkayga aad ogtahoo
Jacaylbaan la doodayaa Janooy halis daaqayee
Dabkaana adaa shidayee
Halkaad iga daydaydiyo

Halkaan ka durkee

Illaahabaa deeq baxshee

Dulmiga caashaqa ka daa

Digashada caashaqa ka daa

Hana ayaa odhanaysa “walaal Subeeroow aniga waxba heesta ha ii dalacin jacaylka ku haya iyo dhibtiisa waan ogahay waxaanse ogahay khaladna ha igu ahaatee qofka aad jeceshahay inaanay ahayn mid aad intaasoo dhan isu khasaariso ama naftaada u dhibto anigu maanta beerkayga hadii la yidhaa u saar walaalkaa waan kuu saarayaa mana jiro adduunyada cid aan eegto oon adiga ahayn waan ku khasbanaa waxaad jeclaato inaan kula jeclaado laakiin walaal waxaan xusuusnahay halkaad ka soo baxday heerka aad taagnayd iyo halka aad maanta marayso oon ahayn kuwo isku dhaw anigu hal habeen in dhibaato kula soo deristo oo aad seexan waydo waxay iila mid tahay boqol maalmood oo aan soo jeedo” Hani marka ay hadalkaa leedahay indhaheeda ilmo ayaa ka socda waayo waxa damaqday heesta uu u galiyay taas oo uu ka dhigayo in walaashii dulmiyayso caashaq dhab ah oo jira. Subeer ayaa intuu istaagay ku yidhi walaashii “walaal waan dareemayaa oo waxaad u aragtaa in aan heesta adiga kuu galiyay laakiin waxaad ogaataa dunida oo dhan ayaa iska wada sidaa ah adiguna in aanay jirin cid aad iga jeceshahay anba waan ogsoonahay”, way isu dhagaysanaysaa Hodan mudada ay wada hadlayaan labada walaalaha ahi oo ugama banaana meel ay ka soo gashaa Hana ayaa inta ay soo kacday walaalkeed labada dhaban ka dhunkatay waxaanay ku tidhi “anagu hadaan reerkeena nahay waligayo waxaanu kula jeclayn waxaad jeceshahay waxaadse eersataa cidii aad jeclaatay waayo haddaanu kuu diidi lahayn anagaa khaladka lahaan lahayn maxaanu yeelnaa adiga oo soo taagan ayay nin iska guursatay” Subeer hadalkaasi wuu ka cadhaysiiyay wuxuuna ku yidhi “miyaad ogtahay sababta kaliftay guurka Salma maka war haysaa inaan ahay ka ku qalqaaliyay in nin kale guursado ma u qaadanaysaa ka ku faraxsanaa in la guursado wakhtigaa inaan aniga ahaa ma malayn karaysaa sababta aan waxaasoo

dhan u yeelayay? Waxa jirtay arrin aan idinka qariyay rabina inaan hadana sheego oo soo dhex gashay aniga iyo gabadha aan is jeclayn qof walibana wuu yeelayaa haddii ay la soo dersi lahayd arrintani” Hodan marka ay halkaa marayso sheekadu saacaduna tahay sideeddii habeenimo ayay odhanaysaa “dee labadiinan walaalaha ahi idinkaan ka dhicin kuwo is jecel ee aniga talow gurigayagii yaa i gaynaya” wakhtiga waa la isku beegay oo Hana muddadan oo dhan waxay ugu sheekaynaysay Subeer in goor sheegtu sii jiidato wakhtiguna sii fogaado si uu Hodan u noqdo qofka kaxaynaya waxaanay ogtahay in marka ay isku keliyaystaan kolay kaftan dhex mari doono waxaanay la soo booday “oo walaal maanad ogayn in gaadhigii Subeer albaabka inoo yaalo ma inagaa ahba cid ka werwerta qofkii ina qaadi lahaa aan iska sheekaysano ee hadalka inoo wada hana inoogu soo koobina” intay kacday ayay mar labaad waxay u soo qaaday laba koob oo sharaab ah iyo keeg ay iyadu guriga dhexdiisa ku samaysay oo muddooyinkii danbe ee Subeer cuntooyinka kale ka soomay,

Hana ayaa ahayd qofka gacanteeda wax ku siin jirtay isla markaana waxay u samayn jirtay waxyaalo yar-yar oo ay iyadu samayso intii ay maqnayd ayay Hodan ku tidhi Subeer “arrinta ku qabsatay miyaanay ahayn ama noqonayn mid aad iska iloobi karto hadaad hesho waxaad ku ilowdo waxaan dareemayaa waalidkaa, walaalahaa iyo caayiladiina oo dhami way ka soo horjeedaan guurka gabadhaa adiguna ma noqon kartid mid gooni u baxa anigoon ka hadlayn dhinaca dhaqaale iyo isku filaansho balse kaa tusaalaynaya xaga isku xidhka xaafadiina” Subeer inta uu yar dhoole cadeeyay ayuu ku yidhi “maanta oo ay magaalada joogto iska dhaafoo iyadoo la qabo oo nin kale oori u ah ayaan jecelahay hadeerna waan jecelahay waanan jecleen doonaa” erayadaasi waxay ku yihiin dhib iyo karaahi inanta Hodan ah waayo waxay damacsan tahay inay wax u furfurmaan oo Subeer ka soo dabco halka uu taagan yahay markii ay dhamaysteen cabitaankii iyo cunitaankii keega ayaa waxay u balamayaan in ay amba baxaan waxaana la soo istaagay albaabka hore ee aqalka oo uu ku jiro gaadhigu Hana ayaa ka furaysa albaabka hore iyadoo sii

macasalaamaynaysa niyadana u dejinaysa walaalkeed Subeer Hodana ku leh "inankayagu yaanu cidlo naga dareemin" waa la soo dhaqaaqay markii dhexda la marayo ayay Hodan soo jeedisay in maadaama ay wali fiid tahay magaaladana in badan aanay arag in badan oo ka mid ah uu soo tuso Huteel Ambassador oo wakhtigaasi isagu ahaa mid cusub sidii uu ka yeelay wuuna geeyay way soo daadaawadeen sharaabay ka soo cabeen waana soo noqdeen marka ay marayeen isgoys wadada dhexdeeda ah ayaa waxa ka soo horbaxay Salma oo la socota gaadhigii shaqada oo wakhtigaa habeenimo dib ugu noqotay xafiiska Salma gaadhigu kuma cusba iska dhaafe isaga e lanbarka gaadhiga ayay sheeda ka taqaanaa waxa la isku soo gaadhay goob ishaaro ah waanay is barbar galeen iyadoo Salmi rabta inay Subeer salaanto nasiib darro dhinaca Salma waxa soo xiga Hodan oo sidaan horeba u sheegnay wakhtigan u lebisani si aan hore loo arag daaqada ayay kala hadashay si uu muraayada u dejiyo Hodan ayaa soo jeedinaysa Subeer waxa aanay ku odhanaysaa "gabadhbaa leh daaqada dejiya ee maxay inooga baahan tahay" wuu soo jaleecayaa waxaana indhihiisa qabanaya Salma naxdin, farxad, amakaad, af kala qaad, anfarii, werwer, walaac, shaki iyo dareemo badan oo kale ayaa mar kaliya maskaxdiisa ku kulmaya waxaanay Salmi iyada oo qoslaysa oo qudheedu u qaadan la' gabadha la socota Subeer ku odhanaysa "Walaal waa wado waxaanse doonayaa inaan kula soo hadlo caawa ee sideebaa wakhtigu kuu yahay" markaa adigu waxa galay dareen shaki oo waxay is leedahay wiilkii Subeer ahaa wuu leexday waxaana ka soo dhaadhacay hadaladii faraha badnaa ee waalidkii ku lahaa sidoo kalena markay kala dhaqaaqeen ee ay Salmi hoyatay waxay ugu tagtay guriga aabaheed oo daarada fadhiya una diyaar ah inuu u sheego farriintii uu soo faray oday Dhamal cabaar ka dib markay cashaysay ayuu u yeedhayaa waxaanuu leeyahay

"Aabo maalintii dhawayd ee aad shaqada heshay waxaan diiday inaan kaa nixiyo waayo hadalo aad u xun-xun ayaa iga soo gaadhay ninka dhalay inankii Subeer ee aad ii sheegi jirtay aabo waad ogtahay nin oday ah oo gabadh dhalay soddogna ah anigu ulama dhaqmin sidii uu iila hadlay balse

aabo odaygaasi wax alaale wuxuu iila hadhay ma jirin” wuu u sii waday hadalka oo wuxuu u gaadhsiiyay in xitaa odayga

Subeer dhalay ku yidhi “inantaada naga qabo oo ha ii nabad geliso wiilkayga telefoonka gurigaygana yay soo garaacin” cajib!!! Waxaad moodaaba in wax isku beegbeegmeen inantii Salma aabaheed si wanaagsan ayay uga qaadatay hadalkii waxaanay ku yidhi “aabo horena ceeb kuugumaan keenin maantana ha iga filin inaan kuu keeno wax qayrkaa ku hoos marinaya” Salma aabaheed wuu ku soo kacay ayuu madaxa ka dhunkaday oo uu ku yidhi “aabo duco ayaan kugu ogahay waxaad ogaataa in aanad waligaa iilanayn waxaad ogaataa inaan waxba kaa xumaanayn ha hilmaamin hana iloobin in aniga iyo hooyadaa mar walba aan kula daba taaganahay duco” intaa kadib Salmi waxay u dhaqaaqday dhankii qolkeeda si aada ayay u fekertay manay fekerin mudadii ay joogtay sidii caawa u fekertay waxa isu qaban la’ hadalka aabaheed, Subeer iyo gabadha la socota, telefoonka guriga ee lagu dhigayo, iyo hadalo ay dhalinyaradu ku soo tuurtuurayaan, dabcan waa gabadh ugub oo aad u qalbi jilicsan mana aha qof marka hore u dhalatay waji adayg iyo is adkayn waa laga dareemayaa dhibaato kasta oo la soo derista kadib waxay go’aansatay inay si toos ah ugu tagto Subeer soona waydiiso waxyaabaha is bedelay iyo hawsha hada socota waxay kor u qaaday Tilifanka nooca loo yaqaan Mobile-ka maadaama aan ka kale ee guriga laga qaadayn way garaacday markuu arkay lanbarkeedii ayuu si deg-deg ah u qabtay waxaanuu ku yidhi “Walaalo Salma bal iska waran maxaa kugu dhacay baryahan, maxaa lagu waayay maxaad ku mashquushay maxaad igu ilowday ma shaqadii aad heshaybaa mise hooyaa xanuunkii ku soo kordhay” intuu cabaar qoslay ayuu ku yidhi “Salma anigu ismaan lahayn intaasaad kala maqnaanaysaan” Salmi intan uu hadlayo mar kaliya jawaab may celin waanay dhagaysanaysaa markuu dhamaystay ayay ku bilowday “Walaalkayoow waa adduunyo waa hadhkaa labadiisa galin waa madow iyo cadaan waa farxad iyo murugo waa abaar iyo barwaaqo waa oohin iyo qosol waa amakaag iyo ashqaraar ma diidani inaan noqdo mid aad kaga baxday ama aad kaga aar goosatay gef hore oo ay samaysay balse waxa isu kay qaban waayay hadalkaaga macaan wajigaaga

furan iyo qalbigaaga sida kale u shaqaynaya waxa u qaadan waa igu noqotay inaan ogaado inaad leedahay saaxiibad kale taasoo aanay cidina ii sheegin hada ogowoo kuumaan diideen waan kugu hambalyayn lahaa waan kuu soo dhawayn lahaa laakiin sidaad yeeshay marnaba ma yeeleen maxay kaa taraysaa maxaadse igu yeelaysaa maxayse kuu kordhinaysaa intood gabadh qurux badan soo qaadato inaad gaadhiga aan saaranahay barbarkiisa soo istaajiso maxay kaaga badan tahay miyaynu se ahayn walaal laba ay ka dhaxayso arrimaha noocaas oo kale ah kuma seexan habeena kuma toosin aroorna hadimee Subeer meel baa i damqata beerkaa i olola bogaa i daloola haddii aan arko dhib aad leedahay dhaayuhu ma farxaan aragaaga la'aantii ma galo shaqo ilaa aan arko sawirkaaga ma seexdo habeenkii ilaa aan dhagaysto hadalkaaga halaaga, jabka, jiribka, qalalaasaha, qulubka hagar daamada, hantaaqada iga go'day mudada aan kuu sheegayay waxaan ilaahay ka baryayaa inaanuu waxba kugu yeelin anigana uu iga caafimaadiyo walaal waad ogaysoo markii aan dhibaataada galay markii aan falka sameeyay markii aan fakiyay jacaylkeena markii aan ku cidleeyay anigu waxaan ahaa qofka mar walba taagni inaan adiga kuu go'o hase ahaatee adiga ayaa iga diiday oo igu yidhi yeel hadalka waalidkaa maanta waxaan marayaa meel aanay marayn xataa dadka waalan walaal waxaan ka xishoonayaa dhalinyarada waxaan dhibsanayaa cid kasta oo isku keen taqaana waxaan ka cabsanayaa qof kasta oo ii yimaada aniga oo is leh tallow muxuu ku waydiin doonaa Subeeroow haday kula sahlan tahay aamuska aad aamustay inanta aad raacday go'aanka reerkiina eed aqbashay waxaad ogaataa in aan waligay ahaan doono Salma oo Subeer u joogta adiga ayay kuu taalaa sida aad ka yeelayso naftayda aayahayga iyo mustaqbalkayga"

Subeer mudadaas oo dhan aad ayuu u fekerayaa waxaana ka dhaadhici la' meeshan ay ula dhaqaaqday iyo halka uu joogo wuxuu is barbar dhigayaa isaga iyo waalidkii sida ay isku yihiin iyo hadalada gacalisadiisa garaadkiisu ma xuma nin maan gaabana maaha markiisa horena uma dhalan inuu ku degdego hadalada qaar maskaxdiisuu baadhayay wuxuu ka soo minguuriyay wuxuu ugu jawaabi lahaa ama uu kaga jaahil tiri lahaa sida iyo

qaabka ay u qabto Salmi iyo halka uu isagu taagan yahay Subeer wakhtigan wuxuu ka soo noqday Hodan oo uu soo dhigay oo waatii Salmi ku aragtay isagoo sida cabaar ayuunbuu guriga joogaa wuxuu ku yidhi "Walaal moobilka dabkaa uga dhacaya waxaad soo garaacdaa laynka guriga" dabadeetana sidii bay ka aqbashay wuu dhigay telefoonkii Salmi waxay soo tijaabisay inay garaacdo laynka hore ayuu ugu soo gali waayay qofka marka shaki ku jiro ama uu meel ku maqan yahay ama niyadiisu meel ku jeedo wax waliba waxay isu tusaan dhinaca kale markiiba waxay isu rogtay ama ay isa siisay oy maskaxdeeda galisay ogaanbaa telefoonka laynka loo xumeeyay iyadoo ku daashay ayuu goor danbe Subeer telefoonka kor u qaadayaa show dhinac ayaanu si haboon uga saarnayn wuu garaacay Salma oo aad u cadhaysan ayaa qabatay "Hallow markay tidhi" ayaa wuxuu ugu jawaabay "Walaal raali ahaw waan dareemayaa oo waad cadhaysan tahay hase u qaadan waxa aan u kasay in badan ku sii daahi maayo oo arrin ka wayn arrintan ayaa ina dhex taala waxaan doonayaa inaan kuu sheego in aanay gabadh aan la sheekaystaa waxaan doonayaa inaad ogaato dookhaygu inuu adiga yahay waxaan doonayaa inaan ogayn dunidaba inay dumar kula mid ahi ku uuman yihiin waa nasiib darro waa ii ayaan daro waa ii masiibo waa ii niyad jab waa ii karaahi waa la iga adkaaday adna waad ii raacday waxaan ku jiray dagaal waxaan galay dhufays adiguna cadowaga ayaad barbarkooda soo istaagtay hadaad adigu hooyo iiga baxdid barigii ogow anigu inaan ilowsanayn inaan ahaa qofka go'aanka lahaa waxba ha igu celcelinin ha igana dhigin qof iloobay abaalkii dhexdeena anigu wali sidiibaan kuu ahaaye wax igu kordhay mooyaane inaba jacaylkaygii waxba iskama bedelin balse waxa yaab ka joogaa sidaan kaaga dhaadhicinayo horta way u martay oo way u suuro gashay waana fursad la ila helay waayo sida wax iskugu soo beegmeen ayaa dareemayaa laakiin isma lahayn niyadana kuma hayn qalbigaygana kumay jirin Salma ayaa kuu soo raaci doonta ama kuu maqli cid kale haddaan kuu sheego hadalkaba haddaan kuu cadeeyo waxa jira haddaan waxbaba kaa qarin oon halkiisa ugu tagno waad ogtahay oo reer Dhamal ilama kaa rabaan waxaanay geed

dheer iyo mid gaabanba u fuushan yihiin sidii ay iigu dooni lahaayeen gabadh kale balse haddii aan ka yeelo arrintanina maaha inay adiga ku shaki galiso waayo qofka ay haysataa waa aniga cid laga rabo in uu ka soo baxana waa Subeer adiga waxaan kaa sugaa waa samir iyo dulqaad inantan aad aragtay iyo kuwo kale ood arki doonto iyo qaar lagu sheegi doono iyo kuwa hadeerba lagu sheego wax ka jira ma jirto qalbigayguna waa mid midkuna waa Salma” Salma cabaar ayay aamustay mar waxay is tidhi waad khaldantay marna waxay is leedahay waad saxsantahay markay eegto hadaladii aabaheed iyo gabadhii ay ku aragtay Subeer niyadeeda waxaa ku soo dhacaysa in Subeer khiyaamaynayo oo waxa uu u sheegayaa tahay maaweelin iyo maslaxaad uu ku maslaxayo iyada ee aanay jirin wax kale oo ka hooseeya waayo hadaladii xaaji Abtidoon iyo gefkii Dhamal ayaa waxay noqdeen laba meel laga maro aanay jirin marna Salmi waxay is leedahay Subeer waad ku geftayoo isagoo kuu maqan oo waalidkii ay cadaadis saareen ayaad adiguna iyagii u raacday oo waadigan waxaanu qabin dusha ka saaray ee ma haboonayd oo ma wanaagsanayd mase qurux badnayd inaad hubiso intaanad hadalka odhan intaas oo hadal ah iyada uunbaa niyadeeda iska leh Subeer wuu yaaban yahay waxay la aamusan tahay waxaanuu ku yidhi “Walaal ma kugu dhibaataa hadalkaygu miyaad daalan tahay oo waan kaa dhigaa telefoonka miyaan khaldanahay oo may ahayn in aan intan kula hadlo bal ii sheeg sida wax u jiraan”

Salmi waxay ku soo baraarugtay hadalada cadhada ah ee uu Subeer telefoonka kaga soo leeyahay waxaanay tidhi “Alloow sahal ammuuraha walaal kuma nicin kumana nici karo naxlina kuuma qaadine waxaan ka fekerayay aayaheena mustaqbal waayo waxyaabo badan ayaa isu kay qaban la’ mar laybana waxaan u baahnahay inaan sida ugu dhakhsaha badan kuula kulmo oo hadayna caawa noqon habeen danbe aanay shaafin ha dhayalsanin oo ha u qaadanin inaan iska leeyahay hadalka xaalkeenu meel adag ayuu marayaaye waxaynu u baahanahay inaynu wax isku ogaano meel wax isla dhigno dhibta meesha ka saarno inaad ii maqantahay aan ogaado adna aad ii ogaato inaan adiga kuu joogo intase ka horaysa

xaaladeenu waxay ahaanaysaa mid cakiran oo dhinac walba ka soo oodan” Subeer wuu ka aqbala ballantii oo wuxuu yidhi “Habeen danbe todobada ayaan kuugu imanayaa halkii aan iskugu iman jirnay hadalka dadku leeyahayna marlay maaha inaad ii maqasho imikana walaal waad mahadsan tahay ee waa inoo iyo berito igalana soo hadal Mobilkayga habeen” wanaagsan ayaa la is yidhi wakhtigaa Hodan waxay telefoon kula hadlaysaa Hana waxayna uga sheekaynaysaa inay arkeen gabadhii Salma oo ay isku aragtay iyaga oo wada socda si xuna uga gubatay Hana yar aad bay u qososhay waxaanay tidhi “Waa intii aan doonayay gabadhaasi mar uun ha aragto in wiilkayagu uu raadsan karo gabadh kale balse aanuu iyada oo keliya ku indho beelin Subeerbaa debeda u soo baxay waxaanuu maqlayaa qosolka Hana wuxuu ugu soo galayaa qolka isagoo waydiinaya waxay intaa ku faraxday waxayna ugu jawaabaysaa “Walaalwaxaan sheekaysanaynay inan aanu saaxiib nahay oo nin soo doonayay la yidhi gabadh kale ayuu u fadhiistay markaa sheekadaasaa nagu noqotay dhako faar” Subeer waa iska daacad mana dhaadana oo aad uma eegin ama kama filayaba in cida faraha lagula jiraa ay tahay isaga intuu isna la qoslay ayuu iska soo baxay waxay daarada iskaga hor yimaadeen odaygii u aabaha ahaa oo soo rawaxay waa la isa salaamay balse wax salaan dhaafsiisan la isuma yeelan dhinaca kale Salma markii ay wada hadlayeen Subeer waxa dhagaysanaysay hooyadeed maqlaysayna wax kasta oo ay is lahaayeen waxaanay ku odhanaysaa “Hooyo waan idin maqlayay adiga iyo wiilkii aad ii sheegi jirtay hadalada idin dhex yaalay manaan garan arrimahan is bedelay iyo waxa sababay inuu muddada intaa leeg dhinaca kale ugu wareejiyo maskaxdiisa waxaanse kuu sheegayaa weli inan yar baad tahay waan maqlayay calaacalkaaga iyo in aad ku tidhi naftaydu adiga ayay kuu xidhan tahay waxaan hooyo kuu sheegayaa waayeelbaa wax la waydiiyaaye inanku kama tagana ama marnaba ma dhaafayo sheekada aabihii waxaana ku khasab ah in uu yeelo inantii uu aabihii u keeno hooyo kuma lihi diid kasoo hor jeedso ama hada ka noqo go’aankaaga balse waxaad ku qabsataa niyadaad in qofku bina aadmi yahay isna bedeli karo” intaa marka ay is yidhaahdeen ayay Salmi

hooyadeed ku odhanaysaa “waan iska seexanayaa waanan qaatay waanadaada” maalintii labaad goor ay tahay 11 subaxnimo ayaa waxa iska soo horbaxaya gabadha ay Subeer walaalaha yihiin ee Muna oo ka wayn Hana iyo Salma oo wakhtigaa la socota gaadhi aan ahayn kii Hayada balse iyadoo degdegdan awgeed u soo kaxaysatay gaadhigii masuulka xafiiska ay ka shaqayso Muni waxay meel dhaw ka arkaysaa Salma oo la qoslaysa darawalka gaadhiga laakiin ma garan karto mana oga waxay is leeyihiin way iska soo dhaaftay gurigooda ayay soo gaadhay waxa sheeko la qabsaday Hana waxay ugu bilowday “miyaad maanta ogtahay waxaan soo arkay gabadhii Salma oo suuqa la maraysa nin shaw Hanaay inankan aynu walaalaha nahay gudcur ayuu gudayaa ee gabadhaniba uma jeedo waanay ku dul sheekaysataa isagiina waadigaa arkayoo iyada mooyaane cid kale indhihiisu ma qabanayaan”.

Inta aynaan haddaba sheekada sii wadin ayaa waxaan u sheegayaa akhristeyaasha iyo dhamaan dhalinyarada, waayeelka iyo waxgaradka akhrista sheekadan in ay jiraan dad aan iyagoon is arag la kala dilo oo loo kala sheekeeyo midba midka kalena waxaanuu ahayn looga sheego waxaa badan oo dhacda goor walba hebel oo aanuu aqoon u lahayn inuu ka sheekeeyo hebel kale isagoo ku sifaynaya sifayaasha ugu xun-xun ee qof lagu tilmaamo odhan kari mayo ma aqaano qofkaa ama haddiiba uu yaqaano qofkaasi waa qof wanaagsan wuxuuse xooga saarayaa sidii uu burush u sii marin lahaa aayaha danbe ee noloshiisa oo dhan anigu kolay qof ahaan ma garan karo ahmiyada ugu jirta iyo faa’iidada uu ka helayo balse waxaad moodaa in ay ku faraxsan yihiin dadka intooda badani wax ka sheega iyo kala dilida dadka is jecel oo waa kii fanaankii lahaa

Dad hadaad is qabataan

Ileen waad la doodaa

Dugaagoo ku weerara

Yurbaa lagu dabaalaa

Duufaanka xooga leh

Waa laga ducaystaa
Shay kasta oo nafta u daran
Waxbaa lagula daalaa
Balo waxaa ugu digo kulul
Damiir xume jacaylbaa
Daandaasi badanaa
Waa dira diraalee
Intuu hore u dabar jaray
Duqii qays ahaa kow
Ku daaroo cilmina labaa
Inuu cudur da' wayn yahay
Qofkuu helo dawoobayn
Danbi miyuu ka leeyahay
Anaa doorka waayuhuu
Daraygiisa ma i sudhay
Naftu... naftu maygu duduucdaa
Ayana ma iga durugtaa
Inaan doona mooyee
Miyaan dibed ku hoydaa
Danba miyaan
Miyaan diirba naxayaa

Waxa Ku jira tuduca heestan fanaankii waynaa alle ha u naxariistee **Axmed Mooge Liibaan** erayo badan oo kaga hadlayay dira diraalaha iyo dookha, jacaylka wax kastana inaad iska qaban karto balse aanad u jilib dhigi karin qof aad jeceshahay oo damiirkiisa la soo bedelay lana yidhi qofkan kale dan kaama laha way adagtahay sidaad uga daadajiso inaad jeceshahay haddaad oydo hadaad heesho hadaad geeraarto iyo hadaad geeraarto halkii uunbuu isagu taagan yahay waayo waxaa layidhi **been fakatay run ma gaadho** maahmaahdaas oo xaqiiqdii ah mid dhab ah goortay gaadhaana waa goor lagu kala tagay waxaan uga dan leeyahay een uga soo araartay tuducan

waxaan ogahay dhalinyaro badan oo iyaga oon is dilin is dhaliilin is dhibaataaynin is nicin kala fogaanin loo kala sheekeeyay oo midba midka kale u haysto wax aanuu ahayn waxaanan uga jeedaa bulshadu ha u baraarugto gaar ahaan dhalinyaradu indhaha ha kala qaado oo ilaa ay xumaan ku arkaan qofka waa inaanay qaadan waxa looga sheegayo haddii kale wax idiin dhismaya wax idiin hagaagaya horumar aad gaadhaysaan reer aad dhisanaysaan ubad aad yeelanaysaan arrin idiin toosaya iyo wakhti aad iska celinaysaan midna ma jiro waxaad ahaanaysaan la haysteyaal lagu haysto wax yar waayo tadawurka horumarka la gaadhay ayaa wuxuu kuu sahalayaa maanta inuu qofka kaaga dhigo waxaanuu ahayn haddii aanad habsanin haddaba soo ku khaldami maysid waxaan xusuustaa nin aanu saaxiib ahayn ayaa maalin walba wuxuu ka cawdaa waxaanuu ahayn oo lagu sheego maalintii danbe ayuu igu yidhi “ninyahow maxaan yeelaa” anaga iyo dhalinyaro faro badan oo kale ayaa kula talinay inuu sheegto ama ogolaado waxa lagu sheegayo waxay noqotay arrintii markay muddo socotay in la waayo dabadeedna ay isku dhacaan labadii dhinac ee kale dhibaatooyinka hortaagan dhalinyarada ee hagar daamada ku ah ayay kaw ka tahay dira diraaluhu sida abwaankuba sheegayo

Dadba yaan isku diidin

Laba dookhu is raacshay

Kalgacayl isku doonay

Yaa ugu deeqa wanaaga

Yaa daneeya jacaylka

Teeda yaanuu darnaanin

Isna tiisa daryeela

Iyagoo iyyagoo isku duuban

Dadab yaa iskugu hooyoo

Ducada aan kala raagin

Alloow yaa dun xariiraa

Dhul barwaaqo dhexdiisa

Kaymo doogu hadhaysmay

Darmada ugu balaadhsha
Yaa durduursha samaanta
Damaashaadka arooska yaa
Abwaano u doonaa
Ilaa diigu ciyaayoo
Daakiraayo wadaadku
Fanaaniinta dalkoo dhan
Yaa u diyaarsha cawayskaa

Aan dib ugu noqono sheekadeen ee inkastoo ay si xoog ah iskugu direen reer Dhamal lamaanaha Salma & Subeer haddana dhanka kale reerka ay ka soo jeedo Salmi iyagu faraha lamay soo galin xaaladu meesha ay marayso waxa kaliya ee ay i waydiiyeen waa inay ka waraystaan caafimaadka inanka wakhtiga ay hawshooda dhamaysanayaan waxa ka dhiman iyo sidii ay wax ula qaban lahaayeen waxay sidii ahaataba maalintii danbe ayaa odaygii Abtidoon ee dhalay Salma oo u adkaysan la' sida foosha xun ee loola dhaqmay inantiisa uu u yeedhay inantii uu dhalay ee Salma iyo ooridiisii waxaanuu u bilaabay ama ku tiraabay hadalo intooda badan yihiin tiiraanyo iyo xumaan uu ka tirsanayo magaalada uu degen yahay wuxuu ku yidhi "Waxan maqaaxiya iyo nawaaxigii aan joogay lagaga sheekaystaa sheekada Salma iyo Subeer arrintanina haday sii socoto waa mid aad u fool xun oo u baahan in la soo afjaro markaa mar hadaad I horfadhido inantaydiiyeey waxaan caawa kaa rabaa laba arimood midkood waa ta hore ee inaad wiilkii aad jeclayd keento ood guursato kuna soo doono inaad faraha kala baxdo oo aan sheekadaasi mar danbe iyo wakhti danbe soo noqnoqanin hadaad arrintaa qaadan waydo anigu aabo magaaladan daraadaa ayaan uga baxayaa waayo uma adkaysan karayo sheekada, dacaayada iyo hadalada dal qaafka ah ee la isla dhex marayo aad uma diidani oo waligeedba inani wiil jeclaan jirtay ama wiil gabadh jeclaan jiray qasabna maaha inay mar walba isu helaan sida haboon ee ay doonayaan waxaase maanta maraya magaalada wax aynaan u dul qaadan karayn oo reer Abtidoon ku ah lafjab

cid kastaana waxay ka sheekaynaysaa sida uu uga aargoosanayo wiilkaasi gabadheena mudadii uu odaygu hadalka waday hooyo Ruun iyo Salma labaduba way dhagaysanayaan wax hadal ahna kumay darsan balse markii danbe ayay Ruun la wareegtay hadalkii waxaanay tidhi

“Hadalka aad ku hadlaysaa maaha been mana aha in aynu dhagaha furaysano oynu iska dhigno cid aan waxba maqlayn waxa aad maqlayso dhamaantayo waanu ognahay waliba waxyaabo badan oo aanad adigu ogayn ayaan aniga iyo inantaydu kaaga xog ogaalsanahay waxaase la yidhi **Hubsiiimo halbaa la siistaa** ee ma eegnaa inuu wiilkani la qabo arinkan reerkooda iyo inkale odaygii Abtidoon intuu aad u soo booday uu soo hinqaday ayuu yidhi “Waa sax waana wax loo baahan yahay laakiin waa in ayna inala dhaafin labada maalmood ee soo socda ogowoo waa kuwii ballansanaa Salma iyo Subeer inaanay telefoon ku kala dhergayn ee ay isu yimaadaan ballantuna waxay ku began tahay habeenkan odaygu hadlayo habeenka ku xiga mar keliya ayaa odaygii iyo islaantu waxay jaleeceed dhinaca Salma oo ah qofka wax laga sugayo waayo iyada ayaa u tagaysa Subeer kana keenaysa war cad intay hoos u foorarsatay oy run ahaantii khajishay ayaa iyadoo gorada laalaadinaysa ay ku tiraabtay “Aabo iyo Hooyo waan ogolaaday waanan u tagayaa habeen danbe habeenka ku xigana aniga ayaad iga taqaanaa war cad iyo siday xaajadu ku dhamaanayso ama waxay noqon sidaa aad sheegaysaan oo reerkooduu raaci ama wuxuu noqon doonaa nin aniga ii soo go’a oo aanu is guursano” Ruun oo runtii ahayd islaan aad u maskax badan ayaa waxay tidhi

“Hadda waxaad ku darsataa tirada in wiilku madi yahay reerkooduna ka maarmayn inta colaada reerkaasi jirtana wax kuu hagaagayaa aanay jirayn markaa marka aad la hadlayso Subeer ha ula hadlin sidii qof leh reerkiina ka soo go’ ama qof leh keligay iga dooro reerkiina waxaadse tusaalaysaa waayaha jira wakhtiga lagu jiro iyo xaaladu halkay marayso sidaad iiga sheekaysay Subeer waa nin caqli badan wuu kula qaadan doonaa oo wax badan kugu diidi maayo waxaadse ka dheeraataa in labadiina dhexdiina laga shaqeeyo oo la isku kiin diro” Salma intay hooyadeed iyo aabaheedba

macasalaamaysay ayay gurigeedii dib ugu noqotay waxa guriga u dhex yaala compter uu ku xidhan yahay internetku markaa way furtay bogoskeedii waxa ku jira ugu yaraan soddon fariimood oo ay soo direen dadyow kala kaan kaan ah oo aanay midnaba iyadu garanayn waxyaabaha ugu badan ee laga hadlayo waxa ka mid ah sababta ay ugu ciyaarayso wiilka miskiinka ah qaar kalena waxay leeyihiin jacaylka ku hayaa waa khiyaali oo maba jeclid Subeer waxaadse tahay gabadh raacda lacagta oo waadigii barigii horeba ka guursaday ninkii debeda ka yimid inkastoo ay adduunyadu dhib badan tahay waayuhuna xanuun kulul yahay ayaamuhu kala daran yihiin qofna qof uma oga qoomamada iyo qoonta ku taala haddii ay ogaan lahaayeen in inta badan jidhkeeda ama gebi ahaan nafteeda ay u hibaysay Subeer kuma idhaahdeen erayadan ay u soo qoreen.

Salmi kamay daalin inay wada akhrido dhamaan maasayjyadii loo soo dhigay waanay dhamaysay waxa ugu yaab badnaa mid uu soo qoray nin magaciisa ku sheegay C/laahi Nuur oo uu leeyahay gabadhyahay marka hore salaan marka xiga ilmada yaxaaska ee aad ku beer laxawsanayso ninka miskiinka ah ee aan dhibta gaysan miyaanad ka baqayn in ay adiga ku danbarsato oo ay kugu dambayso maxaad adiga oo aan jeclayn isaga dhigaysaa qof jecel mase ogtahay inuu leeyahay gabadh aad u qurux badan oo ay nolosha wadaagaan meel wanaagsana u marayso sheekadu waxaan kuu sheegayaa hadaad khajilayso waxay ahayd inaad magaalada iskaga dhoofto hadaan anigu adiga ahaan lahaana marnaba igamay suurowdeen inaan ku noolaado meesha ama goobta aan ku sameeyay gabood falka noocan ah isagoo u soo qaadaya hees jacayl ah

Waxa aan la dhacayaa

La dheeldheeliyayaa

Waa dhaawacaagee

Lafta dheer ee dhabarkiyo

Dhagahaa I culusoo

Dhaqdhaqaaqi maayee

Dhaayihi jacaylkoow

Waan kaa dhur sugayaa

Ha iga dhicin

Habeen ha iga dhixin

Ileen waa dhibtaydee

Waxa aan la dhuubtee

Dhuunigiina iga jaray

Waa dhibaataadaadee

Dhiigaygii baad tahay

Aan ku dhaadanaayee

Soo yara dhawaw

Dhaayihii jacaylkoow

Mar heestaasaas oo kale ayaad u soo qori jirtay ayaad habeen iyo maalin waxaad u keeni jirtay bushqado faro badan oo ay ka buuxaan heesahaasi markii danbena waxaad gaadhay heer markuu telefoonka kuu soo diro aad tidhaahdo codkaa ma garayo ee tallow yaad ahayd adigoo si dhib yar u iloobay axdigii idiin dhexeeyay oo ka doortay nin lacag leh waxaanuu isagu qaadayay maalmahaa uu niyadiisa ku maslaxayay kuna sasabayay naftiisa heesta ah:

Ma ogtahay daraadeed

Riyo inaan ku daaloon

Aan bad wayn dabaashoo

Ka baafiyay daruuraha

Ma ogtahay dantaydiyo

Intuu caashaq ii diray

Inay tahay da'deenaba

Inaan ana kaa door biday

Taan daydayaayaay
Ku dibjiray habeenadan
Mawluhu ha daayee
Daymadaa jaleecada
Sida geel dar loo huray
Saw kumaan dunuunicin
Adaan dookh jacayl iyo
Kalgacayl ku daarine
Miyaan duniba joogaa

Isagoo mar walba dhagaysan jiray heesahaa iyo qaar kale oo faro badan oo uu ku dhayi jiray naftiisa adiguna imikaad si dhayal ah u rabtaa in aad u dhaxasho nolol

waayo badan lagu soo dhibtoodoo dhaxan iyo qabaw iyo dhul bahal galeen iyo loogu dhoobtay kaymo halis ah dhooldhoolintiisii iyo dhinacyo hayntii dhiigii jidhkiisiyo

dhididkii ka baxayay hadba dhababacayntii dharaar gees u cararkii dhalinyarada

magaaladu ma ku dhantahay warkiisiyoo dhamaantood wax seegan inanyahay ma ogi adiguna dhul baraf laad dhaldhalaal jacayl iyo dhayal raaxo ugu joogtoo

dhaqasho iyo qurux meel aan dhib lahayn habeen dhaansi la ciyaariyo dhankaad doonto maraysoo dharkaad doonto xidhatoo adduunyada dhamaanteed dhinac walba ka aadaye. Waxaan anigu ku odhan lahaa mid kale oo dhigaaga ah iska doono inankana dhibaataada dhako faarka iyo hawsha faraha badan leh ka daa haddii kale adiguna waxba ka heli maysid dadkuna way ku og yihiin waxaanan kugula talin lahaa inaad ilowdo Subeer iyo sheekadiisa.

Qoraalkaasi wuxuu ahaa kii ugu khafiifsanaa ee loo soo qoro oo waayo dadka kale qaarkood way caayayeen balse talo, tilmaan iyo tusaal ayuu isku raaciyay waxaanay mar walba arkaysay Salmi in magaaladu ka haysato war khaldan oo ah inay jacaylka kaga baxday iyadu Subeer waxa intaa dheer inanta waxaas oo dhami ku dhacayaan ninka ay jeceshahay isagu wali wuu jecel yahay mana oga wax dhibaato ah oo ay cidi u gaysatay wuxuu la yaaban yahay waxyaabaha ay la raagayso hadal la'aanteeda iyo marmarka qaarkood oo uu is yidhaahdo hawshaa ku badan waxase runtu tahay muu garan wali oo waxa weeyaan Salma bulshada oo ay ugu horeeyaan reerkoodu ayaa ka qaba fikrad aad u qalafsan iyaduna waxay ka shakisan tahay inuu Subeer u raaco arrintaa waxay sidii ahaataba waxa la soo gaadhay wakhtigii ay la ballantay Subeer marka ay marmarka qaarkood sidaan hore u soo sheegnay marka uu shakisan yahay wax kasta waxa uu ka eegaa dhinac khaldan ballantu waxay ahayd 7:00 habeenimo meeshuna waxay ahayd inuu Subeer yimaado guriga Salma goob u dhow oo aan ka dheerayn halkii ay awalba iskugu iman jireen waxay gaadhay saacadu 7:30 shaw wakhti hore ayuu soo baxay ee taayir ayaa dhexda kaga banjaray mudadaas ayuu sidaa ku raagay wey fekerday way yaaban tahay waxyaabo badan ayay isku gagaaysanaysaa goor danbe ayaa meel aanay filayn uu kaga soo baxayaa salaan kadib gaadhigii soo fuushay iyadoon labadoodaba wajiyadooda ay ka muuqdaan daal waayo Subeer wuxuu la soo rafaaday banjarka gaadhiga Salmina waxay la raxan raagaysay raagitaanka Subeer cabaar markii la kala aamusnaa ayuu ku yidhi Subeer "walaal maxaa kugu dhacay Salma goorahanba waad aamusnayde" Intey dhoola cadaysay ayay tidhi "soo ma ogid Subeeroow adduunyadu inay galinba cayn tahay cishadii timaadaana caynad gooniya leedahay oo aanan la yaabahayn inaan agtaada qiime ka yeelan waayo waxaan ku sugayay mudo ku sugan 40 daqiiqo waligayna iska dhaaf intaase igamaad raagin 2 daqiiqadood gacaliye waxa aynu nahay dad in badan isa soo agjoogay waxaynu nahay laba qof oo dadka iska xaal og wax inoo kala qarsoon oo aan maanta ogahay ma jirto markaa ma kula tahay in aad ii sheegto wax kasta oo is bedelay si aynu

u gaadhno dhayitaanka ama bogsiinta boogta” Subeer waa yaaban yahay waxan oo dhana lama socdaba oo isaga dhibaataada faamliga ee haysata mooyaane marna isma laha gacalisadaada ayay wax kaaga imanayaan wuu u babac dhigay waanuu u cadaystay inaanuu ka hadhayn kana hadhi doonin Salma reerkooda waxase nasiib daradu tahay marka labada dhinacba aan midina kuu garaabayn Salmi waxay is leedahay wuu kaa tagay oo cid kale iyo saaxiibado kale ayuu yeeshay faamligooduna waxay ugu dudayaan muxuu ka daba socdaa gabadhan waa dhibaato adduun dabcan waa waxyaabo iska dhaca inta badan waa arrimaha u baahan in si aada ay dhalinyaradu uga foajignaato wuxuu ugu jawaabay Subeer “Salmaay anigu haddaan cid kale yeelayo habeen iyo maalin subax iyo galab waxa la ila dul joogaa hablo midiba mida kale ka qurux badan tahay waxaas oo dhana waxaan u dhaafaa ama aan u daynayaa ama aanan uba danaynayn waa adi daraadaa ma garan karo manaan fahmin mana qaadan karo kumana qancayo sida yar ee khafiifka ah ee aad iskaga qaadatay inaan anigu meel kale mari karo markii aad debeda ku maqnayd wakhtigaad ninka lahayd maalmahaad i necbayd ayaamihii igu darnaa ma cidbaa igu kaa khasbaysay ma qofkaa ii kaa sasabayay ma jacaylkiibaa iga baaba’ay miyaan waalnaa ma waxaad is leedahay wuu falnaa mise hadaa la bedelay ayaad is odhan kartaa waxaan aad uga xumahay oo aanan qaadan karayn inaan dareemo oon wajigaaga ka arko murugo iyo dhibaato waxaan naftayda dhibtaas oo dhan u galiyay waxaan bulshada gooni uga go’ay waxaan waalidkay goor cad uga dhaqaaqay waxay walaalahay igu colaadinayaan ee ay asxaabtaydu igu caayayaan ogow waa caashaqaaga waxna uma arko inta adiga aan xagaaga kalsooni ka haysto waanse jabayaa lumayaa meel aan marayana ma ogaanayo marka aad ii soo raacdo qolodaa kale hadday arrintu sidaa tahay haddaad iga shakiday iyo hadaad iga tashatayba anigu markii horeba waxaan ahaa Subeer Subeerna wax iska bedelayaa ma jiro” mudada uu hadalkaa leeyahay gaadhigu wuxuu yaalaa baarkinka huteelka ay rabaan inay ka casheeyaan oo wuu la sugi waayay inuu hadalka la daadago markay dhagaysatay ayaa waxa aad u damqay oo nugleeyay hadaladiisii calaacalka

ahaa way oyday labada indhoodbaa ilmo ka timid way adkaysan wayday inay ka qarsato in badan in bay isku dayday inay is ilowsiiso oohinta wayse awoodi wayday markuu arkay Subeer iyada oo hoos u foorarta oo gacmaheeda indhaha ku haysa ayuu ku yidhi “qofkaan dunida ugu jeclaayeey haddaan maalin uun ku fekeri lahaa ka tag waligay kuguma soo noqdeen haddaan in uun is idhaahdo gabadh kale la sheekayso kaama qariyeen walaal I aamin ii aamu waxan oo dhan waxay u dhacayaan waxa la dhawrayaa sawirkeena haddaynu noqono kuwo u dul qaata ka adkaada waayaha adduunka oo ka dabaasha wakhtiga waynu guulaysanaynaa waxa kuu iman doona qaar si cad oon qarsoodi lahayn kuugu sheega hadalo been ah oo la inagu kala fogaynayo waxase taladu ku xidhan tahay hadba sida aad uga qaadato iyo waxa aad ka rumaysato hadalkooda ayaamo badan iyo wakhti badan ayaan ogahay oy dad ku luminayaan sidii la inoo kala dili lahaa ma garan karo faa’iidada ugu jirta adigu se waad ogtahay markaan ahay Subeer dhib kasta oo igu dhacda waxaa lahayd mid ila qaybsata i ogaata ka war qabta looga waramay waa maxay sababta xidhiidh la’aanta intaa leeg ee labadeena ina dhex timid” Salma erayada Subeer meel ololaysay ayaad moodaa inay u qaboojinayaan sida biyaha oo kale waxaad moodaa in uu ku socdo sayloon oo ay macaansanayso ama dhadhansanayso sharaab kiisa ugu macaan ma nuuxsanayso wakhtigan ilmadu way ka go’day hadda ogowoo wali kamay degin gaadhigii waxaanay ku jiraan in ku dhow saacad mar danbe ayaa waxa u yimid mid ka mida inamadii meesha ka shaqaynayay intuu soo istaagay dhinaca Subeer ayuu ku yidhi

“ Walaal waan idiin diyaariyay goobtaad fadhiisan lahaydeen goorahana waan idin sugayay ee ma cidbaa idinka maqan oo idiin soo socota” intay isku naxeen ayuu midba midka kale eegay dabadeedba waxa loo soo dhaadhacay kuraasidii iyo halkii ay ku cashaynayeen markay fadhiisteen ayay cabaar aamusnaayeen waxay la yaabeen sida aanay u dareemin mudada ay ku jireen goor danbe ayay midkoodba dhinac u qoslayaa dabadeed waxaa ka dalbanaya cuntadii wiilkii ka shaqaynayay huteelka waxaanay u sheegeen cunto isku mid ah inuu u keeno sidii buu dalabkii ku

qaaday mudadii uu ka maqnaa ayaa halkii laga bilaabay sheekadii Subeer oo aanay wali ka daadagsanayn shakiga xoogan ee ay ka qaaday gacalisadiisu ayaa wuxuu aad ugu dadaalayaa inuu ka dhaadhiciyo inaanay waxba jirin iyada uun uu u maqan yahay isla markaana aanay dhagaysan war xumo tashiilka iyo dadka kala dila kuwa is jecel Subeer hadalada si adag oo aan dhayal lahayn ayuu u leeyahay kadib markii uu ogaaday xaalada ay ku sugan tahay Salmi waayo markii hore oo dhan wuxuu u hastay inay isaga ku baadhayso oo ay rabto inay ogaato heerka uu ka taagan yahay jacaylkiisu Salma ayaa qaadatay hadalkii waxaanay tidhi “Walaal wax badan baan kaa qariyay Aabo iyo Hooyo way ii yeedheen maalin dhawayd waxaanay talo ku soo gooyeen ama hadal ku gunaanadeen laba arrin midkood in aad yeesho taladayada oo aad ka hadho wiilkaa iyo in aad noo keento oo aanu afkiisa ka qaadno inuu ku jecel yahay isla markaana uu reerkooda qasab kaga dhigo inay ku soo doonaan sidaana aanu kugu siino, walaal markaan u adkaysan waayay hadalka waalidka, iyo Subeeroow arrin aan kaa qarinayay waxaa dhacday in dhamaan dhalinyarada magaaladu aanay lahayn shaqo aan aniga ahayn waxaan ku siinayaa baaswoodhka iimaylkayga bal waxaad eegtaa farriimaha saddexdii todobaad ee u danbeeyay ku soo dhacay in kastoo aan in badan masaxay haddana wali waad arki doontaa waxa ku qoran waxa kale oo jirta horta hablihiinu waa hablahayaga maadaama oo aanan inan la dhalanin waxaan u hastay inay noqonayaan walaalahay oo ay ii buuxin doonaan halkii kuwii hooyaday dhali lahayd ayaan darada jirtaase waxay tahay iyaga ayaa ugu horeeya una horseed ah wax alaale waxa dhacaya oo dhan” Subeer markay intaa tidhi wuu is bedelay oo xaaladii farxadeed ee uu markii hore ku jiray way ka baxday wakhtigan meesha, waxaanuu arkay arrin aad u qadhaadh, fool xun, lana eegan karayn wuxuu ku yidhi “Waan dareemayaa dhibkaaga mana ihi qof aan waxba qaadanahayn waxaanse ku xusuusinayaa in anigaba intaa adiga imika lagu leeyahay in ka badan la igu leeyahay laakiin waxa adiga kuu dheer oo meel laga dhaafaa aanay jirin inay isu kaa soo raacaan waalidkay iyo walaaladay waayo dadka kale oo dhan waad iska celin kartaa

waxba uma arki kartid xataa kol aad ka aargoosato, aflagaadayso waxase nasiib darro ah adiga oo aan waxba ku odhan karin tixgelinta aad aniga igu tixgelinayso awgeed hadayse garan waayeen laga bilaabo maanta kama aamusayo runta ayaanan u sheegayaa waxaanan leeyahay hadaad i nacaysaan, hadaad i jeclaanaysaan, hadaad i dayrinaysaan iyo hadaad I daynaysaanba anigu Salma gabadh aan ahayn ma guursanayo Salmaay xaqiiqdii markaan runta kuu sheego arrintan aniga ayaa halkan soo gaadhsiiyay amar

Illaahayna ha iska jiro ee laakiin waxay ahayd inaan qaato go'aan kama dambays ah oo ama aan u go'o waalidkay ama aan adiga ku soo raaco way dhici wayday hada iyo wixii ka dambeeya ayaan kaga dhabaynayaa oo aan u sheegayaa waalidkay inaanan noolaan karin Salma la'aanteed markaa haddii ay iga maarmayaan ha isoo fasaxaan arrinta kale ee aad ii sheego ee ah in aan waalidkay u sheego habeen dambe hadaa ya ayaan u imanayaa xaafada hooyo iyo aabana u sheeg uguna bushaaree in aanan anigu mawqifkayga marnaba bedelayn bedelina doonin" markii uu intaa yidhi ayay Salmi kor u soo kacday waxaanay ka dhunkatay madaxa iyadoo leh "walaal waan isku kaa hubay, waanan isku kaa halaynayay wixii aan sugayayna ama niyadayda ku jirayna way ii rumoobeen waayo goor iyo habeen, maalin iyo galab, wakhti kasta waxaan ku qancin jiray naftayda in aanan u dhan dhigin hadalada dhac dhaca ah ee dadku igu leeyihiin, maadaama aad adigu wali jacaylkaagu halkiisii yahay oo wax is bedel ahi aanuu ku dhicin" marka ay hadaladaa leedahay hudheelka waxa ka baxaysa hees jacayl ah oo midhaheedu yihiin:

Naf jacayl hayaa

Ma hadh gashee

Hurdo way nacdaa ma hiigsatee

N Naxli baa heloo naanaabiyee

Nasrigeeda doon haba nuurtee

Nidar baan galoo

Adaan najmaay

Noloshaydiyeey adaan najmaay
Ku naawiliyoo kugu nastee
Noloshaydiyeey kugu nastee
Nuur caashaqeeey
Neecaw da'daay
Nasab khayr qabaay
Naf jacayl hayoo nuglaatay dartaa
Nasan waydayoo ku naadilibaa
Niyadiyo qalbiga noolaha dhamaan
Adiga u nimcee naxariista sii
Nuurkaygiyeey
Nidar baan galee adaan najmaay
Noloshaydiyeey adaan najmaay
Ku naawilayoo kugu nastee
Noloshaydiyeey kugu nastee
Nasab khayr qabaay

Subeer wakhtigaa wuxuu la socdaa heesta macaan iyo hadalada aad moodo in la isku soo naqeeyay ama isku soo beegmay ee goobta ka wada baxaya halka Salma ay goortaa wado hadalada isugu jira duur xulka, waanada iyo wax u sheega waxa dul imanaya wiilkii oo u sida wixii ay dalbadeen cabaar ayaa meeshii la fadhiyay aamusni, hadal gaagaaban, qosol dhoole cadayn ah iyo farxad ayaa lagu dhameeyay cashadii dabadeed Subeer ayaa qaatay hadalkii wuxuuna yidhi "Sidaan horeba kuugu sheegay waa in aan hawshayda ka soo baxaa anigana igu halee"

Salmi iyada oo aad u faraxsan ayay odhanaysaa "waayahay walaal waanan ku aaminsanahay" wallow wakhtigu isasii gurayo oo uu ku sii siqayo 10:00 habeenimo, waxa la soo raacayaa gaadhiga sidiibaynuu ku keenayaa gurigoodii isaguna ku hoyday laguma kala joogin intaase markii uu gaadhay guriga ayuu qabsaday telefoonka isaga oo la hadlaya Salma oo wakhtigaa iyaduna u diyaar garoobaysa inay seexato waxay cabaar ku sheekaystaan

telefoonka waxa soo dhacaya moobilka Subeer dabadeed wuxuu ku odhanayaa "Salma iga raali ahaw aan la hadlo qofkan" maadaama ay iyagu marka hore laynka ka wada hadlayeen, wuu qaaday waanuu eegay saawaa Hodan wuu ka qabtay

"Hullo, maxaa la sheegay nabad iyo nabad" intaa markii ay is waydaarsadeen ayaa Hodan tidhi waxaan u baahnahay inaan ku arko waliba sida ugu dhakhsaha badan hada ogowoo gacanta kale waxa uu ku hayaa telefoonka ay ku jirto Salmi waanay maqlaysaa hadalka uu ka jawaabay Subeer iyadu markiiba garatay in qofku tahay dumar balse waxa daah ka saaran yahay ta ay noqonayso Subeer intuu aad u dhibsaday hadalka Hodan dhinacna ka ixtiraamay ayaa wuxuu ku odhanayaa "walaal wakhti ma hayo maalin oo dhan mashquulbaan ahay habeenkiina waxba ma haleelo wiigagan soo socdana waxaba laga yaabaa in uu aabo ii diro Berbera si aan uga soo raro alaab halkaa taala, sidaa darteed way igu adagtahay balanta aan kuu qaadi karayaa adiga oo aan xumaan iiga qaadanayn" markuu intaa yidhi Hodan waxay tidhi "si kastoo ay ahaataba hadii aad tagtana waa nasiibkaa hadii kalena waynu isla joognaa anigaana kula soo hadli doona wakhtiga aan firaaqo helo goortaa Salma aad bay u cadhaysan tahay waxay ku dhawdahay inay dhigto telefoonka waayo waxay ka xanaaqday qancinta badan iyo wakhtiga aadka ah ee uu siiyay gabadha waxaanay ku odhanaysaa "Subeer, la sheekayso inanta anigu waan seexanayaaye" dabadeedna wuxuu odhanayaa "Walaal waan dhameeyay waxay i waydiinaysay waxaad ii tidhaa waan seexanayaana ma jirto ee iga raali ahaw" deetana wuxuu bakhtiinayaa telefoonkiisii Moobilka, Salma oo marka horeba shakisan dumarkuna raga ka sii xag jiraan xaga hinaasaha ayaa hadana waxaa hor imanaya humaag labaad oo odhanaya shaw inta uu kaa maqan yahay gabadhan ayay wada joogaan xaalada Salma ee mararkan dambe waxay noqonaysaa ama ay u eegtahay mid aan degenayn.

Subeer ayaa ku celinaya hadalka waxaanuu ku odhanayaa "walaal is daji qoftani waa gabadhii aan kuu sheegi jiray mana garanayo waxay iga daba socoto wayse iska soo dhamaanaysaa ee adiguna dulqaadkeeda yeelo" intaa

markuu yidhi ayaa waxaa hadalkii la wareegaysa Salma waxaanay si toos ah ugu odhanaysaa "Subeeroow maaha inaynu wax kala qarsano mana haboona inaga oo ah kuwa is hurran inaynu isku sheegno wa khayaali ah iyo hadalo hadhaw inaga hor iman doona, suurogal maaha waxaan waayay wax aan ku idhaahdo oo waan ixtiraamayaa waxaa ii muuqata in hunguri kaaga jiro haddiiba ay sidaa tahayna dee malaha wixii la sheegayay ayaa dhab ah oo aniga ayaa fudud labadayada" Subeer marka hore kamay qasnayn habeen jawi wanaagsan, laydh qabaw, dhul bilaa sanqadh ah oo uu ugu talo galay inuu ku raaxayso hadalka gacalisadiisa ayuu u ahaa habeenku hase ahaatee in yar kadib ayaa waxa uu isku bedelay jawigu mid cakiran oo dhinac walba olol iyo kulayl ka baxayo wuu fadhiistay halkuu awal ka jiifay waxaanuu ku yidhi "aad ayaan uga xumahay ,waan la yaabanahay, waanan liqi kari la'ahay sida dhibta yar ee ay kaaga soo baxday kalmada ah iyada u go', mana filayn in aan waligay afkaaga ka maqli doono cid kale raac wax kastaase way iska dhacaan, hadaad garatay in aad aayaheena, mustaqbalkeena iyo guriga aan dhisaynay mudo yar ku galalafto aniguna waan kula qaatay dabadeedna isagoo aan wax dambe ku odhan ayuu ku dhigayaa tilifank.

Salma markii uu dhigay tilifoonka cir iyo dhul way xamili wayday way ku soo celisay waanuu is dhinac dhigay telefoonkii horena waa kii u xidhay moobilkiisa isagu debeda ayuu uga soo baxay qolka oo ninkii qaboobaa ee farxada iyo qosolka ku galay wuxuu ka soo baxay isagoo aad u qamuunyoonaaya karahsana joogitaanka uu joogo aqalka qudhiisu kama adkaysan karo in uu ka aamusnaado Salma muddo balse arrintu waxay aad ugu sii mudantahay oo wakhtigan gardarada leh Salma debeda ayay u baxday daarada ayay fadhiisatay waxay soo qaadatay rikoodh si ay u dhagaysato heeso ay isku dhaafiso niyad jabka, madax xanuunka, jahwareerka iyo werwerka ku abuurmay waxay baadhay kartoon cajalado ah oo inta badan isagu uu u soo duubay kuwaasoo ahaa kuwo aad isugu dhawaa oo dhamaantood ka hadlayay sidii ay u dhisan lahaayeen reerkooda

una noqon lahaayeen raas balaadhan oo lagu nasto laguna nagaado
dabadeedna waxa u soo baxaysa oo ku soo hagaagaysa heestan:-

**Hurdo kaama lado oo
Jacayl igaama guuroo
Gebiga jidhkaygaba
Qaban waayay gogoshee
Guudloow libaaxiyo
Inta bahal guurguurtiyo
God iyo abeesaba
Ninka guri la seexdee
Ee uu gubay jacayl
Gantaalana uu ka taagay
Kana jaray dhismihii
Hadaad garasho leedahay
Go'daay lama
colaadsheene Ha i gabin,
ha i goynin
Anba kuma gohaadshee
Gaygeena oo wayn
Guudlayda oo badan
Nin dartaa u gees maray
Lama gooyo hanaqee Oo
go'deey lama colaadshee
Ninka galinyadaa dhaxay
Dhaxanta iyo gawlaha
Ee uu gubo jacayle
Gantaalo uu ka taagee
Kana jaray gasiinkii
Hadaad garasho leedahay
Go'deey lama colaadsho**

Dhagaysiga heestaasi ay maqleen dhagaheedu, dhawaaqa fanaanku dhaawac aada ayuu gaadhsiiyay dhamaan jidhkeega waxayna dareentay inay tahay qof dambiile ah garanayna siday uga noqon lahayn iyo sidii looga dhaafi lahaa iyadoon ogayn ayay bakhtiisay rikoodhka shaw markii ay bakhtiinaysay si aada ayay gacanta ugu dhufatay ismana oga markaa waxa nabar ka gaadhay far yarada dusheeda ka soo kacday daaradii oo waxay timid gudihii waxay isku dayday inay seexato hase ahaatee bahashii hurdo la odhan jiray way ka carawday ama way ka tagtay ama waabay waydaybaan odhan karnaa inantii Salmi waxay baaxaa degtaba hadba gees isku rogtaba goor waa dhawaadkii ah oo aan isaga laftigiisa waa Subeere sidii u soo jeeday ayuu u soo dirayaa telefoon miyay hurudaa ilbidhiqsigii ugu horeeyay ayay

qabatay intii aanuu hadlin iyadoon habsanin cida uu yahay ayay ku bilowday “walaal waan khaldamay, gefbaan sameeyay waanan garwaaqsaday waxaan kaa doonayaa inaad ii garawdo oo aad markaa ii dhaafto” isma oga hadaladan ay leedahay oo waxa suurogal ah in cida telefoonka soo dirtayba tahay qof kale balse waa Subeer intuu cabaar ka aamusay ayaa wuxuu yidhi

“haddaan ku saamaxayn, hadaan kuu dul qaadanayn, hadaan dhaafi karin dambigaaga, hadaan iloobi karin dhibtaada, hadaan ku qancayn naftaada, hadaan u khushuucin niyadaada, hadaan Salmaay kuu dhaafin xageen ka tagayaa adduunyada maku noolaan karayaabay kula tahay adiga la’aantaa isaseegan jacaylka iyo shaydaanka inaga dhex shaqeeyay ayuunbaa midkeenba wax tusaayee anba waan ogsoonahay in aanuu midkeena midka kale ka maarmahayn” markuu intaa yidhaahdo ayaa Salma aad moodaa inuu ku soo noqday miyirkii, maankii iyo maskaxdiiba waxaanay dareentay oo ay haleeshay in ay si fiican dhabanka dhulka u

dhigto inkastoo indhaheeda ay ilmo ka socoto haddana uma dareemayso ama uma tirayso sidii qof og inuu ooyayo ee waxay u jiiftaa sidii qof aan dhibi haysan daqiiqado dhexdood ayuu isku bedelay jawigii adkaa ee u dhexeeyay labadooda in kastoo sideedaba lamaanaha is jecel marna is qabtaan marna heshiiyaan

haddana goortan Salmi iyadaa qoorta dhigatay oo dusha saaratay wixii dhacay oo dhan waxaanay diyaar u tahay in lagu xukumo gefka ay gashay goortu se waa goorma saacadu waa wakhtigee ma subaxbaa, ma habeenbaa waa lixdii subaxnimo dadku xaafadaha toosbay u shaqaysanayaan labadoodabana albaabadoodu way furan yihiin horena looguma baran inta laga toosinayo ama intay soo baxayaan in ay furnaadaan albaabadoodu labadii reer midba dhan u yaal Hana yar oo ay walaalo yihiin Subeer iyadu way iska soo gashay qolkiisii isagoo beerka u jiifa oo telefoon haysta ayay arkaysaa oo xataa aan iska bixinin surwaalkii iyo shaadhkii uu kaga yimid hudheelka balse kabaha oo keliya iska saaray dib ayay uga noqonaysaa Salma iyadu way iska wadataa hadalkeeda makhsinkeeduna meel dambe ayuu ku yaalaa oo waabay yartahay cida guriga joogta inanta guriga ka shaqaysana waxa mashquuliyay hawshii gurigeeda odayga iyo islaantuna maba oga waxyaalaha socda.

Markii ay gaadhay saacadu 6:30 subaxnimo ayaa haddana mar labaad Hani ku soo noqonaysaa iyadoo odhanaysa “walaal goormaad saaka kacday ma shaqadaad ku degdegaysay maxaad xalay noogu sheegi wayday inaad kalahayso aroorta saw kuumaanaan kacneen wakhti hore oo quraac kuuma diyaariyeen maba oga inaanuu seexanba isagoo sii jeeda ayuu u jawaabayaa waxaanuu ku odhanayaa

“Walaashaydaan jeclaayeey imikaba waxoogaabaan joogayaaye hadii aad ka gaadhsiin karto ii keen quraacda” intaa markuu yidhi ayay Salmi odhanaysaa “warar wa ayo qofka ku kula hadlayaa?” Hana iyo waxa dhex maray isaga, iyada qudheeda wakhtigii gaadhigu soo doonayay daqiiqado ayaa ka dhiman is garteen in labadooduba saamalayleen balse ma

dareensana midkoodna caajis iyo hurdo la'aan ku kastaaba wuxuu ku qanacsan yahay raali galinta ka kale iyo inay ugu dhamaato sidii ay doonayeen.

Subeer ayaa ku odhanaya "kolay anigu shaqo tagi maayo oo intaan baxo ayaan dhexda ka soo noqonayaa xaafadana waxaan odhanayaa waan xanuunsanayaa laakiin adigu maxaad ku odhan doontaa reerka intaan gaadhigu ku soo gaadhin iska dhig telefoonka, diyaar garow markaad tagto shaqadana ila soo hadal" sidii ayaa lagu kala tagayaa cabaar kadib Salma waxaa u imanaya gaadhigii shaqada waa ay raacaysaa, Subeerna intuu labisto uu isu diyaariyo sidii qof shaqadii tagaya markuu dhexda joogo intuu maqaaxi fadhiisto koob shaaha ka cabo ayuu dib ugu soo noqonayaa guriga waxaanay albaabka iskaga hor imanayaan odaygii u aabaha ahaa oo sii shaqo tagaya "waar maxaa ku soo celiyay" iyo aabo "waxaan dareemayaa madax xanuun, dawakhaad, iyo daal faro badan markaa marka aan cabaar joogay ayaan u adkyasan waayay inaan taagnaado sidaa darteed ayaa igu kaliftay inaan dib u soo noqdo" Oday Dhamal waxa uu odhanayaa "dee hadaa ina mari aan ku geeyo dhakhtarka" dabadeed wuxuu ugu jawaabayaa "aabo waan haystaa dawadii madax xanuunka iyo fiitamiinadii dhawaan la ii soo qoray wax kalena maahee waxaan u malaynayaa calooshaa maalmahan I taagnayd markaa aabo iska shaqo tag ha ii warwarin aniga ee, waxba ma qabo waanan caafimaadayaa"

in yar dabadeed xaajigu wuu iska dhaqaaqay Subeerna gudaha guriga ayuu soo galay intuu u yeedhay Hana ayuu ku yidhi "soomaad arkayn inaan sooka soo jeeday, qadada labada marka ay gaadho ii toosi, cid kasta oo i doonaysana waxaan ku tidhaahdaa wuu xanuunsanayaa" sidiibaanuu hurdo dheer ku galayaa isaga oo aan mar kaliya dhinac isku rogayn ayaa la gaadhayaa wakhtigii qadada halka Salma ay maalintaasi u ahayd maalin

aad u kulul waayo shaqada oo ku badan soo jeedkii xalay iyo cadhadii markii hore ayaa isugu biirbiiray waxayse mar walba ku qaboojinaysaa koob kafee ah oo marnaba inta badan may dareemayn ama kamay muuqan inay xalay soo socotay sidiibayna ku dhamaystay shaqadii oo lagu keenay guriga ogowoo midkoodna midka kale lamuu hadlin mudadii sideeda saacadood ahayd hase ahaatee markii ay sidaa gurigii u gashay iyada oo aan wali dharkii iska bixin ayay soo garaacaysaa si ay u ogaato xaaladiisu halka ay marayso una waraysato intii u dhaxaysay wakhtigii ay kala maqnaayeen wixii ku dhacay Subeer markan wuu soo baraarugay dabadeedba telefonka ayuu ka qabanayaa way garanaysaa inuu hurdo inkastoo ay waydiisay su'aasha ah "maad hurudaa" haddana isaga oo is adkaynaya ayuu k u yidhi "maya" way u sheekaysaa kolba hadalka wuu ka yara baxayaa Subeer waanuu dhalalawsan yahay markay dareentay ayay ku odhanaysaa "galabtaan kula soo hadlayaaye iska seexo, iskana qadee" sidiibaa lagu kala tagayaa Subeer ma oga in gurigooda ay joogto Hodan oo wakhtigan la fadhida Hana gurigana loogu qado sameeyay.

Mar ay labadii duhurnimo tahay ayuu u soo baxayaa siduu u maydhan lahaa inta aanuu qadaynin wuxuu arkayaa guriga oo wakhtigaas diyaar garow weyni ka jiro hablahoodii oo si qurux badan u labisan iyo guriga laftigiisa oo makhsinka fadhiga la kala habeeyay markaa fadhiga uu galay waxay ku jiraan habluhu qolkooda waxba muu dareemin ee intuu daarada ka qaylyay ayuu yidhi "Alla ma naag la'aantaad igu eeganaysaaneey maad i toosisaan, maad iga hagaajisaan guriga, maad iga maydhaan dharka, waxaan ka baqanayaa inaan kuwiinaa yaryar dartood aan mid uun dusha kaga dhaco" wuu iska kaftamayaa wakhtigaa laakiin si wayn ayaa hadalkaa loo dhagaysanayaa oo inantii Hodan waxaabay u holatay inuu wiilku diyaar u yahay ee uu la' yahay cid yeesha hoostayna iska tidhi "tallow maad si toosaba ugu tidhaahdid, waxaan u baahnahay inaan is guursano" subeer isagu dharkiisii iska xidhay waxaana loo keenay cuntadii oo quraacdii iyo

qadadii ayaa la isku soo raaciyay waxaana lagu yidhi “ileen cidi kaa amaan heli maysee, ama taa cun ama ta dambe cun” iyaga laftigoodu kaftan ayay uga jeedaan. Hana iyada oo sii qoslaysa oo dibeda u sii socota ayay ku tidhi “gabadheeybaa lagaa siiyaye waatee gabadha qado iyo quraac is dul saaran aad ka helaysaa, mar hore ayaa laag lagula dhici lahaa oo lagu odhan lahaa ka kac meesha, laakiin walaalkayoow nolosha aad ku nooshahay boqoraduna kuma noola waxaanan ka baqanaynaa in marka aad naga wareegto ama gabadh guursato aad la qabsan waydo maaniga uunbaa ku daba socon, maanuunbaa wax walba ku daba sidi” eryadaa kaftanka ah ayay ilaa daarada ka sii leedahay Hana yar waxaana la socda hadalkeeda qosol gaagaaban waayo **calooshii wax og ayaa qososha** ayaa la yidhi Subeer, ma dhaadana oo waxaabuu iska sii cunayaa cuntadiisii iyadoo sidii ah ayaa waxa ku soo dhacay telefoon dibadeed oo ay soo dirtay gabadh u mehersan inan ay saaxiib yihiin oo Sudan wax ka barata wuu ka qabtay si wanaagsan ayaanuu u salaamay la isku waran inkastoo uu dhinac ka gaajoonayay haddana wakhtigaa **Niciima** wuu ka gaadhsiiyay wuxuu war ka gaadhsiiin kari lahaa saaxiibkii iyo xaaladiisu halka ay marayso inantii iyada oo nafis ah ayay dhigaysaa telefoonkii intii aanay dhigin ayuu ku odhanayaa “Walaal ha ila yaabin xiligaasaan ka toosay hurdo waxna waan cunayey aniga ayaase xaalda oo dhan uga waramaya marka ugu horeysa ee aan arko waanan kula soo hadlayaa aad ayaad u mahadsan tahay sida wanaagsan eed isu soo xilqaantay waayo tii aan garan waynay ayaad adigu garatay telefankii bay dhigayaan wakhtigaa salma iyadu way is duuduubtay oo xitaa waxba may cunin in yar dabadeed ayuu moobilka kaga garaacayaa cabaar marka uu dhaco ayay marka dambe ka qabanaysaa iyada ood garanayso inay tahli la’dahay hadalka oo uu dhib ku yahay Subeer taaga wuxuu doonayaa in uu la kaftamo oo uu hadalo yaryar ku yidhaahdo waxayse ku soo gebogabaynaysaa “waar hurdaad dhamaysatay oo waad nafistay ee inanyahaw aan kaa seexdee walaal iska kay daa” cabaarbuu ku ciyaarayaa siduu ula hadlayay ayay ku gam’aysaa haddana way toosaysaa markuu arko xaaladu halka ay marayso ayuu iska dhigayaa telefoonka saacadu

wakhtigan waa labadii iyo badhkii duhurnimo hablihiina inantii ay casuumeen ayay qolka fadhiga si gooni ah ula joogaan Odaygii Dhamal ahaana goor hore ayuu qadadiisii cunay iskana seexday oo waxanba war uma hayo si kasta ha ahaatee Hodan Hana iyo Muna waxay iyaga u tahay maalin aad u wayn oo dhinacooda farxada iyo damaashaadka ka dhacaya ma malaynaysid isagiina isagoo dharkii uu labistay xidhan ayuu mar labaad dib u seexanayaa hurdadan badani waxay kala go' ku tahay ama ay wakhtiga ku soo gaabisay Hodan oo doonaysay inay la hadasho Subeer. Dhanka kalena waabay ka xishoonaysaayoo waxay is leedahay ha gaadho galabnimada si aad ugu marmarsooto in uu ku sii qaado iyadoo halkaa marayso sheekadu ayuu Subeer soo kacayaa waxaanuu doonayaa inuu alaab ka soo iibsado suuqa si sibiqa ayuu u furayaa ganjeelka wayn ee guriga si uu ula baxo gaadhiga waxay ku war helayaan istaadhka gaadhiga iyo shanqadha albaabka wayn ee debeda labadii ay walaalaha ahaayeen ayaa mar keliya soo wada yaacaya oo odhanaya "xageed qabatay, xageed u baxaysaa, arrinbaanu kuu haynay waxbaanu kula sugaynay" iyagoo aad dareemayso inay degdegsan yihiin isaguna isagoon dhaadanayn ayuu ku odhanayaa "walaal sharaab qabowbaan soo iibsanayaa waxaanan doonayay inaan farriin gaadhsiiyo inaan aanu saaxiib nahay oo mar dhawayd gabadhiisu ila soo hadashay haddaan ugu batana waxaan idinka maqnaanayaa saacad badhkeed, markaa ha u qaadanina inaan fogaanayo sidiibaanuu ku baxayaa isaga oo aad u faraxsan una istareexsan waxaanuu dhegaysanayaa oo gaadhiga ugu jirta hees ay u soo dirtay Salma oo ah kuwan ay qaado Hobolada Ikraan Jaamac

Dadka kaan ka doortoo
Dawadii naftaydoo
Kaan darsay wanaagoo
Ku dalbaday deeqoow maankayga
Adigaa dagay qalbiga
Wadnaha dacalkiisee
Soo dagoo i daawee
Allaa soo dabac
Dunida adaan kaa rabaa
Daayin intuu abuurroo
Dookhaygaan ku raacoo

Wuxuu soo gaadhayaa dukaankii uu ka iibsanayay sharaabka markuu ka dagay gaadhiga ee uu galay dukaankii ayuu waxa uu la yara kaftamay mid ka mid ah inamada haya meesha oo ay aad isu yaqaanaan kaasoo kula kaftamay jacaylka isaga iyo Salma, cabaarbaa la yara qoslay isaguna wuu degdegsanaa oo hore ayuu gaadhigiisa u soo kaxaystay dib ayuu ugu soo noqday guriga wakhtiguna waa ilaa iyo 4:30 galabnimo. Markii albaabka laga furay ee uu xareeyay gaadhiga ayaa waxa uu kula kulmayaa daarada walaashii Hana dabadeetana intay gacanta qabato aya ku odhanaysaa “maanta waxa noo timid gabadh aanaan garanayn oo nagu tidhi inankiina ayaa ila ballamay, dee wax aanu yeelno waanu garan waynay anaguna waanu fadhiisinay, walaal inantu aadbay u qurux badan tahay halkeed tan ka soo heshay, yaa kuu shukaamiyay maxaadse nooga qarsanaysay haddaad gabadha caynkan u eeg haysato, maanta uunbaan ogaanay inaynaan waxba isku ahayn ee walaalnimadeenu tahay afka baarkiisa uun” inta ay hadalkaa wado Hana yar lagama dareemayo inay kaftamayso kalmad kaliya oo laga shakiyana kumay darin sidii ay u soo waday ayay soo galinaysaa makhsinkii fadhiga oo ay wakhtigaa wada joogaan Muna iyo Hodan marka guriga la soo galo qofku waad ogtahayoo cida gudaha ku jirta

aad uma arko gurigana waxaa ku goglan gogol wareeg ah oo xataa ma laha meel yar oo iftiin leh, garay in laba qof ay meesha joogaan sidoo kalena aqoonsay walaashii Muna oo codkeeda ayuu gartay. Haddaba yaa u garan doona qofka kale iyo cida uu yahay wuu iska soo fadhiistay isaga oo isku dhaafinaya hadalka kuna qarinaya inuu arko qofkan ayuu yidhi "inaga yara bedel janalkan oo inoo geeya mid kale" waxaanuu rabaa wakhtigaa la bedbedelayo bahalka inuu ku soo beegmo mid iftiin wayn leh oo uu ku arki karo wajiga gabadha, waxay sidii ahaataba Muna ayaa goor dambe intay soo kacday shiday nalka aqalka una sheegtay cidan ay Hani u sharaxaysay inay tahay Hodan adigana aanay kuu imane aanu anagu casuumnay markaa barasho wanaagsan mar labaad waxaanse ku waydiiyay shakibaa na galaye waadigii awal hore la soo boodi jiray gabadhba ma aqaane hadda ma waxbaad haysataa maxaad sidaadii kiiska iskaga waali wayday intuu aad u qoslay ayuu yidhi "Wallee adduunyadda ninkii dhiman waayaa wax walba wuu arki doonaa, waanan ogaa inantaa yar ee Hana in waxaa iyo wax ka wayniba ka soo socdaan Illaahoo maad ogaatid sida uu wadnuhu ii garaacayay ama xaalada aan ku sugnaa marbaan is idhi xaafadaba ma ka baxsataa, haddana waxaan ku calool adaygay wax kastaaba ha dhacaane la dhamee balse waakane imika maxaad waxaas oo dambi ah iiga galaysaan, maxaan aniga iyo inantan islaameed afka iskugu kaaya gelinaysaan, maxaad Hanaay igula jeclaatay mar walba inaad iga nixiso, iga shakisiiso miyaanan walaalkaa oo kaa wayn ahayn" Hana ayaa ku tidhi "Subeeroow waxaas oo dhami waa jacaylka walaaltinimada haddaanan ku jeclayna waxaas oo dhamba kuulama imaadeen ee hambalyo ayaan kaa sugayee waa maxay hatigaadu" Muna ayaa intii aanuu jawaabin ku tidhi "Horta Hanaay adigu mar walba waa runtiye inankeena dhuuntaad u gashay iskaga tag, ma miskiinimadiisaad aragtay" Hana ayaa aad u qososhay waxaanay tidhi "dee waaban idinka tagi lahaaye miyaad cid uun i raacisaan, haddaan moodayo inaad isku kay raacaysaan miyaan gali lahaaba badaa" inta walaaluhu inantii Hodan way aamusan tahay waxay daawanaysaa oo kaliya TV-ga, dabadeedna Subeer ayaa ku yidhi "Walaal Hodan maxaad isku

martiyaynaysaa guriga miyaa lagaa xigaa, soodigan aamusay waxaan moodayay markaan qolka ku jiray een sheekadiina maqlayay inaad intan ka dhiiranayd oo hadaladiinu qolkay igu soo gaadhgaadhayeen mise waan iska baxaayoo waa la iga xishoonaya” markii uu intaa yidhi ayuu istaagayaa dabadeedna Muna ayaa ku odhanaysa “ha kicine fadhiiso” “dee waayahee inoo wada sheekada ayuu ku odhanayaa”. Halkaa marka ay marayaan ayaa gabadhii Salma oo soo baraarugtay soo garaacaysaa telefoonka dabadeetana Hana ayaa ku odhanaysa “anaa kuu soo qaadaya ee iska fadhi” waa moobil magaceeda ayaana ku qoran markay aragtay aadbay uga xumaatay, haddana ma laha awood ay ku goyso waanay u keenaysaa isaga oo goobtii fadhiya, Subeer in kastoo uu yar naxay haddana wuu ku dhiiraday inuu la hadlo Salma isaga oo fadhiya isla goobtii salaan ka dib ayay waydiinaysaa waxa uu qabanayo xiligan waxaanuu u sheegayaa in uu hablahdoodii la joogo oo aanuu meelnaba u bixin haddaa waayahay intay tidhaahdo ayay iska dhigaysaa telefoonka oo ilaa wakhtigaa waxa ku sii jirta hurdo ama dheelalaw mar keliya ayaa saddexdii hablood is wada eegeen ishuu kala socdaa markaa wuxuu ku yidhi “Hanaay waan ku maqlayaaye maxaad la xanshashaqaysaa” iyaduna ismay dhibine waxay ku tidhi “ogow dhuumashada qaar uu dhabarku muuqdaa waa dhib iyo hadimo!” hayaay!! Oo walaal waxaas oo maahmaah ah iyo murti ahi miyay kuu qarsoonaayeen, weger! Aniga waxba maahee waxaan u sii naxayaa kaad u tagi doonto, waxan oo hinaase ahna dee iska daa walaalo dadku intaa way wada hadlaan, danbaa ka dhaxaysa, shaqaa iska soo gasha, hawlo kale ayay wada yeelan karaan farriinbay i fari karaan, bal maxaad ka ogtahay qofkan ila hadlayay waxa uu ahaa” wuxuuse hilmaansan yahay in magaca Salma uu ka soo baxay telefoonkiisa oo warkaba ay Hani hayso oo garanayso qofku cida uu yahay intay aad ugu qososhay ayay ku tidhi “oo walaal ma islaamihi daqiiqda tukaanka ka qaadan jiraybaa, oo xisaabaa idinka dhaxaysay” afartoodiiba mar kali ah ayay qosol midba dhinac u jeedsanayaan intii qosolka lagu maqnay ayay Hodan ku odhanaysaa

“Hanaay Subeer waad ku shidaysaaye dee ka dhin, oo waa walaalkaaye ka xishood miyaanad ka baqanayn inuu adigana sidaa kuugu adkeeyo markaaga” halkaa markii ay maraysay ayaa uu telefon labaad u soo dhacayaa Subeer oo waxa uu la ballansanaa qolo todobada habeenimo wakhtigana waa Lixdii, intii uu ku hadlayay telefoonka ayaa ileen way dhagaysanayaane hoosta wax la iskugu sheegay waxaana lagu yidhi “mar haddaad baxayso Hodana sii qaad” waana intii lala rabay ee hada ogow. Subeer sidan horeba idiinku sheegay aad ayuu u ixtiraam badan yahay waxyaabo badana waxa u soo jiidaysa ama u soo jiidaya afgaabnidiisa, aamusnaantiisa, xishoodkiisa iyo is difaacid la’aantiisa hadal kamuu soo celin ee inantii sidiibaa shidhka loogu soo saaray ileen marka meel wax ka salag leeyihiin ee jinku daasadaha tumayo ama sabab la isku raadinayo meel aad jiidho ma waydo, cid ku sheegtana waayi maysid. Waxa ka soo hor baxday gabadh ay jaar yihiin Salma oo isagana tukaanka isku yaqaaneen si kadis ah ayuu meel laab ah ugaga soo baxay la isa salaam inantii wuxuu waydiiyay halka ay tagayso u sheegtay inay u socoto xaafadoodii wuu soo qaaday markii hore may arkayn Hodan balse markii gudaha la iskugu yimid ayaa la is arkay si aadana waa la isku yaqaanaayoo gelinka dambe ayaaba barayfad la wada dhigtaa la isa salaam hadal badan la isuma galin waxaan casharada ahayna la isma sii waydiin maba eegin Subeer warba kama uu qaadan kamana uu san shakiyin aqoonta labadan hablood iyo garashada gabadhaan uu soo qaaday iyo gacalisadii Salma la soo gaadh gurigii goobta waa fiidadow degtay oo iska dhaqaaqday hoyatay oo markaa lamay hadlin waxase jab ka joogaa waxa soo socda cabaar markii uu sii socday ayaa waxa ka soo gaadhay wakhtigii ballanta iyo guriga Hodan oo aad uga durugsan meesha dabadeedna wuxuu go’aansaday inuu ku horeeyo ballanta oo uu u tago wiilashii Hodana wuxuu ka codsaday inay raali ka ahaato iyada arrimahan oo dhami waa u naruuro, waa u nasteexo, waa u naq iyo doog niyadeedu way degan tahay intay doonaysay way heshay inay ka fogaatana maba rabto xaalkeeduna waa **meel aan rabay roob ma igu eryay** Subeer cabaar daqiiqado ah oo aan ka badnayn Soddon

daqiiqo ayuu la soo joogay inamada intaana waxa ay dhagaysanaysay
Hodan cajalad rikoodhka ku jirta oo ay ka socota hees aad u macaan oo
midhaheeda ay ka mid ahaayeen:

Caradaa tilmaantoo

Cawayskii gudgude helay

Saakana cawaaliyo

Soo celiyay mayayoo

Jiidhaamo culus iyo

Jini caydh madoobihii

Cidhifka isla gaadheen

Oo geedo culus iyo

Onkod caynbacayniyo

Caradaa tilmaantoo

Cabaar waxaan daawaday

Ubax caynbacayn iyo

Kor uga mudhay caleentiin

Ballanbaalis calamo leh

Shimbiruhu cod faraxliyo

Luuqda isku celiyeen

Calcalyada xareedii

Ceegagaa toggu rogmaday

Rahu caadadiisii

Ka dhex ciyay dhijaamaha

Hadba labada fiidcaw

Cosobkaa ugbaadkaan

Ku onkoday hilaacii

Ayaad ii cajabisoo

Calaf ha isku keen simo

Iyo caano iyo nabad

Inshaa alaah

Iyadoo aan heestii dhamaan ayaa waxa soo galaya gaadhiga Subeer oo si bilaa shanqadh ah iskaga furaya daaqada wakhtigaa way isla maqnayd Hodan oo heesta ayaa si aada dhiigeeda, dhuuxeeda, jidhkeeda iyo dhamaan waaxyaheeda waxay la socdeen heesta waxay ku warheshay "Walaal miyaan raagay, iga raali ahaw aad ayaan uga xumahay inay xiligaa soo gaadho dabadeedna intay qososhay ayay tidhi

"walaal waxba maaha ee waxaaban is lahaa heestan macaan may kuu sii socoto oo wax badanba maan dareensanayn" sidiibuu ku soo kexeeyay kuna keenay gurigooda markii la joogo meel inyar u jirta guriga ee uu joojiyay gaadhiya ayay su'aal waydiisay ah "markaan ku arko erayga aan ku leeyahay afkaan kala maagayaa odhaahdiisoo, ma awoodi karayo in aan kuu tabiyo dhib badan oo aan tirsanayo, wadno hibanaya, caashaq halbawle ku shaqaynaaya aragaaga halis ay naftaydu ku sugan tahay heedhe ma iga badbaadin kartaa,

haddaan saani hadalka kuu idhaa horena waan kuu dareensiyyay hadeerna waan kuu sheegayaa waxaan ahay qof jecel qof aanuu ogayn ilaa hadana aan ka maarmin mana garanayo waxay ku dambaynayso noloshaydu Subeeroow daah igama saarna inaad gabadh jeceshahay dooni maayo inaan dumiyo reerkiina mana ihi qof xaasid ah oo ka xun wada noolaashihiina, walaal ha ila yaabin, ha u qaadan waayin marka aad aragto aniga oo kugu soo maqan ama imanaya gurigiina ma ihi qof xukumi karaysa nolosheeda mana ihi qof helaysa waxa ay doonayso aragaagu waa ii xanuun biin hadalkaaguna waa ii intifaac hadaad iga jarayso adiga ayay ku jirtaa haddii kale dhib kale kuuma gaysanayo waanan ogahay oo iima yeelaysid laakiin walaalkayoow waxaan mar labaad kaa codsanayaa in aanad igu ceebsan jacaylka aan ku jeclaaday iyo sida adag ee uu ii haleelay"

Subeer runtii aad ayuu ula yaabay hadalada Hodan isaga oo dhinaca kalena ka fekeraya mattaantiisii Salma si kastaba ha ahaatee muu noqon mid qofkaa ku reeba qoomamo iyo xanuun ama si arxan dariya ugaga dhaqaaqa

meeshii ay joogtay wuxuuse isku dayay sidii uu u dajin lahaa waxaanuu yidhi "Hodaneey adduunyada habeen iyo maalin hadhkaa labadiisa galin, hada ruux wax jecel iyo heedhe mid kale oo aan ogayn hawl inay ku noolyihiin aadamuhu waan ogahay hase ahaatee hore ayaa loo yidhi naf wax jecel Allaa dhibay aniguna kugu dhibsan maayo waayo aniga ayay isoo martay anigaa og, anigaan dafiri karin, anigaa aaminsan, anigaa mar walba u ooya qofka wax jecel, anigaa kuu markhaati ah, anigaan kugu dafirayn, anigaa qirsan oo waliba qalbigaaga ka arkaaya qaraxyada ka dhacaya, way adagtahay walaashayeeey siday gabadhi ugu dhiirato inay u sheegato wiil jacayl aan haynin, haddii ay ku ciyaaraysana way dhamaataa wakhtiga ciyaartu waxaanse dhadhaminayaa oo aan arkayaa xaaladaadu sida ay tahay aniguna waad sheegtay oo waxba kuuma qaban karo haddii aanan maanta ku jiri lahayn sidaan hore kuugu sheegay edega aan ku xarooday kaagama tageen, kaama baydheen, kaama baaqdeen kun kalena kuguma doorsadeen, haddase halka aan joogo adiga ayaa ka ah marag waxaan kuu qaban karaa inaan si fiican kuu soo dhaweeyo, inaanan dhibsan aragaaga, inaanan karaahiyaysan hadalkaaga iyo inaanan ku hiifin haka yaabin marnaba in wax xumaan ahi xagayga kaaga yimaadaan waxaanse kaa codsanayaa inaad iigu ducayso sidii aan u heli lahaa qofka aan jecleaday, aniguna waxaan kuugu ducaynayaa sidoo kale" kalmadaasi naruuro dheeraada ayay galisay Hodan oo waxay u soo holatay sidii uu ka yeelay ama uu ka ogolaaday codsigeedii.

Intaa markii la is dhaafsaday ayay u sheegaysaa in wakhtigii goor dambe yahay reerkuna igu ogaayeen aqalkiina, markaa halkan ha i dhigin ee guriga hortiisa i gee sidiibuu ka yeelayaa intii laga furayay albaabka wuxuu taagnaa aqalka hortiisa waxa ka furay inan ay walaalo yihiin oo ay Subeer si fiican isku yaqaanaan dabadeedna intuu soo dhaafay albaabka ayuu u yimid Subeer waa la isa salaamay, Subeer oo is leh u sheeg ayaa inankii uga horeeyay hadalka oo uu ku yidhi "dee Subeeroow way ku dhibeen Hana iyo Hodan oo ilaa xiligan haday ku wadaan hawlahaagii oo dhamba way kala daadiyeen" Subeer wuxuu dareemay in wiilka ay walaalaha yihiin ogyahay

inay maanta reer Dhamal la soo joogtay oo ay la soo qadaysay. Kaftan yar oo gaaban kadib wuu soo dhaqaaqay Subeer wadada ayaanuu iska soo qaaday waxay ku dhawdahay saacadu tobankii habeenimo oo intii ay Hodan u sheekaynaysay ayaa wakhtigu aad isu guray sidiibuu ku seexday isagoon haleelin inuu la hadlo Salma waxaynu xusuusanahay in habeenimadkii uu soo qaaday gabadh la jaar ah Salma ileen dumarku waa balaayee waxay u timid Salma waxaana dhex maray sheekadan.

“Salma, waxaan ku waydiiyay goormaa kuugu dambaysay Subeer miyaad kala hadheen, hawshiinu miyay dhamaatay, ma reerkaa isku kiin diiday, ma adigaa ka maarmay, mise isagaa axdigii ka baxay?” Salma, way yaaban tahay oo waxay u qaadan la’dahay hadaladan faraha badan ee inantu is daba dhigtay dabadeedna si aad u kulul oo cadho ku jirto ayay ku jawaabtay “maxaa keenay inaanu kala hadhno aniga iyo Subeer, halkeenu kala tagi karnaa, sideen u kala maarmi karnaa, soo ma ogid inaanaan la’aan karin, soo ma ogid sida aan u jeclahay, soo warkeeda ma haysid dhibta aan u soo maray may kaa dahsoon tahay inuu yahay Subeer ninkaan u soo dumiyay reerkaygii dhamaa miyaad ilowsan tahay in Subeer yahay ninkii shanta sanadood aniga i sugayay xataa iyadoo la i qabo, haddaanad imika saaxiibaday ahayn wax kale ayaa dhici lahaa” inantii intay qososhay ayaa iyadoo ku tiitiiqsanaysa ay ku tidhi “waa runta intabana anaa kaaga markhaati ah, laakiin waxaan ku waydiiya maxaa ka dhexeeya Subeer iyo Hodan” hadalkaasi marka ay tidhi ayay la soo booday Salmi oo ay ku tidhi “maxaad tidhi ku celi bal hadalkaa? Haddana intii aanay inantii u jawaabin ayay tidhi Hodanaa, halkeed ku aragtay, maxaa lagugu yidhi, maxaad maqashay?” intaas oo dhan ayay is daba dhigtay iyadood moodo in xiskeedu maqan yahay gabadhiina si yar oo qabaw ayay ugu jawaabtay “xalay ayay i soo qaadeen oo iyada oo labisan iyo isagu ay i keeneen guriga agtiisa, markaana arrintaas uunbaa kaa waraysanayay ee wax kale ugama jeedin anigu” Salma madaxa ayaa aad u xanuunay cabaarbay aamusnaanaysaa waxa kaliya ee ay ku celinaysaa “miyaad hubtaa?” inantuna waxay ku tidhi “ma waxaan kuu sheegaa dharkay xidhnayd, ma waxaan kuu sheegaa sidii

loo qoslayay, ma waxaad iga doonaysaa meeshii la tagayay, may kaa dhaadhici la'dahay is raacitaanka Hodan iyo Subeer, hadaadse sidan tahay miyaad lugta ka xidhatid Subeer ama u sheegtid runta ood tidhaahdid ha ii sheegin been hana igula dhaqmin wax aan suurogal ahayn oo aa arrin kolba soo afjartid"

Salma marka hore inanta waxa ay ka waraysanaysay kursi daarada yaala balse intay inantii guriga ka shaqaynaysay u yeedhay ayay ku tidhi "waxaad noo keentaa sharaab qabow" meeshiina waa laga kacay oo waxa la tagay qolka fadhiga, waad iska garanaysaa qof marka horeba war sheegayay markuu arkayo sida loo soo dhawaynayayo warkii uu sheegayay inuu sii kordhinayo oo uu sii macaanaynayayo, mana aha wax cusub ama inanta ku ah keli ee waa xaajo waligeedba lagu yaqaano dadka war sheekada yaqaana ee kala dila lamaanaha. Salma iyadoon is ogayn ayay halkan u bilowday inantii wixii dhex maray iyada iyo Subeer, siday isku barten ilaa iyo wakhtigan maanta ah halka arrinkoodu marayo waxaanay ku gebogabaysay in ay ballansan yihiinba maalmaha soo socda inuu u yimaado reerka midna ogowoo reerkoodu sawmaad maqlin inaanay aniga ila rabin waxaan u malaynayaa Subeer reerkooda ayuunbuu u xagliyay, kalmadaasi waa mid ay isticmaasho mar kasta oo Subeer arrin kaga soo fool yeesho ama ay ka tirsato dhibaato, Salmi inantii waxay ku tidhi "walaal waad mahadsan tahay, waxaan jeclahay inaad mar walba ii timaado oo waayo intii aan dalka ku soo noqday maan lahayn saaxiibad joogto ah, waxaan rabaa inaad sidaa iga aqbasho" halkiibaana la isku gacan qaadayaa waanay soo dhawaynaysaa oo gurigooda agtiisa ayay gaynaysaa wakhtigan ay ka sheekaysanaynaa arrinkani waa maalintii dambe gelinkeedii dambe markii shaqada laga soo rawaxay. Salma Illaahayba uma kaadin telefonkii ayay dhegta qabsatay waxaanay garaacday Subeer iyadoo wakhtigaa dheg la qabto aan lahayn cabaar ka dib ayuu ka qabtay may salaamin waxayna ku bilowday

“Maxaa ku helaya haddaad i fasaxdo, maxaa ku helaya, hadaad run igula dhaqanto, maxaa ku helaya hadaad guursato inanta aad jeceshahay ma waxaad u haysataa in aan dhimanayo ama aanan noolaanahayn adiga la’aantaa, waxaad ogaataa Subeeroow in badan ayaa kaa dul qaatay, wax badan ayaan iska dhaafay arrimo aad samaysay maantase tani mid aan ku kala baxayno maaha, waxaan jeclahay ama ay ila tahay ama tahayba inaad i fasaxdo, oo aad intaa dhibaato iigu filnaato, waayo wixii intaa ka dambeeya dee waan ku waalanayaa”. Subeer wali hadal kaliya kumuu odhan umannu jawaabin wuu yaaban yahay meel lagala qaadayna ma garanayo, waxaanuu ku yidhi “walaal, shaydaanka iska naar aynu is aragno, aan isu nimaadno, waxna aan is waydiino, wixii igu cadaada diyaarbaan u ahay inaan kaa qanciyo, laakiin ma laga yaabaa waxan aad igu haysataa inuu yahay wax aan jirin oo aad iska shakiday, intay aad u qososhay ayay ku tidhi “waxaad tahay xariif, aadbaanad u taqaanaa sida loo xado qalbiyada bina aadmiga, waxaanse kuu sheegayaa in beentii iyo halaasigii soo dhamaaday imikana la iskugu yimid xaqiiqdii, waxaad ogaataa inaan ogolaan doonin wax kasta oo aad iila timaado ilaa aad cadayso waxa idinka dhexeeya adiga iyo Hodan” markiiba dareen halka arrintu si ka tahay iyo gabadhii ay qaadeen ay u sheegtay Salma waxaanad filayn iyo falaadhi way kaa nixiyaane waxaan xusuustaa Salmaay heestii uu fanaanku qaadayay ee ahayd

Fikir iyo naftaydaay

Filan waagan kugu dhacay

Fiintuba way la oydaye

Feedha bidix wadnaha sudhan

Tii jacaylka fidisaa

Fulin wayday wacadkee

Ficil aad samaysana

Samirbaa ka fiicane

Ha fakarine ficil joog

Farxad aan ciyaarniyo

Aroosbaa filayee

Sawkan faalkii gees kale

Falaadhuhu u jeesteen

Mid aan fiiro dheeri

Fulin wayday wacadkee

Wax wal oo kaa yaabiya wuxuu ka dhigan yahay filan waa' haddaan filayana in ay arrintani sidan u dhacayso mana soo qaadeen mana salaameen midbaan kuu sheegayaa haddaad tidhi kula hadli maayo ilaa iyo inta aad ii sheegayso waxa idinka dhexeeya adiga iyo Hodan wax aliyaale wax naga dhexeeyaa ma jiraan iyadana waan u sheegay inaan adiga ku jecelahay waanay ogtahay waxaanse u qaadan laahay sababta aad u dhagaysanayso sheekada hablaha yaryar iyo dumarka taydana aad u baal marayso, waxaan arkayaa oo ii muuqda in marba marka ka dambaysa uu soo yaraanayo kalgacalkii, jacaylkii, xiisihii iyo wanaagii badnaa ee aad ii haysay waan dareemi karaa waanan ogahay inay adagtahay qofka aad jeceshahay oo lagula yeesho laakiin waxaa taa ka xun haddii aad masabid ku samayso gacaliyahaaga isaga oon ku jirin wax dambiyana mar walba aad ka dhigto dambiile Salma ayaa tidhi "ima qancinayo, kumana qancayo, mana qaadanayo qaladkan iyo qalado hore oo badanba hore ayaan kaaga qaatay waxaadse ugu talo gashay inaad qulub iyo qalalaase na dhex galiso oo aad arrintayda oo dhan baabiiso musqatbalkaygana ka dhigto mid ka baxa faraha inta aanay se taasi dhicin waa inaan kaa tashadaa waxaan kuu sheegayaa ama ogolow ama ha ogolaanin diid ama yeel jeclaw ama ha jecleenin necbaw ama waligaaba ha nicin, hadaad hortayda ku qancinayso oo inta aad u yeedho aad u sheegayso inay faraha kaa qaado waan ku samrayaa inta ka horaysa wax kasta oo aad ii sheegto, hadal kasta oo wanaagsan iyo wax kasta oo aad iila timaado wax aan ka dhagaysanayaa ma jirto hana daalin hana isku dayin inaad ila soo hadasho, iska ilow magacayga, muuqaalkayga iyo midabkaygaba waayo mugdibaan kaa galay, madawbaan ku jiraa aanan meelna u soo marin, jirimadbaan naftayda kuu galiyay, jab kasta waan kuugu soo dulqaatay waxaas oo dhamina waxay iga

ahaayeen jacayl aan kuu qabo aawadeed ma dafirayo oo odhan maayo imaad jeclayn waxaanse ogahay inaad is bedeshay lagu bedelay Subeerkii horena aanad ahayn, waxaadse ogaataa sidaa aad isku bedeshay inaan isku bedeli karo inta badan ee aan kula hadlayna raali ka ahaw haatan iyo dan ma i horkeeni kartaa gabadha oo hortayda ma ku qancin kartaa mise waa maya”

Subeer aad buu uga cadhooday hadalkaa waayo Hodan mar horeba wuu qanciyay iyaduna way ku qanacday muxuu yeelaa imika ma inanta ay sida walaaltinimada ah isku barten, ma inanta ay walaashii saaxiibka yihiin, ma inanta afka u kala qaaday ee ku tidhi waan ku jeclahay, ma inanta isaga oo waxaas oo dhan og uu ugu jawaabay kuuma baahni niyadna kuuma hayo igana raali ahaw ayuu haddana intuu dumar hor keeno ku yidhaahdaa i nabad geli arrintani waxay ku noqotay u qaadan waa’, filan waa’ waxaanuu go’aansaday wax kasta oo ku dhacayaba inaanuu Hodan hor keenin Salma isaga oo og isagu in uu wax wajiya oo u yaalaaba aanuu jirin haddana qadarinaya, xishamaynaya bila aadminimada qaaliga ah ee ka dhaxaysa labada qof waxaanuu ku yidhi “haddii aad i aaminayso Salmaay i aamin haddii kalena waxa aad sheegayso iyo jacaylka aad sheeganayso midnaba waxba kama jiraan, waxaanan ku xaqiiqsanayaa mar kasta oo aynu is qabano waxaad igu tidhaahdaa aynu kala hadhno iyo imika ina kala kexee qofka ay arrintani xagiisa ka dhamaan la’dahay waa aniga hada se ana sidoo kale way iga soo dhaadhacday waanan daalay mana hayo dulqaad dambe oo aan kugu maslaxo waayo dhinac walba dab baa igaga baxayo xaafad ma tagi karo oo waxaa la i leeyahay ha noo keenin Salma adigiina waxaad i leedahay ha ii imanin oo i nabad gali dhalinyaradii waxay igu leeyihiin Salma daraadeed ayaad sidaa u noqotay way fiicnaan lahayd,

way haboonayd inaad ku qaadato oo aad wax ku qaadato erayada wanaagsan ee suuqa ku jira halka aad iila imanayo kalmada khaladka ee aad iila imanayso haddii aan naag doonayo ma soo gaadheen wakhtigan kumana sugeen adiga kaalamana tashadeen habeen iyo maalina iguma

qaadateen waxaanse aad ula yaabanahay hankaygu halka uu taagan yahay iyo hiyigaagu halka uu marayo waxaananse la yaabayn waxa kaa soo baxaya wixii kuu qarsoonaa waanay fiican tahay intay hadhaw inaga oo xaas ah iman lahayd inaad imika isa sheegto qofka aad tahay oo aan ku ogaado waayo way igu adkaan lahayd manaan heleen meel aan ka baxo iyo si aan u dhaqmo toona waase Illaahay mahadii inay maanta si dhib yar kaaga soo baxdo wax aan muddo badan sugayay, midna ku bushaarayso, kuuma keenayo Hodan waji aan ula tagaana iima yaalo waxaan ku idhaahdaana ma taalo adiga ayay kuu taalaa hadaad iska tagayso hadaad i nacayso iyo hadaad sideenii hore inoo daynaysaba, anigu se waxaan kuu sheegayaa oo aan beeni ku jirin in aanan marnaba hunguraynin gabadh kale adoo maqan iyo adoo jooga toona, waxa kale oo aan ku waydiinayaa maalin walba waxaan arkaa adoo gaadhi la socda, xili kasta waxaan arkaa adiga oo guriga lagaa qaadayo,

ha lagu geeyo shaqo ama meel kaleba aaday miyaan wali ku waydiiyay oo aan kugu dhibay ama aan si xun kuugu hatigay oon ku tusay inaad i khiyaamaynayso, haddaanadse adigu khiyaamoole ahayn maxaad mar walba ugu fekeraysaa inaan ku khiyaamaynayo, raashinkaygaan cuni lahaa, reerkaygaan dhaqan lahaa, rugtaydaan joogi lahaa, raxanraad abaariyo raran kuma dul joogeen awgaa, ayaamaha qaarkood ama maalmo badan waayo dhawra, wakhtiyaal door ah way ila yaabi jireen dadku waxaanse ogahay inaan ahayn qof aan marnaba u dhalanin inuu xumeeyo qof adiguna waad ka xag jirtaa oo noloshayda waxaad tahay tii iska lahayd, indhahayga, wadnahayga iyo dhamaan xubnaha jidhakayga waxay u shaqeeyaa ama ay u nool yihiin yididiilada, kalsoonida iyo hadba heerka wanaagaagu taagan yahay haday sidaa gaadhay inaad igu tidhaahdo hadh cad iska dhaqaaq wax dhib ah maaha cid aan u sheeganayo, cid aan la ciirsanayo, qof aan ula cataabayso iyo cid iga ka qabanaysaa midna ma jiraan, noloshaydu adigay kugu dhamaataa adigayna kugu bilaabantay, waxaan aad ula yaabanahay waxan kale ee aanan arkayn ee kuu muuqda adiga ayaan kaliya maan odhan indhaha u roon ka oohi, aayaha naftaada ka ilmaysii, oorida

mustaqbalkaaga ka cadhaysii hase ahaatee wixii oo dhan waxaa isku qaatay kalsooni darada aad i tustay oo ah mid aanan ka kabanayn, waan dareemayaa waanan ka xumahay inaan hadalo badan oo calooshayda ku jira kuu sheego adiga oo aan waxba ii qabanayn markii aan madiga ahaa, markii aad iga maqnayd, markii la iga kaa guursaday, markaan ugu murugada badnaa, markaan iloobay naftayda maantay igaga darantahay wakhtigaasi waxa ii muuqday oo aan higsanayay inaad ii soo noqon doonto hadaanse moodayo sidan iguma dhaceen hadimada iyo hagardaamadani huuno, gacaliso, walaal, macaan, qalbi arrinteeni adigay kaa go'daa maxaad ku go'aaminaysaa".

Salma siduu horeba u sheegay uma dhaadhacsana hadalada wanagsan ee uu ku leeyahay waxa kaliya oo maraya naagtii oo la hor keeno waxaanay ku odhanaysaa "go'aankaygu waa midkaa, haddii aad yeelayso yeel, haddii kalena diid, waxaan ku siinayaa fursad laba maalmood iyo laba habeen oo aad kaga soo fekerto, waanad mahadsan tahay hadaladaada macaan sida aad u samaysay suugaanta iyo sida aad xariifka ugu tahay xadida qalbiyada bina aadamka iyo inaanay cidi kaaga aqoon badnayn qancinta qof anba waan ogaa hadalkaygu laakiin halkaasuunbuu ku go'ayaa" isagoo halkaa maraya ayaa waxaa ka soo galaysa rikoodhakii uu dhagaysanayay heesta uu qaado fanaanka Alle ha u naxariiste Axmed Gacayte oo uu sameeyay Abwaanka wayn ee Cabdi Qays taasoo lahayd:-

Anigoo dhallaanoo
Qalbigana ka dhimanoo
Dhaayaha wax ka arkayn
Dhagar qaboow abees iyo
Halaq lama dhunkado oo
Dhabta Iguma qaatee
Haweenkaa ka dhiganoo
Ruuxay dhinaca saaraan
Ka idleeyay dhiigee

Anay igu dhex tuureen
Dhamac iyo dhab shidanoo
Qayrkay i dhaafsheenoo
Dhana maanta haysane

Subeer wakhigaasi waxa kale oo u baxaysay oo ku xigtay heestaa tan kale ee
ah:-

Daruuraha hilaaciyo
Dayax nuurayaad tahay
Dawadii naftaydiyo
Dookhaygiibaad tahay
Dumarkaba dhamaantood
Taan ka doortay baad tahay
Kuma dayn karaayoo
Ifkaan kuugu jecelahee
Kuu daacadbaan ahee

Wuxuu ku odhanayaa "Salmaay cajaladaasi ama heestaasi waxay ka mid ahaayeen kuwii aan ku dawayn jiray qalbigayga wakhtiyadii ugu adkaa hada se waad aragtaayoo wax waliba waxay isku badaleen dhinaca kale xaaladeenu maanta waxay noqotay mid aan waxba laga qaban karayn waxba ha i karaahiyaysanin hadalkana yaanan kugu badinin iska seexo laba cisho iyo laba habeen toona waxaan kuu keenayaa ma jiro hadaan keenayana wakhtigan aan joogno ayaan kuu sheegayaa markaa Salmaay walaal adoo iga raali ah ha iiga qaadan xumaan, u malaynin quus wax waliba waa qadar Illaahay adiga ayay kula taalaa sidii aan hor kuugu sheegay waxaad yeelayso". Salma "waayahay ee habeen wanaagsan" iyo habeen wanaagsan sidiibaa lagu kala tagayaa iyadoo aan midna midka kale wax ballan ah ka qaadin qadar dabadeed wuu iska gam'ayaaba Subeer waayo wuxuu isku arkaa oo uu naftiisa u sheegay inaanuu ahayn qofka dambiga

abuuraya wax walibana waxay u dhici doonaan sidii uu Illaahay ugu talo galay isla markaana aanuu isku dawakhin ama iska daba ridin doondoonga iyo raadinta ruuxa shakigu ruxayo.

Dhinaca kale, Salma waxay dareensan tahay dhinac inay khalad ku jirto xaga kalena waxay doonaysaa inay wax u kala cadaadaan ee wax jacayl ah oo ka ba'ay iyo cadaawad ay u hayso midna ma jiro in yar markii ay joogtay ayaa waxaa la soo hadlaya Inaabtigeed Mursal oo ahaa mar odaygeeda waxaanuu ka waraysanayaa wakhtiga iyo waayaha, xaalada dhalinayaronimo iyo xaaska waxa u dhexeeya, wuxuu us heegayaa inay tahay xabad dheeman ah ama luul ah ama se dahab ah hadaad doonto wax qaali uun ah markaa in aanay ku ciyaarin iskana lumin fursadaha soo mara isaga oo waydiinaya hadalada noocaas ah una sheegaya in uu imika yahay walaalkeed ninka guursadaana noqonayo seedigii ayuu ku odhanayaa "qof aad jeclaatay oo aad jamatay ayaa runtii jano u dhinayn waxaan ogahay qofka agtaada ka ah wax wayn, midka aad calmato iyo ka aad u holato inaad guursato inay intuba yihiin qaar iga nasiib badan, wakhtiga, waayaha ayaa ina kala keenay waanan ogaa oo waxaan helay laba waraaqood oo lagu soo diray mudadii aynu is qabnay" shaw markaa maalmihii warqadihii uu Subeer u qori jiray ayaa aanay Salmi si wanaagsan meel ugu habayn kadibna markay ka soo guurtay waxa uu ka helay meel ka mid ah guriga dhexdiisa, wuxuu aad ula yaabay erayada iyo hadalada aadka u culculus ee ku qornaa warqadaa dabadeed isaga oo taa tixraacaya ayuu ku yidhi "talow wiilkii Subeer halkeebuu ku dambeeyay, caruur ma leeyahay, ma guursaday, magaalada ma idinla joogaa mise wuu idinka maqan yahay xidhiidhkiinu se waa sidee" waxay ugu jawaabaysaa "Mursaloow waa runtaa oo aniga oo ooridaada ah ayaa la ii soo qoray waraaqo jacayl qofka ii soo qorayna waxa uu ahaa qofkii aan adduunka ugu jeclaa hase ahaatee markii arrintaadu timid ayaan wax walba bedelay, raacitaankii aan ku soo raacayna muu ahayn mid niyad iga ah, mid muxubo iga ah, mid aan mabsuud ka ahaa, iyo mid aan ku qanacsanaa toona laakiin u qaadin waaga hooy iyo

qadarka Illaahay ayaa sababay in aynu intaa isla joogno ee may ahayn mid aan anigu u kasay ama aan maskaxdayda ka keenay”.

Mursal waa nin aftahan ah, aadna u kaftan badan wakhtigana aanay ku mudnayn lurtii caashaq ee Salmi markaa si saraaxad ah ayuu wax walba ugu sheegayaa wuxuu odhanayaa “walaashayeey inyarbaa adduunka la helaa qof ku jecel, in badanbaa se jirta oo kugula socota indho sarcaad markaan eegay Subeer waa wiil daacad ah arrinta uu kaa yeelayna kolayba anigu kaamaan yeeleen waxase laga yaabaa dadku isku caqli maaha, isku feker maaha, isku abuurna maaha dhibaataada intaa leeg qofka kuu galay inaad kaga dhaqaaqdo meel cidlo ah oo aad ku gefto isaga oo aan wax dhiba kuu gaysan” Salma tin iyo cidhib way jidhidhicootay waxaanay mooday in uu dhegaysanayay hadaladii dhex marayay iyada iyo Subeer waxaanay ku tidhi “maxaad ku keentay hadaladan” isaga oo aad u qoslaya ayuu ku yidhi “wax kale kuma keenine way yar yihiin dadka la jeclaadaa, wayse badan yihiin kuwa wax jeceli adigu waxaad nasiib u yeelatay oo aad hablaha kale kaga duwan tahay ma waydid qof ku jecel, mana yeeshid qof aad jeceshahay ileen imika waynu kaftamaynaaye, iiga sheekee halka uu marayo xalkii Subeer” Salma ayaa ugu hal celisay “Mursaloow wax waliba waa qoraal, wax aan eebe qorina ma dhacaan, hana u malaynin is yeelyeelkayga, is diidsiintayda iyo si kasta oo aan isku adkeeyo inaan anigu hogaanka isku hayo, hadaan kaaga waramo Subeer ilaa hada waan jeclahay, isna wuu i jecel yahay nasiib daradu se waan is fahmi la’nahay” Mursal oo ah nin aad u waayo arag ah muddo badana soo sheekaystay iyadana dabeecadeheega yaqaana ayaa odhanaya “marlay waan hubaayoo, dhib kama imanayso xagiisa arrimaha oo dhana xagaaga ayay ka burburayaan balse waxaad isku taxaluujisaa sidii aad u badbaadin lahayn qof ku jecel” Mursal markii uu intaa ku yidhi waxa ka dhamaanaya kaadhkii uu kula hadlayay waxaanuu la ballamayaa inuu mar dambe la soo hadli doono.

La kala tag, iska tagtay sariirteedii ilaa habeenkii hadba dhanbay isku rogaysaa waxayna la yaaban tahay labada arrimood ee isku hagaagay, waxay ogaanaysaa inay khalad wayn gashay, hase ahaatee Salma oo u dhalatay kini adayg ayaa ku adkaysanaysa inay halkeeda taagnaato ilaa inta ay u kala cadaanayaan arrimuhu, waxay baaxaa degtaba, waxay laba bogalaysaba waxay soo qaadanaysa rikoodhkii si ay u dhagaysato heesihii uu u soo duubi jiray waxaana u soo baxaysa hees uu qaado C/qaadir Jubba

Sagal hooray oo da'ay
Dhibcihiisii soo simay
Saxansaxaa udgoon badan
Sadriga iyo laabtaa
Sidaad tahay i deeqdee
Su'aalahaan ku waydiiyay
Sax miyaa jawaabtani
Si kastaba ayaamuhu
Ha is daba socdeenee
Waan sal gaadhay caashaqaa
Saddex saniyo dheeraad
Caashaqii i sahansaday
Sambabada jidhkaygiyo
Saameeyay feedhaha
Haddii aanad saacidin
Sucaadeey walaaleey
Naftu way iga socon lahayd
Si kastaba ayaamuhu
Ha is daba socdaane

Waan ka salgaadhi caashaqa

Waxaad moodaa, heesaha uu u soo duubo inay yihiin qaar mar walba taagan oo marxalad kastaba ka turjumaya Salmiina uma adkaysan karto hadalada naxariista leh iyo erayada kalgacalku ku dheehan yahay ee Subeer markay dhagaysatay heestan waxay isu gaysanaysaa saddexdii arrimod waxaanay odhanaysaa haddii aanad khaladka adigu lahayn waxan oo dhamiba may dhaceen imikana waa inaad wax ka bedeshaa mawqifkaaga intaa iyadaa isla hadlaysa, haddana waxay odhanaysaa maya **calool adayg waa Alle wehelkii** wax kastaa ha dhacaane wixii aad ku ballan qaaday waa in aad kaga dhabaysaa Subeer haddii aanuu keenin arrintii aad isku ogaydeen isaga ayaa cirka roob ku og, waxay galgalataba goor waa dhawaadkii ah ayay indhaha isku gaynaysaa maxaase ka dan ah saacad ka dib hoonka gaadhiga ayaa u baxaya oo waxaa la leeyahay u soo bax sheekada. Maalintaas oo dhan xafiiska waxay ay u joogtay sidii qof caag, wax tamar ah, dhaqdhaqaaq ah, hawl ah midna may qaban, dadkuna way dareemayeen qaadirada ka muuqatay oo hablaha asxaabtu waxay kula kaftamayeen maxaad talow xalay ku soo jeeday iyo erayo kale oo ay ka mid ahaayeen guurbay qorshaynaysaayoo gebigeed adduunayada geestay ka joogtaba maba garan karaysoo guyaal iyo guyaal badan caashaq soo gilgilaybaa hada soo gunaanadoo gurmadiisa araganaye Salmaay ha gaagixinin caashaqa waxa ku odhanaysa oo geeraarkaa yar u tirinaysa inan ay xafiiska wada fadhiistaan oo ay kuwa kale isaga dhaw yihiin hadal badan uma celinayso oo Way is ogtahay, wayse jeceshahay in looga sheekeeyo hadalada Subeer iyo jacaylkiisa. Wakhtigaa Subeer suuqa ayuu iska joogaa oo gaadhigiisii ayuu wataa waxa ku soo dhacaya telefan ay u soo dirayso Hodan waxaanay odhanaysaa “bal waran, xaaladaada ka waran, is waraysi, xaal waraysi ayaa in muddo ah la galayaa” Subeer ayaa ku odhanaya “waxaan doonayaa inaynu is aragno”.

Hodan iyada haddii uu yidhaah xiligaa soo bax waa diyaar waxaa la ballamayaa todobada fiidnimo iyo Huteel. Subeer waxa uu u ballaminayaa

inuu u sheego dhibaataada haysata iyo halka uu ka taagan yahay arrin walba. Hodan may diidin hadalna kumay soo celin waxay ku tidhi “waayahay walaal, ee halkeed igu soo maraysaa” wuxuu u sheegay inuu guriga hortiisa kusoo mari doono. Telefoonkiis wuu iska dhigay waxaanay bilawday Hodan sidii ay iskugu diyaarin lahayd ballanta

Subeer markiiba waxa ay la soo hadashay Hana oo ay ku tidhi “aniga iyo Subeer ayaa ballansan caawa iyo ma dhici karto” Hodan ayaa ku tidhi “way dhacday ee waxaan ku waydiiyay maxaan xidhaa” Hani intay qososhay ayay ku odhanaysaa “walaalkay wuxuu ka helaa, dharka madmadow ee waxaad qaadataa sadkaagii madowga ahaa” kaas oo ah mid ay iyagu isla garanayeen Hani daacad kama aha dharka ay u xushay ee waxay doonaysaa in uu Subeer ku qoslo waxoogaa waayo dadkuu ku dacaayadeeyaa gaar ahaan hablaha “ma asaybay sidaan maxaa u xidhay dharka madow”.

Markii la gaadhay ballantii ayaa la iskugu yimid goobtii soo qaad oo keen Huteelkii, waa meel aad u qurux badan, neecaw qabaw oo aan dhaxan lahayn ayaa ka dhacaysa iyada oo wakhtigaa dhulku huur ahaa, waa mutul aad looga shaqeeyay oo lagu xardhay si farashaxanimu leh, caws, alool iyo shayo kale oo ah kuwii aynu hidaha u lahayn waxa ku sawran gabadh saddex qayd xidhan iyo wiil laba go’ xidhan, xawayaano kala duduwan, cabaarbaa meeshii la fadhiyay buuqu ma badna oo Huteelku magaalada ayuu aad uga baxsan yahay waxaana inta badan taga dadka aan rabin in rabshad ama hadal buuq ah ka dhex galo sheekadooda in yar markii ay fadhiyeen ee ay dalabkeedii dhiibteen ayaa waxa uu ka yaabay qaabka ay u labisan tahay Hodan, hanaanka Illaahay siiyay iyo midabka aan casaanka ahayn madowgana ahayn ee ku yar inta badan hablaha hadeer jooga, waa gabadh aad u dheer, qoor dheer, dhex dhuuban, kub dhamaystiran, timaha oo aad moodo inaanay iyada ku oolin oo uu shaki kaa galayo inay xidhan tahay kuwa lagu kordhiyay timaha caadiga ah waayo sararaha ayay dhaafeen midabkoduna waa madow tukhul ah oon dawo la marinin, jileec aan gacanta xaganayn dhibna ku lahayn marka ay duubayso. Subeer cabaar

ayuu ku jiray daawashada Hodan oo aanuu caawa ka hor arag iyada oo sidan u labisan marka aad is barbar dhigto Salma iyo Hodan waxa qurux badan Hodan inkastoo jacaylka la yidhaahdo wuu indho la'yahay haddana xaqiiqdii wuu qirayaa Subeer inay Hodan ka qurux badan tahay Salma waxaanuu se iloobayn inuu jecel yahay Salma, aamus dheer dabadeed ayay ku odhanaysaa Hodan "walaal maxaad inoogu sheekayn la'dahay" inta uu yar naxo ood moodo inuu ka soo baxay meel uu ku maqnaa ayuu odhanayaa "iga raali ahaw Hodaneey, waa adduunyo oo, waa waayo badan, waagii kastaba waji gooniya waxay ku Tusaysaa waayo aanad hore u arag ismaan lahayn, umanaan fekerayn Hodan ayaydun intaa is ag fadhiyi doontaan, talada kuma aan darsan Hodan ayaad huteelkan keeni doontaa waxaanse ogaanayaa ama aan arkaa, ama aan horeba u ogaa in wixii uu Illaahay qoray qofna aanuu is hortaagi karin" Hodan waxay fadhidaa meel ku beegan koonfurtiisa waxa ka soo dhacaya laydh aad u yara qabow oo timaha Hodan hadba dhinac u ridaaya, waxa uu la yaaban yahay qaabka uu Illaahay qofkan u samaystay iyo sida uu isu raaciyay akhlaaqdeeda, dad la dhaqankeeda, wakhtigaa waxa ka socda hudheelka ay fadhiyaan heeso badan oo kala kaan kaan ah laakiin markan waxaa socota heestan:

Qaali iyo luulaay
Haddii ay quruxi wacantahay
Ama qiimo leedahay
Qaadirkaan ku dhaartee
Qaalintii hablaha
Runtii qalanjo waa adi
Allow yaa qilaaf iyo
Ka ilaasha qaladoo
Ubad aad u qaadaa
Qay ugu xambaartaa
Qoyskiisa noqotaa
Qado aad u karisaa
Nolol qaaye le oo wacan
Waligaaba kugu qaba

markay muddo sheekaysteen ayuu Subeer ku yidhi “Hodaneey, hore ayaa loo yidhi **waa sagaal adduunyaduyoo ma tobnawdo waligeed** waxaan uga socdaa hadaan hal habeen oo kaliya hunguri iikaa gali lahaa ha hinaasto Salmi waxase nasiib darro ah inay cidlo ka masayrto aniguna inbadan baan u dul qaadanayay, wax badan baan is lahaa yaan dadku idin maqlin, wakhtigan iyo wixii ka dambeeya suurogal maaha inaan anigu qaato khalad aanan lahaynuna gaysto qof khalad, waan kuu soo sheeko dhaafay Hodaneeye, waayadii aanu kala maqnayn aniga iyo Salmi xiliyadii aan aadka ugu baahnaa hadalkeeda iyo arageeda intaba way iga goysoy aniguse marnaba maan tusin in ay xumaysay oo ay burburisay qaybo dhan oo jidhkayga ka mid ah, waxay iga dhigtay qof mariid ah oo aan waxba qabsan karin iyada la’aanteed, ma awoodo inaan la kulmo ama la hadlo ama u hanqal taago gabadh kale, waa wax la yaableh waxaanse jeclahay haddii uu ii wanaagsan yahayna Illaahay ayaan ka baryayaa inaan ku sii jiro xaaladan haddii kalena inuu iga saaro”. Hodan waa qof aad u degan,

dabeecad wanaagsan, oo dhamaystiran intay cabaar aamusnaato ayay ku odhanaysaa “walaal, waayaha adduunka ayaa dadka qaarba caynba ka dhiga marna wiilka ayaa xumaada marna gabadha ayaa ka hadha oo keenta waxyaabo ay ku kala tagaan, kugula yaabi mayo jacaylkaaga iyo sida aad u qadarinayso, waxa aan aad ula yaabanahay sida aan laguugu ogayn haddii aniga hal habeen oo ka mid ah noloshayda uu jacayl sidaa qof ii jeclaan lahaa ma siisteen adduunyada inta aan ku noolahay mana garteen adduunka wax aan ugu abaal gudi lahaa, waase ay iska dhacdaa waxa la yidhi **waa wareegto adduunyoo, wakhtigaa hadba caynno, nin wadeeco la jiifoo, walbahaar ladi waayaa waynaheen ka baxshaa nin wanaag ku casheeyoo wacan oo nabad seexdaa bari wiishle tagaa** haddii ay ogsoon yihiin aadamuhu wax iska kooban lagu daalin lagu rafaadin oo dhamaanteed loo keenay dadka inay ku cibaadaystaan iyo in qofba qofka uu jecel yahay kula dhamaysto si raaxo leh mabay dhaceen is qabqabsigan iyo dhibkan idin haysta, Subeeroow anigu kaagamaan waramin waayahayga adduun iyo wakhtiga isoo maray, waxaan jeclaaday wiil aanu isku fasal ahayn waxaan qarsanayay muddo fara badan oo aan diiday inaan dibnaha u kala furo, waxayse noqotay lagama maarmaan inaan u sheego hawsha igu soo korodhay iyo heerka uu ila taagan yahay Mustafe runtii muu ahayn wiil xun balse waxa uu ahaa qof aan inta badan ku dhaqmin xaqaa’iqa ama dhabta oo ku dhex jira nolol dhalateed ah markii aan u sheegay arrintan maalmihii hore wuu isoo dhaweeyay, muddo badanbaanu si wanaagsan u sheekaysanaynay oo dhalinyarada iskuulku intooda badani isku kaaya ogaadeen, nasiib darro Mustafe waxa uu u baqoolay ama uu tagay safar degdeg ah oo reerkoodu u diray dhinaca dalka Sudan si uu wax ugu soo barto muddo bilo ah markii uu maqnaa, markii aan warkiisii siduu ahaa wakhtiguu ila joogay ka waayay, markii aan ku cidlooday magaalada, markaan u baahday wehelkaygii waxay igu qaadatay inaan habeenkii laba ilaa saddex saacadood ku dhawaad aan dul fadhiyo iimaylka waayo guriga iyo internetka waxba iigamay dhaxaynin muddo ku dhaw afar bilood waxay sidii ahaataba, waxa dhacday in uu ii soo diro warqad khaldan oo shaw uu u dirayay gabadh kale oo saaxibadii ah aniguna

aanan ogayn”. Hodan waxay sidataa wakhtigaa warqadii uu soo diray oon ahayn mid loo diri karo qof si dhib yar loo jecelyahay balse lagu xardhay ama loo qurxiyay si kasta oo warqad jacayl loo dhooldhooliyo, waxay ay ku bilaabmaysay.

Waxaad tahay adduunyada, mida aan ka eeganaayoo waxaad tahay adduunyada midii iigu wacnayd intaan gabadh arkaayoo, walaal Ayaaneey, waxaan Illaahay kaaga baryayaa in uu ku dhaafiyo wax kasta oo dhib kugu ah lama sheekaysto ama cid kale oo aan adiga ahayn dibnaha uma kala furo sawirkaaga ayaa ii wehel ah oo aan ku seexdaa kuna soo toosaa haddaan damco in aan inan la hadlo afku wuxuu iga xadayaa inaan magacaaga ugu yeedho adiguna ayaamahan ma tihid sidaadii waxaan kuu sheegayaa, waxaan imanayaa bisha lixaad, waxaanan doonayaa in aan u imaado reerka aabo iyo hooyana waan sii wargaliyay adiguna waa inaad dhankaaga ka diyaarisaa oo aad u sheegtaa waalidkaa, waxa ii hadhay waa afar bilood intaas kadibna waxaan doonayaa inaan labada sanadood ee ugu horeeya soo xidho si aan u aqal galo, kadibna dib ugu noqdo, walaal ma noolaan karayo adiga la’aantaa waxbarashadaydu waa khasaare haddaanan ku haysanin waxa kaliya oo aan ku qanci karaa waa adoo ooridayda noqda waan ogahay inaad i jeceshahay waxaanan se ilowsanayn inay jiraan boqolaal inan oo ila mid ah igalana kaa bixi kara, waxaan kaa baryayaa inaad daacad iigu ahaato sida aan daacada kuugu ahay hal habeen oo keliya ismaan odhan Ayaan mooyaane gabadh kale la sheekayso ismana lihi inta aad nooshahay qof kale la wadaag aayahaaga.

Barbarkaa yarkaan ka eegay

Wiilkii isha iiga baaqay

Inankii caashaqa igu beeray

Inaanan ka bogsanaynin

Markuu ka bogtuu ogaaday

Hadduu bedel iigu jiiday

Anoo balad xaawa jooga

Muxuu Burco iiga yeedhay
Markaan Boosaaso gaadhay
Hadduu bada booyin ka raacay
Inuu been ila jilaayay
Adaa boqoroow ogaaye
I bixiyoo iga badbaadi
Hadaan nin dambe u baroorto
Hadaan baxsanoow idhaahdo
Aniga balo ha iga raacdo

Heestaasina waxaad moodaa inanka hudheelka hayaa inuu la socdo mawduuca lagaga wada hadlayo goobta waayo mar walba hees ku began hadalkooda ayaa soo galaysa. aan sii wadano sheekadeena ee Warqadan uu qoray Mustafe oo ku soo baxay ciwaan khaldan waxa uu markaa u sheekaynayaa Hodan oo Online u yahay dabadeed halkii uu uga diri lahaa Ayaan ayuunbuu u soo diray bogoskii Hodan, waa wax iska caadi ah in dhalinyaradu is khiyaamayso, Hodan may eegin message-ka soo dhacay waayo kuma hayo ludh aad u faro badan oo qofkii ay dunida ugu jeclayd ayaa ay la hadlaysaa waxase dhib ah laba wajiilaynta Mustafe, waa la is macasalaameeyay wakhtigaa kadib ayay furatay Message-kii oo ay la soo baxday warqada. "Waxaan uga socdaa ayay tidhi Hodan maalintaa aan helay warqada maalmo yar kadib waxaan doonayay inaan u sheego waalidkay inaan guursan doono inankaa maxaase igaga soo baxay".

Subeer aad ayuu ula yaabay sida aanuu isku bedelin dareenka Hodan ee ay wax walba ugu sheegayso sidii uu ahaa iyo iyada oo u muuqatay qof aan dhib badanba u arkayn ee iska yahay wax dhalinyarada intooda badan ka dhaca wuxuu ku yidhi "maxaad yeeshay wakhtigaa?" waxay ugu jawaabtay "ma xusuusto maalmo badan oo noloshayda ka mid ah mana garanayo sidii aan ahaa muddo saddex wiig ah waxaan garan karaa in xaafadu quraan uun igu akhriyaysay oo ay isugu sheekaynayeen waala dardaray inanta waxaan dareemi karayay oo keliya in wax wayn oo aan haystay uu mar

kaliya iga lumay, waxaan u qaadan waayay hadalada macaan een marnaba aanad ka dareemayn inay beentu ku jirto ee Mustafe ii soo jeedin jiray waxaan sidii ahaadaba dadku kolba igu dhago hadlaan maaha Subeeroow in aad u noolaato dadka kugu xeeran ama deegaanka aad ku xeerantahay waa xaaraan in aad u nuglaato waayaha adduunka waayo waxa aad noqonaysaa qof aan iska celin karayn ama aan iska dabaali karayn ama iska difaaci karayn dhib alaale iyo dhibta ku timaada, dhalaal iyo qurux, dheeh iyo wanaag, nuur iyo naxariis intii jidhkaygu lahaa mar kaliya ayaan noqday qori qalalan, cunto ma cuno waxna ma cabo cid ma raaco sidaan hore kuugu soo sheegayna muddo badan ayaan miyir doorsoomaa.

Hodan inta ay hakatay oo ay hadalkii joojisay ayay ku tidhi “walaal Subeer ha ila yaabin ma istaajin karo, waxaanad tahay qofka kaliya ee aan u sheegay dhibta iyo haysatay” Subeerna isaga oo aan wax badanba ka aamusnaan ayuu ugu jawaabay “walaal aniga qudhayda ayaa la yaaban qofkaasi qaabka uu kuu khiyaameeyay iyo qalbi xumaantiisa manuu ahayn qof adduunka korkiisa lagu saamaxo waxaanad ogaataa inuu la kulmayo mar ay ahaataba waxa uu kuu gaystay. Hodan ayaa la wareegtay hadalkii waxayna ku tidhi “waxay sidii ahaataba, waxa ay ayaamuhu is guraanba, wakhtiyadu ay is bedelaanba, maalinba maalin ii dhiibto, waxa la gaadhay wakhtigii uu la balamay inanta ee uu kula ballamay inuu guursanayo waan kuu sheeko dhaafaye wakhtigaa hore aniga iyo Mustafe waxay ahayd ballantayadu in aan is mehersano oo wuxuu isku beegay ballanta uu inantan la galay iyo ta uu aniga ii qaaday

Anigu muddadii aan xanuunsanayay ama warqadaasi ka dambaysay si caadiya ulamaan xidhiidhin kumanaan cadayn karahayn oo kuma odhan karayo maxaad gabadha kale ugu ballan qaaday ee aad warqada khaladka ah iigu soo dirtay waayo jacaylka I haya ayaa ka waynaa wax kasta oo uu igu sameeyo waxay gaadhay noloshaydu wakhti isaga oo waxaas oo dhan ii gaystay haddana aniga oo aan kici karayn aan doono inaan la soo hadlo ama aan internetka u galo, maalmuhu badane dadkuna kala nasiib

wanaagsane bisha lixaad maalintii todobaad saacada koob iyo tobnaad ee subaxnimo ayuu ka soo dagay madaarka Hargeisa waana qaabkii uu ugu soo qoray warqada anigu waxaan ka mid ahaa dadkii ka hor tagay aniga oo aan awoodi karayn inaan dhaqdhaqaaq faro badan sameeyo ayaa kaxaystay gaadhi aanu leenahay dabadeedna cabaar ayaanu ku sugnay madaarka hortiisa isla wakhtigaasi ma aqaano wajigeeda ama saani uma garan karo wajiga inanta Ayaan oo waxaad moodaa in maskaxday ay xataa waxyaabo badani iska bedeleen, markii ay dadku diyaaradii ka soo dhamaadeen ayaa anigu waan daalanaa oo waxaan fadhiistay meel geed hoostii ah waxaan arakay oo aan indhaha ku kala qaaday Mustafe iyo Ayaan oo labada dhaban iska dhunkanaya, cabaar ayaan eegay dabadeed waxaan u diray wiilkii gaadhiga ii waday oo aan u sheegay inuu u sheego inaan ku sugayo oon ku suganahay goobta,

Markii uu gaadhay Mustafe ayuu gaadhsiiyay fariintii dib ayuu ii soo fiiriyay jaleecadii ugu horaysayba wuu i gartay inaan ahay Hodan intuu igu soo cararay ayaan sidaa iskaga qabtay labadiisa gacmood isagoo igu leh "walaal waan ku daydayayay inantan Ilmaabti ayaanu nahay iyadaa isoo dhawaysay waanad arkaysaa oo reerkii iyo faamligii oo dhami way joogaan, Hodan xaaladaadu soo ma wanaagsana waxaan is lahaa iyada oo qurux badan baad u tagaysaa ee maxaa kugu dhacay maad xanuunsatay mise adiga ayaa iska jeclaystay inaad sidan isku dhuubto macaaneey wixii hadiyad aan kuugu soo talo galay iyo qalbigayga laftiisa ayaan kuu sidaa, cadceeda ayaa kulul aniga ayaana kula soo hadli doona, walaal fasax ayaad tahay igana raali ahaw inkastoon jeclaa inaan ku sii raaco haddana iima suurto galayso,

Hodan waxay leedahay "hadalada uu wakhtigaasi igu leeyahay waan diidayay oo waan ogahay inay been yihiin mase dareensiinayan inaan sirtiisa oo dhan hayo waan isku soo noqonay waxa la gaadhay maalintii labaad ee joogitaankiisa telefana ayaan goor galab ah u diray wuxuu ii sheegay inuu wiiga oo dhan uu yahay macsuum, wixii wiigan ka dambeeya

uu ii iman doonaa ee aanuu isoo haleelayn mudadaa hore, wakhtigaasi ayaan go'aan gaadhay, Subeeroow ma tahli karayn inaan qoro qoraal manaan karayn inaan hadal badan ku idhaahdo haddana naftu waxay igu khasabtay inaan u sheego waxa jira waxaan tagay qolkayga fadhiga waxaanan dul fadhiistay koombuteerka oo aan ku diyaariyay qoraal ka kooban 11 page oo mid waliba goonidiisa uu ka kale u fasirayo waxaan u sheegay wax alaale wixii uu ahaa iyo sida aan ula socday sheekadiisa talaabo, talaabo iyo taako taakaba, nasiib darada jirtaa se waxay ahayd guriga iiguma jiro internet markaa waa inaan qaado qoraalka oo aan ka diro gooabaha lagaga ganacsado internetka. habeenkii ayaa noqday goor dambe waxaanan gartay inaan u diro bari subaxda sidiibaan ku seexday habeenimadkii. Subeeroow waxaan kuu sheegayaa in shayga jacaylka la yidhaahdaa yahay shay cajiib ah oo aanad adigu si yar u dafiri karin ama si dhib yar u dhaafi karin isagana indho tiri karin ee uu isagu yahay ka ku hogaaminaya, waagii markii uu baryay halkii aan ka qaadi lahaa warqada, waxaan arkay hal sawir oo uu leeyahay oo ii soo diray mudadii ugu horaysay ee uu baxay, waxaan xusuustay wanaag faro badan iyo jacaylkayagii, waxay igu kaliftay inaan ka joogo oo aanan dirin warqadii balse markii dambe waxaan soo qaaday cajaladii ay ku jirtay qoraalku waxaanan la soo aaday ama ula soo baqoolay halkii aan ka diri lahaa, sidiibaan ku diray wakhtiga aan dirayo waxaan isku arkaa inaan ahay dambiile marna waxaan dareemayaa inaan saxsanahay oo labada dhexdooda ayaan ku jiraa.

Halkaa marka ay marinayso ayaa inankii ay ka dalbadeen cashada uu u keenay, waxaanay yar gooyeen ama hakaday hadalkii taxanaha ahaa ee u socday isla markaana waxoogaa qaadqaadasho ah kadib Subeer kama uu daynin su'aashii waayo isaga laftirkiisa ayaa xiisaynaya halka uu ku dhamaanayo hadalkani waxaanuu yidhi "maxaa dhacay Hodan wixii intaa ka dambeeyay iyada oo markaa afka gacanta ku sii wada iyada oo qoslaysa ayay ku odhanaysaa "subeeroow, maad i yar daysid caawa oo dhanbaan kuu sheekaynayee oo waan daalanahay adna waan aamusnayn waxaanan jeclaa in aad adigu i bedesho hadaadse jeclaatay inaan sii wado", "way baxday warqadii oo waliba laba bogos oo uu lahaa labadaba waan ugu diray

waan an ogahay inuu isla aroorta ama wakhtigaasiba helayo waxaan u qoray xaalad kasta oo jirta si aanuu isku odhanin soo raali gali waxaan u raaciyay warqadii uu saaxibadii u dirayay ee ugu soo khaldantay aniga taas oo ahayd marag furka ama shayga kaliya ee aanuu dafiri karayn ama daah furayay shirqoolka dahsoon iyo booraanta uu ii qoday ee uu iigu talo galay inaan kasoo bixin waligay inta aan noolahay”.

Markii aan ka soo baxay goobtii ee aan dib ugu soo noqday guriga ayaa waxa igu soo dhacay telefoon, waa isagii waana maalintii saddexaad ee uu joogo magaalada, wuxuu doonayaa in uu ii sheego inaan u imaado oo aan is waraysano waxaan u sheegay inaan u iman doono balse inta aanan u iman uu akhriyo farriinta aan u dhigay ee aan bogoska ugu soo diray, wuu iga ogolaaday isaga oo dhawr goor isku dayay inuu I waydiiyo farrintaasi waxa ay ahayd balse waan iska diiday, waxa aanan iloobi karayn ninkaasi mar kaliya kamaan dareemin hadal qalooc ku jiro mar walbana wuxuu igula hadlayay farxad tii ugu dambaysay oo waxaad moodaysay inuu damaashaad aroos durduuranayo oo wakhti kasta afkiisa waxaa ka soo baxayay erayo naxariis badan oo ah kuwa naftayda ka dhigay inuu noqdo jidhkaygu inuu sida shabaga u daldaloolo, Subeeroow waayaha ninkaasi isoo mariyay haddii aan kuu sii wado wuu akhristay warqadii waxaanuu isku dayay inuu iga qanciyo hase ahaatee wakhtihgan diyaarba umaan ahayn xataa inaan salaan ka qaado waayo hore ayaan u go’aansaday una ogaaday waxa uu yahay, muddo markii uu joogay Mustafe wuxuu isku dayay inuu guursado gabadhii Ayaan wakhtigii lagu jiray diyaarinta meherka ayuu xanuunsaday haddana isaga oo xanuunsanaya ayaa loo meheriyay inantii, xanuunkaasi oo ahaa mid xaga maskaxda ah oo wakhtigaasi si kusoo booto ah ugu yimid dadab galkii ugu horeeyay Ayaan way uuraysatay isagana waxa ku sii kordhay xanuunkii waxaana lagu xidhay guriga dhexdiisa Ayaana sidii ayay dib ugu noqotay gurigoodii markii ay halkaa maraysay arrintu way ka soo rayn wayday rajada Mustafe dhakhaatiir badan ayaana isku daba martay aakhirii waxay noqotay in loo diro debeda waxaana la geeyay dalka Ethiopia.

Akhristeyaal inta ay Hodan sheekada ka sheekaynayso waxbay cunaysaa inkasta oo aad garan karto qofka hadlaya ay yartahay cuntadiisu, dhinaca Subeer isagu inkasta oo uu qudhiisu layaab badan ka muujiyay arrinta mucjisada ah haddana kama fara madhna oo gacmaha ayuu kula jiraa saxniga ay cuntadu ugu jirto, Hodan iyada oo sii wada sheekadii ayaa waxay tidhi “markii uu muddo siddeed bilooda sii maqnaa Ayaan way umushay waxaana u dhashay wiil, caafimaadkeedu Ayaan ma xuma xaafada ay ka dhalatayna si wayn ayay ugu dadaaleen xaga kalena Mustafe reerka uu ka soo jeedaana hadba wixii ay karayaan ayay ugu keeni jireen guriga aniga qudhaydu waan u tagay dhawr goor oo waxaan u raacay gabadh ay saaxiibo ahaayeen oo aan anaguna saaxiib ahayn, haddaad aragto inanta Ayaan quruxdeeda, dabeecadeeda, qalbi wanaageeda, furfurnaanteeda iyo daacadnimadeeda, Subeeroow ma garan karo qof aan ku masali karo arrintaasi waxay u sahashay in Illaahay aanuu ku dhibin dhalmadii iyo haynta ilmihii yaraaba waxaanay si qurux badan u korsatay wiilkeedii.

halkaa marka ay marayso ayuu Subeer sheekadii qaatay waxaanuu ku yidhi “hore ayaa loo yidhi **dumar waa badhaadhaha, ragna waa bi’iisee nin afkiisu bayd adag kaga giijay boqonaha Alluunbaa ka bixiyee is banbaanin waydee**, xaaladaydu aniga Hodaneey halkaasay maraysaa kuma dambaabi karo oo ma odhan karo inanta Salma cid ayay la sheekaysataa oo ay kaaga baxaysaa, waxaanse aad ula yaabanahay is bedelkan xooga ah ee ku yimid, way fiican tahay nolosha marka uu qofku kula fahmayo ee tadawurka iyo horumarka aad samaynaysaan uu yahay mid labada dhinacba ka imanaya waase wax aad looga naxo haduu reerku dhinac ka dhisnaado dhanka kalena holac ka soo galo, maan siisteen adduunyadda ayaan qudha haday Salmi ii garaabi lahayd dhibaataada i haysata iyo heerka jacaylkeedu iga taagan yahay waxa kale oo iyaduna aad iigu mudan oo Hodaneey aan dhexdooda ku dhintay waad ogtahay oo reerka aan ka soo jeedo ma ogola Salma waxay ila doonayaan inaan gabadh kale guursado kol ay adigana ahaato iyadoo ay waxaas oo dhami jiraan, iyadoo mashquulkaa naftaydu ku jirto iyadoo ay yartahay inta aan si

wanaagsan u fekeraaba iyada oon xitaa iloobo inta badan inaan iska bedelo dharka aan xidhanahay oo dadku igula yaabaan ayaa haddana waxa aad iyo aad aan ula yaabahanay sida aanay mar kaliya gacalisadaydu u ogayn heerka iyo dhererka ama dhumucda jacaylkeedu uu jiifo jidhkayga waxay igula yaabaan, waxay igu canaantaan, waxay igu caayayaan iyo waxa la igula kaftamaaba soo ma ogid Hodaneey inay yihiin kalmado run ah oon qofna igu samaynin wax beena, waxaas oo dhana ay ii gaysatay midii aan la wadaagayay nolosha, midii aan ifka ugu jeclaa, taan hablahaba u daayay. Intaa kadib ayaa waxaau imanaya inankii Hudheelka dabadeed wuxuu odhanayaa “walaal raali ahaada, maan jeclayn inaan idinka soo dhex galo sheekada aad wadateen laakiin wakhti badan ayaanu idin siinay, huteelkuna mar hore ayuu rawaxay, iska dhamaysta waxaan idin sii siin doonaa muddo dambe oo labataan daqiiqo ah”.

Hodan iyo Subeer aad ayay ula yaabayaan, mid walibana wuxuu eegayaa goor sheegta uu xidhan yahay, waxaana tilmaamayaa kowdii habeenimo oo rubuc dhiman, dalku waa iska firii oo waynu ognahay nabadgelyadiisa, gaadhi ayay wataan oo ma lugaynayaan, jabku se wuxuu ka joogaa Hodan xiligan sida ay ugu garaaci lahayd reerkooda iyo halkii ay odhan lahayd waan ka imid, dhamayste cashadii laga soo bax hudheelkii intii lagu sii jiray jidka ayaa waxa la degay qorshe ah in uu Subeer yidhaahdo waxaan ka keenay xaflad iyada iyo Hana nasiib wanaag markii uu gurigii hor keenay waxa ka furay isla wiilkii ay walaalaha ahaayeen Hodan ee maalintii horena isku arkay inta uu soo dhaqaaqay sidii maalintii hore ayuu ku yidhi “walaal Subeer ma nabadbaa” wiilku dareenba ma qaadan xumaana kama filayo meesha waayo labada reer aad ayay isku dhex galeen habluhuna si xooga ayay saaxiibo u yihiin, Subeer maalintii hore isaga oo gaadhiga ku dhex jira ayuu salaamay wakhtigan se wuu ka soo daadagay gaadhiga waxaanuu ugu yimid dhulka isaga oo raali galinaya, muujinayana inuu kalgacal badan u qabo iyo qadarin, la is macasalaamee sidiibaana lagu kala hoyday, in yar markii aanuu sii socon ayuu soo garaac moobilkii Hodan markaasay ku tidhi “waxaad igu soo celisaa shan iyo toban daqiiqo kadib” muddada ay u

qabatayna waaba inta uu gaadhayay guriga gaydhka ayaa laga furay xaaji Dhamal oo aad uga welwelsanaa wiilkiisu waxa uu ku maqan yaha xiligan, ayaa waydiiyay waxa ku dhacay iyo meesha uu ka yimid wakhtigan.

Subeer aad ayuu u tixgeliyay aabihii isaga oo uu xishood badani ka muuqdo madaxana hoos u foorarinaya ayuu ku yidhi “aabo ma ilowsani, in la i sugayo oo reerku keligay ka fekerayaan aabo khalad ayaan galay inaan hore u sii sheego ayay ahayd wakhtiga aan imanayo hadda kadib u noqon maayo waanan kaa nixiyay ee aabo iska kay cafi”.

Xaaji Dhamal erayada naxariista leh ee xaqdhawrka waalidnimo ku dheehan yahay ee wiilkiisu ku yidhi aad ayuu ugu bogay, isaga oo qoslaya ayuu galay qolkiisii waxaanuu ku yidhi markii uu sii galayay “bal hablihiiniina eeg wakhtigaasay fadhiyeen daarada” dabadeed intuu u tagay hablahoodii ayuu la kaftamay waxaanuu

ku yidhi “walaal, waxaydaan idinku i raacinin ama meel aydaan ii dirin maan tagine waxaan is raacnay oon wakhtigaa la soo joogay Hodan haddaad been iga moodaysaana waatana la hadla intuu garaacay, markay qabatay ayuu ku yidhi “Hodaneey maxkamadbaan saaranahay reerkii oo dhamina banaanka ayay joogaan cida kaliya ee badbaadin kartaana waa adiga ee u sheeg waxa aan ku habsamay iyo hawsha aan hayay” intay aad u qososhay ayay ku tidhi “iigu dhiib Mun” waanay u sheegtay oo waxay ku tidhi “aniga iyo Subeer labadayaduba caawa waan is xaal waraysanaynay, manaanaan kala dhamaysan oo wali waxbaa iskugu kaaya dhiman”.

Muni inta ay qososhay ayay ku tidhi “waa khayr, hadduu xagaaga uun ku soo maqnaa” Hana ayaa kala booday telefoonka dabadeedna waxay ku tidhi “inankayaga habeen dambe hanooga yeedhanin, hana naga kaxaysanin, ma sidiinaad na moodaysaa inaanu leenahay inamo badan, marka aad u baahan tahay guriga ugu kaalay haddii kale inanyahay labadeena ayaa is rifi doona” intay aad u qososhay Hodan ayay ku tidhi “waayahay dumaashiye iska dhiib” Hana oon waxbaba qarinin ayaa tidhi “oo dumaashi bilaa gabaatiyi ma isagaa soconayaba” cabaarbay iska kaftameen hablihii

gurigoodiibay galeen isaguna wuxuu ku soo noqday qolkiisii hurdada laynka ayuuna ka garaacay Hodan halkii ayay uga bilowday sheekadii waxaanay tidhi “Mustafe sanad iyo laba bilood kadib ayaa la keenay magaalada isaga oo gacan naafo ka ah, xiskiisuna aanuu dhamayn laakiin sidii hore dhaama oo dadka soo gargaranaya Ayaana muddo markii ay sidii u joogtay ayay ka dalbatay in laga siiyo warqadeeda dabadeedna labadii reer aad ayay iskugu xumaadeen aakhiritaankiin Ayaan sidiibay ku qaadatay warqadeedii oo ay ku kala tageen labadoodii, Mustafe wuxuu sidii ahaadaba muddo dambe ayay u timid geeridii Alle oo maanta wuu inaga hooseeyaa Alle ha u naxariistee”.

Subeer waxa uu ku yidhi “shayga nabsiga la yidhaahdo ama naxdinta dumarka isha hablaha, hansiga gabdhaha ama laacdanka badan qofba sida uu u yaqaano haddii aanuu qofku ka waantoobin aakhirka waxa uu u dambarsadaa inuu sidaa u dambeeyo waayo Mustafe, Alle ha u naxariisto ee wuu heli karayay inuu ama adiga ku fasaxo ama iyada fasaxo Illaahayna casaa wajaluhu cidnaba kagama tago gef uu galay oo uma dhaafo ilaa inta uu ka toobad keenayo waana waxa aan ka baqanayo ee igu kalifay in adiga oo quruxdaa leh aan kuu quudhi waayo inaan kuu sheego ballan been ah sidaan hore u soo sheegnay Subeer xaga diinta aad ayuu u yaqaanaa waxaanuu ka mid yahay dhalinyarada faro ku tiriska ah ee ku wanaagsan tafsiirka Quraanka kana adag shantooda salaadood”. Hodan cabaar ayay aamusnaanaysaa waxaanay ku odhanaysaa “Subeeroow, caawa inbadan ayaynu wada hadalnay, waxaanay noloshayda u noqonaysaa taariikh, ma garanayo muddo haatan laga joogo ilaa afar sano oo dhadhaw ayaan habeen habeenada ka mid ah sidaa ula hadlay wiilkii aan kuu sheegayay ee imika inaga hooseeya Subeeroowna waxaan mar walba kugula talinayaa inaad ku taagnaato wadadaadaa oo aanad khiyaamaynin xataa haddii ay iyadu isku daydo inay ku khiyaamayso ahaw ka la dulmo, ahaw ka la dhibo, ahaw ka mar walba cawda, ahaw ka aan mar walba qofka kale ka cadhaysiin, noqo mid aan dadku ku tilmaamin laba wajiile xaafada aad ku nooshahay, magaalada aad joogto iyo dhalinyarada aad ku dhex jirtaaba

marka sheekadaada la hadal hayo waxaad tahay qof aan lahayn meel xun ama iin badan oo la sheego hase ahaatee dadku ma waayaan meel ay wax ka sheegeen iyaga ayaana cambaareeya oo qofka ku sheega ceebta, waxaana suurogal ah tiyoo lagaa gar daran yahay in haddana dhibta oo dhami adiga ku fuusho, waxaan kugula dardaarmayaa in aad adkaysato, xejisato, go'aankaa aad haysato".

Subeer "walaal Hodan waan ku daaliyay, hurdadiibaan kaa qaaday, marka hore waxaan kaa codsanayaa inaad i saamaxdo, mar labaadka waxaan ku waydiisanayaa inaanad dhib u arag mudada badan ee aad ila joogtay, mar saddexaadkana waxaan kaaga mahadcelinayaa sida aad u dheer tahay hablaha maanta jooga in aan anigu ogahay walow aanay dumarku isku qirin qofka wanaagiisa haddana walaashay Hana mar kasta oo ay ila hadlayso

Intaad ii qoslayseed

Oh, my darling, I love you

Hadba igu qaldaysaa

Aynigay I dhaafee

Waa waxa ilaaq dumar

Arooridan banaan iyo

Igu ooday buulkan

Adduun iiga foofine

Dumar lama amaanoo

Umalbuu ka qaadaa

Aadmigaan abaal celin

Asaraar u qaatee

Waxa aan adduunyadda

Intii aan is lahaa dhawr

Asaagay I dhaafshee

Hoos la iigu eegaa

Waa adi daraadaa

Ha ii iman orad, orad

Af macaana ha i odhan

Intii horaaban eedee

Heestan markan uu la hadlayo Hodan si naaqusa ayuu u dhagaysanayaa mana maqashiinayo iyada waana heesihii uu duubtay muddadan dambe ee dhibta ee dhool dhoolka ku riday Salmi, wuxuu ku odhanayaa Hodan “waxay i tidhaahdaa Hani ma jirto gabadh ka wanaagsan Hodan oo aad guursan lahayd, waxaan la yaabaa bay igu tidhi wali maan arag inantaas oo la hadlaysa wiil ama dariiq la maraysa, Hodaneey runtii waxaan ogaaday inay Hani tahay saaxiibadaada koowaad. Hodan inta ay aad u qososhay ayay ku tidhi “habeen wanaagsan waad mahadsan tahay, aniguna waan daalay waanan inoo wakhti dambe”, sidiibaa lagu kala seexanayaa maalintii labaad Salma oo suuqa joogta una soo doontay alaab hayadii ay u shaqaynaysay ayaa waxa ay arkaysaa Hodan oo ka talaabaysa wadada horena waa loo tusay Hodan oo waxa u tilmaantay gabadhii ay soo qaadeen Subeer iyo Hodan intii aanay wadadaba kaba wada dhamaan ayay u yeedhayaan Hodan waa war ma og oo waxba kama warqabto gaadhigan cad ee ku soo leexday gabadhaan cas iyo ninka la saaran ayuunbay arkaysaa yaabtay oo tidhi talow ma cid kale ayay ku moodayaan, dhaqaaqday oo haddana loo yeedh, Salma ayaa ka soo daadagtay gaadhiga waxaanay dhulka ugu timid Hodan marka aad da’ ahaan eegto Hodan iyo Salma, Salma ayaa wayn oo Hodan ayaa yar laakiin waynidu maaha da’da ee waa garaadka iyo maskaxda qofka Illaahay hadba inta uu ka siiyo, Salma ayaa bilowday hadalkii waxayna tidhi “sow ma tihid inanta la yidhaahdo Hodan” iyaduna waxay ugu jawaabtay “haa” markaas ayay mar labaad hadalkii bilowday Salmi oo ay ku tidhi “waxaan ahay qof si wayn kuu doonaya muddo badan ku raadinayay aragaaga ayaa ii dhinaa, maanta se waan ku arkay waxaanse u baahanahay in aynu ballano oo aynu isku nimaadno” Hodan!

Yaab ayaa uu Illaahay u keenay waxaanay ku tidhi “walaal, maxaad iiga baahnayd ee aad muddada iga raadinaysay ismaba naqaanee” dabadeed

Salma ayaa ku tidhi “hadaynaan is aqoon, waynu is baran doonaa ee ma taqaanaa wiilka la yidhaahdo Subeer” Hodan hadalka umay badin ee waxay ku tidhi “haa waan aqaanaa ee maxaad uga baahnayd” Salma way ilowsan tahay in meeshu dariiq tahay gaadhiga ay ka soo dagtayna daaqadiisu furan tahay waxa u muuqda oo kaliya muuqaalka Hodan oo ay ka dhex arkayso Subeer intaa kadib ayay Hodan odhanaysaa “walaal laba dumar ah ayaynu nahay meeshuna waa wado, hadalkuna in uu inaga taagtaagnaado maaha ee waxa aan kaa codsanayaa in aad si yar oo kooban iigu sheegto waxa aad iiga baahan tahay dabadeetana aan iska dhaqaaqo” iyada gabadhii Salma ahayd way is bedeshay waxaanay ku tidhi “waxaynaan u ballamaynbaa Illaahay keenaye maxaa lagaa siiyaa Subeer” haddana intii aanay jawaabin Hodan ayay ku tidhi “iga raali ahaw, maan doonayn inaan halkan kugu waydiiyo laakiinse arrinta aan kuu leeyahay oo dhami waa arrin khusaysa inankaa” Hodan waa qof daacad ah sidaan horebana u sheegnay iska degen oo aan ahayn qof u dhashay hadalka dhaadheer inta badana rag iyo dumar ka ay la hadlaysana hoos ayay uga foorarsataa mana jecla kalmadaha ka soo baxaya afkeeda in dadku ay maqlaan waxay ugu hal celinaysaa “walaaleey Subeer waan aqaanaa isaga oo kaliyana ma aqaanee ilaa xaafadooda oo dhan baan aqaanaa maxaadse iga waydiisay su’aashaa adiga ma Subeerbaa ku qaba mise bilaysbaad tahay” hadalkiibaa ka xumaaday Salmi way xanaaqday inankii dirawalka ahaa ayaa gaadhiga ka soo dagay iskuna dayay inuu dajiyo Salma”

Salmi waxay ku doodaysaa siday ii tidhaahdaa ma askariyadii Subeerbaad tahay mise wuu ku qabaa, Hodana waxa ay leedahay waligoodbay laba qof oo dhalinyaro ahi is baran jireene ee waa maxay gabadhani waxa ay iga doonaysaa su’aalbay i waydiisay waanan uga jawaabay waxaan filayay inay iska dhaqaaqdo hada se waxa ii muuqda in wixii wax ka wayni meesha ka socdaan, hada ogowoo Hodan ilaa wakhtigan may waydiinin qofka ay tahay iyo magaceeda waxayse dareensan tahay inay tahay gabadhii uu uga sheekaynayay Subeer ixtiraam badan oo ay u hayso Subeer ayay u diidan tahay in uu hadalkoodu kor u baxo tan kale se ma oga. Intaasi markii ay

dhacday ayaa wiilkii dirawalka ahaa ku yidhi “walaal isaga oo la hadlaya Hodan, waxaan u malaynayaa in labadiina wax la idiin kala sheegay ma habboontahay in aad is dajisaan oo aad is qaboojisaan wakhtina ballantaan si aydaan isugu dhicin” Salma ayaa soo booday waxayna ku tidhi “noocan oo kale lama ballamo anigu, agjooga aan agjoogo ayaa ku khasaare ah” intaa markii ay tidhi Hodan wax dambe oo hadal ah may soo celinin laakiin xagii wadadu ka xigtay ayay isaga dhaqaaqday dibna umay soo eegin waxa isku soo hadhay wiilkii iyo Salma aad ayuu ula yaabay dirawalka dulqaadka inanta aanuu garanayn iyo gabadha sarkaalada u ah kibirkeeda wuxuuna hoosta ka yidhi “labadaaba Illaahaybaa wada samaystay” sidiibaanay Salmi xafiiskii ugu noqotay halka Hodana ay timid xaafadoodii, Hodan maaha qof gardaro badan oo dhacdha badan jecelna inay dadka gardaraysato dadka mar walba waase dadka aan laga gar bixin ee aan qaadanin gefka, muddadii ay dhexda soo socotayna ilmo ayaa ku taagnayd indhaheeda markii ay guriga soo gashay ayay oohin bilowday intay makhsinkeedii hoosta ka xidhatay waxay ku canaanaysaa nafteeda ma naagbaa maanta adiga oo magaalada dhex joogta kuugu hanjabtay oo waxay doonto intay kugu tidhi aad aayar uun iskaga soo dhaqaaqday haddana waxay eegaysaa wanaaga iyo sharafta u dhaxaysa iyada iyo Subeer waxay oydaba goor dambe ayay cadho burburtay waxayna la hadashay Subeer oo ay u sheegtay waxa ku dhacay iyo siday yeeshay,

Subeer kuma oga Salma salfudaydka intaa leeg iyo inay sida ciyaala suuqiinta intay wadada istaagto ku dhex caayayso gabadh aanay wax alaale iyo wax ka dhexeeyaa aanuu jirin. Subeer wuxuu ku yidhi Hodan “iska dulqaado imikana suuqa ayaan joogaa galabta ayaanan kula soo hadlayaa marka aan soo tooso adiguna wax dambe oo hadala yaanuu kaa gaadhin gabadhaa” Hodan waxay u sheegtay inaanay markeedii horeba la hadlin hadeerna diyaarba u ahayd, gurigiibuu ku soo noqday Subeer maydhasho iyo qado kadib wuxuu dul fadhiistay telefoonka si uu ula hadlo Salma inkastoo ballantoodu ahayd inaanuu la hadlin ilaa inta uu gabadhaa hor keenayo ee uu ku odhanayo waatan oo waxba nagama dhexeeyaan, garaac

telefoonkii way ka qabatay waxaanuu u waydiiyay halka ay joogto iyadoo is

diidsiinaysa ayay ku tidhi “waxaan joogaa xaafada” laakiin sidii ay awal hore ula hadli jirtay ulamay hadlin wuxuu ka codsaday maadaama oo uu moobilku lacag yahay inuu ka garaaco laynka oo ay ka qabato waanay ka ogolaatay markii uu bilaabay hadalka ayuu waydiiyay su’aashii u horaysay oo ah “ma dhacday arrinta sidaas ahi?” Salma wax kale kumay jawaabin waxaanay tidhi “way dhacday waanay dhacaysaa waligeedna way dhici doontaa waliba dhagarbaan gali doonaa haddii aanad adigu xaajada dhankaaga ka dhamayn”, Subeer yaab! Ayaa uu Illaahay u keenay wuxuuna ku yidhi “walaal, maxay tahay waxa idinka dhexeeya adiga iyo Hodan” waxaanay ugu jawaabtay “haddaanad is yeelyeelayn waad ogtahay oo waa adiga inta aan noolahayna ma ogolaan doono in gabadhi agtayda iyo dunida guudkeeda kula tallaabsato hadaad ka bixi waydo arrimaha aad ku jirtana adiga ayaa ka sheekayn doona” wakhtigan warku wuu dhaafay Hodan hanjabaadu xataa isagiibay saamaysay,

Subeer inkastoo uu markii hore cadhaysnaa haddana markii dambe markuu ogaaday waxay waxan oo dhan u samaynaysaa inay tahay jacayl ay u qabto ayuu ku odhanayaa “waxa ayaan darro ah, ceeb waxa inoogu filan, dadku inagula yaabayaan, cid waliba ku sheekaysanaysaa in maanta sheekadeenu magaalada si xun u dhex qaaday isla markaana markay xaaladuhu halkaa marayaan waxa haboon in la dajiyo arrimaha wax walbana loo qaado sidii ay ku dhamaanayaan, midi waa mida horee marna kaama filayn arrimaha aad ku kacday midna waa ta labaade mar hadaad i nacday oo aad igu tidhi iga tag maxaa kuu geeyay gabadha islaameed, ayaan darrada inteeda leeg, foolxumada joogtada ah ceebta aan kaa hadhayn, taariikh xumada miyaanad midnaba ka yikhyikhsoonayn, Salmaay run ayaan kuu sheegay waad iga qaadan wayday halkii uunbaanan anigu taaganahay laakiin uma dul qaadanayo inaad inantaa mar labaad ku gefto oo aad aflagaado iyo cay suuqa ula istaagto, way awoodi karaysay inay waxay doonto ku tidhaahdo, laakiin sida la ii sheegay way kaa roonaatay, mutacalimad baad tahay

wadan shisheeye ayaad in badan ku noolayd, dhaqanka iyo nolosha ayaad garanaysaa, jacaylka, rabitaanka, doonitaanka, damaca iyo si kasta oo la isku raadsado adaa uga dhaw Hodan waase nasiib darro inaad ku kacdo fal aanay ku kicin hablaha yaryar ee da'doodu ay ka hoosayso shan iyo toba, jirka", ma hadlayso inta uu hadalka wado, si fiican ayayna u dhegaysanaysaa waxaanuu odhanayaa "garaadka, aqoonta, ilbaxnimada iyo tadawurku waa in ay waxyaabo badan ku dhaafiyaan, waa inaad ka horayn kartaa qof aan gaadhin isagu heerkaa, hadaadse adigu sidan noqoto maxaan kula hadlaa hablaha kale ee Waayo aragnimo, ilbaxnimo dumarnimo ama reernimo aan soo marin,

Salma in badan markii ay aamusnayd ogaatayna inay aad u khaldan tahay ayay ku tidhi "horta marka si loo eego waa khalad inaan gabadhaa doontaa, dhanka kale marka aan ka eego se uma arko anigu dambi aan galay" waxaad moodaa wakhtigaa inay ka soo daadagtay arrinkii kululaa, cadhadii iyo ciilkii ay u qabtay Subeer iyo Hodan oo ay garawsatay inay gef samaysay, Salma marnaba afkeeda kamay odhan raali galin baan bixinayaa laakiin waxay ku celcelinaysaa gabadhaasi haday nolosheeda doonayso waa inayna kuu iman, Subeer adduunyadu dhib badanaa aadmigu noocyo badanaa wakhtigani xusuus iyo xanuun iyo kul badanaa maalinba maalinbaad moodaa inay sii eryayso uma arkaysanayo inay suuqa ii soo gasho laba dumar ah ayaa isku kaa haysta maantana adigaa gar daran waxaan ku cafiyo ama aan inantii ku raali galiyana imaad tusin oo waxaad wali la soo taagan tahay inaad waxyeelo u gaysan doonto arrimahaasina maaha kuwo dhaqan, hido iyo isir aynu u leenahay anigu cidna kulama jecli shaydaanka iska naar dadka iska daa waxan kuu khaakhaayiraya ee kolba dhinac iska kaa tusaya kuguna leh ninkii Subeer naag kale ayuu raacay ka bax ku feker sidii aynu u noqon lahayn reer dhisma anigu talada aan ku siinayaa waa midaa tu kalena ogow waxaan maqlayay in aad u baxayso safar debeda ah mudaduu qaadanayana ma garan karayo markaa siday kula tahay inaynu hawlaheena u socodsiino". Salmi inay cabaar ku

qososhay ayay ku tidhi sideed ku soo ogaatay safarkayga iyo afaarahayga ismaan lahayn

Subeerbaa hawl aad leedahay ama wax aad ku sugan tahay ka daba iman doona waa runtaa oo waxaan tagayaa bisha soo socota shan iyo tobankeeda waxaanan maqnaanayaa sideed bilood oo aan soo qaadnayno Public administration waxaana laga yaabaa in bishan aynu ku jirno la diyaariyo safarkayaga maadaama ay bishu tahay dabayaaqo” Subeer “oo Salma sahal weeye adduunyadu qofka aan samrina wax waliba wuu soo maraa sawmaad ogayn inaan adiga ku sugayay, sawmaad ogayn sawdka aad tidhaahdo inuu sad ii ahaa, sawmaad ogayn su’aal kasta oo aad i waydiiso sida aan kaaga qancin jiray mase halmaamsan tahay wanaagii iyo wixii aan soo qabtay oo dhan walaal ma garan karo waxaan kugu masaalo halkaad igaga taalo iyo halka aad is dhigtay aadbay u kala durugsan yihiin xiligan aan joogana waxay dantu igu khasbaysaa inaan raadsado qof aan la qaybsan karayo nolosha intaydii horana aan ka soo qaado samir waxba igumaad samaynin waan fiicanahay, soo jeeda, caafimaad qaba, cunayaa, cabayaa walibana cararayaa cid kastana ha tidhaahdo maxaa ku dhacay jacaylkii dhexdeena waxaanse kuu sheegayaa waxaanan waligay kuu sheegin kaasoo ah in laga bilaabo caawa aan ka noqday ama aan joojiyay sii waditaankii jacaylkeena aniga oo eegaya jidka aadka u jiribka badan, jeexjeexyada iyo meelaha sida xun aynu u jibaaxayno hadhawna jahawareer inagaga imanayo adduunyadu maanta maaha barina maaha intii bilis xaawalay xanaanayn jiray intii inan la xurmayn jiray, intii jacayl la adkaynayay intii culays qof u adkaysan karayay waxaan u malaynayaa inaan dusha u soo ritay maantana xaaladu waxay igu maraysaa wax aanan yeeli karayn markaa walaal Salmaay iska jooji sidaana igaga raali noqo”,

Salma waxay hadal ku bilowday “waxaan hore u ogaa ayuunbaad hadeer ii sheegtay waa la ii sheegay ama waan garanayay soo noqodkayga inaad qalbiga ii dhisaysay daahna igamuu saarnayn in aanad marna gabadh carmal ah guursanayn hase ahaatee markii hore waxaad ahayd inan

wanaagsan, qalbi fiican, qurux badan, qaaliya oo qof lagu doorsadaa jirin masiibadu waxay tahay ama murugadu timid markaan ogaaday inaad tahay laba wajiile aan hadalkiisu marnaba weecad galayn dareenkayguna wuxuu i siinayay mar walba sidii aan kuu soo jiidi lahaa wayse igu adkaatay waa la iga guulaystay waanan ku khasaaray anigu muddadii ugu dambaysay inaan si wanaagsan kuu salaamo mooyaane wax niyada kuumaan haynin hadaan kuu hayana ma tageen safarka sideeda bilooda ee waxaan ku odhan lahaa ka hor aynu aqal galno, Subeeroow maan kugu ogayn kuguna baran sida dadka qaar laba wajiilaynta shaw meeshay ka timidba ama cida ay ka soo bilaabantayba waa adiga u tudh hablihiina waxaan uga socdaa hansi gabadheed sida aad hore u sheegtay hawl aad u yar maaha halka aad maanta maraysaana waa halkii dadku isku dili jireen dhicise mayso inaynu is dilno aniga iyo gabadha kale waxaanse ballan ku qaadayaa inaan faraha kaa qaado oo aan kuu daayo qofka aad jeceshahay mar haddii xaalkaagu taagan yahay waxaad tahay ciyaala suuqad” Subeer intuu xoogaa qosol dhoole cadayn ah sameeyay ayuu ugu hal celiyay “waxa aad dambi i saarayso haddaan in uun kaga jiro wuxuunbay noqon lahayd inanta aad ii tuhmaydana waxaan dhaar kuugu marayaa in aan wax naga dhexeeyaa aanuu jirin laakiin hada aan iyada iyo qaar kale oo badanba u bilaabi doono una furayo qalbigayga Illaahaybaana og cidii ku guulaysan lahayd hanashada iyo kasbashada noloshayda, Salma ismaan lahayn xaalaadka noocaas ah adigaa kaga tagi mooyaane iyadaa kugu eedayn doonta waase wax soo baxayoo inaan ana sii murmo oon maan samayn iyo maan samayn isku celcelino waxay inagu tahay ceeb waan qaatay Hodana laga bilaabo imika igu ogow inay buuxisay booskii adigu aad banaysay waayo waxa la yidhi **qofkii samraa sadkiibuu helaa** waxaanan ku xaqiiqsanaya inantaasi inta jeer ee ay igu tidhi walaal iyada oo aanay waxba inaga dhaxayn ayay dadku u haystaan inaan ku jecelahay ama aad i jeceshahay waxa kuu wanaagsanayd inaad u tagto Hodan oo aad lacag ka qaadata ama aad ka iibiso jacaylka kulana baayactanto qiime kasta waxaad ogaan lahayd heerka ay iga taagan tahay iyo waxa aan anigu ugu jawaabay laakiin qofna calaf aan loo qorin cunaha ma mariyo ku daysayaa iyo ku doonatayaaba

Hodan waxay noqonaysaa xaaskayga” Salma way is hayn kari la’dahay waxaanay ay hubanaysaa hadaladii hore ee ay tidhi ilmo ayaa indhaheeda ka da’aya oohin ayaanay hadli karayn cabudh iyo naqaska oo qabtay ayaa iskugu darsamay Subeerse hadduu awal u nixi jiray oo uu ka damqan jiray madax xanuunkeeda wakhtigan wuxuu ku yidhi “telefanka iska dhig, iskana seexo hana inoo ahaato wahti aanad ooyayn waayo ma dhagaysan karo oohin aanan anigu eedeeda lahayn isasoo canaano muraayada isla tag isu soo sheeg qofka aad tahay kadibna ii kaalay adiga oo is og saxaaga iyo khaladkaaga” isagoo la hadlaya ayaa telefoon soo dhacayaa waana Hodan qofka soo hadlaysaa kama qarinayo ee wuxuu ku odhanayaa

“Hodaneey khadka waxaa ku jirta Salma arrinkaagiibaananu ka wada hadlaynay iska raali noqo xaalna qaado dhiban ha u arkin gabadhaasina way ku raali galisay adigana walaaltinimadii inaga dhaxaysay waa sideedii arrin yar oo soo korodhayna aniga ayaa kuu sheegi doona mar dambe ayaynu telefoon ka soo wada hadli doonaa imika aan u dhameeyo Salma waxay iga doonayso inkasta oo aanay walaal wanaagsanayn inaan kugu dhigo telefoonka ama aan cid kaa horaysiiyo haddana wakhtiga ayaa i culaysinaya igana raali ahaw” Hodan waa qof aad u dulqaad badan waxayna odhanaysaa “walaal waad mahadsan tahay iguna salaam Salma una sheeg inaan wax xumaana u qabin” Salmi way maqlaysaa hadaladan la is waydaarsanayo waxay miciinsatay oo kaliya oohin iyo naqaskii oo ku xidhmay markay dhigtay Hodan telefankii ayay ku odhanaysaa Salmi “waxaan doonayaa in aan wax ku waydiisto ee ma iga raali noqonaysaa oo ma ii ogolaanaysaa” isaga oo aan u jawaabin ayaa aabihii soo galayaa qolka waxaanuu ku odhanayaa waan kuu bahanahay ee debeda u soo bax dabadeedna intuu telefoonka soo qaado ayuu ku odhanayaa Salmayaa heestan aan maalin dhawayd soo duubay inkastoo ay wax badani is bedeleen iska sii dhagayso inta aan la hadlayo aabo. Waxaanay ahayd

Hadba waxaad ku nooshahay iyo

Waayahaagu sida uu yahay

Waan jeclaa inaan helo

Wakhtigii la joogaba

Wayse noqon waydoo

Waayadan kumaan arag

Wadadiina sooma marin

Inkastoonan waayadan

Wajigaaga imanoo

Wadadiina soo marin

Waligay kamaad gu'in

Wadnaha jidhkayga oo

Sibaad iigu wayntahay

Inkastoo warkayguba

Waabay qadhaadh iyo

Warmo kaaga daran yahay

Waxase filan waaya

Hadda anigu wacaneey

Weedhaada kama tago

Ilamaa wardheer iyo

Kii wabi ka soo gala

Ama badaha waawayn

Adaan kaa waraystaa

Inaan wali ku jecelahay

Dadkaba qaar

Inta waqalka

caashaqu Waagii iyo

habeenkii

Wadnahayga kamuu

gu'in Ee aad wardiga

iyo

Sida wardiga duuliyo

Adduunyaa wareegiyo

Ifka waxa ku nool

Adaan kaa waraystaa

Ee markaad wada jirkeenii

Iyo weheshi diidaan

Ana kali u weecdoo

Usiisi baan ku maqanahay

Hadalada Subeer ee tooska ahba waxa kaga daran heestan uu u saaray ee aad moodo in iyada ay ka sheekaynayso way iska dhagaysatay iyada oo la yaaban sida wax waliba dhinaceeda ugu soo foorarasadeen rikoodhku wuu is bakhtiiyay iyaduna telefoonkii may dhigine sidii ayuunbay dhagta ugu haysay markii uu cabaar maqnaa ayuu soo noqday oo uu u sheegay kana raali galiyay hawsha uu ku maqnaa, Salma wakhtigan way ku cadahay haddii la sarana dhiig kama imanayo isaguna ma oga inay heestan sii dhagaysatay oo uu wixiiba kala tuuray wuu yaaban yahay arrintii waxay sidii ahaataba Salmi waxay ku adkaysanaysaa inay kulmaan oo ay wax is waydiiyaan Subeerna wuxuu leeyahay way dhamaatay waxa aynu is waydiinaa markaa uma baahni in aynu kulano ee aynu sidaa isku dayno, Salma may baryin Subeer umanay baranin inuu hadal ku soo celiyo inkastoo ay ixtiraami jirtay haddana marka ay tidhaahdo waxaa samee sideeda ayuu u soo qaban jiray dhacday oo haddii awal hore aan la diidi jirin maantaba lagu celin hadalkii waa iska xaal adduun adoo shalay wacnaabaa maantana waayuhu ku wareejiyaayoo weecataa oo aad waydaarataa wax kasta oo wanaag ah calaagal iyo cataab wuu ka dhamaaday yaase u joojinaya yaa maqlaya yaa dhego u leh yay u dhigatay abaal maxaa la odhan doonaa maxaase lagula hadlayaa Salma hadalku wuxuu ku soo ururay “walaal markaas oo kaliya aan kulano waxaad doonto aynu is nidhaahno ha iga diidin haddaan anigu dambiile noqday adiguna ha ila noqonin”

Subeer aad ayuu uga dhego adaygay waxaanuu ku celceliyay inaanuu diyaar u ahayn kulankeeda raalina ka ahayn hadalkeeda ee ay iska dhigto telefoonka yaase ku dhigi kara qof kula hadlaya oo mar ooyaya mar qoslaya mar tawaawacaya marna kaftamaya talaa ku cadaatay waxay qasab ku noqotay Subeer inuu ogolaado ballanta oo uu u oofiyo isaga oo aan laakiin tusayn waji farxadi ka muuqato sidiibaana la isku afgartay telefoonadiina waa la kala dhigay. Salmi wakhtigan oo ah fiid waxay doonaysaa inay ku noqoto inan ay ballansanaayeen dabadeedna gaadhi yar oo ay maalmahaa iibsatay ayay la soo baxaysaa nasiib wanaag waxay dhexda ka soo qaadaysaa inan jaarkooda ah oo isaguna u sii socda dhinaca ay u sii jeedo waxa wax walba ka sii daran Subeerna wakhtigiibuu soo baxay isaguna wadada ayuu xaga kale kaga yimid toban daqiiqo in kayar ayay labadii gaadhi soo istaageen meel inshaaro ah midba dhinac Subeer wuu arkaa gaadhiga Salma inay iyadii wadatana wuu arkayaa nin inuu la saaran yahayna wuu u jeedaa Salmi laakiinse ma aragto gaadhiga Subeer iyo isaga toona waxaanay ku mashquulsan tahay dhagaysiga heeso iyo inanka oo uga sheekaynaya xaalada waddanka si aada ayay u qoslaysaa way timo qaawan tahay foodad yar oo khafiifana garbaha ayay u saaran tahay muraayad yar oo cad ayay xidhan tahay si qurux badan away u labisan tahay timahana xaga dambe ayay biin kaga xidhay isla markaa gaadhiga ay wadataa beersoolbaa ku xidhan laakiin qofka ka hor yimaada ee u fiirsadaa wuu arkayaa,

Subeer in badanbay taagnaayeen meesha si fiicana wuu uga bogtay waayo wuxuu la yaaban yahay gabadha caawa oo dhan ooyaysay siday u bedelatay ninkay la socotay iyo wakhtiga ay suuqa ku sii jeedo aadbuu ula fajacay Subeerbaa hor dhaqaaqay dabadeed wuxuu soo istaagay xageeda dambe si uu u daba galo ilaa bal halka ay ku socoto waxa isku hagaagaya inanku guriga uu tagayaa maba aha mid aad u sii durugsan oo muddoo toban daqiiqo ah ayaa lagu gaadhayaa laakiin Salma maadaama oo ay durugsan tahay meesha ay tagaysaa aadna u madow tahay lagana yaabo in dhexda laga helo ayay ka codsanaysaa Guuleed inuu raaco oo uu la soo

noqdo marka hore wuu ka diidayaa hase ahaatee marka dambe wuu ogolaanaya isaga oo waliba u sheegaya inuu ballan lahaa haddana markay inanta walaasheed ahi wuu ogolaaday gurigiibaa la soo gaadhay Subeer meel dheer ayuu u jiraa gaadhigana si aayara ayuu u wadaa waxa luuq la soo maraba waxa wado la soo wareegaba la yimid gurigii hoontiibaa lagu garaacay guriga waa ganjeel albaabka ayaa laga furay Salma ayaa daadagtay cabaarbay gudaha gashay shaw inantiibaa ku tidhi yaa kula socda waxayna u sheegtay in uu wiil gaadhiga ku jiro gabadhu waxay ku qabsatay Salma maxaad ugaga timid inanka gaadhiga u yeedh sharaab ha cabo oo soo fadhiisi Salmi inay dib u soo noqotay oy waliba ka soo wareegtay daaqada Guuleed ayay furaysaa una sheegaysaa inuu soo daadago Subeer markan wuu ku soo dhawaaday oo meel waxoogaa u jirta ayuu taagan yahay wax kasta oo dhacayana wuu arkaa ayaan darradu se waxay tahay wuxuu u haysto inay dhacayaan iyo hawsha meesha ka socota ayaan is lahayn durba hinaase ayaa galay is yidhi shaw ninkanay kugu dul wadatay markhaati ma doon ayuu ka dhigtay is qanci oo is yidhi caawa ayuunbay wixii oo dhami kuu kala cadaadeen.

Salma iyo Guuleed muddo soddon daqiiqadood ah ayay ku jireen guriga kadibna way ka soo baxeen iyagoo iska faraxsan oo ka sheekaysanaya sida ay inantu u soo dhawaysay ayuu qof waliba dhankiisa ka galayaa albaabka gaadhiga soo dhaqaaqeen oo halkii ay markii hore ka yimaadeen ayay dib ugu soo laabteen inankii Subeerna meeshii madoobayd ka soo bax soona daba gal ileen shakigu waa balee wuxuu is moodsiyay in wixii hawl ahaydba la soo fushaday wuu iska soo daba socday Salmi inankii waxay dhigtay meeshii uu ku socday ta ka sii daran ee uu aadka uga sii masayray waxay ahayd Salma inantu waxay soo siisay bac ay ku jiraan Jukulayd iyo alaabooyin yaryar oo ah bacahan debeda laga keeno iyaduna markuu daadagay Guuleed ayay u yeedhay waxayna ku tidhi maadaama oo aan saaxibadaa kaa habsaamiyay hoo hadiyadan u gee oo kaga farxi wuu soo wareegay bacdiina wuu ka qaatay taasina waxay u sii marag furtay Subeer oo markiisii horeba shakisanayaa in wax jiraan Iska socotay Salmi

Guuleedna halkiisii ayuu ballantiisii ka tagay oo isagu nin wax kale u jeed ah muu ahayn haddaba maxaa ku dhacay Subeer, Subeer cir iyo dhulba wuu xamili waayay gaadhiga meelbuu jiidhsiin gaadhay qof kasta oo ka soo horbaxa way is laynayeen inamadii dhalinyarada ahaa ee uu la fadhiisan jiray maqaaxida inta fiidka hore oo qosqoslaya ayuu u yimid gooni ayuu uga fadhiistay koob shaaha ayuu dalbaday la yaab, lana ogaa in wax ku soo kordheen la se garan halka ay wax ka imaadeen, waxay sidii ahaataba intaa uu meesha fadhiyo waxa aad moodaa Subeer inuu xisaabinayo adduunyo dhan hoos buu iskula sheekaysanayaa dadkan hareerihisa fadhiyana maba arkayo oo waxay u yihiin cid aanuu garanayn goor dambe ayaa wiil ay saaxiib yihiin u yimid oo uu ku yidhi "waar Subeer caawa sideed tahay" inanka waxa la yidhaahdaa Salaan wuxuuna ugu jawaabay "Salaanoow arrini way igu qasan tahay garana maayo wax aan yeelo," inta badana qofka marka arrimahan oo kale la soo darsaan wuxuu jecelyahay inuu helo cid uu iskaga baabiiyo fekerka ama ka baajisa dhibaataada uu naftiisa gaadhsiiyo

Salaan waa nin aad u caqli badan in badan ay saaxiib ahaayeen meelna wada degen yihiin wuxuu ku odhanayaa Subeer "saaxiib xaaladaadu ma fiicna waanan ku arkayaa oo waxa aad u baahan tahay inaynu wada hadalno markaa siday kula tahay hadaynu is raacno oo aan ka kacno meeshan" Subeer waa intii uu doonayay waanuu ka ogolaaday gaadhiga shidaal badan baa ugu jira waxay qaadeen jidka dheer ee magaalada uga baxa bariga mudadii uu sii socdayna wuxuu uga sheekeeyay Subeer in ay Salmi samaysay dhibaataada caynkaas ah, soddonkii daqiiqo ee ay Haleeyo gaadhayeen ayuu u dhameeyay dhibka ay ku haysay iyo ta caawa uu la kulmay, Salaan si fiican buu u dhagaysanayaa waanuu arkaa in saaxiibkii hawada ka baxsan yahay waxa kaliya ee u furana uu yahay sidii uu dib ugu soo celin lahaa ama uu noloshiisa u badbaadin lahaa markii la gaadhay Haleeya ayuu ku yidhi "Subeeroow inoo jooji gaadhiga kana soo dag" sidiiibuu Subeer yeelay maqaaxi ku taala meesha ayay ka qaateen laba kursi waxaanay la tageen oo ay kala soo fogaadeen meeshii ay dadku fadhiyeen,

Salaanbaa hadalkii bilaabay waxa uu ku yidhi “horta Subeeroow arrimahani laba uun bay noqdaan waa mida koowaade inay gabadhani tahay gabadh waxan caado u leh oo aan cidna u joojin ciday doontana raacda sida lagu helayaana ay fududahay iyo in gabadhaasi ay daacad ahayd oo aanuu jirin wax xidhiidh ah oo ka dhexeeyay iyada iyo wiilka wakhtigaa ay is raaceen”,

Subeer kama daadagayso waa daacad waayo hore ayaa loo yidhi **nin meeli u caddahay meeli ka madaw** waxaanuu kula soo booday “Salaanoow saaxiib waxaan kugu nacay beerjileeca iyo sida xun ee aad gabadhaa ugu dabgayso iyadoo wax naga dhexeeyaa aanuu jirin maxaa kuu diiday in arrintan sida aan u arkayo aad u aragto ma naagta ninka raacday ee guriga la gashay ee kala soo baxday ee waliba hadiyada siisay ayaad i leedahay waa daacad walaal Salaanoow sharafteena maaha maanta inaan gabadhaas oo kale wax na dhex maraan”, Salaan kamuu hadhin hadalkii wuxuu ku yidhi “waxaan la hurayn horaa loo yeelaa hadaad kala hadhaysaan adiga iyo Salmi mar hore ayaad kala hadhi lahaydeen hadaladan oo dhana waxa kaa yeedhsiinayaa waa jacaylkeeda waxa ku hayaana waa hinaase sidaad hore iigu sheegtay iyadana hinaasahaas oo kale ayaa haya markaa miyaydaan u baahnayn in la isku kiin soo dhaweeyo oo la iskiin fahansiyo mise waxaad leedahay maba khaldamo iyaduna way u kasaysaa khaladka”,

Subeer wuxuu cadhoodaba candhuuftaa ku dhegan iyadoo ay qabaw tahay haddana wuu dhidid san yahay shaadhka baldhamaduu furtay in yar marka uu joogaba timaha ayuu faraha galinayaa isaga gadh yar oo uu lahaa wuu rifay sidii uu kolba isaga oo aan is ogayn in u goynayay, Salaan wuxuu ku daalay waano wuxuu uga sheekeeyay dhibaatooyinka uu keeno hinaasuhu iyo inuu xitaa sababo in ninku gabadhiisa dilo ama gabadhu ninkeeda qudha ka jarto iyaga oo aan waxba samaynayn midna qabso oo haddaanad maanta Salma jeclayn toban nin haday raacdo waxba umaad aragteen ee jabku wuxuu ka imanayaa waa jacaylka idin dhex yaala waxaan kugula talinayaa walaal anigaa daba galaya arrintan Salmi si fiican bay ii taqaanaa waxa jira oo dhan anigaa soo ogaanaya adiguna is daji inta aan kuu keenayo war buuxa Subeeroow indhahaaga oo shan ah, adiga oo sidaa u

soo taagan ayaan iska kaxaysatay oo uu guursaday Salma walina sidiibaad u jeceshahay maxaa kalifay in aad ka shakido wiil ay raacday oo waliba aynaan hayn sababta ay isku raaceen, Salmi miyaanay ahayn gabadhii aad ku tidhi markay soo noqotay aniga wuxuunbaad ii tahay inantii aad markii hore ahayd iimana muuqato guurka lagu soo guursaday iyo hadalada la isla dhex marayaa waxaan kuu sheegayaa sidaad markii hore ninka waayeelka ah u ahayd ayaa hadeerna lagaa rabaa inaad u ahaato haddii kale wax waliba waxay isku rogi doonaan xaga xun” Subeer laydha qabowbaa ku dhacday daalkii faraha badnaana wuu ka yaraaday wixii uu cadho qabayna Salaan buu ku yidhi ugu dambayntiina wuxuu ka ogolaaday in uu soo ogaado oo uu war sax ah keeno sidiibaa lagu soo noqonayaa oo magaalada lagu soo galayaa la kala hoyay oo Salaan waxa uu geeyay gurigoodii markii uu yimid Subeer gurigooda ayaa Hana yar oo u sida cashadii u keentay wuxuu u sheegay inaanuu waxba cuni karayn caawa, Hana way yaabtay walaal maad xanuunsanaysaa, maxaa kugu soo dhacay, dawo ma kuu doonaa markaad naga tagtay waad faraxsanayd caawase wajigaagu ma qurux badna, ma cidbaad is disheen, Subeer waxa looga bartay in uu fiidkii markuu soo hoydo uu u sheekeeyo labadooda hablood iyo aabahood oo uu makhsinka fadhiga cabaar la soo joogo si ay iskaga xog waraystaan waayaha adduunka qof walbana laga dhagaysto wixii uu tabanayo habeenkani wuxuuse ahaa mid ka duwan kuwaa hore, Hani kasoo baxday gurigii isna intuu xidhay qolkii ayuu is duuduubay saacadu waa 10:30 habeenimo wuu galgashay hadba geesbuu isku rogay wax walba samee wuu gami’ waayay lama hadli karo Salma oo kuma odhan karo ninbaad sidatay oo waakii saaxiibkii uga digay gurigiibaa ku kululaaday sida qoladii muqayiliinta ahayd debeda ayuu u soo baxay goor ay ahayd kowdii habeenimo wakhtigaasi oday Dhamal ayaa maqlay shanqadha guriga wuxuuse markii hore u qaatay inuu galayo suuliga odayga ayaa isna in yar kadib tag is yidhi suuliga waxaanuu la kulmay wiilkiisii oo fadhiya daarada yaab oo fajac ayaa uu Illaahay u keenay kamanuu filayn inuu halkan ku arko la is bariidi markii hore wuu dhaafay odaygu soo noqodkii dambe ayuu waydiiyay waxa ku dhacay ee uu xiligan debeda la fadhiyo.

Subeer wuxuu u sheegay aabihii in caawa jawigu kulul yahay isla markaana uu gami' waayay odaygu waa nin waayeel ah sidaan horeba u soo sheegnayna la socda waayaha dhalinyarada ee wkahtigan kasii darrane wax ubad ah gaar ahaan wiilna kanoo kaliya ayuu dhalay wuxuu u ilaaliyaa si aad u adag oo uu is yidhaahdo yaanuu dareemin cadaadis, xumaan iyo wax uu karaahiyayso inta badana waxa uu u sameeyaa waxa uu jecel yahay, odaygii intuu soo qaatay kursi ayuu soo dhigtay

agtiisa waxaanuu ku yidhi "wiilkaygiyoow, miyay kula tahay in aan gam'ayo adiga oo debeda jooga ama aan hurdin aabo hore ayaa loo yidhi **nimaad dhashay kumuu dhalin** iima noqonayso ama ma ladayo hurdo inta aad adigu banaanka fadhido aabo meesha ka kac oo iska seexo waxaanad samaysaa waxyaabahan oo dhan wax kastaba ha noqdaane markay dhacdo waxa fiican in dulqaad iyo samir loo yeesho aabo dhalinyartu waa kula wada mid nin walbana intan ku haysata labanlaabkeed ayaa haysata hase ahaatee qof waliba wuu qarsanayaa mana haboona in lagu arko nin jilicsan waayo waxa aan ogahay waxaad ka soo gudubtay kugumana tirinayo nin aan adkaysi lahayn oo u dabacsan duruufaha dabiiciga ah laakiin aabo caawa waan naxay manay ahayn inaad iga nixiso naftaadana kaligaa ma lihid ee dhamaantayo ayaa kula leh inta aad iga qarin karto dhibta ku haysata aadba waa inaad iga qarisaa uma jeedo adiga oo wax u baahan inaad ii sheegan waydo taasi waa khalad laakiin mar walba waxaan jeclahay inaad farxad ku noolaato, qososho oo aad noqotana mid qayrkii in badan ka horeeya aabo goormaad sidan u soo dabacday, aabo ma jacaylkiibaa kaa soo dhaadhacay, aabo maxaan kuu qabtaa ee aan imika laga maarmi karayn ama aanay kaaga dambayn waxaan rabaa inaad ii sheegto go'aankaaga kama dambaysta ah oo ayna ku jirin inantii aan markii horeba isku diidnay"

odaygu intii hore oo dhan wuu fiicnaa Subeerna niyadiisu marba marka ka dambaysa ayay soo wanaagsanaanaysay laakiinse waxa mar kaliya qalbigiisa dab ka holcay markii uu yidhi kuma jirto inantii hore aynu iskula ogayn, taasoo Subeer ka dhigtay inuu iskala garan waayo aabihiina ku

yidhaahdo gabadhba uma baahni odaygii cabaarbuu u sii sheekeeyay dabadeed Subeer ayaa ka codsaday inuu iska hoydo isaguna hoydo si uu isaguna u seexdo sidiibayna u dhacday labadoodii qolbay kala galeen bal waakane haddana ninkan dhinac walba dhibaataadu kaga weegaarsan tahay muxuu sameeyaa dhinac Salma ma hayo oo waadiga arka waxa ka dhex socda, xaga kalena odaygu maba maqli karo magaca Salma arrintu waxay ku noqotay **ileen meel la ciirsadaana** Subeer goor dambe oo waa dhawaadkii ah ayuu gam'ay intii hore oo dhana wuu is rogrogayay aroortiina wuxuu soo kacay meelahaa tobankii oo wuu diiday hablihii guriga ku garaacay telefoonkiina wuu bakhtiistay si aanay cidina ula soo hadlin halklaa marka ay xaaladi marayso iyada wakhtigaa Salmi wax dhibi ma haystaan oo ma ogaba waxa dhacay waxaanay u diyaar garowsan tahay ballanta caawa ay ballansanaayeen dhibaataadii Subeer qabsatay iyo hawlaha dhacay oo dhanba ma oga, Subeer markii uu u soo baxay banaanka waxa uu yimid meheradoodii waxayna gaadhay wakhtul qadadii iska noqay oo iska seexay waxa la soo hadlay Salaan oo u sheegay inuu maanta tagay xafiiskii Salma nasiib darro aanuu la kulmay oo ay wakhtigaa ku maqnayd hawl dibadeed sidaa darteed wuu ka war sugay isaga, intaa markii ay is yidhaahdeen waxa soo dhex galaya telefoon kale waana Salma oo rabta inay la hadasho Subeer si ay u xusuusiso uguna adkayso ballanta,

Subeer si wanaagsan ayuu u salaamay uguna qaaday salaantii wixii ay waydiisayna wuu uga jawaabay todobada habeenimo iyo goob iyaga u cayinayd ayaa lagu ballamay way dhigtay telefoonkii Subeer wuu cadhaysan yahay hase ahaatee wuu qarsanayaa oo wuxuu diidanyahay in arrintiisu kala daadato. waxay sidii ahaataba afartii galabnimo ayay la soo hadlaysaa Hodan iyada oo ka waraysanaysa xaaladiisa iyo sida uu yahay, Subeer wakhtigan waxaad moodaa inuu u soo dabcay oo uu u hiloobayo una baahan yahay la hadalka Hodan, jeclaysanayana dhawaaqa ka soo baxaya cabaarbaa la kaftamay saacad ka dib waxa lagu ballamay in caawa meelahaa sagaalka ama tobanka markuu soo hoydo ay la soo hadasho ama isagu soo hadlo, sidiibay ku kala tageen saacadu waa shantii, Salmi

dhinaceedii ayay ka gashay diyaar garow maadaama ay in badan isku cadhaysnaayeen Subeer waxay doonaysaa sidii ay u soo jiidan lahayd markaa waxay soo qaadanaysaa sad isku eeg oo aad u qurux badan oo xataa timaheeda, lip istiigeeda, dharkeeda, kabaheeda, saacadeeda, boorsadeeda intuba way isku eeg yihiin waxaana lagu yaqaanaa labisaada caynkan ah badanaa dadka aadka u ilbaxa ah oo yaqaana sida shayadu iskugu soo baxaan. Subeer xiligaa si caadiya ayuu iskaga labistay wakhtigu wuu soo dhawaaday waxaana la soo gaadhay lixdii iyo badhkii intii uu soo socday ayay timid todobadii oo rubuc dhiman wuxuuna meeshii ugu yimid gaadhigii Salma oo meeshii yaala waxay iloobeen marka hore in labada gaadhi midkood laga tago oo mid uun la kaxaysto deetana Subeer soo daadag wuxuu u sheegay inay iska xarayso gaadhiga sidiibayna yeeshay waxa la kaxaystay kii Subeer huteelku ma foga inyar kadiba waa la gaadhay waxa ballanta qabatay Salma xitaa waxay sii ballamisay cashada iyo goobta ay fadhiisanayaan la soo gal waxa loo soo hor mariyay cabitaankii cabaarbay iska sheekaysanayeen intii aan cashada loo keenin, Subeer inta badan wuu aamusan yahay waxaanuu sugayaa bal waxa ay ku hadasho, Salmi hadalkiibay qaadatay waxayna tidhi "inanyahaw adduunyadan aad arkayso waxa la isku sameeyay lab iyo dhadig, waxaynu nahay kuwo aan kala maarmayn, hadaad mooday inaad iga tagi karayso ama aad u haysato inaan ku dafiri karayo, oo aan jacaylkaaga ilaawayo been ayaan u sheegayaa naftayda adiguna sidoo kale, Subeeroow waxaad ogsoonaataa in dhibta aad maanta igu haysato oo ah inanbaad suuq u istaagtay ay tahay marka hore mid ceeb inagu ah aniga iyo adiga iyo iyadaba, hase ahaatee ogsoonow inaanad dafiri karayn in jacaylku waxyaalo badan ku ilowsiin karo dareen faro badan kaa qaadayo, maan ogayn runtii wakhtigii aan la hadlayay inanta iyo xataa markii aan adiga kuu jawaabayay dib ayaan u xusuusanahay hadaladii aan idhi waanan garawsanahay khaladkii aan galay walow ay tahay wax aan filayay inaan sameeyay ama adiguba aad samayn lahayd, waxba maan samaynin gabadh ayaan ku idhi ninkayga iiga hadh, waad ii sheegtay inaan waxba idinka dhaxaynin waanse qaadan waayay, waxaan kuu sheegayaa oo aanan dafirsanayn, diidayn, qarinayn, una

arkayn dhibaato inaan ku caayo adiga iyo iyadaba aniga oo kuu caayaya kalgacayl iyo muxubo aan kuu qabo, hadaanan dan kaa lahayna iima suuro gasheen inaan la kulmo gabadha, inaan kula hadlo adiga, in aynu halkan iskugu nimaadno iyo inaan in badan dushaada ka ooyo toona, waan xusuusnahay waxaad igu tidhi **markaad wada jirkeenii iyo weheshi diidaan ana kali u weecdoo usiisibaan ku maqanahay** waa erayadii malaha maad ogayne cajaladii aad ii saartay markii aad aabo la hadlaysay, walaal maan diidin wada jirkeena, wada joogeena, weheshigeena iyo wax isku ahaanteena toona, ma aqaano oo qof aan adiga ahayn dibnaha uma kala furin aniga oo niyad u haya haddii aad i rumaysanayso waxaad tahay qofkii ugu horeeyay ee ii bilaaba sheekada ama baabka jacaylka waxaanad tahay kii iigu dambeeyay ee ilaa hada xiisadaa ii dhiga, walaal waad garan kari lahayd hadii aan macalimiin badan leeyahay, waad ogaan lahayd hadaan suuqa ku jiro waxaan u noolahay waa adiga inta ka hadhay noloshaydana uma baahni inaan cid kale la qaybsado, maalintii dhawayd ee aan ku lahaa waan kaa gooyay niyadayda iska daa goyne minit kama maqnaan kartid, wakhti walba waad ila joogtaa, wehel aan adiga ahayn ma lihi, walaal aan adiga ahayn ma lihi, eeg meesha aad igaga tagayso dib u raac dhibta aan kuu soo marayo iga gooso, i dil oo waxaad doonto igu samee mid uun iga daa waan kaa tagayaa, taasoo igu ah kalmada aan ifka ugu necebahay walaal caawa waxaan ku tusayaa lix sanadood iyo shan bilood ka hor amaano aad ii dhiibtay waxaanan kaa codsanayaa in aad ii tixgeliso iina dambi dhaafto”,

markaa waxay soo saaraysaa silis dahab ah oo uu ku qoran yahay magaca Subeer oo ah kii uu u galiyay maalintii ay ka dhoogaysay madaarka Hargeisa wakhtigii uu kaxaysanayay ninkii loo guuriyay ee Mursal, intii ay soo noqotay may tusin Subeerna waxa caqligiisa galay markii ay ninkaa raacday kulana soo hadli wayday ayay tuurtay shoog ayuu ka qaaday aragtida siliskan oon wax iska bedelay jirin waxay ku tidhi “wakhti kasta oo aan kuu imanayo iyo mar kasta oon ka ahayn mudadii yarayd ee ninka kale aan la joogay wali jidhkayga kama furin sida siliskaasi iigu xidhan yahay

qoorta ayay naftayduna kuugu xidhan tahay haddii aad diidayso, haddii aad i dayriso iyo haddii aad dudmo igaga tagto intaba waxaan ahaan doonaa ama aan ahay qof u nool Subeer si kasta oo ay ahaato, wax kasta oo aad yeesho waxaan kaa codsanayaa oo aan mar labaad walaal ku leeyahay ii dambi dhaaf". Subeer aad ayuu u fekerayaa wuxuu la yaaban yahay hadalada Salma ee aan meel laga maraa jirin ficilkii habeenkii dhawayd uu arkayay, hadaladii ay hore ugu tidhi iyo waxyaalo badan oo kale ma gaadhi karo go'aan uu ku yidhaahdo iska tag mana yeeli kale mid kale oo uu ku yidhaahdo waan kaa ogolaaday ha dhagaysto hadalada dhiilada leh ee murugadu ku dheehan tahay ee ka soo yeedhaya afka Salma,

Subeer mar dambe ayuu ku odhanayaa "waxaan ku waydiiyay xalay saacadu markii ay ahayd lixdii iyo badhkii halkeed joogtay?" Salmi waxba kamay qarin waxay u sheegtay intii meelood ee ay soo martay waxay soo qabatay iyo wixii ay u baxday, wuxuu waydiiyay "yuu ahaa wiilkii aad la socotay?" iyada oo dareensan inuu arkay ayay ku odhanaysaa "Subeeroow inankaasi waxaynu nahay jaar dhexda ayaanan ka qaaday aniga ayaana ka codsaday inuu isii raaco ee isagu wuxuu doonayay inuu ku dago meel dhexe oo uu kula ballansanaa, sidii uu ii sheegay gabadh ay wada sheekaystaan balse goobta aan tagayo oo aad u durugsan awgeed ayaan ka codsaday inuu i raaco oo uu ila soo noqdo waanuu iga yeelay iyada oo ay dhibaato ku ahayd," halkaa marka ay marayso ayuu ku yidhi "waayahaye waydinkii guriga wada galay hadaad inanka dhexda ka sii qaaday muxuu gaadhiga ugu dhex jiri waayay" wasxay ku qancisay "in inantii guriga lahayd ay ku adkaysatay inuu soo daadago wiilku maadaama ay ceeb tahay qof la socda qof in meel banaan ah lagaga yimaadaa sidiibaanan ugu yeedhay markii dambena waanu soo wada baxnay oo waxaan dhigay halkii ballantiisu ahayd sidibaanu ku tagay".

Subeer wuxuu ku celinayaa "sidaa kumuu tagine maxaa dhacay ee kale?" markaa Salma waxa maskaxdeedka baxsan inay siisay alaab wiilka cabaarbay murmayaana oo ay leedahay wax kale oo dhacay ma jiraan

isaguna leeyahay sheeg waxa dhacay marka dambe ayay xusuusanaysaa oo ay ku odhanaysaa ma waxaad u jeedaa oo aad arkaysay ama lagugu yidhi bacdii alaabtu ku jirtay ee aan siiyay, waa daacad Salmi waana qof u dhalatay inaanay waxba qarinin hadaladeeduna aad u cadcad yihiin intay qososho ayay ku odhanaysaa “walaal waxa ku jiray jokolayt, nacinac, xanjo iyo sharaab ay i soo siisay inantu aniguna maadaama aanan uba baahnayn waxaan gartay in aan siiyo wiilka mar haddii uu ka habsaamay gacalisadiisa si uu uga farxiyo”. Subeer intii hore oo dhan wuu cadhaysnaa oo wajigiisa waxa ka muuqatay daal hase ahaatee markay intaa ku tidhi ayuu si qurux badan ugu qoslay hase ahaatee Salma ayaa iyaduna bilowday Su’aalaad waxayna tidhi “waxaan ku waydiiyay wa ayo cida i daba socotay dee gurigana waxaan ka qabto maxaa laguugu soo sheegi waayay ii sheeg cida arrintan kuu soo gudbisay?” Subeer wuu ka dhaadhicin waayay inuu isagu arkaayay oo aan cidina u sheegin,

Salmi waxay ku adkaysanaysaa cidbaad ii samaysay soo ogaata wax kasta oo aan qabanayo ee maxay kaaga badan tahay maxaadse ku falaysaa soo ma ogid arrimahaasi inay kala fogayn iyo is necbaysi uun keenaan walaal hadaynaan is aaminin u malayn maayo in qofna qofka kale ilaalin karo” iyada oo kaftamaysa ayay ku odhanaysaa “Subeer shaw hinaasahan aad ii sheegayso kaaga ayaa ka xun, waan sigtay, waxay ku filnayd oo kaliya madaxa oo aad inanka ku dhufato Illaahaybaa se na badbaadiyay ee waxaasoo hinaase ah iska daa”. Halkaa marka ay marayaan ayaa Loo keenay raashinkii inankii cuntada siday ayaa ka dalbaday inay waxoogaa u ogolaadaan in uu u dhigo raashinka, dhamaysay oo iska dhig raashinkii, lama bilaabin cuntadii ee haddana waxaaa la sii waday hadalkii, iyada oo uu Subeer leeyahay “maan hinaasine, wuxuunbaan eegayay waxa dhacaya iyo sida ay wax u jiraan isaga oo iska adkaynaya inay ogaato inuu wali jecelyahay”, Salmi intay aad u qososhay ayay ku tidhi “walaal waxa jira waxyaabo aanan qarsoomi karin qofka is yidhaahda qarina lagu dareemi karayo markaa inaad hinaastay shaki ma laha.

Halkaa marka ay marinayso ayuu ku yidhi “aynu iska bilaabano cuntada”, cabaar ayaa la casheeyay markii la dhamaystayna ayaa haddana halkii laga sii bilaabay kaftankii iyo doodii, waxay socotoba wuxuu ku yidhi Subeer “Salmaay, anigu sidii aan horeba kuugu sheegay ama aad ogtahayba ma jiro xiligan xidhiidh toos ah oo labadeena inaga dhexeeyaa sababtuna waxay tahay waad ogtahay oo waxa aad burburisay meel kasta oo aynu ka samayn lahayn ama ka dhayi lahayn dhibaatooyinka jacaylkeena, marka aad i leedahay adigaan kugu eegayay inaad i jeceshahay iyo in kale, marka aad i leedahay hal habeen niyadayda kamaad bixin haddana uu kuu diyaar yahay tagitaanka aad ugu baxayso safarka dheer markee iyo goortee ayaan ku rumaystaa waxaan jeclahay maadaama aynu in badan isla soo joognay, maadaama aan la inoo kala sheekayn karayn, maadaama labadeenaba shaki ina kala dhex galay.

Isla markaana, uu bilaabmay aaminaad la’aan, kala daadsanaan iyo boholyow la’aan waxaan kaa codsanayaa inaynu ahaano laba qof oo wadaaga walaaltinimada anigana nasiibkayga adigana ayaankaaga aynu eegno” Salmi kuma qanacsana ee waxay leedahay wixii dhacay dhaceen wax dambena iman maayaan marka aan ka hadlayo xagayga markaa adiguna ii dambi dhaaf oo intaa igu daa. Subeerse xaaladu waxay ka maraysaa meel aad u adag oo uu ku adkaysanayo inay kala hadhaan. Wakhtiga ay murmayaana ama ay is haystaan waxa hudheelka ka socota hees jacayl ah oo talantaali ay u qaadaan labada fanaan ee kala Khadra Daahir & Axmed Cali Cigaal taas oo ah:

Haddii aan ku baday ciil

Caloolyowna kugu riday

Nabsigii i soo celi

Cabashana ku baanay

Adna caawa ha is

odhan Ka cad gooso

ee cabashadii iska

ilow Calool
lugulidaayeey
Maadigay cawaansaday
Hadaad ciida hoose iyo
Gashid meel cidhiidhi ah
Ama ay col iyo guluf
Warmo kaaga cararaan
Walee ciidan kuma taro
Waxba ha ii calaacalin
Adaa laydha ka cabee

Heestan oo aad moodo in inantu wakhtigaasi inanka ku eryayso kuna tusaalaynayso dambi hore oo uu galay ayaa waxa aad ugu dhag taagaya Subeer, Salma ayaa ku odhanaysa “ma sida kuwaas oo kale ayaynu ku kala tagnaa, mise kalgacaylkeenii taxnaa jacaylkeenii aayotiinka lahaa, ayaamaheenii wacnaa, iftiinkii aynu ilownay, aqalkii aynu dhisaynay aayar maynu burburinaayoo u jabnaa cadowgeena intaan yeeli lahaa sidaa waxa aniga ila roon inaan iska hoydo oo aan ifkan ka tago, Subeeroow wuu kugu batay hadalkaygu wakhti walbana waad karaahiyaysataa waxaanse kaaga ballan qaadayaa inaanad dib u karaahiyaysan doonin, waxaan is lahaa waxan oo dhan wuxuu u samaynayaa mar uunbuu is bedeli doonaa hase ahaatee waan arkaa wakhtigan oo uma soo jeedid inaynu reer dhisano iyo inaynu qayrkeen raacno toona waxaanan ku leeyahay waan tagayaa waxaanan maqnaanayaa mudadii aan kuu sheegay hase ahaatee ogow sidaan horeba kuugu sheegay anigu adiga qof aan adiga ahayn oo aan aqal u galayaa ama aan oori u noqonayaa ma jirto”.

Subeer hadaladan iyo kuwii hore ee aadka u dabacsanaa ama ay ku beerlaxawsanaysay dhag uma dhigin sidii ayaa meeshii lagaga soo kacay, cashada Salma ayaa qabtay oo soo ballamisay hudheelka, gaadhigiibaa la soo wada raacay intii dhexda lagu soo jiray ayaa waxa ku soo dhacaya Subeer telefoon ay soo dirtay Hodan wuu salaamayaa waxaanay u sheegaysaa inay u baahan tahay inuu la hadlo hase ahaatee Subeer

wakhtigan wuu xanaaqsan yahay wuxuuna u sheegayaa inaanuu la hadli karin hadeer hase ahaatee ay mar kale soo wacdo, yaabtay Hodan waxay ku celisay "maxaa walaal kugu dhacay" wuxuu ugu jawaabay "anigu kuu sheegay ee nabadeey telefankiina wuu ku bakhtiiyay" Salma oo garab fadhida ayaa ku odhanaysa "maxaad aniga iska kay maqashiinaysaa, maxaad xaaskaaga ugu ciyaaraysaa, maxaad niyada uga dilaysaa, maxaad qalbiga ugaga tumanaysaa ilaa hadma ayaad ahaanaysaa wiilka ku ciyaara ama ku dheeldheela ama ku tunta qalbiyo badan iyo quluub faro badan oo hablood, Subeeroow wax waliba aayaheeda waa la helaa anigu hadaan ku waayay in kastoonan u haysan inaan ku waayi karo haddana hadaad inanta ballan u qaaday waa inaad ka daysaa qaabka xun ee aad ula dhaqmayso" Subeer wuxuu ku odhanayaa "maxaa kaa saaran, maxaa kaa galay maadigaa, maad taqaanaa aniga ayay i jirtaa hadaan wanaajinayo iyo haddii aan xumaynayaba nasiibkaaga ku eekaw wakhtigaagiina waad soo qaadatay umana baahni in aad mar dambe afaaro aan leeyahay soo gasho xataa raali kama ihi inaad ii soo dirto telefan aad adigu leedahay aragtidaasi imika ha ahaato tii inoogu dambaysay waanan ku ogaaday waxaad tahay hadalka ayuunbaanan doonayay inaan kugu idhaahdo oo aanan haysanin anigu ama gabadh aan guursado ama aan toban guursado wixii aan yeeli lahaa waa hawl aan waxba kaa galin", waxa la soo gaadhay wakhtigan halkii ay ku dagi lahayd Salmi oo ah gurigooda agtiisa hase ahaatee Salmi waxay jeclaysanaysaa inay waxoogaa ka raali galiso oo ay si dabacsan ula hadasho mar walbana waxay doonaysaa inaanuu ka fogaanin iyadoo markaa gunaanidkii wada ayay tidhi "walaalkayoow adduunyada intaan ku noolahay ama aan ku noolaa ama aan ku noolaan doono ma garan karo meel aan adiga ahayn oo aan joogayo, naf adiga dartaa u jabaysa, u jeelan, u jibaadaysa oo jal qaadan wayday waxaad u jikaartaa sow jaxarnimo maaha haddaan anigu ahay adiga wax wal oo aad igu samayso marka aad walaal i tidhaahdo ayuu iga baaba'aa, ma garanayo anigu meesha aad iga qabatay, halka aad i taabatay iyo qaybta jidhkayga ka mida ee aad i taabatay". Subeer sidii qof budh lala dhacay ayuu afka taagayaa xagaasuu u sii jeedaa

gaadhiguna wuu taagan yahay waxaana ka socota oo uu dhagaysanayaa
hees jacayl ah oo ah

Ma markaan hawoodeen

Habsan geenyo uguboo

Ku heeraaran dooxada

Hiyigeedu raaca

Ma halkii dharaartii

Casarkii mamoodiga

Dad Hargeisa soo maray

Hadiyad igu siiya

Markii ugu horaysee

I haleelay caashaqu

Ma halkaan fadhiistaa

Habeenkii taariikhdi

Hada saacaday tahay

Iyo maalintii la i helay

Isku soo hagaagaa

Rabi igu hagaajaa

Goobta ay taagan yihiin waa halkii habeenkii ugu horaysay ee ay is raacaan
uu ka qaaday Salma muddo ka badan lix sano ka hor waana meel u caan
ah jacaylkooda waxaadse moodaa in ay ku soo hagaagtay heestu intay
sidaa u eegtay Salmi ayay ku tidhi "Subeeroow ayaamuhu mid waliba
suurad gooniya iyo sawir gaarabay leedahayoo dadku ku xusuustaan
halkaynu taaganahay, heesta socota, hadalka aad i leedahay miyaad u
malaynaysaa inay is qabanayaan haddii aad i eryayso ama aad rabto inaan
kaa tago waxa habboonayd in aanad halkan ila soo gaadhin oo aad ii dayso
gaadhigayga si aynu labadeenu hudheelka ugu kala tagno waxaanse
xusuusnahay meel kasta oo jidhkayga waa halbowle damqanaya oo
hadalkaaga u baahan, had iyo jeerna waxaad tahay Subeeroow mid aanan
garanayn meel uu ila gaadhi doono waxaase ii muuqda iyo waxa aad i
leedahay kolay way kala fog yihiin aniguna ma garanayo si aan noqon

doono imikana waan iska tagayaa waanan kuu soo ducaynayaa waayo xaqaaan kugu leeyahay iyo ka aad igu leedahay waxay u dhigmaan kuwa waalidka iyo ubadkoodu isku leeyihiin.

Sidaa darteed, walaal Subeeroow ma nihin kuwii la maqli lahaa xumaantooda ee waxaynu nahay kuwii lagaga dayan lahaa wanaaga, kalgacaylka, jacaylka iyo muxubada, inkastoo aan dumar ahay oonan diidayn dambiga aan galay haddana ii dulqaado laba ruux mid uunbaa dulqaatee". Intaa markii ay tidhi Subeer isagoon hadal badan odhan ayuu ku odhanayaa "walaal kolay muddo badanbaynu taagnayn meesha, waanan kula soo hadli doonaa ee habeen wanaagsan". Salma Subeer muddadii ay wada joogeen ilaa wakhtigii ay isbarten marnaba isagu muu odhan jirin habeen wanaagsan ama iga tag, waxayse dareemaysaa in wakhtigan Subeer uu ku soo adkaaday amay ay u eekaatay xaalad aanay waxba ka bedeli karayn, way iska calool adaygtay sidiibay ku degtay, kuna tagtay gurigoodii, hada ogowoo arrimihii la isku soo raacay ee loo ballansanaa in laga wada hadlo intooda badan wax jawaaba la iskama siin, iyadu wali may helin go'aankii ahaa inay u diyaar garowdo siday u noqon lahayd xaas ama loo fasixi lahaa isaguna muu helin arrintii uu ka doonayay Salma oo ah inay soo bandhigto qorshe cusub oo ka duwan kii hore. mid waliba wuxuu tagay gurigoodii si uu iskaga hurdo tago, habeenkaas oo dhan gabadha Salma wuxuu u ahaa habeen baas oo may mahadin is qurxintii, labiskii diyaar garowgii iyo kalgacalkii ay ku tagtay goobta way kala duwan tahay qofka marka rajo kuugu laaban tahay ee aad is leedahay wakhtigaa ka faa'iidayso iyo marka ay kaaga soo dhamaato.

Salmi kabaha ayay iska saartay waxaanay shidatay Tiifiiga si ay isku dhaafiso hawlaha iyo dhibaataada la soo deristay ee aanay awal u baran, ma jirto cid ay u yeedhato oo ay kala sheekaysato xaalada iyo qof ay u sheegtaa toona.xaga kale Subeer lurba kuma hayo waxa meesha ka dhacaya wuuna ugu talo galay maadaama ay iyadu markii hore gashay dambiga. Sidiibuu waagu ku baryayaa Salmi subaxnimadii halkii ay fadhiisatay habeenimadii iyo dharkii ay xidhnayd ayuunbay ku soo shaqo tagaysaa, waa la dareemi

karaa qof xalay oo dhan soo jeeday hase ahaatee iyadu way istiilaysaa oo waxay diidan tahay in la dareemo, goor dambe oo rawaxaada ku dhow ayaa waxa u yeedhaya sarkaalkii hayadooda ka madaxda ahaa waxaanuu ku wargelinayaa in siminaarkii ay u baxaysay hore loo soo dhigay dabadeetana ay soo goosato tigidhka, buukinkana soo samaysato isla markaana saddex maalmood kadib ay ambabixi doonto jabkuba wuxuu ka joogaa qofkan la dirayaa niyadiisii halkay ku maqan tahay, ma joogtaa oo ma tahay mid waxan dhagaysan karaysa mise waxay u baahan tahay in dhinaca kale looga wareego, Salmi way iska soo kacday waxaanay u yeedhay dirawaliinta gaadhiga mid ka mid ah si uu u qaado oo uu u geeyo shirkada diyaaradaha markay timid meeshii si fiican ayaa loogu soo dhaweeyay xafiiska inkastoo ay ahayd wakhti la rawaxayo haddana hayada oo xidhiidh wayn la leh shirkada ayaa waxa u suuro galay in loo dhamaystiro dhamaan dhukumentigii ay u baahnayd iyada iyo qofkii kale ee raacayay sidiibaanay kaga imanaysaa oo ay ugu soo noqonaysaa xafiiskii.

Subeer ma oga in Salmi tagi doonto wakhti dhaw cid u sheegtaana ma jirto qof uu ka waraystana ma haysto oo dhalinyaradu iskuma ogola Salma iyo Subeer iyagoo, xumaynaya Salma oo ay leeyihiin axdi ma laha, ballantana ma taqaano markaa haddii uu cid u diri lahaa ma helayo oo ma awoodo, maalin kadib ayaa waxaa qasab noqotay inay la soo hadasho Salmi Subeer si ay ugu wargeliso inay bari baxayso isla markaana ay u baahan tahay inay is arkaan. Subeer kamuu ogolaanin kulanka habeen dambe hase ahaatee wuxuu ogolaaday macasalaamaynta iyo inuu si niyadsan ah oo aan calool xumo ku jirin u kala tagaan, arrintaasi waxay ku noqotay Salma filan waa, qaadan waa, muddo ayay ka fekeraysay waxa ay samayso sababta oo ah iskama tagi karto iyada oo qofkii ay ifka u jeclayd uu meel xun xaalkoodu kala marayo. Waxay sidii ahaataba markii ay gaadhay sagaalkii habeenimo ee ay ogaatay inuu guriga u soo hoydo ayay imanaysaa guriga iyada oo la socota saaxibadeed Ayaan, kadib albaabka ayaa la soo garaacayaa, Hana yar ayaa ka furtay salaan dabadeed waxay u sheegeen dantii ay lahaayeen oo ah Subeer. Hani wax jawaab ah may siin intay dib u noqotay ayay u

sheegtay walaalkeed inay u taagan yihiin dibada dumar doonaya oo aanay garanayn, markaa Salmi kamay soo daadagin gaadhiga ee waxa u timid oo kaliya Ayaan, wayse aragtaa in ay laba dumar ahi ku jiraan gaadhiga, Subeer oo wakhtigaa u diyaar garoobayay hurdo wuxuu soo xidhay macawiis iyo garan, debeda ayaanuu u soo baxay kamanuu filanayn in ay wakhtigan imanayso oo wuu la yaabay cida xilligan doonaysa ku soo dhawaa markiiba gaadhiguu gartay Ayaanbaa soo horaysay way isa salaameen waxayna u sheegtay in ay goorahanba Salmi u fadhiday halkan isla markaana ay rabto inuu la kulmo wuu ka ogolaaday,

Subeer isaga oo macawiistii iyo garankii xidhan ayaa lagu qaaday gaadhigii Ayaan ayaa la sii dhigay gurigoodii dabadeedna waxay tageen halkii ay istaagi jireen oo ah goob aan ka fogayn guriga Salma iyo hadalkii ugu horeeyay ee ay tidhaahdo ayaa wuxuu ahaa "Subeer anigu bari sideeda subaxnimo ayaan baxayaa, sideed biloodna waan kaa maqnaanayaa si ay noqona Illaahaybaa garan, dadkana waxa wanaagsan inay wuxuun isku ogaadaan, habeenkii dhawayd ee aynu isla joognay go'aan aynu ku kala tagtay muu jirin waxaan doonayaa caawa inaynu noqono laba qof oo midkiiba goonidiisa u go'o iyo inaynu noqono laba qof oo isku maqan, ha u malaynin, hana u qaadan waayin baryada faraha badan leh ee aan kugu celcelinayo adigana faan kuu noqon mayso inaad iga calool adaygto oo aad cadaadis igu saarto wax

Illaahee ina abuurtay keenay oo ah calaf". Subeer wuu ku qoslay kalmadaa waxaanuu ku yidhi "haddaan kugu diidayo calafkii markaad soo noqotay ayay inoo kala dhamaan lahayd, aniguse kuguma diidanayn arrinta hore waxa ay ahayd dhibaato kale oo aad adigu samaysay hadayse arrintu noqotay inaad bari baxayso ma jecli inaad ku baxdo niyad xun oo aad ku tagto sidaa walow aanad ahayn Salmaay qof sideedii hore ah haddana anigu ballan waxaan kaaga qaadayaa qof aan adiga ahayn inaan la hadlin horena ula hadlin dibna ula hadli doonin".

Intaa markii uu yidhi Salma waran ku taagnaa ayaa ka go'ay farxad darteed ayay ilmaysay waxaana ka mid ahaa hadaladeedii "waan

garanayay walaal, waan ogahay walaal inaanad marnaba cidlo igaga dhaqaaqayn, waxaan xusuusnahay wixii aynu isla soo marnay, halka aad igaga taalo caawa iyo habeenkii aynu is baranay iyo habeenkii aan soo noqday iyo habeen kasta oo aan kula kulmay way ii suntan yihiin, walaal adiga ayaa indhaha ii kala furay, adiga ayaa adduunkan i baray, adiga ayaan ku shaqeeyaa aragtidiisa, adiga ayaan ku jeclahay oo kaliya ma kaa maarmi karayo, markaa walaal waxaan kaa codsanayaa mar hadaad ogolaatay tagitaankayga iina ballan qaaday inaan sidii hore ahaano isuna maqan nahay anigana waxaad igu ogaataa in aan ahaado qof dhawrsoon oo sharaftaada iyo taydaba ilaalisa kaamana maqni ee waan kula joogaa mar walba, waxa kaliya oo aan kaaga tagayaa waxa weeye in aad reerka ka dhaadhiciso sidii ay iskugu keen ogolaan lahaayeen. Waxa ay wakhtigaa dhagaysanayaan hees ay qaado Sahra Axmed oo ah

Sirma qabe Raxmaanoow

Adigaa u sahanoo

Waxba maan samaynine

Haday samadu furan tahay

Suuradaha quraankiyo

Saligaan u diriyaa

Inaan kaan sugaayay

Sidaan ahay u sheegaan

Sahwi iyo daraadii

Salsal iyo saaciyo abaar

Kala saari waayoo

Siday noqonba mooyee

Subeer inkasta oo uu markii hore ka adkaystay tawaawaca, catawga, calaacalka, walaaca, walbahaarka, walwalka iyo walanwalka ku abuuran Salma haddana wakhtigan ogolaa sidiibaanay ku soo celinaysaa waxayna

ballamayaan bari marka ay baxayso diyaaradu inta ka horaysa inay is arkaan. Salmi calowyowgii iyo dhibtii ay kaga timid guriga wakhtigan wuu ka baaba'ay waxaanay soo noqotay iyada oo aad moodo in xidigo loo soo tolay ama darajo la soo siiyay, farxada, raynraynta, damaashaadka iyo qosolka ka dhacaya Salma waxa yaabay xaafadii, islaantiibaa ku tidhi "hooyo, maxaad soo heshay" si yar oo gaaban bay ugu tidhi "hooyo soo ma ogid inaan aroorta dhoofayo, oo aan maqnaan doono sideed bilood, waxaan ku faraxsanahay inaan hooyaday iyo aabahay oo caafimaad qaba ka tago aniguna aan Illaahay ka baryayo inuu i soo celiyo aniga oo nabad qaba", wax sidaasaba may dhaamin islaantu, ama umay sii fiirsanba farxadan dheeraadka ah ee inanteeda.

Salmi telefoon ayay dhagta qabsatay waxaanay la hadashay saaxiibadeed Ayaan oo ay u sheegtay in ay bari baxayso, sidoo kalena sheekadii iyada iyo Subeer si wanaagsan u soo dhamaatay oo barito uu ka mid noqon doono dadka sii sagootiyaya. Arrintaasi Ayaan umay riyaaqin waayo waxay ku ogayd Subeer isaga oo wata Hodan iyo colaada dhex taalay Salma, waxaanay ku tidhi "walaal Salmaay anigu waan imanayaa oo meel aan ku hadhaa iima taalo laakiin intee in leeg ayaad aaminsantahay Subeer iyo jacaylkiisa".Salmi iyada oo dhibsanaysa hadalka saaxiibadeed ayay ku tidhi "walaal adigana shakibaa Illaahay kugu abuuree, arrintaasi way dhamaatay, baribaad arki doontaa waa inoo iyo sideeda subaxnimo guriga ayaan kugu sugayaa", sidiibaanay isku macasalaameeyeen.

Salmi hore ayay u diyaarsatay wixii ay ku amba bixi lahayd oo uma baahna inay dib suuq ugu laabato ama ay alaab iibsato oo teedii hore ayaa meel ay kala dhigto ay la'dahay, waxay ku dhaqaaqday inay diyaariso shandadii ay ku guran lahayd alaabada iyo in ay u sheegto saaxiibadeed si ay uga soo qayb galaan bixitaankeeda intii aan ogayni, Subeer isagu wuu iska noqday waanuu iska seexday, markii waagu baryay ayaa la yimid gegeda diyaaradaha, Subeer waxa la socda inankii Salaan ee ay saaxiibka ahaayeen waxaanuu u labisan yahay si aad u qurux badan oo aanuu beryahaa u soo

labisan, garoonka halka uu maanta taagan yahay waxa weeye halkii uu ku macasalaameeyay Salma muddo fog iyada oo raacaysa ama noqotay afo nin kale wuxuu kolba qof yimaado saacadu waxay gaadhay sagaalkii subaxnimo, Salmi iyadu waxay timid sideedii iyo badhkii halka Subeer sideediiba sii joogay garoonka faq gooni ah ayaa la galay waxaanay istaageen halkii ay istaageen mudadaa hore ee aynu tilmaanay Salma ayaa hadalka qaadatay waxay ku tidhi “walaal ma xusuusan tahay goobtan”, intuu qoslay ayuu ku yidhi “miyaanay ahayn halkii aan kuugu xidhay siliska aad maalinta dhawayd i tusaysay, miyaanay ahayn halkii iigu dambaysay niyad qab muddo aad u badan, miyaanay ahayn meeshii labadeenaba oohintu ka dhamaatay, ma waxaad ii haysataa qof bilaa xusuus ah mise waxaad leedahay Subeeroow qalbigaaga waxa aad ka saartay dhamaan wixii xusuustayda ahaa anigu Subeer ahaan ma iloobo, kamana baxdo qalbigayga waxaan u iman jiray in aan niyadayda ku sabirsiiyo maalmihi xumaa iyo wakhtiyadii adkaa ee i soo maray, waan iman jiray galabtii marka aan helo firaaqo si aan ugu xusuusto halkii aynu wada taagnayn iyo hadaladii aynu is lahayn, Salmaay sideedaba dadku waa laba waa qof marka uu kula joogo qalbigiisu ku agjoogo iyo qof marka uu kaa maqan yahay qalbigiisuna kaa maqan yahay umaan haysanin muddo dheer inaad iga maqan tahay ilaa iyo intii aad adigu iskay nacsiinaysay, walaal maantana waa maalintaa maalinteedii, dardaarankuna waa dardaarankii dardaarankiisii, waxaan ku leeyahay waxaad tagaysaa wadan shisheeye oo awal hore waalid iyo ninkaaga ayaa kula socday, maantase waa kaligaa, inanbaad u tahay, waad u nugushahay ha is odhanin ku dayo kuwa aad ugu tagto halka ay joogaan, ha is odhanin maxaa kaa galay ma cidbaa ku arkaysa, ha is odhanin yeel waxyaabaha ay yeelaan qayrkaa,

Salmaay kuma soo koobi karo waano wakhtigaa inagu gaaban, mar walbana sidaasuu inoogu gaabnaanayaa ilaa inta aynu isku noqonayno nin iyo ooridii, haddaad i jeceshahay waad iga tagaysaa, hadaan ku jeclahayna waan kaa sii socdaa waxaad Illaahay inooga baridaa in uu iskugu keen keeno guri xalaal iyo bayd raaxo leh”. Waxa la soo gaadhayaa wakhtigii

diyaar garowga Salmi aad ayay u hiyi kacsan tahay waanay ka xuntahay tagitaanka ama bixitaanka ay baxayso waayo muddo badan ayay col ahaayeen iyada iyo mataankeedu, maalintay heshiiyeena waxaa lagu yidhi ama ay ku beegantay safarkeedii. Isla markaa Salma dhib aada ayaa ka haysata arag la'aanta, hadal la'aanta iyo fogaanta ay ka fogaanayso midkii ay nafta la wadaagaysay, qadar yar kadib iyada oo aan hadalo badan odhan ayaa waxa u yeedhaya xubno ka mid ah reerkooda una sheegaya in la sugayo iyada, wax ay yeeshaa ma jirto doorkan Subeer muu siinin wax hadiyad oo aan ahayn hadalada dardaaranka ah.

Sidiibaanay ku baxaysaa oo ay ku fuulaysaa diyaaradii, goobta ay tagaysaa marka hore waa Nairobi oo Kenya ah halkaas oo ay joogayso labada bilood ee ugu horeeya waxase loogu talo galay inay u gudubto wadanka Norway oo uu ka dhacayo shir lagu qaban qaabinayo ama lagu diyaarinayo qaabka iyo sida loo caawiyo wadamada ka soo doogtay dagaalada sokeeye ama ay ku cusub tahay Dimuqraadiyadu. Salma xaalkeedu waxa uu noqday **duushaye Alloow nabadeey** Subeerna halkiisii ayuu ku soo noqday isaga oo aan aad u faraxsanayn, wakhtigu wuxuu ku dhaw yahay xiligii qadada maadaama oo uu in badan ku soo daalanaa Gegida Dayuuradaha waxay noqotay in uu si degdeg ah iskaga tago xaafada si uu iskaga bedelo una maydho, isla markaana nasasho galo, Subeer imaatinka guriga waxa uu ugu yimid Hodan oo la joogta hablahoodii muu dhibsan, wuu salaamay waanuu iska soo dhaafay isaga oo ku degdegaya dhinaca qolkiisa. Hana oo ka war haysay meesha uu tagayo, waayo xalaybay ogayd markay Salmi u timid ee ay inta badan wada maqnaayeen iyo kalahaadii aroornimo waxa intaa u sii dheeraa dareenka ay ka qaadatay sida quruxda badan ee uu u labistay, Hani way ka daba timid waxaanay waydiisay "walaalo, maanta caruusbaad u eegtahaye miyaad guursatay mise minxiisbaad ahayd, qurux badanidaa gabadha ku aragtaa kaaba hadhi maysee", Subeer iyo Hana way iskugu baxdaa oo siduu ula kaftamo ama ugu sheekeeyo uma sheekaystaan Muna oo ah gabadha ka wayn.

Intaa kadib wuxuu ku yidhi “walaal iskaga kay tag waan daalanahay waxaan u baahanahay inaan xamaamka tago oo aan maydho kaftankana dib inoogu dhig” sidiibay kaga soo baxaysaa Hani iyada oo qoslaysa waxay dib ugu soo noqonaysaa qolka fadhiga oo ay joogaan Hodan iyo Muni, Muni waxay diyaar u tahay inay u sheegto walaalkeed in uu la hadlo gabadhan Hodan, reerkuna isku raacsan yahay inuu guursado, markaana ay u sheegaan odayga dhalay oo aan hablaha iyo wiilka midkoodna waxba ka diidayn, soo bixitaankii ugu horeeyay ee uu debeda u soo baxo ayay ku odhanaysaa Muni “Subeer walaal waxaan jeclahay inaan kuu sheego arrin aan in badan kaa qarinayay taasoo ah Hodan iyo hawlaheeda” walaaluhu marka aanay in badan wada kaftamin ama aanay sheeko wadaagto lahayn way kala xishoodaan oo isuguma dhiiranayaan sida labada qof ee kale, Muna waxaynu xusnay inay ka xidhxidhan tahay xaga kaftanka iyo sheekada walaalkeed laakiin ay tahay qofka ugu jecel Subeer reer Dhamal dhamaantood isaguna wuu ogsoon yahay, qadarin xoog ah oo uu u hayo awgeed waxay ku qasabtay inuu dhagayso erayadeeda aanuu raalida ka ahayn, waxay ku dirqiday inuu maqlo wuxuu mar hore diiday ama diidanaa, way wadatay sheekadeedii waxaanay hadal ku soo gunaanaday “Subeeroow lix sano iyo saayid socon mayso gabadhbaan sugayaa, waxaad noo sheegtaa in aad noogu talo gashay goblanka, ubad la’aanta, farxad la’aanta, cidlada aan maanta joogno iyo inaad yeesho talada aan kuu soo jeedinayno oo ah guurka Hodan”.

Subeer aad uguma celiyo hadalka Muna waxayse ka fursan wayday inuu u sheego ma dhaafaanka kuna yidhaahdo “walaalo aniga iyo Hodan waanu wada hadalnay, waxna waan isla meel dhignay sidaasi darteed haday guur noqoto, haday sheeko noqoto iyo haddii kaleba anaga iyo Hodan labadayadu war buuxa ayaanu kugu soo celinaynaa”, Muni maadaama aanay walaalkeed hore ula hadlin ballan horena ka qaadin yididiilo xoog ah ayay galisay ballantani, sidoo kalena Subeer wuxuu ka fakaday hadalada adag iyo mowqifkeeda xag jirka ah oo haddii uu diidi lahaa dib iinaanay u wada hadleen ayaa dhici lahayd. Halkaa marka ay marayso wiilkii Subeer

arrimuhu ku soo ururoo, waxay edega u soo galay mas, halaq aan meel uu ka dhaafaa jirin haddii xaajigu maqlana (waa aabihiiye) arrintu intan way ka sii adkaanaysaa markaa waa in uu is dhuubaa, halka ay Muni ka taagan tahay cid la'aanbaad na dhigtay xaajigu wuxuu marayaa waxaad ugu talo gashay in magacaygu baaba'o oo la waayo cid igu abtirsata maxaan yeelaa, halkeen talo kaga hagaagaa aabo anigu ma guursan karo oo waan gaboobay adigiina waan kuug taag la'ahay sow kaaf iyo kala dheeri maaha, waa hadalada ay mar walba Subeer iyo aabihii isku waydaarsadaan doodaha, Subeer waxba xumee isma laha caashaqan uu xurmaynayay iyo xilka jacayl ee uu qaaday ayaa xadka kala talaaboo xididada jidhkiisiyo xoogiisa jabiyo xeeladbuu u la'yahay uu kaga baxo xayndaabkan adag dadku uma garaabaan isaguna garab ma haysto, gef inuu samaynayo ayuunbaa cid waliba u haysataa, waxay ka dhigan tahay heestii ahayd

Niyadaan ka ooyaa

Urugada xasuustaa

Uurkiyo calooshay

Aramidu i jiiftaa

Haddana kama adkaystee

Ugubnimo xishood lee

Il nugaylna waa kee

Afka kama cadayn karo

Ergana uma diran karo

Caashaqu ogaysiis ma leeyahay

Subeer talo way ku cadaatay ma yaqaano meel uu ka baxo iyo wax uu sameeyo toona hadalada reer Dhamalna waa qaar xaqiiqdii aan la dafiri karin oo ah biyo kama dhibcaan ama run meel mar ah, meeraysiga Subeerna noqon maayo mid uu kaga badbaado ama ka baajiyo kaambaynka ay ku hayaan walaalihii iyo aabihii, Muni iyadu sidaynu hore u sheegnay maaha qof kaftanta oo u furfuran sida Hana isla markaa wuxuu ku go'aansanayaa Subeer in uu u sheego Muna inay wada hadlayaan marka

uu hadeer qaado Hodan, iska gal gurigiisii waxa la gaadhay galinkii dambe intaa may wada hadlin Hodan iyo Subeer kaliya Subeer waxa u furan in uu iska maslaxo Hodan oo uu yidhaahdo siduu horeba ugu yidhi “walaal Illaahbaa ceeb asturee iska kay astur oo adigu waxaad tidhaahdaa ma rabo inankiina” hase ahaatee suurogal ma aha oo Hodan haday intaa odhanayso maxaa soo lug goynaya, maxaa gurigooda keenaya maxay ka soo doontaa, may aayar iska nasato.

Waxay sidii ahaataba markii la gaadhay shantii galabnimo ayay Hani u soo gashay walaalkeed una sheegtay inay Hodan diyaar tahay oo ay rabto inuu hooyo, cabaar yar kadib wuu labistay waxaanuu u diyaar garoobay sidii uu u kaxayn lahaa. Hodan qorshahan wuxuu sii galiyay in uu dhexda kaga dhameeyo wixii arrin ah ee uu uga baahan yahay sidoo kale qorshaha wuxuu ku daray in uu sii cashaysiiyo oo ay la joogto muddo badan, maadaama uu u sheegayo wax badan sidiibaanay isku raaceen, markii ay soo fuushay gaadhigii ayuu ku bilaabay kaftan aanuu hore ula kaftami jirin si ay uga ogolaato inay la joogto inta ay cashada gaadhayso Hodan way yaaban tahay oo waxay is leedahay maxaa iska bedelay Subeer hadalkiisii maanta iyo kan caawa labaduba waxaad moodaa inay ka soo dabcayaan halkii hore ee uu taagnaa, Hodan iyadoo aad u qoslaysa ayay ku tidhi “Subeeroow reerkiina waxa nasiib leh qofka ku soo biira waayo waxaad tihiin xaafad ama qoys dhamaantood is wada jecel, jacaylkaas oo aan ahayn mid la iska yeelyeelayo laakiin gunta ku haya meel adag waayo waxaad isku noqoteen walaalo, waalid, saaxiibo iyo wax kasta oo ay dadku isku yihiin saddexdiina walaalaha ah iyo aabihiin wali maan arag sidaad u dhaqantaan ee aad isku fahanteen cid isku fahantay, walaal waa ayo tallow cida ayaan u leh inuu la soo jaaro ama ku soo darsamo aqalkan haday tahay xaga hablaha iyo hadday dhankaaga tahayba” Subeer inta uu sheekada is dhaafiyay ayaa waxa uu ku yidhi “imika waxaan doonayaaba labadan hablood ee aad saaxiibka tihiin inaan masaajidka kaga yabooho, dee walaal way socon waayeen maaha, maxay kula tahay adiga” waa erayo kaftan ah oo xitaa uu bedelay luqadiisii hore, Hodan ayaa ku tidhi “isku bax oo isla

hel maa adiga Misaajid lagu geeyo oo lagaa yaboohiyo ma hablaha aad aragtay caynka ay u eegyihiin ayaad caawana tidhi waxaan gaynayaa misaajid, cabaarbaa la qoslay. Hodan kama hadhsana hadalkeena haduu moodayo inay dhaafayso ama ay iloobayso sheekadeeda caawa oo ay u soo biyaysatay inaanay waxba amaahin xaqiiqdana farta ka saarto waxaanay ku bilaabaysaa "Subeeroow in badan ayaad igu tidhi qalbigayga meel kaagama banaana anigana qalbigayga meel walba waxa buuxiyay xusuustaada arrintanina maaha mid loo kala tagayo, walaal hadaad maqli jirtay jacayl cidbaa u dhimatay, qaarbaa u liita, jabaa lala soo maray iyo wax la mid ah aniga ayaa wakhtigan uu heeryada i dul saaray mana garanayo ilaa maanta meel ay naftaydu ku dagayso oo aan adiga ahayn adiguna qofbaad jeceshahay aniguna adigaan ku jeclahay intii aan is adkayn karayay waan is adkeeyay wayse iga soo dhamaatay waxaan taaganahay wakhtigii la odhan jiray habluhu reeraha ayay u soo galaan markaa hadaad i saarayso iyo haddii aad i eryayso, hadaad i nacayso, hadaad i jeclaamayso iyo hadaad wax kale yeelaysaba go'aankaygu waa midhkaa, mana yeelayo hadal kale oo aan ahayn waan kaa aqbalay, walaal muddo badan ayaan daraadaa u aalay sariirta dusheeda, in badan ayaan adiga uun kaa dhur sugayay wakhtigaygii wuxuu ku dhamaaday sidii aan xagaaga u soo eegayay adiguna malaha waxay kula tahay inaan kugula kaftamayo hadalka aan ku leeyahay".

Subeer xilligan wuxuu gaadhiga ku weecinayaa oo uu soo gaadhay albaabka hore ee Huteelka ay ka cashaynayeen balse Hodan iyadu hadalkeedii ayay sii wadataa waxayna tidhi "dunida waxaa farxa oo qosla ama qayrkood dhaafa qofka hela qofkii uu jeclaa waxaana qayrkii ka hadhay midkii waayay, mataankii uu calmaday haddii caashaqu cid wax yeelayo, hadduu cadow u yahay aadamaha, hadduu cidlo igu tuurayo iyo hadduu hadeer ikaa siinayo intaba waxaan u ahay diyaar nolosha la'aantaa waxba iima aha" intaa markii ay tidhi iyo waxaa is kulmay bakhtiinta gaadhiga uu bakhtiiyay waxaanuu ku yidhi "walaal waynu sheekaysan doonaaye soo daadag" Subeer intuu ka hor dagay oo uu soo wareegay ayuu ka furay albaabkii

gaadhiga, way ooyaysaa madaxaa aad u xanuunaya cunto iyo cabitaan midkoodna uma dhadhamayo, dhuunigu wuxuu damcad leeyahay marka qofkii aad rabtay uu kula joogo, muxuu kuu tarayaa haddaanad haysanba, Hodan iyadoo madluun ah ayay ka soo dagtay gaadhiga garabka ayuu soo qabtay isagoo sasabaya sidiibaanuu ku soo fadhiisiyay mid ka mid ah kuraasta Huteelka oo markaa diyaar ku ahaa meesha in yar kadib waxa u yimid wiilkii mudalabka ahaa oo ka qaaday wixii ay cuni lahaayeen waxase dhacday inay iyadu cuntaba dalban waydo, Subeer aad ayuu uga xumaaday isagaana dalbay labada cashaba Hodan wuxuu u haystaa inay ku kaftamayso markan ay diidayso dalabka cuntada ee waa arrin ay soo go'aansatay waxaanay doonaysaa inay sidaaba ku joojiso cuntada ilaa inta uu ka yeelayo arrinta ay wadato xilligaa waxa ka socda Huteelka hees aad u macaan oo ahayd

Dawadii naftaydaay

Dumar taan ka doortaay

Sow inaan ku daawado

Dal dheer ugama soo tagin

Dumar ha igu noqonine

Sidaan kaaga daba

dhacay Inaad ii

daryeeshaa Ku wa inala

da'da ahina Way is

doonanayaan

Inaguna duleedkiyo

Darbiyadaan wareegnaa

Doqoniimo weeyaan

Inaad ii dadaali waydo

Iyagoo dhagaysanaya heesta Hodana hoos u foorarto ayaa waxa soo galaya ama imanaya wiilkii oo sida Cuntadii, cabaar markii la isku dul haystay cuntada oo ay diiday inay wax cunto ayaa Subeer si xun uga xanaaqayaa. Hodan intay istaagtay ayay ku odhanaysaa “walaal ama xanaaq ama ha xanaaqin halkan umaan imanin inaan wax cuno laakiin waxaan u imid inaad iga qanciso rabitaankayga hana u qaadanin cuntada aan halkan ku diidin inaan ku cuni doono meel kale” Subeer mabuu filayn hadalkan wuxuuna is lahaa waxay diidantahay oo qudha inta meeshan la joogo iyo iyada oo uu ka moodayay kaftan. Markii sidaa arintii noqotay ma jirto wuxuu yeelaa wuu fadhiistay, haddana wuu kacay hadalkiibaa ku dhagay oo dibnihiisa ka soo bixi waayay, madax xanuun faro badan, afka oo qalala iyo daal ayuu muddo yar gudaheed ku dareemay, Subeer kama qancin karo hadalka ama waxa ay doonayso Hodan oo rabta inuu ka ogolaado guurkeeda, wuxuu fekeraba wuxuu odhanayaa oo uu maskaxdiisa ka keenayaa in uu ku yidhaahdo waan kaa ogolaaday inaynu wada sheekaysano hase ahaatee arrimaha kale waynu ka wada hadlayaan. Hodan oo goorahanba aad moodo inay geeri fadhiday ayaa mar kaliya waxa ka soo baxaya neef ay la socoto neecaw iyadoo dareemaysa qabaw iyo laydh, in badan aan jidhkeedu arag, Hodan markii hore cadhada mooyaane indhaheeda wax ilmo ah kamay muuqanin balse wakhtigan qosol iyo oohin ayaa is dhex socda waa mararka kaliya ama wakhtiyada gaarka ah ee uu qofku isaga oo ooyaya haddana uu qoslayo, waana wakhtiyada ay dhakhaatiirtu u nisbeeyaan dhimashada degdega ah ama waxa la yidhaahdo **Heart Attack** kaasoo mar kaliya wadnuhu istaago qofka maxaa yeelay is bedelka degdega ah ee uu isbedelay ruuxaasi ayaa jidhkiisa wax wayn ku kordhin kara, kana ridi kara, oohinta Hodan maaha mid ay ku dhawaaqayso balse waa mid ay indhaheeda biyo ka daadanayaan wajigeedana ay farxadi ka muuqato.

Subeer si aada ayuu u dareemay jacaylka Hodan iyo heerka uu taagan yahay wuxuu ogaaday oo uu arkayaa inay ku jirto halis oo ay u dhawdahay inay u haligto nafteeda isaga daraadii. Sidaasoo ay tahay Subeer hada muu furin ballantii ama wacadmii uu la galay Salma **waayuhu sirgacanaa, kululaa sabaanadu siyaasadu guracanaa soo salal madoobaa.** Waxa ka dambeeya lama yaqaano ballantan uu qaaday iyo halka ay ku dambaynayso maalmaba kamay soo wareegin markii uu macasalaameeyay Salma ileen imtixaanka Illaahay meel walba waa yaalaa si kasta oo aad is tidhaahdo uga baxsana lagama yaabo inaad ka dheerayso wixii uu qoray wax qoran, inagoo aan garan karin labada hablood mida uu calfan doono ayaa haddana waxa inankii iskugu soo ururay wixii murugo adduunyada taalay intii uu qayb u helay, marka aynu eegno wiil da'daas ah oo madi ah kuna kulmeen dhibaatooyinkaasi waxaan odhan karnaa wuxuu ka awood iyo kartiba badan yahay kuwo badan oo walaalo iyo wehel ay kala sheekaystaan ama ka caawiyaan dhibaatooyinka noocan ah ee haysta, Subeer ha afgaabnaado laakiin maaha nin hal seego mana aha nin dhacdhac badan.

Aan dib ugu noqono miiskii iyo cuntadii maxaa dhacaya wakhtigan Hodan haday diidanayd markii hore cuntada xiligan iyada ayaa bilowday tii oo waliba ku bilaabaysa si farxadi ku jirto oo ay ku dul kaftamayso. Waa wareegto adduun oo wakhtigaa hadba cayn ah mar dhawaydna waxa fekerku ku badnaa Hodan hadeerna wuxuu u wareegay Subeer, xanuun badanaa wuxuunbaa garan kara qof uu haleelay oo sida Hodan u boholyowday qof kasii jeeday muddo badan ama sida Subeer u hiloobay mid aan u soo jeedin, ama sida Salma nasiibku ka hiishoo hadba meel aan ahayn halkeedii heeryadu kaga dhacayso, hadaad eegto inantii Hodan waxaad moodaa in loo ballan qaaday janada, qosolka, faro ka ciyaarka, dhoole cadaynta iyo sida ay cuntada u cunayso may ahayn mid baryahaa lagu arkay. Waxba yaynaan ku raagin, in badan yaynaan sii dul fadhiyin miiska cuntada, aynu u soo dhaqaaqno markii ay dhamaysteen iyo gaadhiga dhexdiisa hadalka waxaa wadata oo aan joojin sidii uu jawaabta

u siiyayba Hodan waxaanad moodaa in ay iska soo faqayso ama iska soo gurayso wax in badan laabteeda iyo beerkeeda, wadnaheeda iyo badanka jidhkeeda jiifay, waxay haleel u heshay inay u sheegto bilow ilaa wakhtigan sidii maalinba maalin ugu soo dhiibaysay, waxay u sheegtay samirka iyo dulqaadka ay siisay, waxa kale oo ay u sheegtay sida ay nafteeda uga qancisay inay helayso qofka ay rabto iyadoo hadlaysa ayaa waxay tidhi "Subeeroow, may yarayn ayaamuhu intuu waagu ii baryo aanan aqoonin goorta uu gabalku dhacayo ama gabal dhacay aanan garanayn goortuu waagiisii baryay waxaan ahaa mid iska dhex socota iyada oo aan is ogayn dadka qofka kaliya ee badbaadiyay naftayda ama Illaahay shimbirka iiga soo dhigay wuxuu ahaa Muna oo mar walba isku dayi jirtay inay iiga qanciso ama ii dajiso iyadoo ii sheegaysa mar walba rajo wanaagsan, waxa iigu darnaa ama maalmaha iigu xumaa habeenkii marka aan sii seexanayo iyo aroortii marka aan soo tooso labadaa jeer waxay ahaayeen kuwo dhibay naftayda tusaale ahaan Subeeroow habeenkii marka aan sii gam'ayo inkasta oo aanan gam'i jirinba waxaan is waydiin jiray maanta way dhamaatay aroorta maxaad la kulmaysaa, ma heli karaysaa, ma ku yeeli doonaa, tallow maalintani dhamaataye ta dambe ma noqon doontaa midaad ku guulaysan lahayd waxaad inta badan doonaysay indhaha guntooda ayaa i ololi jiray hadaan isku qabtana awood umaan lahayn inaan kala qaado damqasho awgeed aroortii marka aan tooso amase waagu baryo waxaan soo kacaa aniga oo ku fekeraya ama niyada ku haysta maxaad yeeli doontaa, Subeeroow hooyaday iyo walaaladay way dareensan yihiin inaan ku jeclahay waxa waliba ay aad u dareensan yihiin in aan ahay qof aan kaa maarmi karin in badan ayaa la i waydiistay aabahay waxaan u malaynayaa mudadii aynu is naqaanay saddex jeer ayaa rag u yimaadeen raba in aanu gacal noqono waxase mar walba ku gacan saydhaysay inta aanay anigaba i soo gaadhin walaashayda ugu wayn iyo hooyaday oo ogaa heerka noloshayda iyo halka aan taaganahay maxay u diidanaayeen in uu aabahay i siiyo nin kale waxaad moodaa inay ogaayeen inaanay naftaydu ku qancayn qof aan Subeer ahayn, adiguna Subeeroow kuguma dhibsanayo, kuugumana cadhoonayo, kuguma xanaaqsani dibna ugu noqon maayo

dhibkii aad i soo marisay waayo waxaan ogahay inaad adiguba martay jidka aan maray mid la mida waxa kaliya oo aad igaga duwanayd waxay ahayd waxaad tahay nin raga oo maarayn kara waxyaabo badan oo noloshiisa la soo dersa halka anigu ay igu adagtahay inaan u adkaysto ama aan dulqaad u yeesho dhac-dhaca iyo dildilaacyada, nabarada jacaylka iga soo gaadhaya, ma garanin ilaa haddana ma garan doono farxadaydu heerka iyo xadka ama baaxada ay yeelanayso waayo wali taladaydu waxay ku laalantahay cirka qof taladiisu aanay faraha ugu jirina waad ogtahayoo wax uu qabsan karaa ama wax uu samaysan karaa ma jirto”.

Subeer waxa uu gaadhiga keenay guriga hortiisii Hodan ma oga in gaadhigu taagan yahay iyo in uu socdo toona awal hore marka ay raacdo muraayada way dalici jirtay iyada oo ka khajilaysa ama diidan in dadku arko, caawa ama xiligan way dajisan tahay muraayadu iyaduse waxay u haysataa sidii hore oo kale uun, cabaar yar kadib ayuu ku war galiyay inay soo gaadheen oo uu goorahanba taagnaa guriga hortiisa, haddii ay ogaan lahayd may sii wadee hadalka oo waxay ka baqanaysaa in aabaheed ku soo baxo iyada oo gaadhiga ku jirta, way naxday waxayna ku tidhi “walaal maxaad iigu sheegi wayday inaynu mar hore halkan nimid, miyaad ka faa’iidaysatay maqnaashiyaha naftayda iyo tagida ay tagtay, aroorida ay aroorayso naftaydu oyada oo aan ogayn halka uu ku yaalo ceelka biyaha ah ee ay ka soo cabi lahayd,

Markaan helo wax iga maqan

Ama aan hantiyo maal

Soo hees walwaalee

Hablo iima qaadee

Caawanaa hirkaan dagay

Ma hawd iyo calaydhbaa

Hawlihii caashaqa

Ma ka galay halkaygii

Subeeroow waxaan aad ula yaabanahay kulaylka, qabowga, miyir doorsoomka, is ilowga iyo jaha wareerka uu igu riday jacaylkaagu, waxaad moodaa mudadii aan kula soo socday inaan jooginba adduunyada, walaal wax kale oo aan ku idhaahdo garan maayo waan iska degayaa marka aad tagto guriga ayaan kula soo hadlayaa” hadaladaasi waxay ugu dambeeyeen erayadii murtiyaysnaa ee ay Hodan ku tidhi Subeer markii ay yimaadeen guriga, sidiibaa lagu kala tagay, haddaba haduu jab joogaa mar haddii uu ka ogolaaday inuu la sheekaysto waxa ku xiga oo ay qorshaysanaysaa waa guurkiisa isaguna niyadiisa muu galin qof aan Salma ahayn. Si waliba ha dhacdee waxa uu ku khasbanaa markan inuu badbaadiyo oo uu kalifo naftiisa maadaama uu ku furanayo naf kale.

Waxay ka mid tahay dhacdooyinka naadirka ah ee sida tirada yar u soo mara ama u soo wajahi kara qof dhalinyaro ah oo aan waliba waayo arag ahayn, isagu intii uu is lahaa waad samayn karaysaa wuu sameeyay waxase aad u yaab badnaanaysa sida uu u maarayn doono xaaladaha iyo amuuraha qalafsan ee wajiyada badan leh, Subeer arrintan dambe cidnaba kalamuu tashan aan ka ahayn walaashiisii ku soo khasabtay hase ahaatee waxaabad moodaa in marmarka qaar arrinta adigu aad wadato ay ka xoog waynaato ta reerku doonayo saamayn xoog leh oo aanuu filashadeeda lahayn ayaa ka hor timid mana waajihi karo arrintan isaga oo labada dhinac midkood u go’a mooyaane, Subeer maalmo badan ayay ku qaadatay feker iyo tashi waayo muu garanaynin ama muu dareemayn in ay arrimahani mar kaliya sidan isku bedelayaan, Salmi telefoono, waraaqo Emailo iyo sawiro ayay goor kasta soo dirtaa waxayse la yaaban tahay gaabinta Subeer oo laga yaabo in uu saddexdii su’aaloodba mid ka soo jawaabo dhawr goor marka ay la hadashana uu isagu mar la hadlo, Salmi burkaba bahal kama dayin isma laha waa lagu waydaartay oo way isa siisay, qalbigeeda iyo niyadeedana kama daadagayso naag kale ayaa idiin dhaxayn doonta adiga iyo Subeer amase waa lagula wadaagi doonaa adduunyadu waa noocyo badan shay kastaabana si aan la ogayn ayuu iskaga dhacaa, marka aynu ka tagno kuwa loo kasayo ama dadka xumi ay ku xumaynayaan dadka ay

xidhiidhka leeyihiin, ugumuu talo galin Subeer inuu marnaba tuso waji dhib iyo murugo leh gacalisadiisa Salma waxase ka adeegay nasiibka, arrimuhu marka ay sidaa noqdaana waxay yeeshaan wajiyo kala gaar ah waxay noqdaan ama ay la yimaadaan midabo iyo talooyin aanad hore ugu ogayn, Subeer hadduu afgaabnaa oo aanuu dadka aad u dhex gali jirin waxay tani ka dhigaysaa qasab inuu doonto talo waayo kama maaraynayso ama kuma go'aan qaadan karo wax fikirkiisa kaligii ka yimid way ka xoog badatay waxaana ku soo butaacay mawjado kala jaadjaad ah oo mid waliba jiho gooni ah ka timid xaaladan ama xiligan aan odhan karno wuxuu ka mid yahay mid ka mid ah wakhtiyada adag ee uu waajahay wiilkan da'da yar leh haddana waxa loo baahan yahay inuu si raganimo leh uga baxo ama isugu wado.

Maalin dambe ayaa ninkii Subeer waxay ula gashay maadaama aanuu markii hore jaadna cuni jirin balwadna lahayn inuu soo qaato jaad oo uu la soo fadhiisto asxaab badan oo ay ku kala tagi jireen maqaaxiyaha isagoo sii jeclaysanaya joogitaankooda diidayana arrinkan kaliga ku noqonaya ee uu wax badan iska waydiinayo, Subeer ma yaqaano ama waa markii ugu horaysay ee uu jaad afka galiyo sida qolyaha muqayiliinta ah uma qayilayo laakiin caleentii jaadka inteedii badnayd wuu liqay bigays badana wuu cabay goor ay 7:30 habeenimo tahay ayuu ka soo baxay qol yar oo ay ku fadhiyeen ilaa todoba dhalinyaro ah, Salaan oo ka mid ah asxaabtiisa kuwa ay iskugu jecel yihiin hase ahaatee ay marka hore kala reebtay balwadu oo wakhtiyada la qayilayo aanay is arki jirin ayay caawa wada socdaan, Salaan waa nin maskax badan oo aad u fikrad wanaagsan hase ahaatee Subeer oo mararka qaarkood aad odhan karto waa gar ma qaate ayaa ku diida soo jeedino badan oo uu soo hor dhigay, Salaan waxa uu ku yidhi "si arrintani u hadho guurso gabadhan Salma odaygana ku cadaadi hadduu diido marka dambe qasabuu ku yeelayaa xishmada waalidka dartii ayuu diiday inuu sameeyo waxaanuu ogolayn aabihii, mar labaadna wuxuu talo ugu soo jeediyay in uu faraha kala baxo arrinta Hodan oo laga yaabo inay marka dambe caqabad ku noqoto taana sideedii umuu qaadane waynagan arkayna

halka uu marayo haddaba goortan oo la mirqaansan yahay waxa gaadhiga la dhigay meel wadada dactalkeeda ah waxaanay fadhiyaan maqaaxi meel barxad ah ku taala, wakhtiga oo qaboobaa iyagu way gubanayaan taasoo inta badan ah calaamadaha mirqaanka Subeer wuxuu u dhaw yahayba neef qabataw hase ahaatee goor dambe ayuu u burqaday oo uu u soo fatahay sidii wabiga waxa ka soo yeedhaya hadalo waawayn iyo odhaaho aan lagu baranin oo ku cusub afka Subeer iyo dhegaha Salaanba waxa ka mid ah "waxaan samaynayaa waan guursanayaa Hodan Salmana haday ogolaato iyadana waan ku xigsiinayaa haddii kale sidaa ay ku maqan tahay haku maqnaato" Salaan ayaa aad uga xanaaqay eraygaa oo ku yidhi "waxaan ku moodayay inaad tahay nin go'aan leh laakiin jaadkii aad maanta cuntay wuxuu soo saaray jileecnimadaada iyo sida aanad adkaysi ugu lahayn dhacdooyin badan, arrimahani maba aha wax aad isku mashquuliso gabadha hadaad doonaysana gabadhaadu waa Salma cid kasta u gee gabadh aan Salma ahayn lagama yaabo inaad guursato" markuu leeyahay erayadan Salaan wuu qoslayaa isagoo la yaaban sida mirqaanku uga hadliya ama uu u majara habaabin gaadhay saaxiibkii waxaanuu ku yidhi "Subeeroow laga bilaabo caawa dib ha u cunin bahalkaa haddii kale dee barina anigaad odhan doontaa hala dilo oo wax waliba way kuu fududaanayaan, waxaad ku fiicnayd jaad la'aantaadii ee sidaadii hore iskaga joog waxaad caawa igu tidhaahdana waxaan u arkayaa tijaabadii qaadka oo ka soo qaadi maayo hadal meel gaadhaya" Subeer aad ayuu ula yaabay sida saaxiibkii hadalkiisa oo dhanba u daadifeeyay waxaanuu yidhi "Salaanoow jaad la joojinayaa ma jiro, sidaa aan caawa u bilaabay ayaan u wadayaa ilaa inta aan ka guri galayo haddii kale saaxiib waxaad ii sheegtaa inaad tahay cadawgayga oo aynu halkaa ku kala hadhno hada ogowoo mirqaankan iyo xaaladan macaan ee uu imika ku jiro ayaa u sawirtay in wax waliba si dhib yar ku dhamaanayaan waxaanuu diidan yahay saaxiibkiisan leh ka noqo oo iska daa hanagu soo biirine, Subeer habeenkii in badan ayuu u sheekeeyay saaxiibkii Salaan oo uu uga sheekeeyay arrimo badan oo aanuu hore ugu sheegin markii dambe ayuu odhanayaa waar inagu yar dhawee hudheelka waxaana ka socda hees aad

u macaan oo markaa si xooga ugu dhadhamaysa Subeer, waxaanay ahayd
hees uu qaadi jiray Alle ha u naxariistee fanaankii codka baxsanaa ee
Mohamed Mooge Liibaan

Markii aan dhab kuu dayay
Cadceed dhalata waabari
Ama dhool aroornimo
Dhanka bari ka soo baxay
Naasaha dhexdoodiyo
Dhuuxii Hargeysiyo
Damashii ku dherernayd
Oo mayay ku da'ayo
Igu dhalisay caashaqa
Markii aan ku dhawraba
Waxa la isku dhaafaa
Dhex yareey nasiibkee
Malaha waanad dhaadine
Soomaalaad ka dhalatoo
Dhay lagugu koriyoo
Damal dherarkii noqotay
Igu dhidibtay caashaqa
Markii aan ku dheehdaba

Mirqaanka jaadka iyo maqalka heestaa macaan iyo kuwo kale ayaa waxay
hawada ka saareen inanka aan waligii qayilin, wax la murmoba, wax
saaxiibkii ku yidhaahdo arrinkan iska jooji isna uu yidhaahdo waan
dhamaynayaa ugu dambayntii iyadoo aan go'aan laga gaadhin ayaa la kala
tagayaa, Subeer markii uu yimid guriga inkasta oo uu soo habsaamay oo
uu hal saac ka dib maray wakhtigiisii hore haddana wali xaafadu may tabin
oo wakhti dheer oo lagu tabo muu maqnayn qolkiisii ayuu galayaa
waxaanuu soo qaadanayaa taleefanka si uu ula hadlo Salma, telefanka
guriga u yaala ee u gaarka ah waxa uu u furan yahay debeda laba saddex

jeer ayuu ku celcelinayaa mar dambe ayaa laga qabanayaa, nasiib darro qoladii huteelka ayaa u sheegaya in loo casho sameeyay oo lagu marti qaaday Huteel kale oo Night Club ah. Subeer isagoo marka horeba ka xun bixitaanka ay kaligeed tagtay ayaa haddana waxa u raacay shaki faro badan oo uu ka shakiyay, maadaama ay kaligeed joogto meel Qurbe ah, degentahayna Huteel wakhtigii ay doonto bixi karto soona noqon karto arrintan ayaa qayilaadii si aada u tustay, u buunbuunisay una balaadhisay isagoo fikradiisa ay ku jirto maxaa dhacay, maxaa is bedelay, maxay ku sugantahay, maxaan ku sugaa iyo wakhtigan sideebaan naftayda aan ula gaadhaa. Subeer waataan hore u sheegnay in uu saaxiibkii ku yidhi waxaan guursanayaa Hodan Salmana haday ogolaato waan ku labaynayaa haddii kalena ha iska tagto waxa ku soo noqnoqanaya oo dib isugu soo celcelinaya wakhtiyadii ay wada joogeen ee ugu dambeeyay dardaarankii uu ku lahaa iyo hadaladii ay iyadu mar walba hor dhigaysay oo ahaa miyaanad walaal i aaminsanayn maanta ma waxaan ahay qof nafteeda looga baqo, haddaad naftayda u baqayso hore ayaad ugu biqi lahayd markii aan kaa maqnaa muddada badan, Subee wakhtigaasi wuxuu xusuusan yahay in ay hooyadeed iyo wiilkii guursaday ee ay ilmoabtiga ahaayeen ku xeernaayeen oo aanay jirin fursad madax banaani leh oo ay ku tagto meesha ay doonto halka maanta ay haysato wakhtigii iyo lacagtii.

Subeer goor ay tahay 2:30 habeenimo ayuu garaacayaa telefoonka waxaanuu waydiinayaa inanka Risebshanka ee xafiiska Huteelka haya sidii si leeg ayuu ugu sheegayaa inay maqan tahay oo ay imanayso ama aanay imanaynba deetana dhawr su'aalood ayuu waydiiyay ileen waa nin mirqaansane intuu makii hore raali galiyay ayuu ku yidhi ma ku waydiin karaa su'aal sidaa darteed inankii intuu cabaar aamusnaa ayuu ku yidhi "inkastoo ay goor dambe tahay haddana halkeed ka soo hadlaysaa?" wuu isku sheegayaa inuu joogo Hargeisa gabadhanina tahay gabadh ay wax isku yihiin, wiilkii oo markii hore moodayay qof magaalada uun kala dhex hadlaya ayaa si fiican oo degen ula hadlay waxaanuu ku yidhi "walaal gabadhan iyo Hayada ay la socotaa waa dad tiro badan isla markaana

qaarba Huteel ayay degan yihiin waxa dhacda inay habeenada qaar dhaxdo, habeenada qaarna aanay bixinba markaa caawa waxa laga yaabaa inay tahay habeenadii ay lahaayeen xafladaha oo aynaan helin waxaanse isku taxaluujinayaa inaan gaadhsiiyo farriintaada una sheego inta jeer ee aad la soo hadashay, walibana haddii aanay maqnaanin wakhtiga ay soo gasho waa in ay kula soo hadashaa anigaa ballantaa kuu qaadaya” inankiibuu ka qortay Adareeskiisii kiisiina wuu siiyay waxaanuu ku yidhi “barasho wanaagsan iyo saaxiibtinimo hor leh” sidiibuu ku dhigay telefoonka, saacadu waa saddexdii habeenimo wakhtigaasi ayuu Subeer isaga oo gubanaya galayaa baadka waanuu maydhanayaa isaga oo aan dareensanayn qabawga jira balse uu shidayo barjihii maantu.

Soo noqodkiisii iyo waxa kulmay telefoonka oo dhacaya waa Salma waa saacad dambe iyaduna way daalantahay hadal badan ma kari karto waxay u sheegaysaa inay ku maqnayd marti qaad halkaasaa la isku af dhaafayaa iyaduna way xanaaqaysaa isaguna si adag ayuu ula hadlayaa xaalkuna wuxuu noqonayaa in telefoonada la isku dhigo, wuu iska seexday iyaduna markeeda horeba way heedadawsanayd oo way daalanayd waxaanay gashay qolkeedii si ay iskaga seexato markii uu waagii baryay ayaa goor tobankii ah uu ogaanayaa inuu hurdo waxa ku garaacaysa guriga Hana yar oo u sheegaysa inuu habsaamay iyadoo meel waliba damqanayso oo jidhkiisa burbur badani ka muuqdo ayuu soo baxayaa, cabaar yar kadib markii uu quraacday wuxuu u soo baqoolay dhanka magaalada si uu u guto hawl maalmeedkiisii waxaanuu imanayaa tukaankii oo Odaygii hor fadhiyo halkaana waxoogaa canaan ah ayuu kala kulmayaa kumase daahayo wuu iska dhaafayaa, wuxuu toos u galayaa gudaha waxaanuu la soo kala baxayaa buug xisaabeed qabyo ahaa oo uu shalay kaga tagay halkaa markuu bartanka marinayo ayaa waxa la soo hadlaya saaxiibkii Salaan oo shaw xalay oo dhan ku daalay telefoonkiisa oo uu xidhay is waraysi dabadeed, wyxyy waydiinayaa halka ay iskugu imanayaa, waxaanay ku ballamayaan dukaan ay hor fadhiisa jireen wakhtiga qadada ka hor, inyar dabadeed waxa la gaadhayaa wakhtigii salaada duhur, Salaan oo sii jooga

ayaa Subeerna soo ag istaagayaa, gaadhigaa la kaxaysanayaa waxayna u baxayaan meel ka baxsan xaafada intay istaagaan wadada dhinaceeda ayuu uga sheekaynayaa wixii xalay ku dhacay iyo wixii uu ku xalilay iyo waxa sugaya iyo wixii uu kula talin lahaa, Salaan maaha nin Illaahay talo ku dhibay waxaanuu odhanayaa “haday kula soo hadashana khaladkeeda way qaadatay, waa haddii waxa aad ii sheegaysaa dhab tahay, haddii kale oo ay aamusnaato adiguna lama hadlaysid waayo way ugu talogashay waanay ku tijaabinaysaa”.

Sidiibaanuu yeelayaa oo aanuu ula hadlayn, way iska qado tagayaan Subeer maalintii labaadna wuxuu ku celiyay qaadkii oo wuxuu la fadhiistay saaxiibkii inkaariba waatane jabku wuxuu ka joogaa mawjadahan ee midba mida kale isu dhiibayso ee aanay lahayn ka joogsida. Subeer intaa uu fadhiyo marfashka ma hadlo ee wuxuu dhagaystaa waxay ku hadlayaan qolyaha uga soo horeeyay fadhiga waxase ay aad u jecel yihiin inay ka hadliyaan oo ay dhagaystaan bal sida uu ugu dhibcay iyo halka uu ka gaadhay jaadkii, Subeer wuxuu aamusnaadaba markii dambe ayuu soo butaacayaa sidii qasabada oo aanuu hadal kala joojinayn iyadoo dhalinyaradii halkaa fadhiday wax qoslaya mooyaane wax kale laga waayay, waa nin maadeeya oo murti yaqaana walibana cod kar ah laakiin wakhtigii hore waxa ku daahnaa oo hadhaynayay xishood uu u dhashay wakhtiganse la isla soo dhaaf oo wuxuu marayaa inuu marfashkii dhamaaba kaligii la dhagaysto hadal badni awgeed Subeer markuu cabaar hadlo waxa uu galayaa waxoogaa xusuus ah oo ku xeeran noloshiisa markuu inyar ka fekero ayuu ogaanayaa haddana inuu cid u sheekaynayay taasi ayaa dhalinyarada ku keentay in ay wax badan iska waydiiyaan xaalada dhibaato ee wiilka da’da yar dagal fadhiga u ah waa mucjiso qof aan waxba kuu sheegayn, waxna ka soo baxayn balse aad dareemayso inuu dhibaataysan yahay, Salaan oo fadhiya meesha ayaa ku odhanaya saaxiibkii markuu arkay inuu ka baxay oo uu isla maqan yahay “Subeer saddex jeerbuu ku celinayaa kadibna Subeer ayaa ku naxaya codka saaxiibkii oo ogaanaya halka uu ku maqnaa iyo.....

Goor ay tahay lixdii aroornimo oo aanu ilaa wakhtigaa indhaha mar keliya isku qabanin laydhkuna qolkiisa ka bakhtiyin ayuu tiigsanayaa Telefoonka oo yaala geesta bidix ee sarriirtiisa waxanu damacsan yahay inuu la hadlo gacalisadiisii.

Salmi waa gabadh xalay si fiican u seexatay oo aanay kaba qasnayn goortan waxayna fadhidaa barandaha gurigooda, goor dambe ayay maqlaysaa dhawaaqa telefoonka oo goorahanba dhacayay intay si dhakhsha ah u haab haabatay kabaheedii ayay u luuday makhsinka fadhiga oo uu telefoonku yaalay.

Salaan kadib Subeer aad ayuu uga naxsan yahay siduu uu ugu sheegi lahaa arrinkan foosha xun haddana inyar markay wada sheekaysteen ayuu u bilaabay isagoo ku horaysiinaya erayo dejin iyo waano ah xaalada uu kala kulmay aabihii waxaanu yidhi:

"Salma wax waliba wallaal way iska dhacaan marlaybana imtixaanaadku waa qaar la inoo qoray waxan kuu sheegayaa arrin yar ee ha u arkin in ay tahay wax labadeena dhantaali kara ama dhaawici kara kalgacalkeena, wallaal xalay ayaan u sheegay aabbo in gabadha aan soo arkooday ee aan rabo in loo fadhiistaa ay adiga tahay haseyeeshee si aanan filayn ayuu aabahay iila hadlay waxaanu iigu jawaabay ma yeelayo guurka aad guursanayso gabadhaa Salma isagoo ku sababaynaya duruufihii iyo waayihii xumaa ee ina soo maray, wallaal kolay waa waalid oo iyagu meel aynaan waxba ka eegin ayay ka arkaan markaa arrintaas ayaan xilligan kuula soo hadlay."

Intaa markuu yidhi ayay Salmi qaadatay hadalkii iyadoo aad uga naxday go'aanka adag ee uu gaadhay odayga u noqon lahaa sodogu, Salmi waxay tidhi:

"waan ogahay Subeerow in jiribaad iyo imtixaan adduun aanu inagu yarayn waxase loo baahan yahay oo lagama maarmaan ah in aynu u adkaysano waan ogahay oo odhan maayo muxuu aabbahaa sidaa u yeelayaa waayo

dhibaatan oo dhan waa mid ka timid xagga aniga iyo reerkayaga waxa kaloon ogahay in maanta si farxad leh iyo damaashaad leh la ii soo dhawayn lahaa hadday tahay maalintii afar sanno ka hor aan baajiyay diyaar garowgii ay reerkiinu ii diyaariyeen arooska isla markaa si kastay u dhacdo iyo wax kastoo ka yimaada reerkiina waa mid aan anigu dusha u ridanayo hana ka yaabin oo ha ku fekerin in aan u arko xumaan, Subeerow ma ahi qof wanaagsan sababtoo ah waxad tahay qof miskiin ah oo aad u niyad fiican reer baanad keligaa u tahay wiil mar walbana waxay doonayaan in ay arkaan quruxdaada taasi waxay sababtay inay igala kaa baqdaan maadaama ay I

yaqaanaan in aan ahay gabadhii wax la og yahay u geysatay."

erayadani si aad ah ayay u damqayaan Subeer waxaanu yidhi:

"Salmaay ha isa saarin dembi aanad lahayn ha iskuna sheegin in aad tahay qof dembiile ah waan ogahay oo kollay dhib waa dhacay dhinac kasta ha ka yimaadee waxase loo baahan yahay in aynu yeelno sidii aynu u gaadhi lahayn guusha aynu doonayno, siday kula tahay maxaadse arrin haysaa ee ka duwan ka aan kuu soo bandhigayo oo ah in haddii odaygu ku adkaysto diidmadaada aynu si madax bannaan isugu go'no oon ka go'aan goosto reerkayaga.

Salma ayaa tidhi iyadoo sheegaysa sida uu ula muuqdo arrinkani:

"Subeerow, ha hilmaamin hana iloobin, hana dhalinyaroobin, hana fududaan, inagana ha inaga dhigin dad waalid-caasi ah reeraheenana yaynaan u soo jiidin magac xumo miyaad ilowsan tahay afar sanno ka hor maalintii tan oo kale ay aniga ila soo deristay go'aanku sidii uu u dhacay inkastoo wakhtigaasi taladu ahayd mid adag oo aynu labadeenuba ku tashanay in aynu badbaadino hooyadeen haddana maanta laftigeeda ayaa u baahan in aynu badbaadino aabaheen, haddii uu ku dawoobayo, ku fiicnaanayo, ku ladnaanayo, ku qaboobayo, kuna qancayo gabadh kale oo uu kuu guuriyo waa in aad adeecdaa waxa keliya ee aad heerkay ku soo gaadhay waa ducada waalidkaa iyo jaceylkooda waxaan ku leeyahay

maqal hadalka uu kuu soo jeediyay aabahaa anigu waan ku jeclahay, inta ifka ka dhimana lagama yaabo in aan inan rag maxaad haysaa Idhaahdo, waa ballan aan adiga iyo Illaahay idinka qaaday.

Subeer si adag ayuu wakhtigan ula hadlayaa Salma waayo xalay oo dhan wuu soo jeeday in ku dhow saacad iyo badhna wuxu la hadlayay Salma markaa maba oga inta badan hadalada uu odhanayo,
"Salma miyaad I nacday ma go'aan baad keligaa gaadhay, ma aabahay baa ku doonayay markii hore, maxaadse ii lugaynaysaa eed iigu sheegaysaa hadalada beenta ah maxaad ii odhan wayday kuma doonayo, goorma ayaynu noqonay ama aynu ilaa heerkaasi kala fogaanay sideed ii tidhaahdaa guurso gabadh aan adiga ahayn, maan filayn inaad hadaladan iyo qaar la mida igu odhanayso imikana haddaad sidaa garatay go'aanka aabahay iyo kaaga midnaba ma raacayo waxan yeelayaana aniga ayay ii taalaa." isagoon is ogayn ayuu telefoonkii isa saaray waxaanu u baxay debedda.

Salma arrintii way ku foorartaa amakaag iyo yaab ayaa Illaahay u keenay waxa hore loo yidhi "wax badso wax beel bay leedahay" bal miyay iska oggolaato arrinkii uu ula yimid, intay kacaa fadhiisatay oo dhaqaaq joogsatay ayaa iyadoo dhafoorada haysata markay dhawr goor ku celisay telefoonkii balse cidi ka qaadi wayday ayay ku tawaawacday erayo geeraa ah oo ay ka mid yihiin:

Dig diglow ma hiigaan
Iyo daad rogmadayoo
Durba keenay baadoo
Duunyadu ku naaxdoo
Biyuhuna durdurayaan
Sida loo daneeyuu
Ii deeqay wiilkuyoo

**Inta gaban da'diisee
Degmadeena socotana
Isagaan ka doortoo
Naftu doorbidaysee
Daa'inkow ii soo celi
Ma dagaalin aniguye
Isma diidin anaguye
Cidii noo ducaynlayd baa
Midba dacal u riixdee
Afar guban daraadood
Dibadaha u joogoo
Duurgal aan ahaynee
Markan degan nidhaahdaba
Waalidkaa na diidane
Daa'inow allahayow
Dudmo yuu igaga tegi**

Daqiiqado yar gudahood ayaa inantii Salma gabi ahaanba jidhkeedu doorsoomay waxaana qabtay xumad ama qandho aan markii hore haynin, talaa ku ciirtay, arrin baa ku cuslaaday, cid ay wax u sheegto ma hayso waxay go'aansatay inay u lugayso gurigii Subeer inyar dabadeed haddana waxay isku qancisay in ay ka war sugto muddo saacado ah maadaama uu xanaaqsanaa.

Salma waxan odhan karnaa way ka waayo aragsan tahay Subeer marka loo eego dhinaca waxa loo yaqaano Mushkiladaha Qoyska (Family Problems) waayo waxay ogtahay siyaabo badan oo loo xalilo marka ay is qabtaan nin iyo ooridiisu, taasina waxay u sahlaysaa in ay uga wareegto dhinacyo kale.

Waxay go'aansatay in aanay ugu tagin gurigooda isla mar ahaantaana aanay telefoonka ku qaraacin balse waxay go'aansatay in ay u istaagto bartii ay ku balami jireen ee geedkii, waxay tagtay sidii caadada u ahayd

geedkii subaxdii hore ee maalintaa si ay ula kulanto marka uu Subeer tagayo shaqada. Waxay meeshii taagnaataba goor dambe ayaa wiilkii Subeer oo ugu soo talogalay shaqo tag isla mar ahaantaana deg degsanaa oo daahsanaa ayaa meel dheer ka arkaya Gabadha taagan goobta in yar dabadeed markuu uu soo gaadhay, isaga oo ku mashquulsan arrimaha isku dul saarmay ee dhinacyada badan ee nolosha, ayuu la soo istaagay Salma oo goorahanba sugaysay isaga, Salaan dabadeed waxay soo dedejisay salmi hadal iyada oo ka baqo qabta in uu weli cadhaysan yahay, waxayna u sheegtay in wax kastaa iska dhacaan isla mar ahaantaana hadalkii maalintii dhawayd ku dhex maray telefoonku aanu ahayn mid dhaawici kara aayahooda dambe sababta ugu weyn ee ay hadalka u tidhina ay ahayd in ay u caqli celiso balse uu Subeer u qaatay si qaldan.

Subeer wuu ka soo dabacay halkii hore ee uu taagnaa, waxaanu ku yidhi: "waxaan la yaabay hadaladii uu waalidkay igu yidhi iyo kuwaagii oo isku mid noqday."

Subeer hadalkii ayuu sii waday oo dhiniciisa ayuu ka raaligaliyay Salma, waxaana la isla qaatay in ay dhan uga soo wadajeedsadaan halganka dheer ee ay ugu jiraan sidii ay mar uun u noqon lahaayeen Qoys.

Intaa dabadeed waa la is macasalaamaynayaa waxaanu ballanqaadayaa Subeer sidii uu horeba u ballanqaaday in uu aabihii ka qancin doono arrinta caqabada ku ah, waxaanu u dhaqaaqayaa dhinacii Bakhaarka oo uu markaa ku sugnaa odaygii Dhamal, soo gelitaankii horeba wuxu odaygii aabihii ahaa ku odhanayaa aabbo maxaa kugu dhacay maanta ana waxan rabay in aan kuu diro ganacsigeenii Boorama laakiin waxad moodaa in jidhkaaga daal badani ka muuqdo ee bal ii xaal warran aabo.

Subeer ayaa wuxu yidhi: "Aabo waan iska wanaagsanahay waxaanad

iyeelina igumuu dhicin"

"Yaab!" odaygii weligii kamuu maqlin odhaahahan oo kale waxaanu aad ula yaabay dhiiranaanta uu kula soo booday kelmadan maadaama aanu hore uga baran waxaanu yidhi Odaygu "Aabo waa maxay waxan kuu geystay ee aad ka cabanaysaa, ma gabadhaad ogayd dhibtay hore inoogu geysatay ayaad haddana tan inoogu daraysaa, mase noqon karnaa, dad ku kala tagaya gabadh iyo wax la mida miyaanad ogayn in aad tahay waaxdaydii midig, haddaadse adigu hadalkayga khalad u qaadatay maxaa kuu diiday in aad si qabow wax iigu sheegto. Imika iyo haatan waan ogaa in aanad beryahan sidaadii ahayn anigana waxa igu qasab ah in aan kuu yeelo wax kasta oo aad rabto. Subeer ayaa ku soo boodaya aabihii isaga oo ay labada indhood ilmo ka socoto kana naxsan erayadii uu aabihii ku yidhi iyo sida uu aabihii ugu jawaabay oo noqday kaaf iyo kala dheeri waxaanu yidhi: "aabo iga raali noqo, I cafi, oo I saamax, waan ogahay in aan khaldamay waanan ogahay in aanu ifka jirin cid iga kaa jeceli, imikana haddaad igu tidhaahdo iska daa iyo haddaad tidhaahdo waan kuu yeelay labadaba raali baan ka ahay waxaanan diyaar u ahay in aan qaato ducadaada ee aabo ii ducee."

Dhamal ayaa isu raaciyay "gabadhiina waan kuu oggolaaday waanan kuu duceeyay ee aabo maanta sidee buu qalbigaagu yahay ma ku faraxsan tahay maxaa kale ee aan kuu qabtaa."

Jawiga Subeer ee xilligani wuxu noqday mid aan la tilmaami karin, waxaanu ugu jawaabay aabihii: "ma jiro arrin kale oo iigu kaa hadhsan."

Intaa dabadeed waxa la isku soo raacayaa guriga si loogu qada tago bal haddaba aynu eegno maadaama ay Subeer iyo Aabihii ka soo heshiiyeen arrinkii Salma sida uu isku beddelay xidhiidhkoodii waalidnimo oo markii horeba ay ahaayeen laba is dhalay dhinacna ka saaxiiba iyadoo ay u sahashay madinimadu ayaa Subeer mar walba wuxu ku dhiiranaa inuu aabihii u dhalo Wiilal kale taasoo ahayd mid labadooda oo qudha ka

dhaxaysa oo aany ogayn reerka intiisa kale, waxaana dhexmaraysa wakhtigan sheekadan,

Subeer ayaa wuxu yidhi: "Aabbo gacaliye, adiga oo iga raali ah, hal aan ku idhaahdo, maadaama aniga iyo gabdhaha aad dhashay ee aanu wallaalaha nahay aanu hadda nahay dad waa weyn oo gaadhay xiligii ay waalidkood u abaal gudi lahaayeen, sidee bay kuula muuqataa haddii aanu adiga laftaada kuu guurino oo gabadh yar oo noo dhasha ubad yar yar, taas oo laga yaabo in Illaahay kaa siiyo wiilal kale oo anigana madinimada iga baabi'iya oo garab iyo gaashaan ii noqda."

Oday Dhamal ayaa isna yidhi: aabo taasi ma xuma laakiin, sebenka aynu ku jirno gabadha aan guursadaa waxaan u arkaa inay inagu soo kor-dhinayso rab-shad waayo hadda waxaan ku hawlanahay maamulkiina qoysnimo iyo dhismaha ubadkayga, balse hadii aan hadda guursado waxaan ka mashquulayaa dhismihiinna.

Sidaa darteed iminka iima muuqato meel aan ka guursadaa, maxaa yeelay sida aad ogtahay labadii hablood ee aad walaalaha ahayd mid waa la guursaday, midna weli way joogaan, adiguna sidoo kalena waadigan aan aqal yeelan sidaa awgeed markaa aad wada fushaan, hadii Alle-idmo waan iska tashan doonaa, mana waayayo wadaad dabka ii shidda.

Subeer oo sheekadiisii iyo sheekadii cusbayd ee aabihii isku wada ayaa yidhi aabo markaan eego dabeecadaha ay naxariista badani ka muuqato ee leedahay, waxaan moodi jiray inaad tahay qof caynaan jilicsan oo aan diidayn talada iyo waxa danahaaga ku saabsan ee aanu u soo jeedino, laakiin hadda waxa ii muuqatay inaad adigu igu dhashay madax-adaygga iyo goaan qaadashada adag, balse hadii aan dib ugu soo noqdo arrintan, waxaan aabo ku waydiinayaa, sidee baad u aragtaa hindisahaygan, cusub ee ku saabsan guurkayga

Oday Dhamal ma aha nin ad-adag, wuxuuna wiilkiisa Subeer dheeryahay dhaqanbulshanimo iyo kaftan badnaan, taas oo uu wiilkiisa waxa uu doonayaba u sheego isaga oo qoslaya, dabadeed oday Dhamal isaga oo la hadlaya wiilkiisa Subeer, wuxuu yidhi aabo Subeerow haddii aan ka jawaabo arrinta gabadha aad sheegtay, waxaan tafaasiil ka bixin kari lahaa adiga oo I tusa, kadibna marka aan arageeda iyo qiimaynteeda ka bogto wax I waydii.

Subeer intuu qoslay ayuu aabihii ugu jawaabay aabo bal ka waran haddii ay tahay gabadha ugu fool xun gabdhaha magaalada jooga, maxaad yeelaysaa.

Oday Dhamal hadalka meel fog kama doonin, kumana raagin jawaabta ee wuxuu si deg deg ah u yidhi aabo horta nin walba waxa u qurux badan gabadha uu ka helo, waana tii hore loo yidhi, ninba tuu calmadaa wow Cambaro-luul, markaa aabo gabadha aad arkootay sow adiga kumay cajabin.

Subeer baa isna yidhi aabo waa runtaa oo nin kasta ama qof kasta qofka uu jeclaado ama calmado ayaa aragtidiisu tustaa inuu dadka ugu qurux badan yahay, uguna wacan yahay, anigana gabadha aan calmaday ayaa dadka igula qurux badan, iigulana qaayo badan walow ay runtii tahay qof qurx iyo qiimeba loo dhameeyey.

Markii ay Subeer iyo aabihii hal cabaar ah is dhaafsadeen wada sheekaysi iyo doodo kaftan u badan, runna aan ka taganayn, waayo waxa la yidhi waayeel hadalkiisa kaftanka ayuu ku dhamaystaa. Ayuu Subeer u hadlayaa si aan kaftan ku jirin oo runta lafteedii ah, wuxuuna yidhi aabo sida ii qorshaysan muddo saddex toddobaad ah ayaa ka hadhsan waqtigii aan u qoondeeyay in loo tago gabadha reerkooda, si loo waydiisto."

Odayga Subeer aabihii aad buu u yaqaan Xaaji Abtidoon, wuuna ogyahay inuu gabadh keliya leeyahay wax ubad ah.

Odaygu isagoo hadalkiisii sii wata wuxuu wiilkiisa ku yidhi: aabo waayahay wax kasta oo aad u baahato anigu maya kaa odhan maayo, hawshana waan kula dhamaynayaa ee diyaar-garow.

Subeer waayahay aabo ayuu yidhi, dabadeedna waa la kala tegay, Laakiin Subeer isaga oo faraxsan ayuu markiiba tegay xafiiskoodii ganacsiga, wuxuuna si deg deg ah u qabsaday Telefoonka oo wuxuu la hadlay Salma, wuxuuna si farxad leh ugu yidhi Salmay wax badan baan sugayay inaynu mar uun isu noqono nin iyo ooridii, laakiin maanta ayay himiladaydii sararta gadaanka saaran tahay, waayo aabahay wuu ila ogolaaday arrinteenii aan ula tegay, wuxuuna I siiyay kalsoonidii ugu dambaysay ee qadiyadda guurkeena, markaa miyaanay xaajadeenu maanta joogin guushii kama dambaysta ahayd.

Salma intay farxad la riyaaqday oo ay jidhiidhico farxadeed jidhkeeda tin iyo cidhib saaqday ayay tidhi Walaal Subeerow miyaad kaftamaysaa, mise run baad ii sheegaysaa. Salma way sii waday hadalka waxayna tidhi walaal Subeerow arrinta keliya ee aan werwerka ka qabay ee aan ka baqayey waxay ahayd inuu aabe Dhamal qaddiyadeenna ku gacan saydho mar labaad oo uu is hortaago guurkeenna, markaa miyaad iga farxinaysaa oo wuu aqbalay, bal ii waran haddii ay arrintu run tahay muxuu kugu yidhi Subeer, isaga oo si kalsooni iyo yididiilo badani ka muuqato u hadlaya ayuu u jawaabay Salma, wuxuuna yidhi Salmay, Gacalo, arrintaasi way dhamaatay laakiin aabo wuxuu igu yidhi, waxaan rabaa inaad I soo tusto gabadha aad guursanayso si aan u arko sida ay u egtahay, waayo buu yidhi waxaan doonayaa inaan kaa eego gabadha aad guursanaysaa inay tahay gabadh qurux badan iyo in kale, dabadeedna taa waan ka yeelay, ee sidee bay adiga kula tahay Salmay.

Salma waxay hadalkaa kaga jawaabtay walaal Subeerow miyaad igu ciyaaraysaa, mise waa kaa dhab, iminka waxaad doonaysaa inaad dabada iga kaxayso oo aad odaygii I horgayso, miyaadanse ogayn aabo iska daayoo inaan qofkasta oo aad wax isu tihiin ka xishoodo oo aanan wejiga siin-karayn, markaa walaal Subeerow hadii aad iga naxayso sidaa haygu talin.

Subeer, isaga oo ku ciyaaraya Salma ayuu hadana ku yidhi Salmay walaal ma jiro dariiq kale oo inoo furan oo aan ahayn inaad odayga hor tagto oo aan iskiin baro, ka dibna aad wada sheekaysataan oo is-barataan.

Salma, way sii naxday, waxayna hadalka Subeer u haysataa hadal run ah, dabadeedna waxay ku tidhi Alla walaal Subeerow miyaad waallan tahay, ma waxaad doonaysaa inaan qaracmo, miyaadan iga naxayn, alla walaal iga daa ha I horgaynin odayga ii soddogga ah ee aanan wejiga siin karayn, balse Subeerow hadii aanad doonayn inaan muraaradilaaco odayga igala hadal oo uga cudur daar arrintayda, aniga oo aad kaaga codsanaya inaad iga bad-baadiso naxdin iyo baqdin naftayda waxyeelo u gaysan karta hadii ay dantu igu khasabto inaan odayga hortago, waayo haddii ay arrinteenu u xanibmayso shardigaa markaa waan ku khasbanahay inaan sidaa yeelo, laakiin waxaan kaaga baahanahay suuf iyo xanjo waxaad isku xidhoba inaad iga furato hor-tegidda wejiga odayga.

Salma waxa ka dhamaaday baryootan iyo hallaan-hal sidii ay u lahayd walaal odayga hay horgayn ee iga daa, iyadoo ku walaatay calaacal iyo walaac.

Hase yeeshee goor dambe oo uu calaacal ka dhamaaday ayuu Subeer u sheegay inuu ku ciyaarayey oo uu arrintaa hore u dhameeyey, taas oo uu aabihii ku qanciyeey inuu iska ilaawo qoddobkaa.

Markii uu Subeer sidaa yidhi gabadhii Salma waxa ka soo booday neef-weyn, waxayna tidhi waar walaal gacaliye maxaad iigu ciyaaraysay naftii baad iga saartee, iminkana aad baad u mahadsan tahay mar hadii aad arrintaa hore iiga horjoogsatay oo aad dhamaysay.

Subeer baa isna yidhi walaal Salmay, mar-mar waa isaga keen furan yahay kaftanka iyo laacdanka kalgacaltooyo, laakiin taa odayga marna kama yeeleen, hadii aan ka yeelano waxay noqon lahayd nin hawsha dhinaciisii dayacay oo kugu soo daayey arrin aan kufkaaga ahayn.

Intaa markii ay Salma iyo Subeer is-dhaafsadeen ayey is-macasalaameeyeen oo kala tageen, iyadoo xiliga ay hawshu dhacayso iyo sida loo maamulayona laga sii ballamay.

Hase yeeshee Subeer labo maalmood ka dib ayuu safray dhinaca magaalada Berbera, halkaas oo uu ka soo samaynayey xisaab xidh ku saabsan meherado ganacsi oo ay Berbera ku leeyihiin, wuxuuna halkaa ku maqnaa toban maalmood. Laakiin maalinkasta Salma iyo Subeer telefoonka ayey ku wada xidhiidhi jireen ee ma ahayn dad kala baadiyoobay.

Salma tobankii cisho ee uu Subeer Berbera ku maqnaa mar qudha guriga debedda ugama ay soo bixin.

Subeer Tobankii cisho ka dib wuu so noqday, dabadeedna isla maalintii uu soo galay ayuu markiiba Telefoon u diray Salma, kuna wargeliyey inuu yimi, wuxuuna intaa u raaciyey inuu doonayo inay is-arkaan isla caawaba, taas oo ay iyana dhinaceeda ka aqbashay, waxaana lagu ballamay goobtii caanka ahayd ee lagu ballami jiray.

Dabadeedna 7:00 fiidnimo ayaa la isugu yimi goobtii ay ku ballameen, laakiin habeenkaa lama tegin hudheelkii cuntada ee ay arimaha ku soo gorfayn jireen, sidaa darteed waxay habeenkaa dhex-qaadeen suuqa

ganacsiga Allaabooyinka iyo dukaamada lagu iibiyo alaabooyinka udugga iyo quruxda

Dabadeedna Subeer ayaa intuu Salma soo dhex-taagay Dukaan camiran ku yidhi Walaal ka qaado wixii aad alaab u baahantahay iyo wax kasta oo ku cajebiya oo ay naftaadu u baahan tahay laakiin Salma iskuma ay badin ee waxay qaadatay waxoogaa alaab ah oo ay hadiyad ahaan uga qaadatay lamaanahooda jacayl.

Goor ay damacsanyihiin inay suuqaba ka soo baxaan ayey Salma isha ku dhufatay dukaan aad u camiran oo iibiya alaabada ragga sida dharka, kabaha iwm., dabadeedna waxay tidhi walaal Subeerow igu leexi dukaanka Subeerow wuu ku soo leexiyey, dabadeedna Salma ayaa tidhi soo deg Subeerow, wuu soo degay, isaga oo yaaban oo leh Walaal Salmay maxaad dukaankan uga baahantahay, laakiin Salma ayaa ugu jawaabtay Walaal gudaha hore u soo gal anigaa kuu sheegayee.

Markii ay dukaankii gudaha hore u galeen ayey Salma tidhi Walaal Subeerow waxaan goaansaday inaan kuu iibiyo laba bed-ladood ama iskujoog oo dhar ah, markaa I tus nooca aad ka hesho, laakiin Subeer intuu si kalgacal ku dheehanyahay u milicsaday ayuu ku yidhi Walaal Salmay iska dhaaf maxaa kugu igbaaraya wax iibinta, illayn hadii aan marto u baahanahay lacag waan haystaa oo waan iibsan lahaaye.

Salma taa way ku gacan saydhay, waxayna tidhi Subeerow hadalka iska dhaafoo martaha ma xulanaysaa, mise anigaa kuu xula.

Dabadeedna Subeer wuxuu xushay hal iskujoog, halkii ee kalena Salma ayuu ka codsaday inay u xusho, wayna u xushay.

Subeer iyo Salma arrad iyo baahi wax uma iibsanayaan, laakiin tani waxay uga dhigan tahay hadiyado jacayl oo la is dhaafsanayo.

Dabadeedna markii la soo alaabo iibsi dhamaystay ayaa inta meel wax laga cabo cagta la soo mariyey wadada laydha la soo cabay, laakiin habeenkaa waxa magaalada ku daay roob ma hiigaan ah, taasina waxay Subeer iyo Salma u suurtagelin wayday inay marqudha cagta dhulka dhigaan, sidaa darteed baabuurkii ay wateen dushiisa ayey waqtiga intiisa badan ku qaateen.

Markii ay suuqii ka soo fanjeediyeen ayey sheeko is-galaabixiyeen.

Subeer ayaana sheekada bilaabay wuxuuna yidhi Walaal Salmay 13-ka bisha ayaanu reerkiinna u soo gole fadhiisanaynaa oo lagu waydiisanayaa, maalintaana waxa ka hadhay shan maalmood oo qudha markaa sidaa reerka u sii sheeg, adiguna digtoonii iyo di yaargarow waa inaad ku sii jirtaa.

Salma hore umay ogayn waqtiga kama dambaysta ah ee ay Subeer iyo aabihii u ballameen inay reerkooda u imanayaan, sidaa darteed intay farxad la riyaaqday ayey tidhi Alla Subeerow walaal maxaad taa iigu sheegi wayday, ma waxaad is tidhi hadii aad u sheegto farxad bay la muraaradilaacaysaa,

Subeer intuu si raxmadleh u qoslay ayuu yidhi Salmay in yar baa ka hadhay waqtigii aynu waxkasta ka arrinsan lahayn ama ka tashan ama isu sheegi lahayn Ama si walba isu xaal ogaan lahayn, markaa inoogu ducee nasiib wanaagsan iyo inay wax waliba inoogu dhamaadaan guul iyo khayr, waana inoo ayaamahan, isla markaana wixii hore inoola soo kulmay adna waa nasiibkaa anna waa ayaankay.

Salma, iyadoo dareen kal-gacal iyo xushmadi ku dheehantahay ku milicsanaysa mataankeeda jacayl ee Subeer ayey ku geeraartay heestan:

**Mar adoo iga dheerbaa,
qalbigu kuu
dhawaaqaa.**

Marna adiga oo dhow,

Indhuhu kaa dhergayn.

Mar anoo dhagi hurdada galay,

Haasaawaha kula dhig dhigay

**Sidaad iigu dheertahay
ma ruuxaan kula dhigaa jira.**

Sow dhuuxa iyo maad raacin dhiigaba

Bal dhankaaga qabo caashaq

**Yaanu dheeliyine
anigana I dhawr sida
curad la dhalay**

Aan dhool dhoolinee.

Salma marka ay geeraarkaa yar ku heesayso, waxay duljoogaan gurigoodii, dabadeedna Salma intay gaadhigii daaqadda iska furtay ayey si xushmad iyo ixtiraam leh u tidhi Walaal Subeerow isma ilowno, macasalaama iyo noolikulantee. Subeer waayahay walaal Salmay, koleyba hawsheenu kaabiga ayey saarantahay, maalmo yar ka dibna hadii eebe idmo kala hoyan-mayno ee waynu wada hoyanaynaa.

Marka uu Subeer weedhahan ku tiraabayo Salma daaqadda baabuurka oo furan ayey lugta kala sii degeysaa, laakiin intay hakatay ayey daymoonaysaa oo qoorta u soo jeedinaysa dhinaca Subeer, dbadeedna markuu Subeer hadalkaa yidhi ayey Salma farxad iyo riyaq daraadeed ilmo ka soo dareertay, wayna degtay oo waa la kala hoyday, iyadoo uu waqtigu yahay abaara 8:30-kii caweysnimo.

Subeer markii uu gurigoodii tegay wuxuu ugu tegay aabihii oo fadhiya daaradii guriga oo ay laydh aad u qaboobi ka dhacayso waana markii uu roobkii daay qaaday ka dib.

ayaa bariido la is dhaafsaday iyo qader sheeko ah, odayga ayaa Subeer u qadimay suaal wuxuuna yidhi Aabo Subeer, waxaad Berbera ku maqnayd muddo toban cisho ah, mudadaasna ismaynu arag, imana aynu waraysan laakiin markii aad guriga soo gashay ayaad markiiba deg-deg u baxday ee maxaa soo kordhay oo aad la carartay.

Subeer ayaa ku jawaabay Aabo waa runtaa oo inaga oo aan is arag, isna waraysan ayaan deg-deg u baxay, laakiin dhibi ma jirto, meel kalena maan qabanine, waxaan u tegay gabadhii aan guurka ka damacsanaa oo aan u sheegayey arimo yar-yar.

Odaygiibaa hadana yidhi Wiilkaygiyow, sowtaan ku idhi aabe qofkasta oo aad jeceshahay aniguna waan kula jecelahay, waana anigii kuu sheegay inaan diyaar kuu ahay wax kasta oo aad u baahan tahay inaan wax kaala qabto, laakiin maxaad wax iiga qarsataa

Subeer wuxuu hadana ku jawaabay Aabe horta iga raali ahaw, laakiin arrinta aan maanta ugu tegay gabadhaa ma ahayn wax weyn ee waxaanu tagnay Dukaamada dharka, waxayna ii soo iibisay maryahan aan tuurta ku sito, ta kale gabadhaasi aad bay kaaga xishootaa, wayna ku adagtahay inay

wejigaaga timaado xishood dartii, sidaa darteed bay uga warwareegtaa aragaaga.

Oday Dhamal Waan gartay laakiin goorma ayaad marka dambe la kulmaysaa Subeer: Aabo horta miyeynaan arrinta dhamaynayn, sowdiga og inay waqtigii aynu reerka la ballanay ka hadhsantahay shan maal-mood oo keliyi. Oday Dhamal: Aabo waan ogahay, waynuna u diyaar-garoobaynaa

Intaa markii ay is dhaafsadeen Dhamal iyo wiilkiisa Subeer ayey kala hoydeen, iyaga oo aan iska waraysan safarkii uu Subeer Berbera ku tegay iyo hawlihii uu ka soo qabtay. Waqtigu wuu isa soo gurayaa, sidaa darteed maalintii gole-fadhiisiga guurka Subeer loo ballamay, waxa la soo gaadhay maalin ay ka hadhsantahay labo cisho oo qudha, laakiin labadii reer mid waliba goonidiisa ayuu ka diyaargaroobay, guryihiin waxa lagu sameeyey qolof rid iyo rinjiyeyn, taas oo lagu sameeyey qurxin loogu diyaargaroobayo munaasibadda gole-fadhiisiga ee lagaga wada hadlayo guurka Subeer iyo gabadha uu doonayo ee Salma.

Subeer, waa nin gabdho badan la dhashay, sidaa darteed wixii hawl guriga looga baahnaa hablahaa qabtay, Subeerna hawli ma haysato, laakiin gabadhii Salma oo, iyadu keligeed reer gabadh iyo wiilba u ah naftaa ka baxday hawl daraadeed, waxaana hawsha diyaar-garowga gole-fadhiisigeeda u sii dheeraa qol cusub oo toddobaadkii uu dambeeyey lagu kordhiyey gurigooda, iyadoo qolkaa loogu talo galay maalinta la isu soo gole-fadhiisanayo inay fadhiistaan ragga wada hadlayaa.

Subeer iyo Salma marka laga yimaado hawsha lala wadaago, waxa kale oo uu mid waliba goonidiisa ugu jiraa diyaargarow gaar ah oo aroos, taas oo uu mid waliba ka shaqaynayo gurxinta jidhkiisa iyo hugiisa si ay u yeeshaan shacnigii iyo wanaagii lagu yiqiin dad aroos ah.

Waxa loo kal-tiriyoba waxa la soo gaadhay gelinkii hore ee maalintii ay ballanta golefadhiisigu ahayd.

Sidaa darteed oday Dhamal ayaa wiilkiisii Subeer subaxnimadii ku yidhi Aabo gabadha mar hadii aad heshiiseen ma ka wada hadasheen meherka. Subeer ayaa ku jawaabay

Aabo mayee kamaanu wada hadlin. Odaygii baa hadana yidhi Aabo waxa wanaagsan inaad arrinta meherka ka sii heshiisaan Si aanay hadhaw qarba qarbo idinku noqon.

Subeer, waayahayv aabe ayuu yidhi, dabadeedna goor barqadii ah ayuu Salma telefoon u diray wuxuuna Bariido ka dib ku yidhi Walaal Salmay sida aad ogtahay kulankii arrinteena ku saabsanaa ee loo ballamay waa maanta, laakiin waxa jirta arrin aynaan ka wada hadlin oo aan hadda uun xusuustay Salma oo yara naxsan oo hoosta iska waydiinaysa tolow, maxay ahayd arrinta weli qabyada ahi, sowdinkii wax walba hore u dhamaystay ayaa tidhi Walaal Subeerow maxay ahayd arrintaasi

Subeer wuxuu ku jawaabay Walaal wax kale maahee waxaynaan ka wada hadlin arrintii meherka, taas oo xiliga meherku dhacayo la ina waydiinayo aduunka meherkaagu inta uu yahay ioy ma ka heshiiseen.

Salma oo ka wer-wersanayd arrinta Subeer sheegayaa waxa ay tahay ayaa neefi ka soo booday waxayna tidhi Alla Subeerow walaal waaban naxay oo waxaan mooday inay dhibaato soo korodhay, ee hadii ay intaa tahay maxaad iga waydiinaysaa sowdiga og inaynu is-jecelnahay oo aynaan waxba isku diidanayn habayaraatee ama waxba isku xidhayn, taasna anigu wax sharuud ah kuma xidhayo habayaraatee ee maxaad ka yaabtay

Subeer: Walaal Salmay meherku waa qoddob shareeco ah, oo aan ku salaysnayn malo-awaal, sidaa darteed waa arrin u baahan in la sugo, waxna lagaga heshiiyo, iyadoo uu meherku yahay xaq ay gabadhu leedahay

sharciyan,markaa waa inay labada qof ee uu qofna meherka xaq u leeyahay, qofna laga doonayo wax kaga heshiiyaan, wuxuna noqdaan wax ay iskala raali yihiin, ta kale miyaadan ogayn inuu meherku yahay xaq aad adigu leedahay oo aan cidi kula lahayn goaankiisa, kaana qaadi karrin taladiisa iyo waxa aad ka damacdo inaad ka dhigato ama qabsato.

Salma, Waayahay walaal waan gartaye, hadda maxaynu yeelnaa adiga ayaaban kuu dhiibaye, maxaad odhan lahayd oo ay kula tahay illeyn waxba ma kala lihin, waxna kugu diidi maayee.

Subeer, wuxuu si aad kaftan moodo,laakiin run ah u yidhi Salmay anigu weligay maan guursane malaa adigaa taa igaga waayo aragsan oo igu dhaama taladeeda, laakiin hadii aan horta anigu dhaan-wadadayda iska rito, waxaan maqlijiray gabdhaha waxa lagu meheriyaa intii hooyadood lagu meheriyey ama soddoh-dood lagu meheriyey, balse hadii eebe idmo oo ay arrinteenu dhamaato adigu soddoh ma lihid oo Alla ha u naxariistee aniga hooyaday waa dhimatay, laakiin waxa nool hooyadaa ee sidee bay kuugu muuqataa hadii aad telefoonka yara dhigato oo aad si farsameysan hooyo u soo waydiiso adduunkii lagu meheriyey.

Salma intay tidhi I sug ayey telefoonkii deg-deg u dhigtay ka dibna intay hooyadeed u tagtay ayey ku tidhi Hooyo weligay kumaan waydiine iga raali ahow, oo waxaan ku waydiiyey aduun intee leeg buu aabahay kugu mehersaday markii aad isguursateen .Salma kuma ay degdegteen suaashaa noocaas ah inay hooyadeed waydiiso, laakiin waxay ahaayeen labo qof oo is dhalay, hadana saaxiib ah, waayo maadaama ay Ruun wax ubad ah Salma oo keliya dhashay, Salmana ay hooyadeed jeceshahay, keligoodna ay weligood guriga ku wada noolaayeen waxay mararka qaarkood u sheekaysan jireen ama u kaftamijireen sidii labo qof oo saabiix ah.

Ta kale hooyo Ruun waxay ahayd qof dhaqanka taqaan oo arrintaana fahamsan, Sidaa awgeed hooyo Ruun may dhibsan ama lama yaabin suaasha ay gabadheedu waydiisay, wayna uga jawaabtay markiiba, waxayna ku tidhi Hooyo anigu waxa la igu meheriye 20 Tul-dood oo geel ah, laakiin waxaan ku waydiiyey maxaad maanta suaashan ku keentay.

Salma waxay ku jawaabtay Hooyo wiilkii aanu isguursan lahayn ayaanu ka doodnay meherkaygu waxa uu noqonayo, maadaama maanta arrintayada ay labada reer isugu gole-fadhiisanayaan, markii aanu taa wax iska waydiinayna waxaanu tixraacanay waxyaalihii dadkeena dhaqanka u ahaan jiray marka ay is guursanayaan, taas oo la yidhi gabadha marka la guursanayo waxa lagu meherin jiray inta hooyadeed ama soddoh-deed lagu meheriyey, sababtaa ayaana keentay inaan suaashaa kuu waydiiyo hooyo gacaliso.

Hooyo Ruun ayaa hadana tidhi Waan gartay, sida aad sheegtayna waa wax jiri jiray ama hadaba jira dhaqan ahaan.

Dabadeed Salma intay telefoonkii oo goorahanba is bar-bar yaalay ku noqotay ayey Subeer ku tidhi: Walaal Subeerow hooyo waan waydiiyey suaashii, waxayna ii sheegtay in lagu meheriyey 20 hallaad oo geel ah.

Subeer dood kama keenin, wuxuuna yidhi: Waayahay walaal sidaa ayaa inoo ballan ah, waana inoo maanta iyo kulankii loo ballamay.

Sheekadii xiisaha lahayd ee mudada dheer inoo socotay waxay ku soo gebogeboowday aakhirii in Salma iyo Subeer ay is calfadaan oo ay qoys is jecel noqdaan.

Dhamaad